

INCIPIT LIBER JEREMIÆ PROPHETÆ



# Contents



# INCIPIT LIBER JEREMIAE PROPHETAE

1 Verba Jeremiae filii Helciae, de sacerdotibus qui fuerunt in Anathoth, in terra Benjamin. <sup>1</sup> <sup>2</sup> Quod factum est verbum Domini ad eum in diebus Josiae filii Amon, regis Juda, in tertio decimo anno regni ejus. <sup>2</sup> <sup>3</sup> Et factum est in diebus Joakim filii Josiae, regis Juda, usque ad consummationem undecimi anni Sedeciae, filii Josiae, regis Juda, usque ad transmigrationem Jerusalem, in mense quinto. <sup>4</sup> Et factum est verbum Domini ad me, dicens: <sup>5</sup> [Priusquam te formarem in utero, novi te, et antequam exires de vulva, sanctificavi te, et prophetam in gentibus dedi te.] <sup>3</sup> <sup>6</sup> Et dixi: [A, a, a, Domine Deus, ecce nescio loqui, quia puer ego sum.] <sup>4</sup> <sup>7</sup> Et dixit Dominus ad me: [Noli dicere: Puer sum: quoniam ad omnia quae mittam te ibis, et universa quaecumque mandavero tibi loqueris. <sup>8</sup> Ne timeas a facie eorum, quia tecum ego sum ut eruam te, dicit Dominus.] <sup>9</sup> Et misit Dominus manum suam, et tetigit os meum, et dixit Dominus ad me: [Ecce dedi verba mea in ore tuo: <sup>5</sup> <sup>10</sup> ecce constitui te hodie super gentes et super regna, ut evellas, et destruas, et disperdas, et dissipas, et aedifices, et plantes.] <sup>11</sup> Et factum est verbum Domini ad me, dicens: [Quid tu vides, Jeremia?] Et dixi: [Virgam vigilantem ego video.] <sup>6</sup> <sup>12</sup> Et dixit Dominus ad me: [Bene vidisti: quia vigilabo ego super verbo meo, ut faciam illud.] <sup>13</sup> Et factum est verbum Domini secundo ad me, dicens: [Quid tu vides?] Et dixi: [Ollam succensam ego video, et faciem ejus a facie aquilonis.] <sup>7</sup> <sup>14</sup> Et dixit Dominus ad me:

<sup>1</sup> + **1.1 Praefatio** Hæc interpretatio Hieronymi est. Si quid in ea moverit, secundum Hebræos codices exploretur. Alia est Septuaginta interpretum Ecclesiis usitata: quæ, quamvis nonnulla aliter habeat quam in Hebræis codicibus invenitur, tamen utraque, id est secundum Septuaginta et secundum Hebræam, apostolica auctoritate firmata est. Non errore neque reprehensione superiori, sed certo consilio Septuaginta nonnulla aliter dixisse vel contexisse intelliguntur. Quod ideo præmonemus, ne quisquam alteram ex altera velit emendare: quod singulorum in suo genere veritas observanda est. Argumentum Incipit Jeremias Anathotites, qui est viculus tribus a Hierosolymis distans millibus, apud Thamnas in Ægypto a populo lapidibus obrutus occubuit. Jacet vero in eo loco sepultus, quo dudum Pharaon rex habitaverat. Et quoniam postulatione sua defugatis ab eodem loco serpentibus, Ægyptios a tactu aspidum facit esse securos, magna eum ibi religione Ægyptii venerantur. Verba Jeremiae. HIER. LXX: Verbum Dei, quia verba Jeremiae verbum Domini est.

<sup>2</sup> + **1.2 In diebus**, etc. ID. Mirabilis Dei clementia. Jam captivitate vicina, et Babylonio exercitu vallante Jerusalem, nihilominus populum ad poenitentiam vocat, mallens servare conversos quam perdere delinquentes.

<sup>3</sup> + **1.5 Priusquam te**. Non quod ante conceptionem fuerit, ut hæretici suspicantur; sed quia præscivit eum Dominus futurum, cui facienda jam facta sunt; qui vocat ea quæ non sunt tanquam ea quæ sunt.

<sup>4</sup> + **1.6 A, a, a, Domine Deus**. Detestatur officium quod pro ætate non potest sustinere. Eadem verecundia, qua Moyses gracilis et tenuis vocis se esse dicit; sed ille quasi magnæ et robustæ ætatis corripitur, quasi puero huic venia datur, qui verecundia et pudore decoratur.

<sup>5</sup> + **1.9 Et misit**, etc. ID. Notandum quod hic manus Dei mittitur, etc., usque ad ut confidentiam accipiat prædicandi. ID. Quatuor tristibus duo læta succedunt, etc., usque ad et propinare jubetur omnibus nationibus.

<sup>6</sup> + **1.11 Virgam vigiliarum**. ID. Virga vigiliarum, etc., usque ad resurrectione Domini floruisse narratur.

<sup>7</sup> + **1.13 Et factum est**. Gradatim peccantes corripuntur; qui noluerunt, percutiente virga,

[Ab aquilone pandetur malum super omnes habitatores terræ: <sup>8</sup> <sup>15</sup> quia ecce ego convocabo omnes cognationes regnorum aquilonis, ait Dominus: et venient, et ponent unusquisque solium suum in introitu portarum Jerusalem, et super omnes muros ejus in circuitu, et super universas urbes Juda: <sup>16</sup> et loquar judicia mea cum eis super omnem malitiam eorum qui dereliquerunt me, et libaverunt diis alienis, et adoraverunt opus manuum suarum. <sup>17</sup> Tu ergo, accinge lumbos tuos, et surge, et loquere ad eos omnia quæ ego præcipio tibi. Ne formides a facie eorum, nec enim timere te faciam vultum eorum. <sup>9</sup> <sup>18</sup> Ego quippe dedi te hodie in civitatem munitam, et in columnam ferream, et in murum æreum, super omnem terram, regibus Juda, principibus ejus, et sacerdotibus, et populo terræ. <sup>10</sup> <sup>19</sup> Et bellabunt adversum te, et non prævalebunt, quia ego tecum sum, ait Dominus, ut liberem te.]

2Et factum est verbum Domini ad me, dicens: <sup>2</sup> [Vade, et clama in auribus Jerusalem, dicens: Hæc dicit Dominus: Recordatus sum tui, miserans adolescentiam tuam, et caritatem desponsationis tuæ, quando secuta es me in deserto, in terra quæ non seminatur. <sup>11</sup> <sup>3</sup> Sanctus Israël Domino, primitiæ frugum ejus: omnes qui devorant eum delinquent: mala venient super eos, dicit Dominus. <sup>12</sup> <sup>4</sup> Audite verbum Domini, domus Jacob, et omnes cognationes domus Israël. <sup>13</sup> <sup>5</sup> Hæc dicit Dominus: Quid invenerunt patres vestri in me iniquitatis, quia elongaverunt a me, et ambulaverunt post vanitatem, et vani facti sunt? <sup>14</sup> <sup>6</sup> Et non dixerunt: Ubi est Dominus qui ascendere nos fecit de terra Ægypti; qui traduxit nos per desertum, per terram inhabitabilem et inviam, per terram sitis, et imaginem mortis, per terram in qua non ambulavit vir, neque habitavit homo? <sup>15</sup> <sup>7</sup> Et induxi vos in terram Carmeli, ut comederetis fructum ejus et optima illius: et ingressi

---

corrige vel emendari, mittuntur in ollam succensam, de qua plenius Ezechiel. Ollam succensam. Hinc Dominus ad Job dicit, etc., usque ad sed hæc violenta et prava interpretatio est.

<sup>8</sup> + **1.14 Habitatores terræ.** De quibus in Apocalypsi, etc., usque ad et Petrus: Electis advenis Ponti, Galatiæ, Cappadociæ, Asiæ et Bithyniæ.

<sup>9</sup> + **1.17 Tu ergo accinge,** etc. ID. Job quoque præcipitur, etc., usque ad sed civitatem totam quæ super montem posita latere non potest.

<sup>10</sup> + **1.18 Et in columnam.** De qua Apostolus: Columna et firmamentum veritatis I Tim.. Et Petrus et Jacobus et Joannes qui putabantur esse columnæ Ecclesiæ, et Paulo et Barnabæ dederunt dexteram communionis. Regibus Juda. ID. Si quando reges Juda, etc., usque ad in Domino speret ut vincat.

<sup>11</sup> + **2.2 Adolescentiam.** HIER. Plenius hoc in Ezechiele legitur ubi sibi Dominus Jerusalem matrimonio copulat, et sub persona uxoris, suis jungit amplexibus. Sive ut ardentiorum monstret affectum, puellam eam et desponsatam vocat. Quo enim nondum potiti sumus, ardentius appetimus.

<sup>12</sup> + **2.3 Omnes qui devorant.** HIER. Sicut qui primitias devorant, etc., usque ad primitiæ debentur sacerdotibus, non hostibus.

<sup>13</sup> + **2.4 Israël.** ID. Utrumque nomen ponitur, Jacob et Israël, non secundum duas et decem tribus, sed juxta omnem populum, cum ipse Jacob postea dictus sit Israël.

<sup>14</sup> + **2.5 Quid invenerunt patres.** Offensam dicit Deus a patribus factam, non quod peccata patrum filiis imputentur, sed quia filii habentes similitudinem patrum, et suo et parentum scelere puniuntur. Propter sanctos patres filiorum miseretur Deus.

<sup>15</sup> + **2.6 Neque habitavit homo.** ID. Qui semper ad majora festinat, etc., usque ad sed certamen et incertus exitus futurorum.

contaminastis terram meam, et hæreditatem meam posuistis in abominationem. <sup>16</sup> <sup>8</sup> Sacerdotes non dixerunt: Ubi est Dominus? et tenentes legem nescierunt me, et pastores prævaricati sunt in me, et prophetæ prophetaverunt in Baal, et idola secuti sunt. <sup>9</sup> Propterea adhuc iudicio contendam vobiscum, ait Dominus, et cum filiis vestris disceptabo. <sup>10</sup> Transite ad insulas Cethim, et videte: et in Cedar mittite, et considerate vehementer: et videte si factum est hujuscemodi: <sup>17</sup> <sup>11</sup> si mutavit gens deos suos, et certe ipsi non sunt dii: populus vero meus mutavit gloriam suam in idolum. <sup>18</sup> <sup>12</sup> Obstupescite, cæli, super hoc, et portæ ejus, desolamini vehementer, dicit Dominus. <sup>19</sup> <sup>13</sup> Duo enim mala fecit populus meus: me dereliquerunt fontem aquæ vivæ, et foderunt sibi cisternas, cisternas dissipatas, quia continere non valent aquas. <sup>20</sup> <sup>14</sup> Numquid servus est Israël, aut vernaculus? quare ergo factus est in prædam? <sup>15</sup> Super eum rugierunt leones, et dederunt vocem suam: posuerunt terram ejus in solitudinem. Civitates ejus exustæ sunt, et non est qui habitet in eis. <sup>21</sup> <sup>16</sup> Filii quoque Mempheos et Taphnes constupraverunt te usque ad verticem. <sup>22</sup> <sup>17</sup> Numquid non istud factum est tibi, quia dereliquisti Dominum Deum tuum eo tempore quo ducebat te per viam? <sup>18</sup> Et nunc quid tibi vis in via Ægypti, ut bibas aquam turbidam? et quid tibi cum via Assyriorum, ut bibas aquam fluminis? <sup>19</sup> Arguet te malitia tua, et aversio tua increpabit te. Scito et vide quia malum et amarum est reliquisse te Dominum Deum tuum, et non esse timorem mei apud te, dicit Dominus Deus exercituum. <sup>23</sup> <sup>20</sup> A sæculo confregisti jugum meum: rupisti vincula mea, et dixisti: Non serviam. In omni enim colle sublimi, et sub omni ligno frondoso, tu prosternebaris meretrix. <sup>24</sup> <sup>21</sup> Ego autem plantavi te vineam electam, omne semen verum:

<sup>16</sup> + **2.7 Et induxi vos**, quasi diceret: Pro labore durissimi itineris, etc., usque ad et hæreditatem illius abominabilem facimus.

<sup>17</sup> + **2.10 Cethim**. ID. Cethim, vel Italiæ scilicet, vel occidentalium partium, quia Judææ Cyprus insula, in qua urbs hujus nominis vicina est, de qua Zeno princeps Stoicorum. Et considerate. ID. Possumus contra eos hoc dicere, qui majori studio sequuntur vitia quam virtutes, quibus dicitur: Humanum dico propter infirmitatem carnis vestræ; sicut exhibuistis membra vestra servire immunditiæ et iniquitati ad iniquitatem Rom. 6., etc.

<sup>18</sup> + **2.11 Populus meus**. Velut anthropophormitæ, qui occasione hujus testimonii: Faciamus hominem ad imaginem et similitudinem Gen. 1., immensam et simplicem divinitatis substantiam lineamentis nostris et humana figuratione compositam pertinaciter contendunt.

<sup>19</sup> + **2.12 Obstupescite, cæli**. ID. LXX: Obstupuit cælum, etc., usque ad et tam cæli quam cælum eodem dicuntur nomine, ut Thebæ, Athenæ.

<sup>20</sup> + **2.13 Me dereliquerunt**. Qui præceptum dedi dicens: Ego sum Dominus Deus tuus qui eduxi te de terra Ægypti. Et secundum quod in eodem loco scriptum est: Non sint tibi dii alieni in conspectu meo, pro quo secutus est dæmones. Fontem aquæ vivæ. ID. Fons perpetuus est et vitales habet aquas. Cisternæ et lacus de torrentibus et aquis turbidis complentur impluviis.

<sup>21</sup> + **2.15 Nunquid servus**. ID. Ex hoc loco Judæ in superbiam elati, etc., usque ad Maledictus Chanaam, servus erit fratribus suis Gen. 9.. Leones. Secundum anagogen, leones intelligimus, etc., usque ad Omnes adulterantes quasi clibanus corda eorum Osee 7..

<sup>22</sup> + **2.16 Usque ad verticem**. Secundum illud: A planta pedis usque ad verticem, etc., usque ad qui puritatem Ecclesiæ sua polluunt turpitudine.

<sup>23</sup> + **2.19 Arguet te malitia tua**. ID. Nota quod malitia et prævaricatio, etc., usque ad quia dereliquit Dominum Deum suum.

<sup>24</sup> + **2.20 A sæculo confregisti**. ID. Potest hoc ad eum dici, etc., usque ad et faciunt divaricare pedes suos omni transeunti.

quomodo ergo conversa es mihi in pravum, vinea aliena? <sup>25</sup> <sup>22</sup> Si laveris te nitro, et multiplicaveris tibi herbam borith, maculata es in iniquitate tua coram me, dicit Dominus Deus. <sup>26</sup> <sup>23</sup> Quomodo dicis: Non sum polluta; post Baalim non ambulavi? Vide vias tuas in convalle; scito quid feceris: cursor levis explicans vias suas. <sup>27</sup> <sup>24</sup> Onager assuetus in solitudine, in desiderio animæ suæ attraxit ventum amoris sui: nullus avertet eam: omnes qui quærunt eam non deficient: in menstruis ejus invenient eam. <sup>25</sup> Prohibe pedem tuum a nuditate, et guttur tuum a siti. Et dixisti: Desperavi: nequaquam faciam: adamavi quippe alienos, et post eos ambulabo.] <sup>28</sup> <sup>26</sup> [Quomodo confunditur fur quando deprehenditur, sic confusi sunt domus Israël, ipsi et reges eorum, principes, et sacerdotes, et prophetæ eorum, <sup>27</sup> dicentes ligno: Pater meus es tu: et lapidi: Tu me genuisti. Verterunt ad me tergum et non faciem, et in tempore afflictionis suæ dicent: Surge, et libera nos. <sup>29</sup> <sup>28</sup> Ubi sunt dii tui quos fecisti tibi? surgant, et liberent te in tempore afflictionis tuæ: secundum numerum quippe civitatum tuarum erant dii tui, Juda. <sup>30</sup> <sup>29</sup> Quid vultis mecum iudicio contendere? omnes dereliquistis me, dicit Dominus. <sup>31</sup> <sup>30</sup> Frustra percussi filios vestros: disciplinam non receperunt. Devoravit gladius vester prophetas vestros: quasi leo vastator <sup>32</sup> <sup>31</sup> generatio vestra. Videte verbum Domini: numquid solitudo factus sum Israël, aut terra serotina? quare ergo dixit populus meus: Recessimus; non veniemus ultra ad te? <sup>33</sup> <sup>32</sup> Numquid obliviscetur virgo ornamenti sui, aut sponsa fasciæ pectoralis suæ? populus vero meus oblitus est mei diebus innumeris. <sup>34</sup> <sup>33</sup> Quid niteris bonam ostendere viam tuam ad quærendam dilectionem, quæ insuper et malitias tuas docuisti vias tuas, <sup>34</sup> et in alis tuis inventus est sanguis animarum pauperum et innocentum? non in

<sup>25</sup> + **2.21 Vineam electam.** In Hebræo, soresh, quod genus est vitis optimæ, de cujus sarculo plantavit Israël, et miratur quomodo semen verum et electa vinea in amaritudinem versa facta sit aliena. Quomodo ergo conversa es? Nullus securus sit si plantatio, etc., usque ad si permanserit in eo quod plantata est.

<sup>26</sup> + **2.22 Borith.** ID. Ipsum Hebræum. LXX vero herbam fullonum, quæ in Palæstina in humidis et virentibus nascitur locis, et ad lavandas sordes eandem vim habet quam et nitrum.

<sup>27</sup> + **2.23 Vide vias tuas,** id est respice convallem filiorum Ennon, quæ Silcæ fontibus irrigatur, ibi cernes delubrum Baal, quem relicto Deo coluisti.

<sup>28</sup> + **2.25 Prohibe pedem tuum.** Pascha facturi, etc., usque ad quæ deberent evangelico pede calcari et conteri.

<sup>29</sup> + **2.27 Verterunt. Projicientes sermones meos retrorsum.** Quando enim magister præcipit, etc., usque ad sed tumorem animi indicant gestu corporis.

<sup>30</sup> + **2.28 Secundum numerum.** Vel eosdem, vel diversos, singulæ civitates colebant deos, ut nec in impietate viderentur habere consensum; sed pugnans contra se superstitio, errorem sequeretur diversum.

<sup>31</sup> + **2.29 Quid vultis?** Prona est ad excusationem sui humana perversitas: et quod merito sustinet, sibi injuste videtur sustinere.

<sup>32</sup> + **2.30 Filios vestros.** Ut plagis filiorum disceretis, quod austeriori curandi essetis medicamine, et ne forsitan diceretis, peccantes corripere noluisti.

<sup>33</sup> + **2.31 Videre verbum Domini.** Moyses videbat vocem Domini. Et Joannes apostolus verbum Dei se vidisse et attraxisse dicit.

<sup>34</sup> + **2.32 Nunquid obliviscetur?** ID. Ornamentum suum perdit qui a Domino recedit, et intelligentiam doctrinæ, quæ significatur in pectore: Unde, Joannes supra pectus Domini in cœna recubuit Joan. 13., et sacerdotibus inter cætera servatur pectusculum victimarum.



fossis inveni eos, sed in omnibus quæ supra memoravi. <sup>35</sup> <sup>35</sup> Et dixisti: Absque peccato et innocens ego sum, et propterea avertatur furor tuus a me. Ecce ego iudicio contendam tecum, eo quod dixeris: Non peccavi. <sup>36</sup> <sup>36</sup> Quam vilis facta es nimis, iterans vias tuas ! et ab Ægypto confunderis, sicut confusa es ab Assur. <sup>37</sup> <sup>37</sup> Nam et ab ista egredieris, et manus tuæ erunt super caput tuum: quoniam obrivit Dominus confidentiam tuam, et nihil habebis prosperum in ea.] <sup>38</sup>

3[Vulgo dicitur: Si dimiserit vir uxorem suam, et recedens ab eo duxerit virum alterum, numquid revertetur ad eam ultra? numquid non polluta et contaminata erit mulier illa? Tu autem fornicata es cum amatoribus multis: tamen revertere ad me, dicit Dominus, et ego suscipiam te. <sup>39</sup> <sup>2</sup> Leva oculos tuos in directum, et vide ubi non prostrata sis. In viis sedebas, exspectans eos quasi latro in solitudine: et polluisti terram in fornicationibus tuis, et in malitiis tuis. <sup>40</sup> <sup>3</sup> Quam ob rem prohibita sunt stillæ pluviarum, et serotinus imber non fuit. Frons mulieris meretricis facta est tibi; noluisti erubescere. <sup>41</sup> <sup>4</sup> Ergo saltem amodo voca me: Pater meus, dux virginitatis meæ tu es: <sup>42</sup> <sup>5</sup> numquid irasceris in perpetuum, aut perseverabis in finem? ecce locuta es, et fecisti mala, et potuisti.] <sup>6</sup> Et dixit Dominus ad me in diebus Josiæ regis: [Numquid vidisti quæ fecerit aversatrix Israël? Abiit sibimet super omnem montem excelsum, et sub omni ligno frondoso, et fornicata est ibi. <sup>43</sup> <sup>7</sup> Et dixi, cum fecisset hæc omnia: Ad me revertere: et

<sup>35</sup> + **2.34 In omnibus.** Istis, sive sub omni quercu alia littera; Hebræum enim et quercum et ista significat. In amœnis autem locis, umbra et frondibus immolabant.

<sup>36</sup> + **2.35 Et dixisti.** His utendum est apud eos, etc., usque ad non lugere, sed excusationes prætere. Ecce ego iudicio. ID. Audiatur hæresis nova ex veteri, iram Dei esse vel maximam, nolle peccatum humiliter confiteri, sed impudenter jactare justitiam.

<sup>37</sup> + **2.36 Et ab Ægypto.** Ut Ægyptiorum impetum, etc., usque ad increpantur ergo quia, relicto Deo, spem in hominibus ponunt.

<sup>38</sup> + **2.37 Super caput tuum.** ID. More lugentium, ut Thamar ab Amnon corrupta cinere caput sparsit, et manus supra posuit, et ita reversa est in domum suam.

<sup>39</sup> + **3.1 Vulgo dicitur: si dimiserit.** Ecce de fornicata et relicta muliere, etc., usque ad quanto contemptus adhuc vocare non dedignatur. Si dimiserit vir. HIER. Hoc dicere possumus adversus eos, qui fidem Domini relinquentes et hæreticorum erroribus irretiti post multas fornicationes et deceptionem suarum animarum, simulant se reverti ad pristinam veritatem, non ut deponant venena pectoris, sed ut insinuent aliis. Tu autem fornicata es. Sive: Habuisti pastores multos in offensionem tui, ut Deum scilicet offenderes; et qui magistri esse debuerant, ut alios ab omni errore prohiberent, auctores impietatis exstiterunt. Tamen revertere. Si revertearis ad me, dicit Dominus. Arguit impudentiam meretricis, quæ post adulterium audet reverti ad virum.

<sup>40</sup> + **3.2 Leva oculos tuos.** Juxta anagogen: His qui hæreticos errores deserere se promittunt, præcipitur ut levant oculos in directum. Nisi enim recta viderint, pristinam pravitatem damnare non possunt. Quasi latro. Sicut solent latrones ad vesperam, etc., usque ad et descendantibus de Jerusalem in Jericho obsidet vias.

<sup>41</sup> + **3.3 Frons mulieris.** ID. Hoc possumus dicere de hæreticis qui in erroribus suis gloriantur. Quia supra dixit: non peccavi, arguit eam ut mulierem procacem quæ ad nullum declinare erubescit.

<sup>42</sup> + **3.4 Dux virginitatis meæ tu es. Nunquid irasceris in perpetuum,** etc., usque ad tanto miserior meretrix quæ non vult recipere sanitatem.

<sup>43</sup> + **3.6 Nunquid vidisti quæ fecerit?** ID. Facit comparisonem, etc., usque ad et hoc est quod dicit: Nunquid vidisti quæ fecerit? Adversatrix Israël. ID. Sub figura duarum sororum

non est reversa. Et vidit praevaricatrix soror ejus Juda <sup>44</sup> <sup>8</sup> quia pro eo quod mœchata esset aversatrix Israëli, dimissem eam, et dedissem ei libellum repudii: et non timuit praevaricatrix Juda soror ejus, sed abiit, et fornicata est etiam ipsa: <sup>9</sup> et facilitate fornicationis suae contaminavit terram, et mœchata est cum lapide et ligno: <sup>10</sup> et in omnibus his non est reversa ad me praevaricatrix soror ejus Juda in toto corde suo, sed in mendacio, ait Dominus.] <sup>11</sup> Et dixit Dominus ad me: Justificavit animam suam aversatrix Israëli, comparatione praevaricatricis Judae. <sup>45</sup> <sup>12</sup> Vade, et clama sermones istos contra aquilonem, et dices: [Revertere, aversatrix Israëli, ait Dominus, et non avertam faciem meam a vobis, quia sanctus ego sum, dicit Dominus, et non irascar in perpetuum. <sup>46</sup> <sup>13</sup> Verumtamen scito iniquitatem tuam, quia in Dominum Deum tuum praevaricata es, et dispersisti vias tuas alienis sub omni ligno frondoso, et vocem meam non audisti, ait Dominus. <sup>47</sup> <sup>14</sup> Convertimini, filii revertentes, dicit Dominus, quia ego vir vester: et assumam vos unum de civitate, et duos de cognatione, et introducam vos in Sion. <sup>48</sup> <sup>15</sup> Et dabo vobis pastores juxta cor meum, et pascent vos scientia et doctrina. <sup>16</sup> Cumque multiplicati fueritis, et creveritis in terra in diebus illis, ait Dominus, non dicent ultra: Arca testamenti Domini: neque ascendet super cor, neque recordabuntur illius, nec visitabitur, nec fiet ultra. <sup>49</sup> <sup>17</sup> In tempore illo vocabunt Jerusalem solium Domini: et congregabuntur ad eam omnes gentes in nomine Domini in Jerusalem, et non ambulabunt post pravitatem cordis sui pessimi. <sup>50</sup> <sup>18</sup> In diebus illis ibit domus Juda ad domum Israëli, et venient simul de terra aquilonis ad terram quam dedi patribus vestris. <sup>51</sup> <sup>19</sup> Ego autem dixi: Quomodo ponam te in filios, et tribuam tibi terram desiderabilem, hæreditatem præclaram exercituum gentium? Et dixi: Patrem vocabis me, et post me ingredi non cessabis. <sup>52</sup> <sup>20</sup> Sed quomodo si contemnat mulier amatorem suum, sic contempsit me domus

---

loquitur quæ de una stirpe Abrahæ, Isaac et Jacob, sunt generatæ. Priorem adversatricem vocat, quæ statuit in Dan et in Bethel vitulos aureos.

<sup>44</sup> + **3.7 Et vidit.** ID. Aliorum tormenta, aliorum remedia sunt, etc., usque ad et ad zelum et æmulationem Domini collocatum.

<sup>45</sup> + **3.11 Justificavit animam.** Justificata est Sodoma soror tua ex te. Et alibi: Descendit hic justificatus in domum suam ab illo Luc. 18..

<sup>46</sup> + **3.12 Et non avertam faciem.** Unde: Averte faciem tuam Psal. 50., etc., usque ad de quibus vere dicitur: Qui devorant populum meum sicut escam panis.

<sup>47</sup> + **3.13 Verumtamen scito.** Quasi dicat, cum misertus fuero tui, non te justum putes; sed semper memento iniquitatis tuæ et superbix colla dimitte, ut qui per arrogantiam offendisti, per humilitatem placare Deum possis.

<sup>48</sup> + **3.14 Convertimini.** HIER. Judæi putant hoc completum esse, etc., usque ad Nisi Dominus sabaoth reliquisset nobis semen, sicut Sodoma essemus, et similes Gomorrhæ fuissetis Rom. 9..

<sup>49</sup> + **3.16 Cumque multiplicati fueritis.** ID. Alii hoc ad finem temporum referunt, etc., usque ad sed spiritualem cibum sectabuntur.

<sup>50</sup> + **3.17 Vocabunt.** Qui olim dicebant, Qui sedes super Cherubim, manifestare Psal. 79., etc. Inter duo Cherubim in propitiatorio Domini majestas apparebat, et loquebatur Moysi et sacerdotibus, sed modo aliter tempore fidei.

<sup>51</sup> + **3.18 In diebus illis.** Hoc proprie in Christi adventu completur, cum duodecim tribus simul Evangelio credunt, et terram aquilonis relinquunt et diaboli imperium.

<sup>52</sup> + **3.19 In filios.** HIER. i In numero filiorum qui de gentibus crediderunt. Quotquot enim receperunt eum, dedit eis potestatem filios Dei fieri Joan. 1..

Israël, dicit Dominus. <sup>53</sup> <sup>21</sup> Vox in viis audita est, ploratus et ululatus filiorum Israël: quoniam iniquam fecerunt viam suam; obliti sunt Domini Dei sui. <sup>54</sup> <sup>22</sup> Convertimini, filii revertentes, et sanabo aversiones vestras. Ecce nos venimus ad te: tu enim es Dominus Deus noster. <sup>55</sup> <sup>23</sup> Vere mendaces erant colles, et multitudo montium: vere in Domino Deo nostro salus Israël. <sup>24</sup> Confusio comedit laborem patrum nostrorum ab adolescentia nostra: greges eorum, et armenta eorum, filios eorum, et filias eorum. <sup>25</sup> Dormiemus in confusione nostra, et operiet nos ignominia nostra: quoniam Domino Deo nostro peccavimus nos, et patres nostri, ab adolescentia nostra usque ad diem hanc: et non audivimus vocem Domini Dei nostri.] <sup>56</sup>

4[Si reverteris, Israël, ait Dominus, ad me convertere: si abstuleris offendicula tua a facie mea, non commoveberis. <sup>57</sup> <sup>2</sup> Et jurabis: Vivit Dominus in veritate, et in iudicio, et in justitia: et benedicent eum gentes, ipsumque laudabunt. <sup>58</sup> <sup>3</sup> Hæc enim dicit Dominus viro Juda et Jerusalem: Novate vobis novale, et nolite serere super spinas. <sup>4</sup> Circumcidimini Domino, et auferte præputia cordium vestrorum, viri Juda, et habitatores Jerusalem: ne forte egrediatur ut ignis indignatio mea, et succendatur, et non sit qui extinguat, propter malitiam cogitationum vestrarum.] <sup>5</sup> [Annuntiate in Juda, et in Jerusalem auditum facite: loquimini, et canite tuba in terra, clamate fortiter, et dicite: Congregamini, et ingrediamur civitates munitas. <sup>6</sup> Levate signum in Sion; confortamini, nolite stare: quia malum ego adduco ab aquilone, et contritionem magnam. <sup>7</sup> Ascendit leo de cubili suo, et prædo gentium se levavit: egressus est de loco suo ut ponat terram tuam in solitudinem: civitates tuæ vastabuntur, remanentes absque habitatore. <sup>59</sup> <sup>8</sup>

<sup>53</sup> + **3.20 Mulier amatorem.** ID Semel mista, videns eum, etc., usque ad contempsit Dominum Salvatorem, in perniciem suam.

<sup>54</sup> + **3.21 Vox in viis audita est.** Libenter suscipit Dominus pœnitentem, occurrit filio inopia et squalore confecto, pristinis vestibus induit, gratiam reddit revertenti, si tamen cum ploratu et ululatu redeat ad patrem.

<sup>55</sup> + **3.22 Aversiones vestras.** Alii conversiones: quamvis propria voluntate ad eum convertamur, nisi tamen ille nos traxerit, et cupiditatem nostram suo præsidio corroboraverit, non possumus esse salvi. Intelligimus, et de populo Judæorum ad eum revertente, et de hæreticis qui Dominum dereliquerunt.

<sup>56</sup> + **3.25 Dormiemus.** Vox Israël, qui Deum suum non audivit et hæretici pœnitentis. Pars enim est salutis peccata nosse et confiteri; unde: Dic tu prius iniquitates tuas, ut justificeris Ibid..

<sup>57</sup> + **4.1 Si reverteris.** HIER. Septuaginta: Si conversus fuerit Israël, ait Dominus, ad me convertatur. Alia littera, converteris, id est, si salutem desideras, et te peccasse dicis, plene convertere, id est, quem negasti crede. Si abstuleris. Patet, quia quando movemur et dicimus: Mei autem pene moti sunt pedes, pene effusi sunt gressus mei Psal. 72.. Non ex imbecillitate naturæ hoc patimur, sed quia contra Deum offendicula et idola nostra ponimus.

<sup>58</sup> + **4.2 Et jurabis, vivit,** etc. ID. In suggillationem, scilicet mortuorum deorum, per quos jurat omnis idololatra. Novate. ID. Eradicando vepres et sentes, etc., usque ad non potest animus ærumnis mundi plenus semen Dei suscipere et fructum facere. Circumcidimini. ID. Viro Juda et habitatoribus Jerusalem præcipitur, ut deserant occidentem litteram, et sequantur vivificantem spiritum. Ne forte. ID. Monet et prædicat, ne facere compellatur quæ in Ninivitis probamus, quibus est prædicta sententia, ut imminentem furorem declinarent pœnitentia.

<sup>59</sup> + **4.7 Ascendit leo.** HIER. Si quis fautor est aut auctor perversorum dogmatum, de eo potest dici, ascendit leo de cubili suo, etc. Et prædo. De quo dicitur, Omnium inimicorum suorum dominabitur Psal. 9.. Qui gloriatur dicens: Circumivi terram et perambulavi eam Job 2.. Quis

Super hoc accingite vos cilicii; plangite, et ululate: quia non est aversa ira furoris Domini a nobis. <sup>60</sup> <sup>9</sup> Et erit in die illa, dicit Dominus: peribit cor regis, et cor principum, et obstupescunt sacerdotes, et prophetæ consternabuntur.] <sup>61</sup> <sup>10</sup> Et dixi: [Heu ! heu ! heu ! Domine Deus, ergone decepisti populum istum et Jerusalem, dicens: Pax erit vobis: et ecce pervenit gladius usque ad animam?] <sup>62</sup> <sup>11</sup> [In tempore illo dicetur populo huic et Jerusalem: Ventus urens in viis quæ sunt in deserto viæ filiæ populi mei, non ad ventilandum et ad purgandum. <sup>63</sup> <sup>12</sup> Spiritus plenus ex his veniet mihi, et nunc ego loquar judicia mea cum eis. <sup>64</sup> <sup>13</sup> Ecce quasi nubes ascendet, et quasi tempestas currus ejus: velociores aquilis equi illius. Væ nobis, quoniam vastati sumus. <sup>65</sup> <sup>14</sup> Lava a malitia cor tuum, Jerusalem, ut salva fias: usquequo morabuntur in te cogitationes noxiæ? <sup>66</sup> <sup>15</sup> Vox enim annuntiantis a Dan, et notum facientis idolum de monte Ephraim. <sup>67</sup> <sup>16</sup> Dicite gentibus: Ecce auditum est in Jerusalem custodes venire de terra longinqua, et dare super civitates Juda vocem suam: <sup>68</sup> <sup>17</sup> quasi custodes

---

est enim quem diaboli venena non tangunt, nisi ille qui ait: Venit enim princeps mundi hujus, et in me non habet quidquam? Job. 14. De loco suo. De abisso, in qua est religandus, in quam ne mittatur exorat.

<sup>60</sup> + **4.8 Super hoc.** Sine pœnitentia sævissimam bestiam vitare non possumus, et nisi ad Deum non solum mente, sed etiam corpore convertamur. Dum enim vastatur Ecclesia, ira Dei est aperta.

<sup>61</sup> + **4.9 Principum.** HIER. Qui legem docere debuerunt, et subjectos a leone defendere. Sacerdotes. Qui putantur esse sapientes: Stultam enim fecit Deus sapientiam hujus mundi, quia per illam non cognoverunt Deum. Prophetæ consternabuntur, etc. Aquila, amentes erunt. Quis enim non insaniat, non perdat cor, cum principes et reges et sacerdotes quondam suos sub leone conspexerit.

<sup>62</sup> + **4.10 Et dixi: Heu, heu, heu, Domine Deus.** Quia supra dixit, in tempore illo vocabunt Jerusalem solium Domini, etc., et nunc dicit, peribit cor regis, etc., turbatur propheta, et in se putat Deum mentitum, nec intelligit illud longe post, hoc in proximo futurum tempore.

<sup>63</sup> + **4.11 Ventus urens.** HIER. Quando scilicet pervenerit gladius usque ad animam, etc., usque ad nequaquam populo, sed mihi veniet, ut meum triticum dissipetur.

<sup>64</sup> + **4.12 Spiritus plenus.** Quidam hunc locum sic exponunt, ut postquam purgata fuerit area, reliquiæ salvæ fiant. Unde scriptum est: Spiritus plenitudinis veniet mihi; unde evangelista, De plenitudine ejus omnes accepimus Joan. 1.. Et nunc ego. Aposiopesis, sicut ait Virgilius ÆNEID.: Quos ego; sed motos præstat componere fluctus. Propheta dicturus prospera, retinet se, et tristibus junxit tristia.

<sup>65</sup> + **4.13 Ecce quasi,** etc. Ventura cernit ut præsentia; et babyloniorum describit exercitum, cujus curruum rotarumque strepitus tempestati sævissimæ comparatur, et equorum velocitas aquilis. Exercitus diaboli, currus scilicet et equites Pharaonis, quod intelligens vir ecclesiasticus dicit, Væ nobis quoniam vastati sumus. Credens illi sententiæ. Cum conversus ingemueris, salvus eris. Væ nobis, quia propheta quasi digito demonstravit, populus ingemiscit. Et non futura, sed jam facta sentit dicens: Væ nobis.

<sup>66</sup> + **4.14 Lava a malitia.** Respondet propheta imo in propheta Dominus, Lava. Unde: Lavamini, mundi estote Isa. 1., scilicet aqua baptismi, aqua pœnitentiæ salutaris.

<sup>67</sup> + **4.15 Vox enim annuntiantis.** Juxta situm Judææ loquitur. Tribus enim Dan juxta Libanum montem et urbem quæ nunc Paneas dicitur, aquilonem respicit, unde venturus Nabuchodonosor. De monte. Post tribum enim Dan succedit terra Ephraim per quam venit in Jerusalem. Allegorice. HIER. Venit judicium Domini in terram Domino delinquentem cum omni ubertate supplicii.

<sup>68</sup> + **4.16 Custodes.** Adversarios scilicet qui tam diligentes obsideant, et munitionibus urbem claudant, ut magis vinearum agrorumque custodes, quam adversarios putes. Vult Dominus nationes omnes in circumitu suam nosse sententiam, et flagellata Jerusalem cunctos recipere dis-

agrorum facti sunt super eam in gyro, quia me ad iracundiam provocavit, dicit Dominus. <sup>18</sup> Viæ tuæ et cogitationes tuæ fecerunt hæc tibi: ista malitia tua, quia amara, quia tetigit cor tuum. <sup>69</sup> <sup>19</sup> Ventrem meum, ventrem meum doleo; sensus cordis mei turbati sunt in me. Non tacebo, quoniam vocem buccinæ audivit anima mea, clamorem prælii. <sup>70</sup> <sup>20</sup> Contritio super contritionem vocata est, et vastata est omnis terra: repente vastata sunt tabernacula mea; subito pelles meæ. <sup>21</sup> Usquequo videbo fugientem; audiam vocem buccinæ? <sup>71</sup> <sup>22</sup> Quia stultus populus meus me non cognovit: filii insipientes sunt et vecordes: sapientes sunt ut faciant mala, bene autem facere nescierunt. <sup>72</sup> <sup>23</sup> Aspexi terram, et ecce vacua erat et nihili; et cælos, et non erat lux in eis. <sup>73</sup> <sup>24</sup> Vidi montes, et ecce movebantur: et omnes colles conturbati sunt. <sup>25</sup> Intuitus sum, et non erat homo: et omne volatile cæli recessit. <sup>26</sup> Aspexi, et ecce Carmelus desertus, et omnes urbes ejus destructæ sunt a facie Domini, et a facie iræ furoris ejus. <sup>27</sup> Hæc enim dicit Dominus: Deserta erit omnis terra, sed tamen consummationem non faciam. <sup>74</sup> <sup>28</sup> Lugebit terra, et mœrebunt cæli desuper, eo quod locutus sum. Cogitavi, et non pœnituit me, nec aversus sum ab eo. <sup>75</sup> <sup>29</sup> A voce equitis et mittentis sagittam fugit omnis civitas: ingressi sunt ardua, et ascenderunt rupes: universæ urbes derelictæ sunt, et non habitat in eis homo. <sup>76</sup> <sup>30</sup> Tu autem vastata, quid facies? cum vestieris te coccino, cum ornata fueris monili aureo, et pinxeris stibio oculos tuos, frustra componeris: contempserunt te amatores tui; animam tuam quærent. <sup>77</sup> <sup>31</sup> Vocem enim quasi parturientis

ciplinam.

<sup>69</sup> + **4.18 Viæ tuæ.** HIER. Quidquid mali nobis accidit, etc., usque ad quanto minus in homines quondam civitatis Dei?

<sup>70</sup> + **4.19 Ventrem meum.** ID. Loquitur hoc Dominus, cum seditionem et discordiam cernit in Ecclesia, et in conventiculis suis clamare perdicem, et in bella converti Dei requiem. Unde sequitur:

<sup>71</sup> + **4.21 Usquequo videbo.** Vox prophetæ, et per prophetam Dei, dolentis super contritionem populi sui, cujus viscera ad instar hominis lacerantur, Salvator in morte Lazari, et super Jerusalem flevit. Nec dolorem celat silentio, et clangor buccinæ et strepitus præliorum illius turbat affectum, dum mala malis cumulantur, et universa duarum tribuum terra vastatur.

<sup>72</sup> + **4.22 Quia stultus populus.** HIER. Quia principes populi mei non cognoverunt, etc., usque ad quem semper cupiebat videre? Sapientes sunt, etc. ID. Sapientes malitiosi, etc., usque ad non sapientia, sed versutia et calliditas vocatur.

<sup>73</sup> + **4.23 Aspexi terram.** Propheta cernit in spiritu quæ ventura sunt, ut audiens populus terreatur et pœnitentiam agat, ut non sustineat quæ formidat. Quidquid secundum historiam de Judæa et Jerusalem dicitur, ad Ecclesiam Dei referamus: quæ cum Deum offenderit, et vitiis et persecutione vastata fuerit, ubi quondam virtutum cohors et lætitia, ibi multitudo peccatorum et mœror versetur.

<sup>74</sup> + **4.27 Hæc enim dicit.** HIER. Mista est Domini clementia iræ: terra deseritur, sed non consumitur, ut remaneant qui intelligant clementiam ejus.

<sup>75</sup> + **4.28 Cogitavi et non pœnituit me,** etc. Ut prædictam auferrem sententiam, et ira sævientis non perveniret ad finem; minatus est Dominus per Jonam, sed impendentem gladium lacrymarum et gemituum magnitudo superavit.

<sup>76</sup> + **4.29 A voce equitis.** Describit furentium exercitum a cujus timore populus civitatem reliquit, et ardua conscendit: sed tamen iram Dei declinare non potuit. Hoc totum ad Ecclesiam potest referri, cum Deum offenderit, et adversariis tempore persecutionis, vel vitiis atque peccatis tradita fuerit.

<sup>77</sup> + **4.30 Tu autem vastata.** HIER. Hoc idem dicendum contra eos, qui conjugales affectus, et veræ fidei pudicitiam perdididerunt. Cum vestieris. Hæc enim et tuis amatoribus præparas, et lectus

audivi, angustias ut puerperæ: vox filiæ Sion intermorientis, expandentisque manus suas: Væ mihi, quia defecit anima mea propter interfectos !] <sup>78</sup>

5[Circuite vias Jerusalem, et aspiciate, et considerate, et quærite in plateis ejus, an inveniatis virum facientem iudicium, et quærentem fidem: et propitius ero ei. <sup>79</sup> 2 Quod si etiam: Vivit Dominus, dixerint, et hoc falso jurabunt. 3 Domine, oculi tui respiciunt fidem: percussisti eos, et non doluerunt; attrivisti eos, et renuerunt accipere disciplinam: induraverunt facies suas supra petram, et noluerunt reverti. <sup>80</sup> 4 Ego autem dixi: Forsitan pauperes sunt et stulti, ignorantes viam Domini, iudicium Dei sui. <sup>81</sup> 5 Ibo igitur ad optimates, et loquar eis: ipsi enim cognoverunt viam Domini, iudicium Dei sui: et ecce magis hi simul confregerunt jugum; ruperunt vincula. <sup>82</sup> 6 Idcirco percussit eos leo de silva; lupus ad vesperam vastavit eos: pardus vigilans super civitates eorum: omnis qui egressus fuerit ex eis capietur: quia multiplicatæ sunt prævaricationes eorum; confortatæ sunt aversiones eorum. <sup>83</sup> 7 Super quo propitius tibi esse potero? filii tui dereliquerunt me, et jurant in his qui non sunt dii. Saturavi eos, et mœchati sunt, et in domo meretricis luxuriabantur. <sup>84</sup> 8 Equi amatores et emissarii facti sunt: unusquisque ad uxorem proximi sui hinniebat. <sup>85</sup> 9 Numquid super his non visitabo, dicit Dominus, et in gente tali non ulciscetur anima mea? <sup>10</sup> Ascendite muros ejus, et dissipate: consummationem autem nolite facere: auferte propagines ejus, quia non sunt Domini. <sup>86</sup> 11 Prævaricatione enim prævaricata est in me domus Israël, et domus Juda, ait Dominus. <sup>12</sup>

angustus utrumque capere non potest. Nec Deus ornamenta suscipit, quibus ante amatoribus tuis placuisti.

<sup>78</sup> + **4.31 Vocem enim quasi**, etc. HIER. Duo exempla posita sunt, et parturientis et lugentis, ut quidquid mulier patitur, vel in fetu, vel in morte filiorum, Jerusalem patiatur in populis.

<sup>79</sup> + **5.1 Circuite vias**. HIER. Grandis amor justitiæ ut non juxta interrogationem Abrahamæ, et responcionem Dei, quod pro decem viris justis liberet Deus civitatem, jamjamque perituram; sed si unum invenerit, qui faciat iudicium, et quærat fidem.

<sup>80</sup> + **5.3 Domine, oculi tui**. ID. Damnantur opera Judæorum (in quibus juxta legis cæremonias exultabant) per fidem Christianorum, per quam gratia salvi facti sumus. Percussisti eos. GREG. Omnis divina percussio, etc., usque ad et est unum flagellum quod temporaliter incipit, et æternis consummatur suppliciis. Et non doluerunt. Inferuntur supplicia ut corrigantur vitia, sed non emendatur Jerusalem nec per tormenta.

<sup>81</sup> + **5.4 Forsitan pauperes sunt**. HIER. Sicut illud, Mittam filium meum, forsitan ipsum verebuntur Matth. 21.. Utitur Deus sermone dubitantis, ut ex ambiguitate sententiæ et verborum suspensione liberum hominis monstretur arbitrium.

<sup>82</sup> + **5.5 Ecce magis**, etc. Juxta tropologiam. Qui magni putantur in Ecclesia, quia solvunt jugum et rumpunt vincula, traduntur in ignominias passionum, ut faciant quæ non conveniunt. Vincula. HIER. Præceptorum Dei, non Pharisæorum, de quibus dicitur: Dirumpamus vincula eorum et projiciamus a nobis jugum ipsorum Psal. 1..

<sup>83</sup> + **5.6 Pardus vigilans**. Alexandri impetum significat, qui subditis sibi variis gentibus, quasi variatus pardus contra Medos Persasque arma corripuit. Quia vero non de futuro, sed de præterito, vel jamjamque de futuris historiam texit, ideo de Romano tacet imperio.

<sup>84</sup> + **5.7 Saturavi eos**. HIER. Audiat hoc qui acceptis divitiis luxuriæ serviunt.

<sup>85</sup> + **5.8 Equi amatores**. ID. Equis, cum non vident jumentum, etc., usque ad Assimilatus est juvenis insipientibus et similis factus est illis Psal. 48..

<sup>86</sup> + **5.10 Et dissipate**. ID. Audiat Ecclesia quam cito muri, etc., usque ad propter clementiam iudicis, non propter meritum peccantium.

Negaverunt Dominum, et dixerunt: Non est ipse: neque veniet super nos malum: gladium et famem non videbimus. <sup>87</sup> <sup>13</sup> Prophetæ fuerunt in ventum locuti, et responsum non fuit in eis: hæc ergo evenient illis. <sup>14</sup> Hæc dicit Dominus Deus exercituum: Quia locuti estis verbum istud, ecce ego do verba mea in ore tuo in ignem, et populum istum in ligna, et vorabit eos. <sup>88</sup> <sup>15</sup> Ecce ego adducam super vos gentem de longinquo, domus Israël, ait Dominus: gentem robustam, gentem antiquam, gentem cujus ignorabis linguam, nec intelliges quid loquatur. <sup>89</sup> <sup>16</sup> Pharetra ejus quasi sepulchrum patens; universi fortes. <sup>17</sup> Et comedet segetes tuas et panem tuum; devorabit filios tuos et filias tuas; comedet gregem tuum et armenta tua; comedet vineam tuam et ficum tuam: et conteret urbes munitas tuas, in quibus tu habes fiduciam, gladio. <sup>90</sup> <sup>18</sup> Verumtamen in diebus illis, ait Dominus, non faciam vos in consumptionem. <sup>91</sup> <sup>19</sup> Quod si dixeritis: Quare fecit nobis Dominus Deus noster hæc omnia? dices ad eos: Sicut dereliquistis me, et servistis deo alieno in terra vestra, sic servietis alienis in terra non vestra. <sup>92</sup> <sup>20</sup> Annuntiate hoc domui Jacob, et auditum facite in Juda, dicentes: <sup>21</sup> Audi, popule stulte, qui non habes cor: qui habentes oculos, non videtis; et aures, et non auditis. <sup>93</sup> <sup>22</sup> Me ergo non timebitis, ait Dominus, et a facie mea non dolebitis? qui posui arenam terminum mari, præceptum sempiternum quod non præteribit: et commovebuntur, et non poterunt; et intumescent fluctus ejus, et non transibunt illud. <sup>23</sup> Populo autem huic factum est cor incredulum et exasperans: recesserunt, et abierunt. <sup>24</sup> Et non dixerunt in corde suo: Metuamus Dominum Deum nostrum, qui dat nobis pluviam temporaneam et serotinam in tempore suo, plenitudinem annuæ messis custodientem nobis. <sup>25</sup> Iniquitates vestræ declinaverunt hæc, et peccata vestra prohibuerunt bonum a vobis: <sup>94</sup> <sup>26</sup> quia inventi sunt in populo meo impij insidiantes quasi aucupes, laqueos ponentes et pedicas ad capiendos viros. <sup>27</sup> Sicut decipula plena avibus, sic domus eorum plenæ dolo: ideo magnificati sunt et ditati. <sup>95</sup> <sup>28</sup> Incrassati sunt et impinguati, et

<sup>87</sup> + **5.12 Negaverunt Dominum**, etc. ID. Audiatur hoc Ecclesia negligens: et providentiam Dei refutans, quod et gladium et famem sustineat, nisi ventura crediderit quæ dicuntur.

<sup>88</sup> + **5.14 Ecce ego do**, etc. ID. Ut increduli sermone tuo crementur, etc., usque ad si supra fundamentum Christi ædificaverimus.

<sup>89</sup> + **5.15 Ignorabis linguam**, etc. ID. In Hebræo: Non intelliges quid loquatur. Est enim malorum solatium, si habeas hostes, quos rogare valeas, qui intelligant preces tuas.

<sup>90</sup> + **5.17 Et comedet segetes**, etc. Vastitatem terræ describit, interfectionem multorum, abactionem pecorum, subversionem urbium et murorum, quod gladio hostili cuncta capiantur.

<sup>91</sup> + **5.18 Verumtamen**, etc. HIER. Reliquiæ scilicet salvæ fient, vel eorum qui in Babylonem ducti sunt, vel relictis ad culturam terræ Judææ; vel eorum qui post persecutionis ardorem, vel fuga, vel confessione fidem Deo servaverunt.

<sup>92</sup> + **5.19 Quod si dixeritis**. ID. Tropologice. Potest hoc super hæreticis accipi, etc., usque ad habitate, imo servite his quorum deos colitis.

<sup>93</sup> + **5.21 Audi, popule stulte**. Proprie ad Judam loquitur et ad domum Jacob. Israël enim multo jam tempore exsulabat in Assyriis. Qui non habes cor. Dat intelligi quod absque præcepto naturaliter debemus intelligere quæ recta sunt. Qui habentes, etc. Cui simile: oculos habent, et non videbunt, etc., Similes illis fiant qui faciunt ea, et omnes qui confidunt in eis Psal. 113..

<sup>94</sup> + **5.25 Iniquitates vestræ**, etc. HIER. Si quando mare transcendat terminos, etc., usque ad in quibus operariis vineæ unum æternæ præmium promittitur.

<sup>95</sup> + **5.27 Sicut decipula**. Dum invicem se venantur ad mortem, et aliorum damnis atque

præterierunt sermones meos pessime. Causam viduæ non iudicaverunt, causam pupilli non direxerunt, et iudicium pauperum non iudicaverunt.<sup>96</sup>

<sup>29</sup> Numquid super his non visitabo, dicit Dominus, aut super gentem hujuscemodi non ulciscetur anima mea? <sup>30</sup> Stupor et mirabilia facta sunt in terra: <sup>31</sup> prophetæ prophetabant mendacium, et sacerdotes applaudebant manibus suis, et populus meus dilexit talia. Quid igitur fiet in novissimo ejus?]

6[Confortamini, filii Benjamin, in medio Jerusalem: et in Thecua clangite buccina, et super Bethacarem levate vexillum, quia malum visum est ab aquilone, et contritio magna.<sup>97</sup> <sup>2</sup> Speciosæ et delicatæ assimilavi filiam Sion.<sup>98</sup> <sup>3</sup> Ad eam venient pastores et greges eorum; fixerunt in ea tentoria in circuitu: pascet unusquisque eos qui sub manu sua sunt.<sup>99</sup> <sup>4</sup> Sanctificate super eam bellum: consurgite, et ascendamus in meridie: væ nobis, quia declinavit dies; quia longiores factæ sunt umbræ vesperi! <sup>100</sup> <sup>5</sup> Surgite, et ascendamus in nocte, et dissipemus domus ejus.<sup>101</sup> <sup>6</sup> Quia hæc dicit Dominus exercituum: Cædite lignum ejus, et fundite circa Jerusalem aggerem. Hæc est civitas visitationis: omnis calumnia in medio ejus.<sup>7</sup> Sicut frigidam fecit cisterna aquam suam, sic frigidam fecit malitiam suam. Iniquitas et vastitas audietur in ea, coram me semper infirmitas et plaga.<sup>102</sup> <sup>8</sup> Erudire, Jerusalem, ne forte recedat anima mea a te; ne forte ponam te desertam, terram inhabitabilem.<sup>103</sup> <sup>9</sup> Hæc dicit Dominus exercituum: Usque ad racemum colligent quasi in vinea reliquias Israël. Convertite manum

dispendiis domos suas complent, secundum illam philosophorum sententiam, Omnis dives, aut iniquus, aut hæres iniqui. Atque utinam hæc tantum ab eis fiant qui foris sunt, et non a nobis, et venientium ad nos, non manus contemplantur, sed ora.

<sup>96</sup> + **5.28 Incrassati sunt**, etc. Cui simile: Incrassatus, impinguatus, dilatatus, dereliquit Deum factorem suum Deut. 32.. Et: Incrassatus est dilectus et recalcitravit Ibid.. Et impinguati, etc. In divinis confisi: quasi dicat: Anima, multa bona habes posita in annos plurimos: requiesce, comede et bibe Luc. 12..

<sup>97</sup> + **6.1 Confortamini**, etc. HIER. Quia jamjamque ab aquilone Nabuchodonosor venturus est, etc., usque ad inter hos alius vicus est qui lingua Syra et Hebræa Betacaren nominatur in monte positus.

<sup>98</sup> + **6.2 Speciosæ**. Describitur pulchritudo Jerusalem, quæ est ipsa Sion ut aliud totam urbem, aliud arcem urbis sonet. Sion enim arx, id est specula, interpretatur et speciosæ mulieri comparatur.

<sup>99</sup> + **6.3 Pastores**. HIER. Satis eleganter ponitur hic verbum, etc., usque ad quorum alii manifestant ad polluendum scortum, alii ad urbis excidium.

<sup>100</sup> + **6.4 Væ nobis**, etc. HIER. Illis dicentibus: Surgite et ascendamus, isti respondent: Væ nobis, etc. Et est hic sensus: Si per diem hoc patimur, quid per noctem patiemur?

<sup>101</sup> + **6.5 Surgite**. Qui dixerunt, consurgite et ascendite, etc., sese illis verbis provocant ad bellum: Surgite et ascendamus in nocte, ut sciant adversarii non temporis esse victoriam, sed virtutum.

<sup>102</sup> + **6.7 Sicut frigidam**. Sine calore fidei: Ecclesia, spiritu ferventes: mali autem, frigida; unde: Refrigescet charitas multorum Matth. 14.. Et illud: Assimilabor descendentibus in lacum Psal. 28.. Semel sufficiat dixisse lacum, non stagnum sonare, secundum Græcos, sed cisternam, quæ Syro et Hebræo sermone Gab dicitur.

<sup>103</sup> + **6.8 Erudire**. HIER. Per hoc discimus, quod flagellet Deus, etc., usque ad per omnem dolorem et flagellum erudieris, Jerusalem.



tuam quasi vindemiator ad cartallum.<sup>104</sup> <sup>10</sup> Cui loquar, et quem contestabor ut audiat? ecce incircumcisæ aures eorum, et audire non possunt: ecce verbum Domini factum est eis in opprobrium, et non suscipient illud.<sup>105</sup>

<sup>11</sup> Idcirco furore Domini plenus sum; laboravi sustinens. Effunde super parvulum foris, et super consilium juvenum simul: vir enim cum muliere capietur; senex cum pleno dierum.<sup>106</sup> <sup>12</sup> Et transibunt domus eorum ad alteros, agri et uxores pariter, quia extendam manum meam super habitantes terram, dicit Dominus:<sup>107</sup> <sup>13</sup> a minore quippe usque ad majorem omnes avaritiæ student, et a propheta usque ad sacerdotem cuncti faciunt dolum.

<sup>14</sup> Et curabant contritionem filiæ populi mei cum ignominia, dicentes: Pax, pax ! et non erat pax.<sup>108</sup> <sup>15</sup> Confusi sunt, quia abominationem fecerunt: quin potius confusione non sunt confusi, et erubescere nescierunt. Quam ob rem cadent inter ruentes: in tempore visitationis suæ corruent, dicit Dominus.

<sup>109</sup> <sup>16</sup> Hæc dicit Dominus: State super vias, et videte, et interrogate de semitis antiquis quæ sit via bona, et ambulate in ea: et invenietis refrigerium animabus vestris. Et dixerunt: Non ambulabimus.<sup>110</sup> <sup>17</sup> Et constitui super vos speculatores: Audite vocem tubæ. Et dixerunt: Non audiemus.<sup>111</sup> <sup>18</sup>

Ideo audite, gentes, et cognosce, congregatio, quanta ego faciam eis.<sup>19</sup>

Audi, terra: ecce ego adducam mala super populum istum, fructum cogitationum ejus: quia verba mea non audierunt, et legem meam projecerunt.<sup>20</sup> Ut quid mihi thus de Saba affertis, et calamum suave olemtem de terra longinqua? Holocaustomata vestra non sunt accepta, et victimæ vestræ non placuerunt mihi.<sup>112</sup> <sup>21</sup> Propterea hæc dicit Dominus: Ecce ego dabo in populum istum ruinas: et ruent in eis patres et filii simul; vicinus et proximus peribunt.<sup>113</sup> <sup>22</sup> Hæc dicit Dominus: Ecce populus venit

<sup>104</sup> + **6.9 Usque ad racemum.** ID. Quasi cum vastata fuerit Jerusalem, etc., usque ad quasi in cartallum vel in torcular.

<sup>105</sup> + **6.10 Incircumcisæ aures,** etc. Notandum quod circumcisio in Scripturis dicitur tribus modis: in præputio, in corde, in auribus, unde: Qui habet aures audiendi audiat Matth. 11..

<sup>106</sup> + **6.11 Idcirco furore.** HIER. Quasi dicat: Venientem iram Dei prospicio, et furore ejus et iracundia plenus sum, et ultra sustinere non possum: nec pro peccatoribus audeo deprecari Deum.

<sup>107</sup> + **6.12 Extendam.** HIER. Septuaginta: Elevabo: utrumque autem percipientis habitus est; unde: Et adhuc manus extenta sive, excelsa Isa. 5..

<sup>108</sup> + **6.14 Et curabant contritionem.** ID. Quasi dicat: Cum tanta facerent mala, etc., usque ad magis illos supplicio et Dei iracundiæ præparantes.

<sup>109</sup> + **6.15 Confusi sunt.** ID. Expressius hoc legendum est, etc., usque ad quin potius peccatum auxere contemptu. Nescierunt. Noluerunt; sed nimio contemptu et vitio violenti mali nec intelligere quidem potuerunt. Grandis impietas, non solum non cavere, sed nec intelligere velle peccata, et nullam habere distantiam bonorum malorumque operum.

<sup>110</sup> + **6.16 State super vias.** Legamus Evangelicam parabolam, in qua negotiator bonus omnes vendidit margaritas, ut unam emat pretiosam: ut scilicet per patriarchas et prophetas veniamus ad eum qui dicit: Ego sum via, veritas et vita Joan. 14., unde, State super vias, etc.

<sup>111</sup> + **6.17 Vocem tubæ.** HIER. Vocem tubæ, mandata Evangelii vel doctrinam apostolorum: unde, In montem excelsum ascende tu qui evangelizas Sion, exalta sicut tuba vocem tuam, qui annuntias Jerusalem.

<sup>112</sup> + **6.20 Ut quid mihi thus.** ID. Quasi dicat: Frustra mihi ad unguenta conficienda, etc., usque ad cum Scriptura dicat, Redemptio animæ viri propriæ divitiæ ejus Prov. 13..

<sup>113</sup> + **6.21 Patres et filii.** ID. Filii patrum sequuntur blasphemias, quotidie illam imprecationem suscipientes: Sanguis ejus super nos et super filios nostros Matth. 27..

de terra aquilonis, et gens magna consurget a finibus terræ. <sup>114</sup> <sup>23</sup> Sagittam et scutum arripiet: crudelis est et non miserebitur. Vox ejus quasi mare sonabit: et super equos ascendent, præparati quasi vir ad prælium adversum te, filia Sion. <sup>115</sup> <sup>24</sup> Audivimus famam ejus; dissolutæ sunt manus nostræ: tribulatio apprehendit nos, dolores ut parturientem. <sup>25</sup> Nolite exire ad agros, et in via ne ambuletis, quoniam gladius inimici, pavor in circuitu. <sup>116</sup> <sup>26</sup> Filia populi mei, accingere cilicio, et conspergere cinere: luctum unigeniti fac tibi, planctum amarum, quia repente veniet vastator super nos. <sup>27</sup> Probatores dedi te in populo meo robustum: et scies, et probabis viam eorum. <sup>117</sup> <sup>28</sup> Omnes isti principes declinantes, ambulantes fraudulenter, æs et ferrum: universi corrupti sunt. <sup>29</sup> Defecit sufflatorium; in igne consumptum est plumbum: frustra conflavit conflator, malitiæ enim eorum non sunt consumptæ. <sup>30</sup> Argentum reprobum vocate eos, quia Dominus projecit illos.]

7 Verbum quod factum est ad Jeremiam a Domino, dicens: <sup>2</sup> Sta in porta domus Domini, et prædica ibi verbum istud, et dic: [Audite verbum Domini, omnis Juda, qui ingredimini per portas has ut adoretis Dominum. <sup>3</sup> Hæc dicit Dominus exercituum, Deus Israël: Bonas facite vias vestras, et studia vestra, et habitabo vobiscum in loco isto. <sup>4</sup> Nolite confidere in verbis mendacii, dicentes: Templum Domini, templum Domini, templum Domini est! <sup>118</sup> <sup>5</sup> Quoniam si bene direxeritis vias vestras, et studia vestra; si feceritis iudicium inter virum et proximum ejus; <sup>6</sup> advenæ, et pupillo, et viduæ non feceritis calumniam, nec sanguinem innocentem effuderitis in loco hoc, et post deos alienos non ambulaveritis in malum vobismetipsis: <sup>7</sup> habitabo vobiscum in loco isto, in terra quam dedi patribus vestris a sæculo et usque in sæculum. <sup>8</sup> Ecce vos confiditis vobis in sermonibus mendacii, qui non proderunt vobis: <sup>119</sup> <sup>9</sup> furari, occidere, adulterari, jurare mendaciter, libare Baalim, et ire post deos alienos quos ignoratis: <sup>10</sup> et venistis, et stetistis coram me in domo hac, in qua invocatum est nomen meum, et dixistis: Liberati sumus, eo quod fecerimus omnes abominationes istas. <sup>11</sup> Numquid ergo spelunca latronum facta est domus ista, in qua invocatum est nomen

<sup>114</sup> + **6.22 Ecce populus,** etc. Proprie hoc dicitur de Babyloniis, qui venturi sunt contra Jerusalem. Et omnis armaturæ ordo describitur, et præliantium impetus, ut terrore commoti agant poenitentiam et Deum clementissimum placent.

<sup>115</sup> + **6.23 Vox ejus quasi,** etc. Allegorice. HIER. Possumus hoc testimonio abuti, etc., usque ad et quasi vehementissimi maris fluctus, ita opprimunt resistentes.

<sup>116</sup> + **6.25 Nolite exire,** ID. Evangelium quoque docet, etc., usque ad sed firmissime se tueantur munitionibus.

<sup>117</sup> + **6.27 Et probabis.** ID. Quasi dicat: Ut cum probaveris et scieris viam, etc., usque ad qui sicut aspides surdæ obturant aures suas, ne audiant vocem incantantium. Omnes isti. GREG., Moral., l. 18, c. 14. Principes sunt a Domino recedentes et inobedientes, etc., usque ad qui ab Ecclesiæ unitate discordat, proximum non amat. 4 Caput 7

<sup>118</sup> + **7.4 Templum Domini.** ID. Potest hoc convenire illis virginibus, etc., usque ad in quo fides vera, conversatio sancta et omnium virtutum chorus.

<sup>119</sup> + **7.8 Ecce vos confiditis in vobis.** ID. Frustra eos in templo habere fiduciam hæc peccata demonstrant, etc., usque ad et in tantam prorumpunt amentiam, ut liberatos se jactent, quia a cultu Dei recesserunt.

meum in oculis vestris? Ego, ego sum: ego vidi, dicit Dominus. <sup>120</sup> <sup>12</sup> Ite ad locum meum in Silo, ubi habitavit nomen meum a principio, et videte quæ fecerim ei propter malitiam populi mei Israël. <sup>121</sup> <sup>13</sup> Et nunc, quia fecistis omnia opera hæc, dicit Dominus, et locutus sum ad vos mane consurgens, et loquens, et non audistis: et vocavi vos, et non respondistis: <sup>122</sup> <sup>14</sup> faciam domui huic, in qua invocatum est nomen meum, et in qua vos habetis fiduciam, et loco quem dedi vobis et patribus vestris, sicut feci Silo: <sup>123</sup> <sup>15</sup> et projiciam vos a facie mea sicut projecit omnes fratres vestros, universum semen Ephraim. <sup>16</sup> Tu ergo, noli orare pro populo hoc, nec assumes pro eis laudem et orationem: et non obsistas mihi, quia non exaudiam te. <sup>124</sup> <sup>17</sup> Nonne vides quid isti faciunt in civitatibus Juda, et in plateis Jerusalem? <sup>125</sup> <sup>18</sup> Filii colligunt ligna, et patres succendunt ignem, et mulieres conspergunt adipem, ut faciant placentas reginæ cæli, et libent diis alienis, et me ad iracundiam provocent. <sup>19</sup> Numquid me ad iracundiam provocant? dicit Dominus; nonne semetipsos in confusionem vultus sui? <sup>20</sup> Ideo hæc dicit Dominus Deus: Ecce furor meus et indignatio mea conflatur super locum istum, super viros, et super jumenta, et super lignum regionis, et super fruges terræ: et succendetur, et non extinguetur. <sup>126</sup> <sup>21</sup> Hæc dicit Dominus exercituum, Deus Israël: Holocaustomata vestra addite victimis vestris, et comedite carnes: <sup>22</sup> quia non sum locutus cum patribus vestris, et non præcepi eis, in die qua eduxi eos de terra Ægypti, de verbo holocaustomatum et victimarum: <sup>127</sup> <sup>23</sup> sed hoc verbum præcepi eis, dicens: Audite vocem meam, et ero vobis Deus, et vos eritis mihi populus: et ambulate in omni via quam mandavi vobis, ut bene sit vobis. <sup>24</sup> Et non audierunt, nec inclinaverunt aurem suam: sed abierunt in voluntatibus et in pravitate cordis sui mali: factique sunt retrorsum, et non in ante, <sup>25</sup> a die qua egressi sunt patres eorum de terra Ægypti usque ad diem hanc. Et misi ad vos omnes servos meos prophetas per diem, consurgens diluculo, et mittens: <sup>26</sup> et non audierunt me, nec inclinaverunt aurem suam: sed induraverunt cervicem

<sup>120</sup> + **7.11 Spelunca latronum**, etc. ID. De hoc loco sumptum puto quod dicitur in Evangelio, etc., usque ad oculi mei contemplati sunt quod vos putatis occultum.

<sup>121</sup> + **7.12 Ite ad locum meum in Silo**, etc. ID. Ubi scilicet fuit primum tabernaculum meum, etc., usque ad Cum venerit Filius hominis putas inveniet fidem super terram Luc. 18.

<sup>122</sup> + **7.13 Ad vos mane consurgens**, etc. ID. Non quod ei tempus absque diluculo sit, etc., usque ad filii lucis dicuntur et non noctis neque tenebrarum, nec dormientes, qui scilicet mandata Dei conservant.

<sup>123</sup> + **7.14 Sicut feci Silo**. Abjeci Silo, abjecturus et templum: abjeci decem tribus, abjecturus et duas tribus. Quidquid illi populo minatur, timeamus et nobis, ne similia faciamus.

<sup>124</sup> + **7.16 Tu ergo noli**, etc. HIER. Ne videatur propheta rogans non impetrare quod postulat, præcipit Dominus, etc., usque ad hæc impoenitentia, hæc blasphemia, vel verbum in Spiritum sanctum remissionem non habet in æternum.

<sup>125</sup> + **7.17 Nonne vides**. Ne putemus crudelem Deum: qui nec rogari patiat, causam reddit quare non audiat, Nonne vides?

<sup>126</sup> + **7.20 Conflatur**. HIER. Quasi dicat: Quod diu facere nolui, vestrorum peccatorum multitudine facere compellor super viros et super jumenta. Cum irascitur Deus, etiam homines, et quæ sunt hominis, similem severitatem sentiunt.

<sup>127</sup> + **7.22 Quia non sum locutus**. ID. Manifeste ostendit, quia primum decalogum dederit, etc., usque ad necessaria ergo fuit gratia evangelica, quæ eos non merito suo, sed Dei misericordia conservaret.

suam, et pejus operati sunt quam patres eorum.] <sup>27</sup> Et loqueris ad eos omnia verba hæc, et non audient te: et vocabis eos, et non respondebunt tibi. <sup>128</sup>  
<sup>28</sup> Et dices ad eos: [Hæc est gens quæ non audivit vocem Domini Dei sui, nec recepit disciplinam; periit fides, et ablata est de ore eorum. <sup>129</sup> <sup>29</sup> Tonde capillum tuum, et projice, et sume in directum planctum: quia projecit Dominus et reliquit generationem furoris sui; <sup>130</sup> <sup>30</sup> quia fecerunt filii Juda malum in oculis meis, dicit Dominus. Posuerunt offendicula sua in domo in qua invocatum est nomen meum, ut polluerent eam: <sup>31</sup> et ædificaverunt excelsa Topheth, quæ est in valle filii Ennom, ut incenderent filios suos et filias suas igni, quæ non præcepi, nec cogitavi in corde meo. <sup>131</sup> <sup>32</sup> Ideo ecce dies venient, dicit Dominus, et non dicetur amplius Topheth, et vallis filii Ennom, sed vallis interfectionis: et sepelient in Topheth, eo quod non sit locus. <sup>132</sup> <sup>33</sup> Et erit morticinum populi hujus in cibos volucris cæli et bestiis terræ, et non erit qui abigat. <sup>34</sup> Et quiescere faciam de urbibus Juda, et de plateis Jerusalem, vocem gaudii et vocem lætitiæ, vocem sponsi et vocem sponsæ: in desolationem enim erit terra.] <sup>133</sup>

8[In illo tempore, ait Dominus, ejicient ossa regum Juda, et ossa principum ejus, et ossa sacerdotum, et ossa prophetarum, et ossa eorum qui habitaverunt Jerusalem, de sepulchris suis: <sup>134</sup> <sup>2</sup> et expandent ea ad solem, et lunam, et omnem militiam cæli, quæ dilexerunt, et quibus servierunt, et post quæ ambulaverunt, et quæ quæsierunt, et adoraverunt. Non colligentur, et non sepelientur: in sterquilinum super faciem terræ erunt. <sup>3</sup> Et eligent magis mortem quam vitam, omnes qui residui fuerint de cognatione hac pessima, in universis locis quæ derelicta sunt, ad quæ ejeci eos, dicit Dominus exercituum.] <sup>4</sup> Et dices ad eos: [Hæc dicit Dominus: Numquid qui cadit non resurget? et qui aversus est non revertetur? <sup>135</sup> <sup>5</sup> Quare ergo aversus est populus iste in Jerusalem aversione contentiosa? Apprehenderunt

<sup>128</sup> + **7.27 Et loqueris ad eos.** ID. Ne dubitetis indurare cervices, etc., usque ad nunc saltem loquere eis verbis meis.

<sup>129</sup> + **7.28 Hæc est gens.** Hoc in tempore prophetarum factum est, et in umbra præcessit. In Christo plene completum est, cujus disciplinam noluerunt audire, unde eleganter infertur: Periit fides et ablata est. Quæ proprie Christianorum est.

<sup>130</sup> + **7.29 Tonde capillum.** Apud veteres consuetudo fuit lugentium tondere cæsariem, nunc e contra comam dimittere luctus indicium est.

<sup>131</sup> + **7.31 Excelsa Tophet.** HIER. Tophet Hebraice, latitudo Latine, qui locus est, etc., usque ad neque enim si canis aut asinus aut immundum quod tibet animal primum occurrisset domino, offerre debuisset.

<sup>132</sup> + **7.32 Ecce dies venient.** ID. Quando recessit a fidelitate Domini sui, tunc incoepit obsidio. Sed cum rex Ægypti veniret et liberaret Jerusalem, Nabuchodonosor illum fugavit. Postea Nabuzardan obsedit eam, et cepit, et duxit Sedeciam in Antiochiam, et ibi orbatus.

<sup>133</sup> + **7.34 Et quiescere faciam.** Cum locus idololatriæ versus fuerit in sepulchra, ut ubi Deum offenderant, ibi cadavera eorum inhumata jacerent.

<sup>134</sup> + **8.1 In tempore illo,** etc. HIER. Omnia quæ prophetalis sermo describit, etc., uque ad aurum et argentum quæ in sepulchris more antiquo ponebantur.

<sup>135</sup> + **8.4 Et dices.** Post tanta mala ad poenitentiam provocat eos qui remanserunt. Sive, priusquam veniant, quæ minatus est, hortatur ad conversionem, et poenitentiae locum indicat. Aversus est, sive avertit. Quasi dicat: Conversus potest iræ Dei precibus resistere et avertere.

mendacium, et noluerunt reverti. <sup>136</sup> **6** Attendi, et auscultavi: nemo quod bonum est loquitur; nullus est qui agat pœnitentiam super peccato suo, dicens: Quid feci? Omnes conversi sunt ad cursum suum, quasi equus impetu vadens ad prœlium. <sup>137</sup> **7** Milvus in cœlo cognovit tempus suum: turtur, et hirundo, et ciconia custodierunt tempus adventus sui: populus autem meus non cognovit iudicium Domini. <sup>138</sup> **8** Quomodo dicitis: Sapientes nos sumus, et lex Domini nobiscum est? vere mendacium operatus est stylus mendax scribarum! <sup>9</sup> Confusi sunt sapientes; perterriti et capti sunt: verbum enim Domini projecerunt, et sapientia nulla est in eis. <sup>10</sup> Propterea dabo mulieres eorum exteris, agros eorum hæredibus, quia a minimo usque ad maximum omnes avaritiam sequuntur: a propheta usque ad sacerdotem cuncti faciunt mendacium. <sup>139</sup> **11** Et sanabant contritionem filiæ populi mei ad ignominiam, dicens: Pax, pax! cum non esset pax. <sup>140</sup> **12** Confusi sunt, quia abominationem fecerunt: quinimmo confusione non sunt confusi, et erubescere nescierunt. Idcirco cadent inter corruentes: in tempore visitationis suæ corruent, dicit Dominus. <sup>141</sup> **13** Congregans congregabo eos, ait Dominus. Non est uva in vitibus, et non sunt ficus in ficulnea: folium defluxit, et dedi eis quæ prætergressa sunt. <sup>142</sup> **14** Quare sedemus? convenite, et ingrediamur civitatem munitam, et sileamus ibi: quia Dominus Deus noster silere nos fecit, et potum dedit nobis aquam fellis: peccavimus enim Domino. <sup>143</sup> **15** Exspectavimus pacem, et non erat bonum: tempus medelæ, et ecce formido. <sup>16</sup> A Dan auditus est fremitus equorum ejus; a voce hinnituum pugnantium ejus commota est omnis terra: et venerunt, et devoraverunt terram et plenitudinem ejus; urbem et habitatores ejus. <sup>144</sup> **17** Quia ecce ego mittam vobis serpentes regulos, quibus non est incantatio: et mordebunt vos, ait Dominus. <sup>145</sup> **18** Dolor meus super dolorem, in me cor meum

<sup>136</sup> + **8.5 Quare ergo**, etc. HIER. Quanto eos ad pœnitentiam provocavi, tanto magis recesserunt, non tam studio peccandi, quam me superandi.

<sup>137</sup> + **8.6 Nemo quod bonum**, etc. ID. Omne g enus hominum pronum est ad malum Gen. 8.. In tempore Salvatoris, omnes declinaverunt, simul inutiles facti sunt, non est qui faciat bonum Psal. 13.. Unde ipse: Salvum me fac, Domine, quoniam defecit sanctus Ibid. 11.. Ubi sunt ergo qui dicunt in nostra positum potestate omni peccato carere?

<sup>138</sup> + **8.7 Milvus in cœlo**. ID. Quasi dicat: Etiam aves sua norunt tempora, ut sciant quando ad calida festinantes loca rigorem hyemis declinare debeant, et veris principio ad solitas redire regiones.

<sup>139</sup> + **8.10 Propterea dabo**. ID. Receperunt mercedem suam, et qui verbum Domini abjecerunt, ipsi abjecti sunt.

<sup>140</sup> + **8.11 Et sanabant contritionem**. ID. Quasi dicat: Boni medici aliena vulnera verbis sanare cupiebant, etc., usque ad et ignominiam eorum qui decipiunt dicentes, pax, pax, etc.

<sup>141</sup> + **8.12 Idcirco cadent**. ID. Ut quorum dignitas excelebat, etiam ruinæ populi misceantur, quia scilicet a minimo usque ad maximum omnes avaritiæ student Jer. 6..

<sup>142</sup> + **8.13 Non est uva**, etc. Quasi dicat: Cum tempora prætereant, et æstati succedat autumnus, et hyeme arborum cadant folia: de longe cuncta videbitis nec ex eis cibum capietis.

<sup>143</sup> + **8.14 Quare sedemus**. Vox populi inducitur respondentis, et vitia sua confitentis, et sese mutuo cohortantis. Convenite et ingrediamur civitatem munitam. Vel unam civitatem Jerusalem: jam enim aliæ captæ fuerant.

<sup>144</sup> + **8.16 A Dan auditus est**. Ubi Jordanis fluvius oritur: Nabuchodonosor describitur a Dan veniens per Phœnicem cum exercitu suo.

<sup>145</sup> + **8.17 Mittam vobis serpentes**. ID. Ut insanabiliter percutiant vos, etc., usque ad qui eloquia Domini contemnunt traduntur adversariis potestatibus.

mœrens. <sup>146</sup> <sup>19</sup> Ecce vox clamoris filiæ populi mei de terra longinqua: Numquid Dominus non est in Sion? aut rex ejus non est in ea? Quare ergo me ad iracundiam concitaverunt in sculptilibus suis, et in vanitatibus alienis? <sup>147</sup> <sup>20</sup> Transiit messis, finita est æstas, et nos salvati non sumus. <sup>148</sup> <sup>21</sup> Super contritione filiæ populi mei contritus sum, et contristatus: stupor obtinuit me. <sup>149</sup> <sup>22</sup> Numquid resina non est in Galaad? aut medicus non est ibi? quare igitur non est obducta cicatrix filiæ populi mei?]

9[Quis dabit capiti meo aquam, et oculis meis fontem lacrimarum, et plorabo die ac nocte interfectos filiæ populi mei? <sup>150</sup> <sup>2</sup> Quis dabit me in solitudine diversorium viatorum, et derelinquam populum meum, et recedam ab eis? quia omnes adulteri sunt, cœtus prævaricatorum. <sup>151</sup> <sup>3</sup> Et extenderunt linguam suam quasi arcum mendacii et non veritatis: confortati sunt in terra, quia de malo ad malum egressi sunt, et me non cognoverunt, dicit Dominus. <sup>152</sup> <sup>4</sup> Unusquisque se a proximo suo custodiat, et in omni fratre suo non habeat fiduciam: quia omnis frater supplantans supplantabit, et omnis amicus fraudulenter incedet. <sup>153</sup> <sup>5</sup> Et vir fratrem suum deridebit, et veritatem non loquentur: docuerunt enim linguam suam loqui mendacium; ut inique agerent laboraverunt. <sup>154</sup> <sup>6</sup> Habitatio tua in medio doli: in dolo renuerunt scire me, dicit Dominus. <sup>7</sup> Propterea hæc dicit Dominus exercituum: Ecce ego conflabo, et probabo eos: quid enim aliud faciam a facie filiæ populi mei? <sup>155</sup> <sup>8</sup> Sagitta vulnerans lingua eorum, dolum locuta est. In ore suo pacem cum amico suo loquitur, et occulte ponit ei insidias. <sup>9</sup> Numquid super his non visitabo, dicit Dominus, aut in gente hujusmodi non

<sup>146</sup> + **8.18 Dolor meus.** ID. Ex persona Domini hæc legenda, eversionem Jerusalem plangentis, et ejus miseriam non ferentis.

<sup>147</sup> + **8.19 Et ecce vox.** Describit fletum et ululatum urbis ingressis hostibus. Hostes venientes de terra longinqua clamant contra civitatem vel cives contra hostes.

<sup>148</sup> + **8.20 Transiit messis.** Verba populi in Jerusalem longa obsidione conclusi, quia mutata sunt tempora, anni circulus revolutus. Spes autem nostra irrita.

<sup>149</sup> + **8.21 Super contritione.** Domini responsio, qui in afflictione Jerusalem videtur afflictus.

<sup>150</sup> + **9.1 Quis dabit.** HIER. Rex Jerusalem obsessa civitate ab hostibus, etc., usque ad hoc autem tam ex persona Domini, quam ex persona prophetæ intelligi potest.

<sup>151</sup> + **9.2 Quis dabit me,** etc. Quasi dicat: Melius est habitare in solitudine, quam inter tanta scelera hominum commorari. Unde in Evangelio: Usquequo sustinebo vos? Matth. 17. Et alibi: Oui intelligit sedebit, quoniam tempus pessimum est Thren. III; Mich. 2..

<sup>152</sup> + **9.3 Quia de malo,** etc. HIER. De malo in malum transeunt peccatores, etc., usque ad et lingua armantium in blasphemiam.

<sup>153</sup> + **9.4 Unusquisque,** etc. GREG. Callidus hostis cum a bonorum cordibus expelli se conspicit, eos qui ab illis valde diliguntur exquirat, et per eorum verba blandiens loquitur, qui plus cæteris amantur, ut dum vis amoris cor perforat, facile persuasionis gladius ad intimæ rectitudinis intima irrumpat. A proximo suo. HIER. Quia et inimici hominis domestici ejus Mich. 6.. Fratrum quoque gratia rara. Et tradet pater filium, et filius patrem. Et duo in tres, et tres in duo dividuntur Luc. 12..

<sup>154</sup> + **9.5 Ut inique agerent laboraverunt.** GREG. Ac si aperte diceretur: Qui amici esse veritatis sine labore potuerunt, ut peccent, laborant: cumque vivere simpliciter renuunt, laboribus exigunt ut moriantur.

<sup>155</sup> + **9.7 Et probabo eos.** HIER. In fornace tribulationis. Vasa figuli probat fornax Eccli. 27.: ut quidquid in nobis adulterinæ materiæ est, excoquatur. Argentum enim Domini igne examinatum, probatum terræ, purgatum septuplum Psal. 11..

ulciscetur anima mea? <sup>156</sup> <sup>10</sup> Super montes assumam fletum ac lamentum, et super speciosa deserti planctum, quoniam incensa sunt, eo quod non sit vir pertransiens, et non audierunt vocem possidentis: a volucre cæli usque ad pecora transmigraverunt et recesserunt. <sup>157</sup> <sup>11</sup> Et dabo Jerusalem in acervos arenæ, et cubilia draconum: et civitates Juda dabo in desolationem, eo quod non sit habitator. <sup>158</sup> <sup>12</sup> Quis est vir sapiens qui intelligat hoc, et ad quem verbum oris Domini fiat, ut annuntiet istud, quare perierit terra, et exusta sit quasi desertum, eo quod non sit qui pertranseat? <sup>13</sup> Et dixit Dominus: Quia dereliquerunt legem meam dedi eis, et non audierunt vocem meam, et non ambulaverunt in ea, <sup>14</sup> et abierunt post pravitatem cordis sui, et post Baalim, quod didicerunt a patribus suis: <sup>159</sup> <sup>15</sup> idcirco hæc dicit Dominus exercituum, Deus Israël: Ecce ego cibabo populum istum absinthio, et potum dabo eis aquam fellis. <sup>160</sup> <sup>16</sup> Et dispergam eos in gentibus quas non noverunt ipsi et patres eorum, et mittam post eos gladium, donec consumantur. <sup>161</sup> <sup>17</sup> Hæc dicit Dominus exercituum, Deus Israël: Contemplamini, et vocate lamentatrices, et veniant: et ad eas quæ sapientes sunt mittite, et properent: <sup>162</sup> <sup>18</sup> festinent, et assumant super nos lamentum: deducant oculi nostri lacrimas, et palpebræ nostræ defluant aquis. <sup>163</sup> <sup>19</sup> Quia vox lamentationis audita est de Sion: Quomodo vastati sumus, et confusi vehementer? quia dereliquimus terram; quoniam dejecta sunt tabernacula nostra. <sup>164</sup> <sup>20</sup> Audite ergo, mulieres, verbum Domini, et assumant aures vestræ sermonem oris ejus, et docete filias vestras lamentum, et unaquæque proximam suam planctum: <sup>165</sup> <sup>21</sup> quia ascendit mors per fenestras nostras; ingressa est domos nostras, disperdere parvulos deforis, juvenes de plateis.] <sup>166</sup> <sup>22</sup> Loquere: [Hæc dicit Dominus: Et cadet morticinum hominis quasi stercus super faciem regionis, et quasi fœnum post

<sup>156</sup> + **9.9 Nunquid super his** ID. Sæpe versiculum istum repetit, ut malis eorum enumeratis inferat se juste facere quod facit.

<sup>157</sup> + **9.10 Super montes.** ID. Tropologice. Super montes fletus assumitur, etc., usque ad qui possunt in sublime ascendere usque ad simplices, recesserunt a Deo.

<sup>158</sup> + **9.11 Et dabo Jerusalem.** ID. Cum ecclesiastici doctores deficiunt, etc., usque ad et qui dicit, Inhabitabo et inambulabo in eis Lev. 26..

<sup>159</sup> + **9.14 Cordis sui.** Non in corde nostro, sed in Domino confidendum est. Pravum est cor hominis, de quo exeunt pravæ cogitationes.

<sup>160</sup> + **9.15 Idcirco hæc dicit Dominus.** Potest de vicino tempore prophetari, quo capti sunt a Chaldæis: et proprie de hoc, quo in omnibus gentibus sunt dispersi et toto orbe divisi.

<sup>161</sup> + **9.16 Gladium.** HIER. Vel materialem vel spiritualem, quo dividuntur, ne in malum consentiant, sed in eo, quod mali sunt, dispereant.

<sup>162</sup> + **9.17 Et vocate.** Vocate lamentatrices propter futuram captivitatem, etc., usque ad voce modulata populum transfundant in lacrymas.

<sup>163</sup> + **9.18 Oculi nostri.** Propterea: vel ipse Deus adjungit se compatientis affectui, ut quod populus sustinet, sustinere et sentire ipse dicatur.

<sup>164</sup> + **9.19 Quomodo vastati.** Dicant hoc in persecutione credentium turbæ, quæ idcirco vastatæ sunt atque confusæ, quia dereliquerunt legem Domini, et deseruerunt tabernacula sua.

<sup>165</sup> + **9.20 Audite ergo.** Superius dixit: vocate lamentatrices, etc. Nunc quasi præsentibus alloquitur, in suggillationem sacerdotum, atque doctorum, et virorum omnium: ut illis a doctrina cessantibus, mulieres audiant verbum Domini.

<sup>166</sup> + **9.21 Quia ascendit.** Quia tanta erit fortitudo, et velocitas hostium, ut non expectent ostium, sed per fenestras, et tecta conscendant.

tergum metentis, et non est qui colligat. <sup>167</sup> <sup>23</sup> Hæc dicit Dominus: Non gloriatur sapiens in sapientia sua, et non gloriatur fortis in fortitudine sua, et non gloriatur dives in divitiis suis: <sup>24</sup> sed in hoc gloriatur, qui gloriatur, scire et nosse me, quia ego sum Dominus qui facio misericordiam, et iudicium, et justitiam in terra: hæc enim placent mihi, ait Dominus. <sup>168</sup> <sup>25</sup> Ecce dies veniunt, dicit Dominus, et visitabo super omnem qui circumcisum habet præputium, <sup>169</sup> <sup>26</sup> super Ægyptum, et super Juda, et super Edom, et super filios Ammon, et super Moab; et super omnes qui attonsi sunt in comam, habitantes in deserto: quia omnes gentes habent præputium, omnis autem domus Israël incircumcisi sunt corde.]

10[Audite verbum quod locutus est Dominus super vos, domus Israël. <sup>170</sup>  
<sup>2</sup> Hæc dicit Dominus: Juxta vias gentium nolite discere, et a signis cæli nolite metuere, quæ timent gentes, <sup>3</sup> quia leges populorum vanæ sunt. Quia lignum de saltu præcidit opus manus artificis in ascia: <sup>171</sup> <sup>4</sup> argento et auro decoravit illud: clavis et malleis compegit, ut non dissolvatur: <sup>172</sup> <sup>5</sup> in similitudinem palmæ fabricata sunt, et non loquentur: portata tollentur, quia incedere non valent. Nolite ergo timere ea, quia nec male possunt facere, nec bene. <sup>173</sup> <sup>6</sup> Non est similis tui, Domine: magnus es tu, et magnum nomen tuum in fortitudine. <sup>174</sup> <sup>7</sup> Quis non timebit te, o Rex gentium? tuum est enim decus: inter cunctos sapientes gentium, et in universis regnis eorum, nullus est similis tui. <sup>175</sup> <sup>8</sup> Pariter insipientes et fatui probabuntur: doctrina vanitatis eorum lignum est. <sup>176</sup> <sup>9</sup> Argentum involutum de Tharsis affertur, et aurum de Ophaz: opus artificis et manus ærarii. Hyacinthus et purpura indumentum eorum: opus artificum universa hæc. <sup>10</sup> Dominus autem Deus verus est, ipse Deus vivens, et rex sempiternus. Ab indignatione ejus commovebitur terra, et non sustinebunt gentes comminationem ejus. <sup>11</sup> Sic ergo dicetis eis: Dii qui cælos et terram non fecerunt, pereant de terra et de

<sup>167</sup> + **9.22 Loquere: Hæc dicit,** etc. HIER. Verbum Hebraicum quod tribus litteris scribitur, etc., usque ad ut non sit qui sepeliat corruentes.

<sup>168</sup> + **9.24 Qui facio misericordiam.** ID. Etsi quædam videantur injusta, omnia tamen, etc., usque ad Qui gloriatur, in Domino gloriatur II Cor. 10..

<sup>169</sup> + **9.25 Ecce dies venient.** ID. Multæ gentium, et maxime Judææ et Palæstinæ confines, etc., usque ad circumcisio enim non prodest, nisi legem observes.

<sup>170</sup> + **10.1 Audite verbum,** etc. HIER. Proprie adversus eos loquitur, etc., usque ad et ex causis cælestium moderentur terrena.

<sup>171</sup> + **10.3 Lignum.** ID. Quod de idolis diximus, etc., usque ad propria est et eorum qui ignorant Deum.

<sup>172</sup> + **10.4 Argento et auro.** ID. Ut fulgore materiæ simplices occupet et decipiat. Hic error usque ad nos pervenit, ut religionem in divitiis arbitremur.

<sup>173</sup> + **10.5 Nolite ergo timere.** Solent plerique gentium dæmones colere ne officiant, et alios exorare, ut proficiant: unde Virgilius, Æneid. 3: Nigram hiemi pecudem, zephyris felicibus albam.

<sup>174</sup> + **10.6 Non est similis tui.** Non est similis tui Domine, deorum, scilicet qui ab hæreticis finguntur.

<sup>175</sup> + **10.7 Tuum est enim.** HIER. Quamvis hæretici juxta sapientiam mundi, etc., usque ad Perdam sapientiam sapientium, et prudentiam prudentium reprobabo I Cor. 1..

<sup>176</sup> + **10.8 Involutum.** ID. Aliter non decipit; falsitas involvitur, veritas, etc., usque ad dum cæli sibi colorem ostendunt, et cælestia promittunt.



his quæ sub cælo sunt ! <sup>177</sup> <sup>12</sup> Qui facit terram in fortitudine sua, præparat orbem in sapientia sua, et prudentia sua extendit cælos: <sup>13</sup> ad vocem suam dat multitudinem aquarum in cælo, et elevat nebulas ab extremitatibus terræ: fulgura in pluviam facit, et educit ventum de thesauris suis. <sup>178</sup> <sup>14</sup> Stultus factus est omnis homo a scientia: confusus est artifex omnis in sculptili, quoniam falsum est quod conflavit, et non est spiritus in eis. <sup>179</sup> <sup>15</sup> Vana sunt, et opus risu dignum: in tempore visitationis suæ peribunt. <sup>180</sup> <sup>16</sup> Non est his similis pars Jacob: qui enim formavit omnia, ipse est, et Israël virga hæreditatis ejus: Dominus exercituum nomen illi. <sup>17</sup> Congrega de terra confusionem tuam, quæ habitas in obsidione: <sup>181</sup> <sup>18</sup> quia hæc dicit Dominus: Ecce ego longe projiciam habitatores terræ in hac vice, et tribulabo eos ita ut inveniantur. <sup>19</sup> Væ mihi super contritione mea: pessima plaga mea. Ego autem dixi: Plane hæc infirmitas mea est, et portabo illam. <sup>182</sup> <sup>20</sup> Tabernaculum meum vastatum est; omnes funiculi mei dirupti sunt: filii mei exierunt a me, et non subsistunt. Non est qui extendat ultra tentorium meum, et erigat pelles meas. <sup>183</sup> <sup>21</sup> Quia stulte egerunt pastores, et Dominum non quæsierunt: propterea non intellexerunt, et omnis grex eorum dispersus est. <sup>184</sup> <sup>22</sup> Vox auditionis ecce venit, et commotio magna de terra aquilonis: ut ponat civitates Juda solitudinem, et habitaculum draconum. <sup>185</sup> <sup>23</sup> Scio,

<sup>177</sup> + **10.11 Cælos et terram.** Quæ cooperatores Christi, qui dii vocantur et domini, per doctrinam ecclesiasticam partim fecerunt. Qui facit. ORIG., Homil. in Jer. Dominus qui facit terram in fortitudine, etc. Tres quodammodo virtutes Dei assumens propheta, etc., usque ad si vero cœlestia, thesaurizatorem suum ad propinquam sibi regionem subvehunt.

<sup>178</sup> + **10.13 Nebulas.** HIER. Quæ noverunt scilicet quibus pluvias suspendant et quibus impendant: Moyses quasi nubes loquebatur, qui dicebat, Exspectet terra, ut pluviam verba mea Exod. 9.. Et Isaias: Audi, cœlum, et auribus percipe, terra, quia Dominus locutus est Isa. 1.. Ab extremitatibus. Qui vult in vobis primus esse, sit omnium novissimus. Aliter enim nemo fit nubes. Fulgura in pluvias. ORIG. Fertur quod fulgura ex nubium vel imbrum collisione generantur, etc., usque ad Jeremias quoque et Baruch sibi colloquentes rutilantia fulgura mittunt. Et educit ventum de thesauris. ID. Ventus qui terras perflant in thesauris Dei non sunt, etc., usque ad inde oritur ut alius sit sapiens, alius fidelis et hujusmodi.

<sup>179</sup> + **10.14 Stultus.** HIER. Stultus comparatione Dei, etc., usque ad omnia enim contraria assumpsit Deus, ut contraria dissolvat. Falsum est. ORIG. Quod ordine suo fingit. Falsum est enim quod conflavit, sicut stultus est omnis homo a scientia, stultum etiam est quod facit. Non est spiritus. HIER. Notandum quod in hoc capite ventus et spiritus uno nomine apud Hebræos appellantur ruah.

<sup>180</sup> + **10.15 Vana sunt.** Aut enim rustica sunt, ut lignum, aut pulchro sermone tinnientia, ut argentum; aut de proprio sensu simulata mentiuntur, ut aurum. In tempore visitationis. Ad tempus valet hæresis, ut qui probati sunt manifesti fiant I Cor. 11.. Cum autem visitatio Dei venerit, et oculus ejus cuncta respexerit, omnia conticescent.

<sup>181</sup> + **10.17 Congrega.** HIER. Præcipitur Jerusalem ut quidquid substantiæ foris habet, in urbem munitissimam congreget, et longe obsidioni præparet alimenta. Non enim Deus, sicut prius, longe post futura minatus, sed statim futura.

<sup>182</sup> + **10.19 Væ mihi,** etc. ID. Conqueritur Jerusalem quod vehementer afflicta sit et plaga insanabili.

<sup>183</sup> + **10.20 Tabernaculum.** ID. Plangit Jerusalem tam facilem factam subversionem suam, etc., usque ad magna pars eorum interfecta atque deleta est.

<sup>184</sup> + **10.21 Grex.** ID. Septuaginta: pecora. Quod juxta historiam stare non potest: in tam longa enim obsidione pecora non durassent.

<sup>185</sup> + **10.22 Vox auditionis.** ID. Hæc omnia quæ præteritus et præsens sermo describit, etc., usque ad qui stulte egerunt, et Dominum non quæsierunt. Draconum. Vel Struthionum.

Domine, quia non est hominis via ejus, nec viri est ut ambulet, et dirigat gressus suos. <sup>186</sup> <sup>24</sup> Corripe me, Domine, verumtamen in iudicio, et non in furore tuo, ne forte ad nihilum redigas me. <sup>187</sup> <sup>25</sup> Effunde indignationem tuam super gentes quæ non cognoverunt te, et super provincias quæ nomen tuum non invocaverunt: quia comederunt Jacob, et devoraverunt eum, et consumpserunt illum, et decus ejus dissipaverunt.]

11 Verbum quod factum est a Domino ad Jeremiam, dicens: <sup>188</sup> <sup>2</sup> [Audite verba pacti hujus, et loquimini ad viros Juda, et ad habitatores Jerusalem, <sup>189</sup> <sup>3</sup> et dices ad eos: Hæc dicit Dominus Deus Israël: Maledictus vir qui non audierit verba pacti hujus <sup>190</sup> <sup>4</sup> quod præcepi patribus vestris, in die qua eduxi eos de terra Ægypti, de fornace ferrea, dicens: Audite vocem meam, et facite omnia quæ præcipio vobis, et eritis mihi in populum, et ego ero vobis in Deum: <sup>191</sup> <sup>5</sup> ut suscitem juramentum quod juravi patribus vestris, daturum me eis terram fluentem lacte et melle, sicut est dies hæc.] Et respondi, et dixi: Amen, Domine. <sup>192</sup> <sup>6</sup> Et dixit Dominus ad me: [Vociferare omnia verba hæc in civitatibus Juda, et foris Jerusalem, dicens: Audite verba pacti hujus, et facite illa, <sup>7</sup> quia contestans contestatus sum patres vestros, in die qua eduxi eos de terra Ægypti, usque ad diem hanc: mane consurgens contestatus sum, et dixi: Audite vocem meam. <sup>193</sup> <sup>8</sup> Et non audierunt, nec inclinaverunt aurem suam, sed abierunt, unusquisque in pravitate cordis sui mali: et induxi super eos omnia verba pacti hujus quod præcepi ut facerent,

Symmachus, Syrenarum, ut pro hominibus habitent scilicet dracones, et omnia venenata: vel struthiones, quæ solitudini familiares in desertis nascuntur et nutriuntur. Aut Syrenes, scilicet quædam monstra et dæmonum phantasmata.

<sup>186</sup> + **10.23 Scio**, etc. Erubescant, qui aiunt unumquemque suo regi arbitrio. Non est enim hominis via ejus, etc.; unde David: A Domino gressus hominis dirigetur Psal. 36..

<sup>187</sup> + **10.24 In iudicio, et non in furore**. HIER. Quasi, quæ patimur, justa sunt, etc., usque ad gentes autem, quæ non cognoverunt te, non iudicium, sed indignationem merentur.

<sup>188</sup> + **11.1 Verbum**. ORIG., Hom. in Ezech. Quod scilicet in principio apud Deum, etc., usque ad et discipulis ait: Vobiscum sum usque ad consummationem sæculi Matth. 28.. Verbum quod factum est. HIER. Non est positum in titulo, quo tempore, etc., usque ad ad viros Juda et Jerusalem sermo dirigitur.

<sup>189</sup> + **11.2 Audite**, etc., Viros Juda, etc. Alleg. Christianos scilicet, Christus enim de Juda ortus est. De quo vere dicitur: Juda, te laudabunt fratres tui: manus tuæ super dorsum inimicorum tuorum Gen. XLIX., etc. Jerusalem. Ecclesiæ, quæ est civitas regis magni, et visio pacis. Pax enim in ea multiplicatur et cernitur.

<sup>190</sup> + **11.3 Maledictus**. ORIG. Judæi enim maledicti sunt, qui non audierunt testamentum Dei, quando eduxit eos de terra Ægypti. Nos autem qui in Christo credimus, testamento ejus obedimus quod per Moysen traditur: et nobis hoc dicitur ne maledicti simus.

<sup>191</sup> + **11.4 Eduxi eos**. HIER., ORIG. Nos quoque eduxit Deus de Ægypto et fornace ferrea, etc., usque ad in lege obedientia mandatorum, hic similitudo Dei. Et eritis. Non est Deus omnium, sed eorum tantum quibus se largitur; unde: Ego sum Dominus Deus tuus sanctus Israël Ezech. 14.. Et alibi quoque inquit, Ero Deus eorum Exod. 3. Et, Ego sum Deus Abraham, Deus Isaac et Deus Jacob. Quod exponens Salvator ait: Deus autem non est mortuorum, sed vivorum Luc. 29.. Mortuus est, scilicet peccator.

<sup>192</sup> + **11.5 Lacte et melle**. HIER. Melle et lacte rerum omnium abundantiam significat, etc., usque ad vel, fiat, Domine, id est, semper maneat quod dedisti.

<sup>193</sup> + **11.7 Quia contestans**, etc. Usque, ut facerent hæc, in Septuaginta non habentur. Quod sequitur: Et non fecerunt, ab ipsis: in fine superioris capituli positum est. Audite verba pacti hujus, etc.

et non fecerunt.] <sup>9</sup> Et dixit Dominus ad me: [Inventa est conjuratio in viris Juda et in habitatoribus Jerusalem. <sup>194</sup> <sup>10</sup> Reversi sunt ad iniquitates patrum suorum priores, qui noluerunt audire verba mea: et hi ergo abierunt post deos alienos, ut servirent eis: irritum fecerunt domus Israël et domus Juda pactum meum quod pepigi cum patribus eorum. <sup>11</sup> Quam ob rem hæc dicit Dominus: Ecce ego inducam super eos mala de quibus exire non poterunt: et clamabunt ad me, et non exaudiam eos. <sup>195</sup> <sup>12</sup> Et ibunt civitates Juda et habitatores Jerusalem, et clamabunt ad deos quibus libant, et non salvabunt eos in tempore afflictionis eorum. <sup>13</sup> Secundum numerum enim civitatum tuarum erant dii tui, Juda: et secundum numerum viarum Jerusalem, posuisti aras confusionis, aras ad libandum Baalim. <sup>196</sup> <sup>14</sup> Tu ergo noli orare pro populo hoc, et ne assumes pro eis laudem et orationem, quia non exaudiam in tempore clamoris eorum ad me, in tempore afflictionis eorum. <sup>197</sup> <sup>15</sup> Quid est, quod dilectus meus in domo mea fecit scelera multa? numquid carnes sanctæ auferent a te malitias tuas, in quibus gloriata es? <sup>198</sup> <sup>16</sup> Olivam uberem, pulchram, fructiferam, speciosam, vocavit Dominus nomen tuum: ad vocem loquelæ, grandis exarsit ignis in ea, et combusta sunt fruteta ejus. <sup>199</sup> <sup>17</sup> Et Dominus exercituum, qui plantavit te, locutus est super te malum, pro malis domus Israël, et domus Juda, quæ fecerunt sibi ad irritandum me, libantes Baalim.] <sup>200</sup> <sup>18</sup> [Tu autem, Domine, demonstrasti mihi, et cognovi: tunc ostendisti mihi studia eorum. <sup>201</sup> <sup>19</sup> Et ego quasi agnus mansuetus, qui portatur ad victimam: et non cognovi quia cogitaverunt super me consilia, dicentes: Mittamus lignum in panem ejus, et eradamus eum de terra viventium, et nomen ejus non memoretur amplius. <sup>20</sup> Tu autem, Domine Sabaoth, qui judicas juste, et

<sup>194</sup> + **11.9 Inventa est conjuratio.** ORIG. Inventa est colligatio in viris Juda, etc. Si peccaverimus, etc., usque ad et efficietis filius Dei in Christo Jesu.

<sup>195</sup> + **11.11 Clamabunt.** In necessitatibus, et non exaudiam, quia me audire noluerunt. Quod et Saul passus est, etc., usque ad quod nunc dicitur ad Judam et Jerusalem pertinet quibus instat captivitas.

<sup>196</sup> + **11.13 Secundum numerum.** ID. In libro Regum et Paralipomenorum invenimus Judam et Jeremiam multo pejora, etc., usque ad tot in confusionem suam aras haberent, quibus idolis immolarent.

<sup>197</sup> + **11.14 Tu ergo.** ID. Præcipitur prophetæ, ne pro eis oret in quos, etc., usque ad ex his discimus, frustra pro aliquo rogari, qui non meretur accipere.

<sup>198</sup> + **11.15 Quid est,** etc. ID. Dicamus hoc principibus ecclesiarum et divitibus, cum aliena rapiant et malitias cordis sui non auferant, putant se Dei mereri clementiam. Nunquid carnes sanctæ. At nunc publice offerentium nomina recitantur, et redemptio peccatorum in laudem mutatur: nec evangelicæ viduæ memoria celebratur, quæ plus omnibus in gazophylacium misit.

<sup>199</sup> + **11.16 Ad vocem loquelæ.** HIER. Quasi dicat: Exaltatus per superbiam, non humiliter creatorem et dominatorem tuum intellexisti, sed contra Dominum granditer locutus, igne ejus succensus redigeris in nihilum.

<sup>200</sup> + **11.17 Et Dominus.** Quasi: Olivam uberem, pulchram, fructiferam vocavit te dominus tuus atque plantavit: sed propter vocem loquelæ grandis flamma ejus descendit in te.

<sup>201</sup> + **11.18 Tu autem.** HIER. Judæi et nostri judaizantes ad personam Jeremiæ hoc referunt, etc., usque ad nisi forte dicant populum cogitasse, et non fecisse? ORIG. Tu autem, Domine, etc. Vel notum fac mihi, Domine, et cognoscam Psal. 142.. Juxta Psalmistam, Dominus docet hominem scientiam Ibid. 93.. Unde: Nolite vocari magistri super terram, unus quippe est magister vester qui in cœlis est Matth. 23., qui, scilicet erudit homines, etc., usque ad cum autem venit lignum Jesu Christi, et sermo Salvatoris in eam descendit, dulcoratur.

probas renes et corda, videam ultionem tuam ex eis: tibi enim revelavi causam meam. <sup>202</sup> <sup>21</sup> Propterea hæc dicit Dominus ad viros Anathoth, qui quæerunt animam tuam, et dicunt: Non prophetabis in nomine Domini, et non morieris in manibus nostris: <sup>22</sup> propterea hæc dicit Dominus exercituum: Ecce ego visitabo super eos: juvenes morientur in gladio; filii eorum et filia eorum morientur in fame. <sup>203</sup> <sup>23</sup> Et reliquæ non erunt ex eis: inducam enim malum super viros Anathoth, annum visitationis eorum.]

12[Justus quidem tu es, Domine, si disputem tecum: verumtamen justa loquar ad te: Quare via impiorum prosperatur; bene est omnibus qui prævaricantur et inique agunt? <sup>204</sup> <sup>2</sup> Plantasti eos, et radicem miserunt: proficiunt, et faciunt fructum: prope es tu ori eorum, et longe a renibus eorum. <sup>3</sup> Et tu, Domine, nosti me, vidisti me, et probasti cor meum tecum. Congrega eos quasi gregem ad victimam, et sanctifica eos in die occisionis. <sup>205</sup> <sup>4</sup> Usquequo lugebit terra, et herba omnis regionis siccabitur, propter malitiam habitantium in ea? Consumptum est animal, et volucre, quoniam dixerunt: Non videbit novissima nostra. <sup>5</sup> Si cum peditibus currens laborasti, quomodo contendere poteris cum equis? cum autem in terra pacis securus fueris, quid facies in superbia Jordanis? <sup>206</sup> <sup>6</sup> Nam et fratres tui, et domus patris tui, etiam ipsi pugnaverunt adversum te, et clamaverunt post te plena voce: ne credas eis, cum locuti fuerint tibi bona.] <sup>207</sup> <sup>7</sup> [Reliqui domum meam; dimisi hæreditatem meam: dedi dilectam animam meam in manu inimicorum ejus. <sup>208</sup> <sup>8</sup> Facta est mihi hæreditas mea quasi leo in silva: dedit contra me vocem, ideo odivi eam. <sup>209</sup> <sup>9</sup> Numquid avis discolor hæreditas mea mihi? numquid avis tinctorum per totum? Venite, congregamini, omnes bestia terræ: properate ad devorandum. <sup>210</sup> <sup>10</sup> Pastores multi

<sup>202</sup> + **11.20 Tibi enim.** HIER. Quia non merito meo, sed eorum scelere crucifigor. Venit princeps mundi hujus, et in me non habet quidquam Joan. 14..

<sup>203</sup> + **11.22 Propterea hæc dicit Dominus.** Videtur hoc superiori sententiæ contrarium, in qua, etc., usque ad et quod in præsentia in Jeremia completur, hoc in futurum de Domino prophetatur.

<sup>204</sup> + **12.1 Justus quidem,** etc. HIER. Contra omnes inique agentes disputatio est, sicut in illo Psalmista: Quam bonus Israël Deus his qui recti sunt Psal. 72., etc. Sed præcipue contra hæreticos.

<sup>205</sup> + **12.3 Et tu, Domine.** ID. Ac si dicat: Non est scandalum, si impii vel hæretici pro tempore florent, etc., usque ad cum fuerint, scilicet, ecclesiastico jugulati mucrone.

<sup>206</sup> + **12.5 Si cum pedibus.** Quasi dicat: Si captivitas vicinarum gentium te fatigavit, Moabitarum scilicet, Philistiim, Ammonitarum, Idumæorum, qui propter difficultatem locorum non tam pugna quam latrocinio apti sunt. Quomodo. Id est, quid facies, cum ad captivitatem in Chaldæam veneris? Chaldæi enim et Persæ equis gaudent.

<sup>207</sup> + **12.6 Nam et fratres,** etc. HIER. Potest hoc de Christo intelligi, contra quem fratres clamaverunt: Crucifige eum: Non habemus regem nisi Cæsarem Joan. 19..

<sup>208</sup> + **12.7 Reliqui domum.** Unde, Relinquetur vobis domus vestra deserta Luc. 13.: Et: Surgite, eamus hinc Joan. 14..

<sup>209</sup> + **12.8 Hæreditas mea,** etc. ORIG. Non est mirandum si tunc truci belluæ comparata sit hæreditas, cum usque hodie sint leones in sylva anathematizantes Christum, et blasphemantes et fidelibus insidiantes.

<sup>210</sup> + **12.9 Nunquid avis discolor?** Septuaginta: Nunquid spelunca hienæ hæreditas mea mihi? HIER. Hiena nocturna bestia mortuorum devorat cadavera, et de sepulcris effodit corpora et cunctis vescitur sordibus, cujus immunditiæ Israël comparatur.

demoliti sunt vineam meam, conculcaverunt partem meam, dederunt portionem meam desiderabilem in desertum solitudinis. <sup>211</sup> <sup>11</sup> Posuerunt eam in dissipationem, luxitque super me: desolatione desolata est omnis terra, quia nullus est qui recogitet corde. <sup>212</sup> <sup>12</sup> Super omnes vias deserti venerunt vastatores, quia gladius Domini devorabit: ab extremo terræ usque ad extremum ejus, non est pax universæ carni. <sup>213</sup> <sup>13</sup> Seminaverunt triticum, et spinas messuerunt: hæreditatem acceperunt, et non eis proderit. Confundemini a fructibus vestris propter iram furoris Domini. <sup>214</sup> <sup>14</sup> Hæc dicit Dominus adversum omnes vicinos meos pessimos, qui tangunt hæreditatem quam distribui populo meo Israël: Ecce ego evellam eos de terra sua, et domum Juda evellam de medio eorum. <sup>215</sup> <sup>15</sup> Et cum evulsero eos, convertar, et miserebor eorum, et reducam eos: virum ad hæreditatem suam, et virum in terram suam. <sup>16</sup> Et erit: si eruditi didicerint vias populi mei, ut jurent in nomine meo: Vivit Dominus ! sicut docuerunt populum meum jurare in Baal, ædificabuntur in medio populi mei. <sup>17</sup> Quod si non audierint, evellam gentem illam evulsione et perditione, ait Dominus.]

13Hæc dicit Dominus ad me: Vade, et posside tibi lumbare lineum, et pones illud super lumbos tuos, et in aquam non inferes illud. <sup>216</sup> <sup>2</sup> Et possedi lumbare juxta verbum Domini, et posui circa lumbos meos. <sup>3</sup> Et factus est sermo Domini ad me secundo, dicens: <sup>4</sup> Tolle lumbare quod possedisti, quod est circa lumbos tuos: et surgens vade ad Euphraten, et absconde ibi illud in foramine petræ. <sup>5</sup> Et abii, et abscondi illud in Euphrate, sicut præceperat mihi Dominus. <sup>217</sup> <sup>6</sup> Et factum est post dies plurimos, dixit Dominus ad me: Surge, vade ad Euphraten, et tolle inde lumbare quod præcepi tibi ut absconderes illud ibi. <sup>7</sup> Et abii ad Euphraten, et fodi, et tuli lumbare de loco ubi absconderam illud: et ecce computruerat lumbare, ita ut nulli usui aptum esset. <sup>218</sup> <sup>8</sup> Et factum est verbum Domini ad me, dicens:

<sup>211</sup> + **12.10 Pastores multi**, etc. HIER. Audiant hæc, qui principes volunt esse, etc., usque ad qui populum Dei dissipaverunt.

<sup>212</sup> + **12.11 Desolatione**. ORIG. Quoniam Judæi compleverunt mensuram patrum suorum et addiderunt ad prophetarum occisionem, etiam Salvatoris, etc, usque ad Seminamus non in carne, sed in spiritu, ut non metamus corruptionem de carne, sed de spiritu vitam æternam I Cor. 17..

<sup>213</sup> + **12.12 Non est pax**, etc. HIER. Caro pacem Dei in se recipere non potest. Sapientia enim carnis inimica est Deo, et qui in carne sunt, Deo placere non possunt Rom. 8..

<sup>214</sup> + **12.13 Seminaverunt**. Hoc quoque ecclesiasticis dicitur, etc., usque ad et: Cui plus committitur, plus ab eo exigitur Sap. 6.. A fructibus. Septuaginta. A gloriatione vestra. HIER. Vestibus, scilicet, pretiosis, domibus exornatis, possessionibus multis, sæculari sapientia: Qui autem gloriatur, in Domino gloriatur I Cor. 1.. Et, in cruce Domini nostri Jesu Christi Gal. 6.. Et, in infirmitatibus suis ut inhabitet in eo virtus Christi II Cor. 11..

<sup>215</sup> + **12.14 Vicinos**. HIER. Ad litteram, Idumæos, Philistiim, Moab, et Ammon. Allegorice. Hæreticos qui Christiani dicuntur, et magis terræ sanctæ fiunt affines quam habitatores.

<sup>216</sup> + **13.1 Hæc dicit Dominus**. HIER. Vir sanctus lumbare Dei dicitur, qui de limo terræ assumptus est, etc., usque ad multitudine innumerabilium gentium quodammodo absorptus et nihil reputatus.

<sup>217</sup> + **13.5 Et abscondi**, etc. ORIG. Judæi indigni exstiterunt Deo, et projecti sunt ab eo, etc., usque ad si non adhærens Domino, uno spiritu fuerit in Christo.

<sup>218</sup> + **13.7 Et tuh lumbare**. HIER. In captivitate. Significat autem quod propheta, etc., usque ad ideo æterna perditione contabescit.

<sup>9</sup> [Hæc dicit Dominus: Sic putrescere faciam superbiam Juda, et superbiam Jerusalem multam: <sup>10</sup> populum istum pessimum qui nolunt audire verba mea, et ambulant in pravitate cordis sui, abieruntque post deos alienos ut servirent eis et adorarent eos: et erunt sicut lumbare istud, quod nulli usui aptum est. <sup>11</sup> Sicut enim adhæret lumbare ad lumbos viri, sic agglutinavi mihi omnem domum Israël, et omnem domum Juda, dicit Dominus, ut essent mihi in populum, et in nomen, et in laudem, et in gloriam: et non audierunt.] <sup>12</sup> Dices ergo ad eos sermonem istum: [Hæc dicit Dominus Deus Israël: Omnis laguncula implebitur vino.] Et dicent ad te: [Numquid ignoramus quia omnis laguncula implebitur vino?] <sup>219</sup> <sup>13</sup> Et dices ad eos: [Hæc dicit Dominus: Ecce ego implebo omnes habitatores terræ hujus, et reges qui sedent de stirpe David super thronum ejus, et sacerdotes, et prophetas, et omnes habitatores Jerusalem, ebrietate. <sup>14</sup> Et dispergam eos virum a fratre suo, et patres et filios pariter, ait Dominus. Non parcam, et non concedam: neque miserebor, ut non disperdam eos. <sup>220</sup> <sup>15</sup> Audite, et auribus percipite: nolite elevari, quia Dominus locutus est. <sup>16</sup> Date Domino Deo vestro gloriam antequam contenebrescat, et antequam offendant pedes vestri ad montes caliginosos: exspectabitis lucem, et ponet eam in umbram mortis, et in caliginem. <sup>221</sup> <sup>17</sup> Quod si hoc non audieritis, in abscondito plorabit anima mea a facie superbiæ: plorans plorabit, et deducet oculus meus lacrimam, quia captus est grex Domini. <sup>222</sup> <sup>18</sup> Dic regi et dominatrici: Humiliamini, sedete, quoniam descendit de capite vestro corona gloriæ vestræ. <sup>223</sup> <sup>19</sup> Civitates austri clausæ sunt, et non est qui aperiat: translata est omnis Juda transmigratione perfecta. <sup>20</sup> Levate oculos vestros et videte, qui venitis ab aquilone: ubi est grex qui datus est tibi, pecus inclytum tuum? <sup>21</sup> Quid dices cum visitaverit te? tu enim docuisti eos adversum te, et erudisti in caput tuum. Numquid non dolores apprehendent te, quasi mulierem parturientem? <sup>224</sup> <sup>22</sup> Quod si dixeris in corde tuo: Quare venerunt mihi hæc? propter multitudinem iniquitatis tuæ revelata sunt verecundiora tua, pollutæ sunt

<sup>219</sup> + **13.12 Omnis laguncula.** ID. Hæc est ebrietas, qua obliviscimur præceptorum Dei, et vitiis atque peccatis, etc., usque ad Miser ego homo, quis me liberabit de corpore mortis hujus? Rom. 7.

<sup>220</sup> + **13.14 Et dispergam.** ID. Rationabili ira, ut reducam ab errore, doloribus et tormentis, etc., usque ad et omnis populus Jerusalem calice Babylonis sit inebriandus et captivitate obruendus.

<sup>221</sup> + **13.16 Date Domino,** etc. ID. Ad pœnitentiam provocat, antequam ducantur in Babylonem, etc., usque ad et Sophonias: Dies tenebrarum et turbinis Soph. 1..

<sup>222</sup> + **13.17 Quod si hoc non audieris.** ID. Dicamus Judæis et nostris Judaizantibus, qui litteram, etc., usque ad plorabit anima prophetæ a facie superbiæ eorum. Captus est. A diabolo vel Nabuchodonosor, vel contritus. Aliquando Israël fuit grex Domini. Sed quia indignos se judicaverunt salute, conversus est sermo ad Gentes. Caveat oleaster in bonam olivam contra naturam insertus, ne et ipse conteratur.

<sup>223</sup> + **13.18 Dic regi et dominatrici.** HIER. Verbum Hæbræum Gebira, Aquila et Symmachus Dominatricem et dominam interpretati sunt, etc., usque ad et quod quidam angeli passi sunt pro redemptione dæmonum, et post judicium portas inferni claudi et nullum ibi puniri, quod Origenes sentire videtur, quod frivolum est.

<sup>224</sup> + **13.21 Tu enim docuisti eos,** etc. ID. Quando Ezechias ostendit thesaurum nuntio regis Babylonis. Tu enim, etc. Audiat hoc Ecclesia negligens, quæ docet adversarios suos quomodo possint eam spirituali captivitate comprehendere, et pecus ejus bestiali crudelitate lacerare.

plantæ tuæ. <sup>225</sup> <sup>23</sup> Si mutare potest Æthiops pellem suam, aut pardus varietates suas, et vos poteritis benefacere, cum didiceritis malum. <sup>226</sup> <sup>24</sup> Et disseminabo eos quasi stipulam quæ vento raptatur in deserto. <sup>25</sup> Hæc sors tua, parsque mensuræ tuæ a me, dicit Dominus, quia oblita es mei, et confisa es in mendacio. <sup>26</sup> Unde et ego nudavi femora tua contra faciem tuam, et apparuit ignominia tua: <sup>227</sup> <sup>27</sup> adulteria tua, et hinnitus tuus, scelus fornicationis tuæ: super colles in agro vidi abominationes tuas. Væ tibi, Jerusalem ! non mundaberis post me: usquequo adhuc?] <sup>228</sup>

14 Quod factum est verbum Domini ad Jeremiam, de sermonibus siccitatis. <sup>229</sup> <sup>2</sup> [Luxit Judæa, et portæ ejus corruerunt, et obscuratæ sunt in terra, et clamor Jerusalem ascendit. <sup>3</sup> Majores miserunt minores suos ad aquam: venerunt ad hauriendum. Non invenerunt aquam: reportaverunt vasa sua vacua. Confusi sunt, et afflicti, et operuerunt capita sua. <sup>4</sup> Propter terræ vastitatem, quia non venit pluvia in terram, confusi sunt agricolæ: operuerunt capita sua. <sup>230</sup> <sup>5</sup> Nam et cerva in agro peperit, et reliquit, quia non erat herba. <sup>231</sup> <sup>6</sup> Et onagri steterunt in rupibus; traxerunt ventum quasi dracones: defecerunt oculi eorum, quia non erat herba. <sup>232</sup> <sup>7</sup> Si iniquitates nostræ responderint nobis, Domine, fac propter nomen tuum: quoniam multæ sunt aversiones nostræ: tibi peccavimus. <sup>8</sup> Exspectatio Israël, salvator ejus in tempore tribulationis, quare quasi colonus futurus es in terra, et quasi viator declinans ad manendum? <sup>233</sup> <sup>9</sup> quare futurus es velut vir vagus, ut

<sup>225</sup> + **13.22 Propter multitudinem**, etc. ID. Hinc discimus, quandiu peccata sunt minora, etc., usque ad Isti resurgent in vitam æternam, et illi in opprobrium et confusionem sempiternam Dan. 12..

<sup>226</sup> + **13.23 Si mutare potest**, etc. ID. Hoc testimonio utuntur, qui diversas naturas asserere conantur, etc., usque ad Non igitur gloriatur sapiens in sapientia sua, vel fortis in fortitudine sua Jer. 9., et hujusmodi, quæ in omnibus operatur virtus Christi.

<sup>227</sup> + **13.26 Nudavi**. ID. Rogemus Christum, ut nec in præsentem, nec in futuro revelet posteriora nostra, sed deleat iniquitates nostras, et scelera nostra apparere non sinat.

<sup>228</sup> + **13.27 Super colles**. Allegorice. In collibus et in agris fornicatur, et nunquam mundatur, qui erecta cervice per superbiam, non humiliatur sub potenti manu Dei, sed confidit in sceleribus suis.

<sup>229</sup> + **14.1 Et portæ ejus**, etc. HIER. Sensus, scilicet, per quos animo concipitur disciplina, etc., usque ad et usque in præsentem diem sterilitas pluviarum non solum frugum, sed et bibendi facit inopiam.

<sup>230</sup> + **14.4 Agricolæ**. Quorum unus ait: Dei agricultura estis I Cor. 3.. Et alibi: Dei cooperatores sumus.

<sup>231</sup> + **14.5 Nam et cerva**, etc. GREG. Nam et cerva (vel cervæ) in agro peperit (vel pepererunt). Hæc sententia de doctoribus genitos filios incaute deserentibus dicitur, etc., usque ad scriptum est, Invicem onera vestra portate, et sic adimplebitis legem Christi Gal. 6..

<sup>232</sup> + **14.6 Traxerunt ventum**. ID. Perversi quasi dracones trahunt ventum, cum malitiosa superbia inflantur. Defecerunt oculi. HIER. Claram lucem cernere non valentes, etc., usque ad sunt qui discant, non qui doceant.

<sup>233</sup> + **14.8 Exspectatio Israël**. ID. Dicamus et nos in tempore siccitatis et aquæ penuria, Tibi peccavimus, et malum coram te fecimus Psal. 50., tuum præstolamur adventum, qui salvas Israël, non suo merito, sed tua gratia. Quasi colonus. GREG. Qui enim ut Dominus auditus non est, non possessor agri, sed colonus, etc., usque ad et viatoris prætereuntis, qui negligit ea quæ occurrunt in viis. Et quasi viator. HIER. Judæi hunc locum sic exponunt: Quare segregas te, etc., usque ad relicto Israël tendat ad gentes, ut de loco ad locum, de populo ad populum, de templo ad Ecclesiam.

fortis qui non potest salvare? Tu autem in nobis es, Domine, et nomen tuum invocatum est super nos: ne derelinquas nos. <sup>10</sup> Hæc dicit Dominus populo huic, qui dilexit movere pedes suos, et non quievit, et Domino non placuit: Nunc recordabitur iniquitatum eorum, et visitabit peccata eorum. <sup>234</sup> <sup>11</sup> Et dixit Dominus ad me: Noli orare pro populo isto in bonum. <sup>235</sup> <sup>12</sup> Cum jejunaverint, non exaudiam preces eorum, et si obtulerint holocaustomata et victimas, non suscipiam ea: quoniam gladio, et fame, et peste consumam eos.] <sup>13</sup> Et dixi: [A, a, a, Domine Deus: prophetæ dicunt eis: Non videbitis gladium, et fames non erit in vobis: sed pacem veram dabit vobis in loco isto.] <sup>236</sup> <sup>14</sup> Et dicit Dominus ad me: [Falso prophetæ vaticinantur in nomine meo: non misi eos, et non præcepi eis, neque locutus sum ad eos. Visionem mendacem, et divinationem, et fraudulentiam, et seductionem cordis sui, prophetant vobis. <sup>15</sup> Idcirco hæc dicit Dominus de prophetis qui prophetant in nomine meo, quos ego non misi, dicentes: Gladius et fames non erit in terra hac: In gladio et fame consumentur prophetæ illi. <sup>237</sup> <sup>16</sup> Et populi quibus prophetant erunt projecti in viis Jerusalem præ fame et gladio, et non erit qui sepeliat eos: ipsi et uxores eorum, filii et filiæ eorum: et effundam super eos malum suum. <sup>17</sup> Et dices ad eos verbum istud: Deducant oculi mei lacrimam per noctem et diem, et non taceant, quoniam contritione magna contrita est virgo filia populi mei, plaga pessima vehementer. <sup>238</sup> <sup>18</sup> Si egressus fuero ad agros, ecce occisi gladio: et si introiero in civitatem, ecce attenuati fame. Propheta quoque et sacerdos abierunt in terram quam ignorabant. <sup>239</sup> <sup>19</sup> Numquid projiciens abjecisti Judam? aut Sion abominata est anima tua? quare ergo percussisti nos ita ut nulla sit sanitas? Exspectavimus pacem, et non est bonum: et tempus curationis, et ecce turbatio. <sup>240</sup> <sup>20</sup> Cognovimus, Domine, impietates nostras, iniquitates patrum nostrorum, quia peccavimus tibi. <sup>241</sup> <sup>21</sup> Ne des nos in opprobrium,

<sup>234</sup> + **14.10 Movere pedes suos**, etc. ID. Notandum in Scripturis sanctis quod semper peccatorum pedes moveantur, etc., usque ad et qui turrim Babylonis ædificaverunt, ab Oriente moverunt pedes suos.

<sup>235</sup> + **14.11 Noli orare**. ID. Stultum est orare pro eo qui peccaverit ad mortem, etc., usque ad qui enim semel gladio et fami et pesti destinatur, nullis precibus eruitur: unde, Noli orare, etc.

<sup>236</sup> + **14.13 Prophetæ dicunt eis**, etc. Audiant hæc magistri qui peccantibus et in vitiis permanentibus prospera pollicentur. Multi tales hodie sunt, qui non curant undecunque sit oblatio, consulentes suæ avaritiæ; ut quidam fecisse dicitur, qui persuadebat ut secreta confiterentur peccata coram Deo ante altare, et ipse ex adverso sedebat: et audiebat, et hanc securitatem dabat. Tantummodo largas eleemosynas facite et sufficit.

<sup>237</sup> + **14.15 Hæc dicit Dominus**. HIER. Caveat pseudoprophetæ, ne qui decipiendo lactant populum Dei, et ipsi pereant cum deceptis, et jaceant insepulti, et non sit qui operiat ignominiam eorum pulvere poenitentiae.

<sup>238</sup> + **14.17 Deducant oculi mei**. ID. Dupliciter hic locus intelligitur. Quod vel ipse Deus, etc., usque ad virgo contrita, filia percussa, populus deletus.

<sup>239</sup> + **14.18 Si egressus**, etc. ID. Audiant hoc prophetæ nostri et sacerdotes, quod nec foris nec intus, etc., usque ad qui prophetabant prospera, et legis mandata aperire debebant, abierunt in terram quam ignorabant. Id est, captivati sunt.

<sup>240</sup> + **14.19 Nunquid projiciens**, etc. HIER. Ut ubi fuerat cultus Dei et tranquillitas, ibi sit seditio et hostilis fremitus. Si quando nostra Sion nosterque Judas abominabilis abjicitur, nequaquam miremur, sed dicamus quod sequitur.

<sup>241</sup> + **14.20 Cognovimus, Domine**, etc. ID. Quasi: Et nos et patres nostri eadem dementia Dei



propter nomen tuum, neque facias nobis contumeliam solii gloriæ tuæ: recordare, ne irritum facias fœdus tuum nobiscum. <sup>242</sup> <sup>22</sup> Numquid sunt in sculptilibus gentium qui pluant? aut cæli possunt dare imbres? nonne tu es Dominus Deus noster, quem exspectavimus? tu enim fecisti omnia hæc.] <sup>243</sup>

15Et dixit Dominus ad me: [Si steterit Moyses et Samuel coram me, non est anima mea ad populum istum: ejice illos a facie mea, et egrediantur. <sup>244</sup> <sup>2</sup> Quod si dixerint ad te: Quo egrediemur? dices ad eos: Hæc dicit Dominus: Qui ad mortem, ad mortem, et qui ad gladium, ad gladium, et qui ad famem, ad famem, et qui ad captivitatem, ad captivitatem. <sup>3</sup> Et visitabo super eos quatuor species, dicit Dominus: gladium ad occisionem, et canes ad lacerandum, et volatilia cæli et bestias terræ ad devorandum et dissipandum. <sup>245</sup> <sup>4</sup> Et dabo eos in fervorem universis regnis terræ, propter Manassen filium Ezechiaë regis Juda, super omnibus quæ fecit in Jerusalem. <sup>246</sup> <sup>5</sup> Quis enim miserebitur tui, Jerusalem, aut quis contristabitur pro te? aut quis ibit ad rogandum pro pace tua? <sup>247</sup> <sup>6</sup> Tu reliquisti me, dicit Dominus; retrorsum abiisti: et extendam manum meam super te, et interficiam te: laboravi rogans. <sup>248</sup> <sup>7</sup> Et dispergam eos ventilabro in portis terræ: interfeci et disperdidi populum meum, et tamen a viis suis non sunt reversi. <sup>8</sup> Multiplicatæ sunt mihi viduæ ejus super arenam maris: induxi eis super matrem adolescentis vastatorem meridie: misi super civitates repente terrorem. <sup>249</sup> <sup>9</sup> Infirmata est quæ peperit septem; defecit anima ejus: occidit ei sol cum adhuc esset dies: confusa est, et erubuit: et residuos ejus in

---

præcepta negleximus, etc., usque ad nondum venerant ad iniquitatis cumulum: quod in Christi morte completum est.

<sup>242</sup> + **14.21 Solii gloriæ.** Templi, vel cujuslibet sancti, in quo, sicut scriptum est, Thronum ejus in terra allisisti. Tunc alliditur atque destruitur, cum ab eo multitudine peccatorum Deus offenditur. Sed quia culpa perditur, Domini clementia sustentatur, quæ mutatur severitate sententiæ, si irritum faciat Dominus pactum suum quo nobis pollicitus est salutem.

<sup>243</sup> + **14.22 Nunquid sunt in sculptilibus,** etc. HIER. Post multos variosque sermones redit ad titulum prophetiæ, etc., usque ad tu solus es qui populum tuum potes instruere, et divisiones gratiarum exspectantibus te.

<sup>244</sup> + **15.1 Et dixit Dominus.** GREG., Moral., lib. 9, c. 12. Omissis tot patribus, soli Moyses et Samuel ad medium deducuntur, etc., usque ad alter ex principatu ejicitur, et ait: Absit a me hoc peccatum, quia cessem orare pro vobis I Reg. 12..

<sup>245</sup> + **15.3 Et visitabo super eos.** HIER. Quatuor plagas, quibus populus Judæ traditus est, etiam Ezechiel propheta demonstrat, gladium, etc., usque ad ut Creatore neglecto non universa creatura consurgeret in peccatores.

<sup>246</sup> + **15.4 Et dabo eos in fervorem,** etc. ID. Hoc sub Babylois ex parte completum est, etc., usque ad si liberi nepotesque similia gesserint ad posteros perveniunt. Iste Manasses nequissimus fuit, Isaiam sarta lignea secuit, Amon filium suum per ignem traduxit ad honorem idolorum et Tophet.

<sup>247</sup> + **15.5 Quis enim miserebitur tui?** Nullus offenso Deo potest rogare pro flagitiis peccantium, quia nec tam clemens potest esse creatura quam Creator, nec tam alienus externis, quam Dominus suis misereri.

<sup>248</sup> + **15.6 Retrorsum abiisti,** etc. HIER. Cum juxta Apostolum posteriora obliviscens ad priora se extendere debuit, Ægyptias carnes desideravit.

<sup>249</sup> + **15.8 Multiplicatæ sunt mihi.** HIER. Diversis medicaminibus cupit Deus salvare peccantes, ut qui contempserant blandientem, timeant minantem.

gladium dabo in conspectu inimicorum eorum, ait Dominus.] <sup>250</sup> <sup>10</sup> [Væ mihi, mater mea ! quare genuisti me, virum rixæ, virum discordiæ in universa terra? Non fœneravi, nec fœneravit mihi quisquam: omnes maledicunt mihi. <sup>251</sup> <sup>11</sup> Dicit Dominus: Si non reliquiæ tuæ in bonum, si non occurri tibi in tempore afflictionis, et in tempore tribulationis adversus inimicum. <sup>252</sup> <sup>12</sup> Numquid fœderabitur ferrum ferro ab aquilone, et æs? <sup>253</sup> <sup>13</sup> Divitias tuas et thesauros tuos in direptionem dabo gratis, in omnibus peccatis tuis, et in omnibus terminis tuis. <sup>254</sup> <sup>14</sup> Et adducam inimicos tuos de terra quam nescis, quia ignis succensus est in furore meo: super vos ardebit. <sup>255</sup> <sup>15</sup> Tu scis, Domine: recordare mei, et visita me, et tuere me ab his qui persequuntur me. Noli in patientia tua suscipere me: scito quoniam sustinui propter te opprobrium. <sup>256</sup> <sup>16</sup> Inventi sunt sermones tui, et comedi eos: et factum est mihi verbum tuum in gaudium et in lætitiā cordis mei, quoniam invocatum est nomen tuum super me, Domine Deus exercituum. <sup>17</sup> Non sedi in concilio ludentium, et gloriatus sum a facie manus tuæ: solus sedebam, quoniam comminatione replesti me. <sup>257</sup> <sup>18</sup> Quare factus est dolor

<sup>250</sup> + **15.9 Septem.** ID. Verbum Hebraicum Saba, vel septem, vel juramentum, vel plurimos sonat. Unde, etc., usque ad confusa est in æternum spirituali gladio perdens populum suum.

<sup>251</sup> + **15.10 Væ mihi, mater mea,** etc. ID. Potest hoc Synecdochicos de Jeremia intelligi, qui non in toto orbe terrarum, etc., usque ad sed et Jeremiam deprehendimus sæpe in hoc volumine rogasse pro populo.

<sup>252</sup> + **15.11 Si non reliquiæ.** Responsio Domini ad id quod Jeremias supradixerat: Væ mihi, mater mea, etc. Quasi: Noli considerare præsentia tantum, sed futura. Reliquiæ enim tuæ in bonum, etc. In præsentī quoque cum te cuperent inimici opprimere, occurri tibi, et protexi te. Si non reliquiæ tuæ in bonum. De Christo quoque secundum humanitatem possunt hæc dici, Si non reliquiæ. Possunt hæc de Jeremia accipi, qui pessimo tempore, imminenteque captivitate prophetare compulsus est, et dura perpeti a populo non credente.

<sup>253</sup> + **15.12 Nunquid fœderabitur ferrum ferro.** HIER. Quasi: Nec doleas quod populus tuus inimicus sit, etc., usque ad qui in tantam pervenit malitiam, ut duriori metallo, id est, ære circumdatus sit.

<sup>254</sup> + **15.13 Et thesauros.** ORIG. Unus thesaurus est Jeremias, alius Isaias, vel Moyses et cæteri. Hos thesauros abstulit Deus Judæis, et dedit nobis: unde, Auferetur a vobis regnum Dei, et dabitur genti facienti fructus ejus Matth. 21.. Primum credita sunt illis eloquia Dei I Cor. 1., et postea data nobis. Habent quidem legem et prophetas, sed non intelligunt. In omnibus peccatis tuis. HIER. Id est, propter peccata tua, quæ in omnes terminos tuos pervenerunt, etc., usque ad et resurgens Christus non apparuit ultra interfectores suos, sed tantum credentibus.

<sup>255</sup> + **15.14 Ardebit.** Non potest exstingui, quia materiam præbuiisti ardoris, ut meus ignis tua quæ in te sunt ligna consumat et fenum et stipulam. Non est ergo causa ardoris in Domino, sed in his qui fomenta ministrant incendio.

<sup>256</sup> + **15.15 Noli in patientia tua suscipere me.** Vox Christi. Quasi: Longanimis fuisti semper huic populo delinquenti, sed quia etiam contra me erexit temeritatem suam, noli jam esse longanimis. Si autem consideres tempora Dominicæ passionis et ruinæ Jerusalem, videbis, quia omnino patiens fuit. A quintodecimo anno Tiberii Cæsaris usque ad subversionem templi numerantur anni quadraginta duo. Quia spatium pœnitentiæ oportebat dari propter eos qui per apostolos erant credituri.

<sup>257</sup> + **15.17 Non sedi,** etc. HIER. Hebræi arbitrantur hæc ex persona Jerusalem dici, quod sola sederit amaritudine repleta, etc., usque ad quæ opere monstrabit omnem amaritudinem instar fuisse fluentium aquarum. A facie manus tuæ. ORIG. Facies manus Dei est ipsa percussio justi iudicii, quæ superbientem, etc., usque ad et si peccare non desistimus, æternis adhuc suppliciis adjicit. Solus sedebam. GREG., Moral., lib. 4, c. 35. Quasi: Dum considero quid jam per iudicii experimentum patior a tumultu desideriorum temporalium, trepidus mentis secessum peto, quia adhuc acrius illa, quæ minaris, æterna supplicia formido.

meus perpetuus, et plaga mea desperabilis renuit curari? facta est mihi quasi mendacium aquarum infidelium. <sup>19</sup> Propter hoc hæc dicit Dominus: Si converteris, convertam te, et ante faciem meam stabis: et si separaveris pretiosum a vili, quasi os meum eris: convertentur ipsi ad te, et tu non converteris ad eos. <sup>258</sup> <sup>20</sup> Et dabo te populo huic in murum æreum fortem: et bellabunt adversum te, et non prævalebunt, quia ego tecum sum ut salvem te, et eruam te, dicit Dominus: <sup>21</sup> et liberabo te de manu pessimorum, et redimam te de manu fortium.]

16Et factum est verbum Domini ad me, dicens: <sup>259</sup> <sup>2</sup> [Non accipies uxorem, et non erunt tibi filii et filiæ in loco isto. <sup>3</sup> Quia hæc dicit Dominus super filios et filias qui generantur in loco isto, et super matres eorum, quæ genuerunt eos, et super patres eorum, de quorum stirpe sunt nati in terra hac: <sup>4</sup> Mortibus ægrotationum morientur: non plangentur, et non sepelientur: in sterquilinum super faciem terræ erunt, et gladio et fame consumentur: et erit cadaver eorum in escam volatilibus cæli et bestiis terræ. <sup>260</sup> <sup>5</sup> Hæc enim dicit Dominus: Ne ingrediaris domum convivii, neque vadas ad plangendum, neque consoleris eos, quia abstuli pacem meam a populo isto, dicit Dominus, misericordiam et miserationes. <sup>261</sup> <sup>6</sup> Et morientur grandes et parvi in terra ista: non sepelientur, neque plangentur, et non se incident, neque calvitium fiet pro eis. <sup>262</sup> <sup>7</sup> Et non frangent inter eos lugenti panem ad consolandum super mortuo, et non dabunt eis potum calicis ad consolandum super patre suo et matre. <sup>8</sup> Et domum convivii non ingrediaris, ut sedeas cum eis, et comedas, et bibas. <sup>9</sup> Quia hæc dicit Dominus exercituum, Deus Israël: Ecce ego auferam de loco isto, in oculis vestris, et in diebus vestris, vocem gaudii et vocem lætitiæ, vocem sponsi et vocem sponsæ. <sup>263</sup> <sup>10</sup> Et cum annuntiaveris populo huic omnia verba hæc, et dixerint tibi: Quare locutus est Dominus super nos omne malum grande istud? quæ iniquitas nostra, et quod peccatum nostrum, quod peccavimus Domino Deo nostro? <sup>11</sup> dices ad

<sup>258</sup> + 15.19 Si separaveris, etc. ID., Moral., lib. 18, c. 23. Vilis quippe est Deo præsens mundus, pretiosa est ei, etc., usque ad qui ab amore præsentis sæculi loquendo quæ potest, humanam animam evellit. Quasi os meum. HIER. Consideremus quantam mercedem habeat sermo doctoris, si ab errore quempiam liberare voluerit, et de peccantium numero revocare.

<sup>259</sup> + 16.1 Et factum est verbum, etc. HIER. Instante captivitate, ne super proprium dolorem, uxoris quoque et liberorum miseriis torquearis. Bene ergo Apostolus jubet, Quia tempus breve est et consummatio imminet, ut qui exores habent, sint quasi non habentes I Cor. 7..

<sup>260</sup> + 16.4 Mortibus ægrotationum. ID. Nota quod longa infirmitate tabescere, ira Dei est: unde Joram filius Josaphat infirmitate consumitur. Et Apostolus ait: Ideo inter vos multi infirmi et imbecilles I Cor. 11., etc.

<sup>261</sup> + 16.5 Ne ingrediaris domum. HIER. Unde: Cum hujusmodi nec cibum sumere I Cor. 5.. Nec debes dicere ei ave. Apostolis quoque interdictum est, etc., usque ad aliud enim est mori communi lege naturæ, aliud Dei occubuisse sententia. Jeremias juvenis ad prædicandum missus est a Domino, unde ait, A a Domine, nescio loqui. Et virgo fuit et castus, et sine liberis, ut expeditius prædicaret.

<sup>262</sup> + 16.6 Neque plangentur. ID. Modus fuit apud veteres, et usque hodie permanet, etc., usque ad et quotidie deceptorum funera prosternunt in Ecclesia?

<sup>263</sup> + 16.9 Ecce ego auferam. Sic quoque peccanti Ecclesiæ aufert Deus omne gaudium et omnem lætiam. De quo dicitur: Gaudete in Domino semper, iterum dico gaudete Philip. 4..

eos: Quia dereliquerunt me patres vestri, ait Dominus, et abierunt post deos alienos, et servierunt eis, et adoraverunt eos, et me dereliquerunt, et legem meam non custodierunt. <sup>12</sup> Sed et vos pejus operati estis quam patres vestri: ecce enim ambulat unusquisque post pravitatem cordis sui mali, ut me non audiat. <sup>264</sup> <sup>13</sup> Et ejciam vos de terra hac in terram quam ignoratis, vos et patres vestri: et servietis ibi diis alienis, die ac nocte, qui non dabunt vobis requiem. <sup>14</sup> Propterea ecce dies veniunt, dicit Dominus, et non dicetur ultra: Vivit Dominus qui eduxit filios Israëli de terra Ægypti, <sup>265</sup> <sup>15</sup> sed: Vivit Dominus qui eduxit filios Israëli de terra aquilonis, et de universis terris ad quas ejeci eos: et reducam eos in terram suam, quam dedi patribus eorum. <sup>16</sup> Ecce ego mittam piscatores multos, dicit Dominus, et piscabuntur eos: et post hæc mittam eis multos venatores, et venabuntur eos de omni monte, et de omni colle, et de cavernis petrarum. <sup>266</sup> <sup>17</sup> Quia oculi mei super omnes vias eorum: non sunt absconditæ a facie mea, et non fuit occultata iniquitas eorum ab oculis meis. <sup>18</sup> Et reddam primum duplices iniquitates et peccata eorum, quia contaminaverunt terram meam in morticinis idolorum suorum, et abominationibus suis impleverunt hæreditatem meam. <sup>267</sup> <sup>19</sup> Domine, fortitudo mea, et robur meum, et refugium meum in die tribulationis, ad te gentes venient ab extremis terræ, et dicent: Vere mendacium possederunt patres nostri, vanitatem quæ eis non profuit. <sup>268</sup> <sup>20</sup> Numquid faciet sibi homo deos, et ipsi non sunt dii? <sup>269</sup> <sup>21</sup> Idcirco ecce ego ostendam eis per vicem hanc, ostendam eis manum meam, et virtutem meam, et scient quia nomen mihi Dominus.]

17[Peccatum Juda scriptum est stylo ferreo in ungue adamantino, exaratum super latitudinem cordis eorum, et in cornibus ararum eorum. <sup>270</sup>

<sup>264</sup> + **16.12 Sed et vos,** etc. ID. Ne forte dicerent: Injusta sententia est, patrem comedisse uvam acerbam, et dentes filiorum obstupescere.

<sup>265</sup> + **16.14 Ecce dies veniunt,** etc. ID. Prædicuntur miracula, quæ juxta litteram sub Zorobabel et Jesu pontifice partim completa sunt, etc., usque ad reduxit eos in terram suam, id est, ecclesiam quam dedit patribus eorum, id est, apostolis et apostolicis viris.

<sup>266</sup> + **16.16 Ecce ego mittam piscatores.** Judæi putant piscatorum nomine significari Chaldæos, et per venatores Romanos, qui de montibus collibusque, et de cavernis petrarum venati sunt infelicem populum. Cavernis petrarum, etc. HIER. Apostolis et apostolicis viris: Petra enim Christus I Cor. 10., sed et Petro donavit, etc., usque ad et recepisse duplices iniquitates suas.

<sup>267</sup> + **16.18 Duplices iniquitates,** etc. ID. Quia servus sciens et non faciens voluntatem Domini, vapulabit multis Luc. 12.. Dignum est enim eos qui de gentibus sunt, simplicia peccata recipere, et nos duplicia. Unde: Voluntarie nobis peccantibus non relinquitur hostia pro peccatis Hebr. 6..

<sup>268</sup> + **16.19 Ad te gentes venient,** etc. ID. Postquam ejectus est Israëli, et a piscatoribus venatoribusque translatus, gentium multitudo consequenter vocatur, et pristinum confitetur errorem. Ab extremis. Primi terræ sunt sapientes sæculi, nobiles, divites, optimates. Sed extrema, id est, stulta mundi elegit Deus, ut fortia quæque confundat. Venient gentes, id est, ab his, qui sunt novissimi super terram, fatui et ignobiles et abjecti.

<sup>269</sup> + **16.20 Deos.** HIER. Non solum de corporeis simulacris faciunt sibi homines deos, etc., usque ad et adoraverunt opus manuum suarum, putantes vera esse quæ finxerunt.

<sup>270</sup> + **17.1 Peccatum Juda scriptum est,** etc. HIER. Quasi dicat: Gentium peccata deleta sunt, de quibus ad Moysen dicitur, Dimitte me, etc., usque ad Quiescite ab homine cujus spiritus in naribus ejus Isa. 2.. ORIG. Forsitan peccatum Juda, peccatum nostrum, qui credimus in Christum de tribu Juda, etc., usque ad si de Juda proditore volueris intelligere: Peccatum Juda scriptum est,

<sup>2</sup> Cum recordati fuerint filii eorum ararum suarum, et lucorum suorum, lignorumque frondentium, in montibus excelsis, <sup>3</sup> sacrificantes in agro: fortitudinem tuam, et omnes thesauros tuos in direptionem dabo; excelsa tua propter peccata in universis finibus tuis. <sup>271</sup> <sup>4</sup> Et relinqueris sola ab hæreditate tua, quam dedi tibi, et servire te faciam inimicis tuis in terra quam ignoras: quoniam ignem succendisti in furore meo: usque in æternum ardebit.] <sup>5</sup> [Hæc dicit Dominus: Maledictus homo qui confidit in homine, et ponit carnem brachium suum, et a Domino recedit cor ejus. <sup>272</sup> <sup>6</sup> Erit enim quasi myricæ in deserto, et non videbit cum venerit bonum: sed habitabit in siccitate in deserto, in terra salsuginis et inhabitabili. <sup>7</sup> Benedictus vir qui confidit in Domino, et erit Dominus fiducia ejus. <sup>273</sup> <sup>8</sup> Et erit quasi lignum quod transplantatur super aquas, quod ad humorem mittit radices suas, et non timebit cum venerit æstus: et erit folium ejus viride, et in tempore siccitatis non erit sollicitum, nec aliquando desinet facere fructum. <sup>274</sup> <sup>9</sup> Pravum est cor omnium, et inscrutabile: quis cognoscet illud? <sup>10</sup> Ego Dominus scrutans cor, et probans renes: qui do unicuique juxta viam suam, et juxta fructum adinventionum suarum. <sup>11</sup> Perdix fovit quæ non peperit: fecit divitias, et non in judicio: in dimidio dierum suorum derelinquet eas, et in novissimo suo erit insipiens. <sup>275</sup> <sup>12</sup> Solium gloriæ altitudinis a principio, locus sanctificationis nostræ. <sup>13</sup> Expectatio Israël, Domine, omnes qui te derelinquunt confundentur: recedentes a te, in terra scribentur, quoniam dereliquerunt venam aquarum viventium Dominum. <sup>14</sup> Sana me, Domine, et sanabor: salvum me fac, et salvus ero: quoniam laus mea tu es. <sup>276</sup> <sup>15</sup> Ecce ipsi dicunt ad me: Ubi est verbum Domini? veniat: <sup>277</sup> <sup>16</sup> et ego non sum turbatus, te pastorem sequens: et diem hominis non desideravi, tu scis: quod egressum est de labiis meis, rectum in conspectu tuo fuit. <sup>278</sup> <sup>17</sup> Non sis tu mihi formidini: spes mea tu in die afflictionis. <sup>18</sup> Confundantur qui me persequuntur, et non confundar ego: paveant illi, et non paveam ego: induc super eos diem afflictionis, et duplici contritione contere eos.] <sup>19</sup> Hæc dicit Dominus ad me: Vade, et sta in porta filiorum populi, per quam ingrediuntur

---

repugnat quod sequitur eorum, etc.

<sup>271</sup> + **17.3 Excelsa.** HIER. Quæ Hebraice Ramoth. Et significantur hæretici, qui ponunt in cælum os suum, etc., usque ad et servitus dæmonum, qui inimici et ultores.

<sup>272</sup> + **17.5 Maledictus homo.** ID. Maledictus ergo Paulus Samosetanus et Photinus qui quamvis sanctum, etc., usque ad ut fieret utrumque unum, et non adoremus creaturam, sed Creatorem.

<sup>273</sup> + **17.7 Benedictus vir,** etc. ID. Quasi: Judæi maledicti et hæretici, qui non habent spem in Domino, etc., usque ad qui semel pro nobis mortuus est, et ultra non moritur: et dicit, Ego sum vita Joan. 14..

<sup>274</sup> + **17.8 Quod ad humorem.** ID. Quasi diceret: de siccitate Judaica transit ad baptismi gratiam.

<sup>275</sup> + **17.11 In dimidio dierum.** ID. Dies ejus hujus sæculi sunt. Eruit nos Christus de hoc sæculo nequam, et derelinquimus per diem. Novissimum ejus erit insipiens, cum omnia subjecta fuerint Christo. Novissimus inimicus destruetur mors.

<sup>276</sup> + **17.14 Sana me, Domine.** ID. Multi medici curaverunt, etc., usque ad curari et sanari cupit, cujus vera laus et vera medicina.

<sup>277</sup> + **17.15 Ecce ipsi dicunt ad me: Ubi est verbum,** etc.

<sup>278</sup> + **17.16 Ego non sum turbatus te pastorem sequens.** ID. Quanto plus Christum sequeris, etc., usque ad dies judicii malus his qui tormenta patiuntur.

reges Juda, et egrediuntur, et in cunctis portis Jerusalem: <sup>279</sup> <sup>20</sup> et dices ad eos: [Audite verbum Domini, reges Juda, et omnis Juda, cunctique habitatores Jerusalem, qui ingredimini per portas istas. <sup>21</sup> Hæc dicit Dominus: Custodite animas vestras, et nolite portare pondera in die sabbati, nec inferatis per portas Jerusalem: <sup>280</sup> <sup>22</sup> et nolite ejicere onera de domibus vestris in die sabbati, et omne opus non facietis: sanctificate diem sabbati, sicut præcepi patribus vestris. <sup>23</sup> Et non audierunt, nec inclinaverunt aurem suam: sed induraverunt cervicem suam, ne audirent me, et ne acciperent disciplinam. <sup>24</sup> Et erit: si audieritis me, dicit Dominus, ut non inferatis onera per portas civitatis hujus in die sabbati: et si sanctificaveritis diem sabbati, ne faciatis in eo omne opus: <sup>25</sup> ingredientur per portas civitatis hujus reges et principes, sedentes super solium David, et ascendentes in curribus et equis, ipsi et principes eorum, viri Juda, et habitatores Jerusalem: et habitabitur civitas hæc in sempiternum. <sup>26</sup> Et venient de civitatibus Juda, et de circuitu Jerusalem, et de terra Benjamin, et de campestribus, et de montuosis, et ab austro, portantes holocaustum, et victimam, et sacrificium, et thus, et inferent oblationem in domum Domini. <sup>27</sup> Si autem non audieritis me ut sanctificetis diem sabbati, et ne portetis onus, et ne inferatis per portas Jerusalem in die sabbati, succendam ignem in portis ejus, et devorabit domos Jerusalem, et non extinguetur.] <sup>281</sup>

18 Verbum quod factum est ad Jeremiam a Domino, dicens: <sup>282</sup> <sup>2</sup> Surge, et descende in domum figuli, et ibi audies verba mea. <sup>3</sup> Et descendi in domum figuli, et ecce ipse faciebat opus super rotam. <sup>4</sup> Et dissipatum est vas quod ipse faciebat e luto manibus suis: conversusque fecit illud vas alterum, sicut placuerat in oculis ejus ut faceret. <sup>283</sup> <sup>5</sup> Et factum est verbum Domini ad me, dicens: <sup>6</sup> [Numquid sicut figulus iste, non potero vobis facere, domus Israël? ait Dominus: ecce sicut lutum in manu figuli, sic vos in manu mea, domus Israël. <sup>7</sup> Repente loquar adversum gentem et adversum regnum, ut eradiceam, et destruam, et disperdam illud: <sup>284</sup> <sup>8</sup> si pœnitentiam egerit gens illa a malo suo quod locutus sum adversus eam, agam et ego pœnitentiam super malo quod cogitavi ut facerem ei. <sup>9</sup> Et subito loquar de gente et de regno, ut ædificem et plantem illud. <sup>10</sup> Si fecerit malum in oculis meis, ut

<sup>279</sup> + **17.19 Vade et sta**, etc. Quasi diceret: Quia verba tua audire contemnunt, etc., usque ad quasi non audierint, sed audiant velint nolint.

<sup>280</sup> + **17.21 Custodite animas**. Ne præceptum sabbati instauratum per Jeremiam discerpamus, totum simul ponimus, simul omnia cognoscamus. Ut non inferatis onera per portas civitatis hujus in die sabbati. ID. Si nostri judaizantes, etc., usque ad sed et patrem suum dicebat Deum.

<sup>281</sup> + **17.27 Si autem non audieritis me, ut sanctificetis diem sabbati, et ne portetis onus, et ne inferatis per portas Jerusalem**, etc. Quasi dicat: Hæc sunt præmia eorum qui sanctificant sabbatum, et nullo pondere gravantur. Si autem, etc.

<sup>282</sup> + **18.1 Verbum quod factum est ad Jeremiam a Domino dicens**. HIER. Per omnes sensus ad judicium, etc., usque ad et ibi audire præcepta Domini.

<sup>283</sup> + **18.4 Et dissipatum est**, etc. Dissipatum divina providentia, ut nescius artifex errore suo parabolum figuraret.

<sup>284</sup> + **18.7 Repente loquar**. ID. Liberum arbitrium significat, etc., usque ad ut in omnibus excellat gratia largitoris.

non audiat vocem meam, pœnitentiam agam super bono quod locutus sum ut facerem ei. <sup>11</sup> Nunc ergo dic viro Juda, et habitatoribus Jerusalem, dicens: Hæc dicit Dominus: Ecce ego fingo contra vos malum, et cogito contra vos cogitationem: revertatur unusquisque a via sua mala, et dirigite vias vestras et studia vestra. <sup>285</sup> <sup>12</sup> Qui dixerunt: Desperavimus: post cogitationes enim nostras ibimus, et unusquisque pravitatem cordis sui mali faciemus. <sup>286</sup> <sup>13</sup> Ideo hæc dicit Dominus: Interrogate gentes: Quis audivit talia horribilia, quæ fecit nimis virgo Israël? <sup>14</sup> Numquid deficiet de petra agri nix Libani? aut evelli possunt aquæ erumpentes frigidæ, et defluentes? <sup>287</sup> <sup>15</sup> Quia oblitus est mei populus meus, frustra libantes, et impingentes in viis suis, in semitis sæculi, ut ambularent per eas in itinere non trito, <sup>16</sup> ut fieret terra eorum in desolationem, et in sibilum sempiternum: omnis qui præterierit per eam obstupescet, et movebit caput suum. <sup>288</sup> <sup>17</sup> Sicut ventus urens dispergam eos coram inimico: dorsum, et non faciem, ostendam eis in die perditionis eorum.] <sup>289</sup> <sup>18</sup> Et dixerunt: [Venite, et cogitemus contra Jeremiam cogitationes: non enim peribit lex a sacerdote, neque consilium a sapiente, nec sermo a propheta: venite, et percutiamus eum lingua, et non attendamus ad universos sermones ejus.] <sup>290</sup> <sup>19</sup> [Attende, Domine, ad me, et audi vocem adversariorum meorum. <sup>291</sup> <sup>20</sup> Numquid redditur pro bono malum, quia foderunt foveam animæ meæ? Recordare quod steterim in conspectu tuo ut loquerer pro eis bonum, et averterem indignationem tuam ab eis. <sup>21</sup> Propterea da filios eorum in famem, et deduc eos in manus gladii: fiant uxores eorum absque liberis, et viduæ: et viri earum interficiantur morte: juvenes eorum confodiantur gladio in prælio: <sup>22</sup> audiatur clamor de domibus eorum: adduces enim super eos latronem repente, quia foderunt foveam ut caperent me, et laqueos absconderunt pedibus meis. <sup>23</sup> Tu autem, Domine, scis omne consilium eorum adversum me in mortem: ne propitieris iniquitati eorum, et peccatum eorum a facie tua non deleatur: fiant corruentes in conspectu tuo; in tempore furoris tui abutere eis.] <sup>292</sup>

19Hæc dicit Dominus: Vade, et accipe lagunculam figuli testeam a

<sup>285</sup> + **18.11 Ecce ego.** HIER. Implet parabolam quam et aspectu docuit et sermone.

<sup>286</sup> + **18.12 Post cogitationes.** ID. Ubi est absque gratia Dei, etc., usque ad omnes in circumitu ejus nationes.

<sup>287</sup> + **18.14 Nunquid de petra:** quasi diceret: Sicut de Libani summitatibus, etc., usque ad populus meus oblitus est mei.

<sup>288</sup> + **18.16 Ut fieret terra.** ID. Hoc plenius post adventum Domini videtur esse completum, quando nullus Judæorum terram et urbem sanctam ingredi ege permittitur. Sed cum ad planctum venerint, mirantur et deflent vaticinia prophetarum completa.

<sup>289</sup> + **18.17 Sicut ventus.** ID. Usque hodie hæc sententia permanet, etc., usque ad tunc omnis Israël salvus fiet.

<sup>290</sup> + **18.18 Venit.** ID. Ista tunc Judæorum contra Jeremiam vel Christum, etc., usque ad prophetiam omni verborum et sensuum confidentia persequentes.

<sup>291</sup> + **18.19 Attende, Domine, ad me, et audi vocem adversariorum meorum.** ID. In typo Salvatoris, etc., usque ad sanguis ejus super nos et super filios nostros Matth. 27..

<sup>292</sup> + **18.23 Ne propitieris iniquitati eorum,** etc. Non est contrarium superiori sententiæ, etc., usque ad ne inultum peccatum illis fieret in exemplum.

senioribus populi et a senioribus sacerdotum, <sup>293</sup> 2 et egredere ad vallem filii Ennom, quæ est juxta introitum portæ fictilis: et prædicabis ibi verba quæ ego loquar ad te. <sup>3</sup> Et dices: [Audite verbum Domini, reges Juda, et habitatores Jerusalem. Hæc dicit Dominus exercituum, Deus Israël: Ecce ego inducam afflictionem super locum istum, ita ut omnis qui audierit illam, tinniant aures ejus, <sup>4</sup> eo quod dereliquerint me, et alienum fecerint locum istum, et libaverunt in eo diis alienis quos nescierunt, ipsi et patres eorum, et reges Juda: et repleverunt locum istum sanguine innocentum, <sup>294</sup> 5 et ædificaverunt excelsa Baalim, ad comburendos filios suos igni in holocaustum Baalim: quæ non præcepi, nec locutus sum, nec ascenderunt in cor meum. <sup>295</sup> 6 Propterea ecce dies veniunt, dicit Dominus, et non vocabitur amplius locus iste Topheth, et vallis filii Ennom, sed vallis occisionis. <sup>296</sup> 7 Et dissipabo consilium Juda et Jerusalem in loco isto, et subvertam eos gladio in conspectu inimicorum suorum, et in manu quærentium animas eorum: et dabo cadavera eorum escam volatilibus cæli et bestiis terræ. <sup>297</sup> 8 Et ponam civitatem hanc in stuporem, et in sibilum: omnis qui præterierit per eam obstupescet, et sibilabit super universa plaga ejus. <sup>9</sup> Et cibabo eos carnibus filiorum suorum et carnibus filiarum suarum: et unusquisque carnem amici sui comedet in obsidione, et in angustia in qua concludent eos inimici eorum, et qui quærent animas eorum.] <sup>10</sup> Et conteres lagunculam in oculis virorum qui ibunt tecum, <sup>11</sup> et dices ad eos: [Hæc dicit Dominus exercituum: Sic conteram populum istum, et civitatem istam, sicut conteritur vas figuli, quod non potest ultra instaurari: et in Topheth sepelientur, eo quod non sit alius locus ad sepeliendum. <sup>298</sup> 12 Sic faciam loco huic, ait Dominus, et habitatoribus ejus, et ponam civitatem istam sicut Topheth. <sup>13</sup> Et erunt domus Jerusalem, et domus regum Juda, sicut locus Topheth, immundæ, omnes domus in quarum domatibus sacrificaverunt omni militiæ cæli, et libaverunt libamina diis alienis.] <sup>299</sup> 14 Venit autem Jeremias de Topheth, quo miserat eum Dominus ad prophetandum, et stetit in atrio domus Domini, et dixit ad omnem populum: <sup>15</sup> Hæc dicit Dominus exercituum, Deus Israël:

<sup>293</sup> + **19.1 Hæc dicit Dominus: Vade et accipe lagunculam.** HIER. Vult divina Scriptura non solum auribus docere populum, sed etiam oculis. Magis enim mente retinetur quod visu percipitur quam quod auditu. Lagunculam figuli pro laguncula figuli, etc., usque ad et pro Hierihoh Chiricho.

<sup>294</sup> + **19.4 Eo quod.** ID. Omnis hæreticus derelinquit Deum, etc., usque ad et comburunt idolis filios suos quos in hæresi genuerunt.

<sup>295</sup> + **19.5 Quæ non præcepi.** Non præcepi vel cogitavi, etc., usque ad hæc de Deo accipienda sunt, sicut alia.

<sup>296</sup> + **19.6 Topheth, et vallis filii Ennom,** etc. ID. Quæ sit vallis filii Ennom, etc., usque ad vel historialiter Babylonio vastante.

<sup>297</sup> + **19.7 Et dabo cadavera.** Quamvis hæc in Babylonica captivitate populo acciderint, etc., usque ad ventres suos sepulcra facerent liberorum.

<sup>298</sup> + **19.11 Sic conteram populum istum.** Sub Ælio Adriano civitas, et nomen perdidit, et statum, ad frangendam superbiam habitatorum. Sanctæ autem crucis et resurrectionis vocabula non urbem significant, sed locum. ID. Judæi auream atque gemmatam Jerusalem, etc., usque ad et vero judici cuncta reserventur. Et in Topheth sepelientur, etc., usque ad quæ huic imminet loco, fiat sicut Topheth.

<sup>299</sup> + **19.13 Et erunt domus Jerusalem et domus regum.** Omnis domus regum Juda sicut locus Topheth. Hoc in Hebræo non habetur, sed a LXX interseritur.



Ecce ego inducam super civitatem hanc, et super omnes urbes ejus, universa mala quæ locutus sum adversum eam, quoniam induraverunt cervicem suam ut non audirent sermones meos.

20 Et audivit Phassur filius Emmer, sacerdos, qui constitutus erat princeps in domo Domini, Jeremiam prophetantem sermones istos. <sup>300</sup> <sup>2</sup> Et percussit Phassur Jeremiam prophetam, et misit eum in nervum quod erat in porta Benjamin superiori, in domo Domini. <sup>3</sup> Cumque illuxisset in crastinum, eduxit Phassur Jeremiam de nervo, et dixit ad eum Jeremias: Non Phassur vocavit Dominus nomen tuum, sed Pavorem undique. <sup>301</sup> <sup>4</sup> Quia hæc dicit Dominus: [Ecce ego dabo te in pavorem, te et omnes amicos tuos: et corrueat gladio inimicorum suorum, et oculi tui videbunt: et omnem Judam dabo in manum regis Babylonis, et traducet eos in Babylonem, et percutiet eos gladio. <sup>5</sup> Et dabo universam substantiam civitatis hujus, et omnem laborem ejus, omneque pretium, et cunctos thesauros regum Juda dabo in manu inimicorum eorum: et diripient eos, et tollent, et ducent in Babylonem. <sup>6</sup> Tu autem, Phassur, et omnes habitatores domus tuæ, ibitis in captivitatem: et in Babylonem venies, et ibi morieris, ibique sepelieris tu, et omnes amici tui, quibus prophetasti mendacium.] <sup>7</sup> [Seduxisti me, Domine, et seductus sum: fortior me fuisti, et invaluisti: factus sum in derisum tota die; omnes subsannant me. <sup>302</sup> <sup>8</sup> Quia jam olim loquor, vociferans iniquitatem, et vastitatem clamito: et factus est mihi sermo Domini in opprobrium, et in derisum tota die. <sup>9</sup> Et dixi: Non recordabor ejus, neque loquar ultra in nomine illius: et factus est in corde meo quasi ignis exæstuans, claususque in ossibus meis, et defeci, ferre non sustinens. <sup>10</sup> Audivi enim contumelias multorum, et terrorem in circuitu: Persequimini, et persequamur eum, ab omnibus viris qui erant pacifici mei, et custodientes latus meum: si quomodo decipiatur, et prævaleamus adversus eum, et consequamur ultionem ex eo. <sup>11</sup> Dominus autem mecum est, quasi bellator fortis: idcirco qui persequuntur me cadent, et infirmi erunt: confundentur vehementer, quia non intellexerunt opprobrium sempiternum, quod numquam delebitur. <sup>12</sup> Et tu, Domine exercituum, probator justi, qui vides renes et cor, videam, quæso, ultionem tuam ex eis: tibi enim revelavi causam meam. <sup>303</sup> <sup>13</sup> Cantate Domino,

<sup>300</sup> + **20.1 Et audivit Phassur.** HIER. Hic erat pontifex templi, etc., usque ad sed considerat imperantem.

<sup>301</sup> + **20.3 Cumque illuxisset.** Notanda prophetæ patientia atque prudentia. Missus in carcerem tacet, et silentio vincit injuriam, nec tamen dissimulat quod scit esse venturum, ut saltem Dei pontifex peccare desistat, et Dei clementiam deprecetur. Non Phassur. Juxta superiorem interpretationem, etc., usque ad huc illicque circumspicias et venientes adversarios reformides.

<sup>302</sup> + **20.7 Seduxisti me, Domine.** ID. Dicit se propheta a Domino deceptum, etc., usque ad persecutiones et angustias sustineat. Factus sum in derisum. ID. Propheta putaverat statim futurum quod Dominus minabatur; et populus æstimabat quod statim non venerat, non esse venturum.

<sup>303</sup> + **20.12 Et tu, Domine exercituum,** etc. ID. Solus Deus est, etc., usque ad ergo in peccatis mortuus. Videam. Cum sciat justus se Deum habere propugnatorem, in patientia tamen fragilitatis humanæ quod novit esse venturum, jam nunc videre desiderat. Tibi enim. Qui dicis: Mihi vindictam et ego retribuam Heb. 10., etc. Felix conscientia, cujus causa Domino revelatur: Unde apostolus: Omne quod manifestatur lux est Ephes. 5..

laudate Dominum, quia liberavit animam pauperis de manu malorum. <sup>304</sup>  
<sup>14</sup> Maledicta dies in qua natus sum ! dies in qua peperit me mater mea non sit benedicta ! <sup>305</sup> <sup>15</sup> Maledictus vir qui annuntiavit patri meo, dicens: Natus est tibi puer masculus, et quasi gaudio lætificavit eum ! <sup>306</sup> <sup>16</sup> Sit homo ille ut sunt civitates quæ subvertit Dominus, et non pœnituit eum: audiat clamorem mane, et ululatum in tempore meridiano, <sup>17</sup> qui non me interfecit a vulva, ut fieret mihi mater mea sepulchrum, et vulva ejus conceptus æternus ! <sup>18</sup> Quare de vulva egressus sum, ut viderem laborem et dolorem, et consumerentur in confusione dies mei?]

21 Verbum quod factum est ad Jeremiam a Domino, quando misit ad eum rex Sedecias Phassur filium Melchiæ, et Sophoniam filium Maasiæ sacerdotem, dicens: <sup>307</sup> <sup>2</sup> Interroga pro nobis Dominum, quia Nabuchodonosor, rex Babylonis, præliatur adversum nos: si forte faciat Dominus nobiscum secundum omnia mirabilia sua, et recedat a nobis. <sup>3</sup> Et dixit Jeremias ad eos: Sic dicetis Sedeciæ: <sup>4</sup> Hæc dicit Dominus Deus Israël: Ecce ego convertam vasa belli quæ in manibus vestris sunt, et quibus vos pugnatistis adversum regem Babylonis et Chaldæos qui obsident vos in circuitu murorum: et congregabo ea in medio civitatis hujus. <sup>308</sup> <sup>5</sup> Et debellabo ego vos in manu extenta, et in brachio forti, et in furore, et in indignatione, et in ira grandi. <sup>6</sup> Et percutiam habitatores civitatis hujus: homines et bestię pestilentia magna morientur. <sup>7</sup> Et post hæc, ait Dominus, dabo Sedeciam regem Juda, et servos ejus, et populum ejus, et qui derelicti sunt in civitate hac a peste, et gladio, et fame, in manu Nabuchodonosor regis Babylonis, et in manu inimicorum eorum, et in manu quærentium animam eorum: et percutiet eos in ore gladii, et non flectetur, neque parcat, nec miserebitur. <sup>309</sup> <sup>8</sup> Et ad populum hunc dices: Hæc dicit Dominus: Ecce ego do coram vobis viam vitæ, et viam mortis. <sup>310</sup> <sup>9</sup> Qui habitaverit in urbe hac morietur

<sup>304</sup> + **20.13 Quia liberavit.** ID. Pauper spiritu vindictam a Domino consecutus laudat, et se de manu pessimorum erutum gloriatur. Hoc autem non fit merito, sed ejus gratia qui pauperem liberavit, qui non amat divitias superbiæ corruentis, sed humilitatem pauperis liberati.

<sup>305</sup> + **20.14 Maledicta.** In quinto mense, id est Augusto natus est Jeremias, etc., usque ad et vaticinium futuræ subversionis templi autument?

<sup>306</sup> + **20.15 Maledictus vir,** etc. Qui putant animas fuisse in cœlestibus, etc., usque ad et, Redimentes tempus, quoniam dies sunt Ephes. 5, etc.

<sup>307</sup> + **21.1 Verbum quod,** etc. Quando misit. HIER. Notandum quod in prophetis, etc., usque ad de quibus dicitur in sequentibus. Phassur filium, etc. Supra pontifex Phassur sive Phascor qui percussit Jeremiam, patrem habuit Emmer: hic autem Phassur filius est Melchiæ, non est enim idem.

<sup>308</sup> + **21.4 Ecce ego,** etc. Quasi diceret. ID. Frustra repugnare vultis, et arma bellica præparatis, quorum in media urbe usum tantum habebitis, ut armati esse videamini. Non enim habuerunt hostes quos vincerent, sed tantum quos caperent.

<sup>309</sup> + **21.7 Dabo Sedeciam.** Primum de universa urbe prophetatum est, etc., usque ad nec ullam speret misericordiam, cum fœdus perjurio violaverit. In manu. In manu Nabuchodonosor regis Babylonis et in manu inimicorum ejus.

<sup>310</sup> + **21.8 Et ad populum.** Nuntiis regis, qui venerant, etc., usque ad dicens: Maledicta dies in qua natus sum. Ecce ego do coram vobis. Sunt qui hunc locum secundum tropologiam sic exponunt: Melius est se tradere sæcularibus disciplinis, maxime philosophicis, quam in Ecclesia illa permanere; in qua fames sit sermonis Dei, et omnis populus hæreticorum gladio et doctrinæ

gladio, et fame, et peste: qui autem egressus fuerit, et transfugerit ad Chaldæos qui obsident vos, vivet, et erit ei anima sua quasi spoliū. <sup>10</sup> Posui enim faciem meam super civitatem hanc in malum, et non in bonum, ait Dominus: in manu regis Babylonis dabitur, et exuret eam igni. <sup>11</sup> Et domui regis Juda: [Audite verba Domini, <sup>12</sup> domus David. Hæc dicit Dominus: Judicate mane iudicium, et eruite vi oppressum de manu calumniantis, ne forte egrediatur ut ignis indignatio mea, et succendatur, et non sit qui extinguat, propter malitiam studiorum vestrorum. <sup>311</sup> <sup>13</sup> Ecce ego ad te, habitatricem vallis solidæ atque campestris, ait Dominus: qui dicitis: Quis percutiet nos? et quis ingredietur domos nostras? <sup>312</sup> <sup>14</sup> Et visitabo super vos juxta fructum studiorum vestrorum, dicit Dominus: et succendam ignem in saltu ejus, et devorabit omnia in circuitu ejus.] <sup>313</sup>

22 Hæc dicit Dominus: Descende in domum regis Juda, et loqueris ibi verbum hoc, <sup>314</sup> <sup>2</sup> et dices: [Audi verbum Domini, rex Juda, qui sedes super solium David: tu et servi tui, et populus tuus, qui ingredimini per portas istas. <sup>3</sup> Hæc dicit Dominus: Facite iudicium et justitiam, et liberate vi oppressum de manu calumniatoris: et advenam, et pupillum, et viduam nolite contristare, neque opprimatis inique, et sanguinem innocentem ne effundatis in loco isto. <sup>315</sup> <sup>4</sup> Si enim facientes feceritis verbum istud, ingredientur per portas domus hujus reges sedentes de genere David super thronum ejus, et ascendentes currus et equos, ipsi, et servi, et populus eorum. <sup>5</sup> Quod si non audieritis verba hæc: in memetipso juravi, dicit Dominus, quia in solitudinem erit domus hæc. <sup>6</sup> Quia hæc dicit Dominus super domum regis Juda: Galaad, tu mihi caput Libani, si non posuero te solitudinem, urbes inhabitabiles ! <sup>316</sup> <sup>7</sup> Et sanctificabo super te, interficientem virum et arma ejus: et succident electas cedros tuas, et præcipitabunt in ignem. <sup>8</sup> Et pertransibunt gentes multæ per civitatem hanc, et dicet unusquisque proximo suo: Quare fecit Dominus sic civitati huic grandi? <sup>9</sup> Et respondebunt: Eo quod dereliquerint pactum Domini Dei sui, et adoraverint deos alienos, et servierint eis. <sup>10</sup> Nolite flere mortuum, neque lugeatis super eum fletu: plangite eum qui egreditur, quia non revertetur ultra, nec videbit terram nativitatis suæ. <sup>317</sup>

penuria, et peste hæretica moriatur.

<sup>311</sup> + **21.12 Judicate mane.** HIER. In hoc loco clementia Dei demonstratur, etc., usque ad vitio suo accideret eis, non duritia comminantis.

<sup>312</sup> + **21.13 Ecce ego ad te habitatricem.** Loquitur contra Jerusalem, quæ obsessa est: vel sicut Tyrus mari, ita Babylonio cingitur exercitu, et evadere non potest; vel quasi petra durissima se inexpugnabilem et robustam putat, pro soliditate et magnitudine murorum.

<sup>313</sup> + **21.14 In saltu.** ID. Jerusalem et adjacentem regionem (quæ fructiferas arbores bonorum operum non habebat, et ideo incendio digna) quam pulchre vallem campestram appellat, quasi perviam hostibus; non montem excelsum, qui difficile ascendatur.

<sup>314</sup> + **22.1 Hæc dicit.** HIER. Hic sermo Domini factus est, etc., usque ad fugiat Dei sententiam.

<sup>315</sup> + **22.3 Facite iudicium.** Quidquid regis domui dictum est intelligant, etc., usque ad et in Ecclesia composito incedunt gradu.

<sup>316</sup> + **22.6 Si non posuero.** ID. Comminatur domui regis, etc., usque ad et eorum qui ministrant Domino.

<sup>317</sup> + **22.10 Nolite flere mortuum,** etc. ID. Mihi proprie dici videtur de Sedecia, etc., usque ad omnia de Sedecia intelligamus.

<sup>11</sup> Quia hæc dicit Dominus ad Sellum, filium Josiæ, regem Juda, qui regnavit pro Josia patre suo, qui egressus est de loco isto: Non revertetur huc amplius, <sup>318</sup> <sup>12</sup> sed in loco ad quem transtuli eum, ibi morietur, et terram istam non videbit amplius. <sup>13</sup> Væ qui ædificat domum suam in injustitia, et cœnacula sua non in iudicio: amicum suum opprimet frustra, et mercedem ejus non reddet ei: <sup>319</sup> <sup>14</sup> qui dicit: Ædificabo mihi domum latam, et cœnacula spatiosa: qui aperit sibi fenestras et facit laquearia cedrina, pingitque sinopide. <sup>15</sup> Numquid regnabis quoniam confers te cedro? pater tuus numquid non comedit et bibit, et fecit iudicium et justitiam tunc cum bene erat ei? <sup>16</sup> Judicavit causam pauperis et egeni in bonum suum: numquid non ideo quia cognovit me? dicit Dominus. <sup>17</sup> Tui vero oculi et cor ad avaritiam, et ad sanguinem innocentem fundendum, et ad calumniam, et ad cursum mali operis. <sup>18</sup> Propterea hæc dicit Dominus ad Joakim, filium Josiæ, regem Juda: Non plangent eum: Væ frater ! et væ soror ! non concrepabunt ei: Væ domine ! et væ inclyte ! <sup>320</sup> <sup>19</sup> Sepultura asini sepelietur, putrefacta et projecta extra portas Jerusalem.] <sup>20</sup> [Ascende Libanum, et clama, et in Basan da vocem tuam: et clama ad transeuntes, quia contriti sunt omnes amatores tui. <sup>21</sup> Locutus sum ad te in abundantia tua, et dixisti: Non audiam: hæc est via tua ab adolescentia tua, quia non audisti vocem meam. <sup>22</sup> Omnes pastores tuos pascet ventus, et amatores tui in captivitatem ibunt: et tunc confunderis, et erubesces ab omni malitia tua. <sup>23</sup> Quæ sedes in Libano, et nidificas in cedris, quomodo congemuisti cum venissent tibi dolores, quasi dolores parturientis? <sup>24</sup> Vivo ego, dicit Dominus, quia si fuerit Jechonias filius Joakim regis Juda annulus in manu dextera mea, inde evellam eum, <sup>321</sup> <sup>25</sup> et dabo te in manu quærentium animam tuam, et in manu quorum tu formidas faciem, et in manu Nabuchodonosor regis Babylonis, et in manu Chaldæorum: <sup>26</sup> et mittam te, et matrem tuam quæ genuit te, in terram alienam, in qua nati non estis, ibique moriemini. <sup>27</sup> Et in terram ad quam ipsi levant animam suam ut revertantur illuc, non revertentur. <sup>28</sup> Numquid vas fictile atque contritum vir iste Jechonias? numquid vas absque omni voluptate? quare abjecti sunt ipse et semen ejus, et projecti in terram quam ignoraverunt? <sup>322</sup> <sup>29</sup> Terra, terra, terra, audi sermonem Domini. <sup>30</sup> Hæc dicit Dominus: Scribe virum istum sterilem, virum qui in diebus suis non prosperabitur: nec enim erit de semine ejus vir

<sup>318</sup> + **22.11 Ad Sellum**, etc. ID. Josias rex justus tres filios habuit, etc., usque ad ideo quod in eis regnum Juda finitum sit.

<sup>319</sup> + **22.13 Væ qui ædificat**, etc. ID. Joachim filio Josiæ, quem substituit Pharaos, etc., usque ad narrat mortuum et non sepultum, de quo dicemus in posterioribus.

<sup>320</sup> + **22.18 Non plangent eum**, etc. ID. Quod de Hebræo posuimus, etc., usque ad tandem latrunculi interfecerunt eum.

<sup>321</sup> + **22.24 Vivo ego dicit**, etc. ID. Supra dixerat domui regis, etc., usque ad intelligere de Domino majestatis. Quia si fuerit, etc. ID. Miserabiliter Grunius, etc., usque ad si voluerit legere legat ut philosophum, non ut ecclesiasticum.

<sup>322</sup> + **22.28 Nunquid?** ID. Cum hoc de Jechonia dicatur, etc., usque ad qui projiciatur de manu Domini et tradatur Babylonio regi? Vir iste. ID. Jechonias interpretatur Domini præparatio, cui in præsentem loco prima syllaba ie, id est nomen Domini aufertur, et dicitur Chonias, ut subaudiatur perditioni et interitui præparatus.

qui sedeat super solium David, et potestatem habeat ultra in Juda.] <sup>323</sup>

23[Væ pastoribus qui disperdunt et dilacerant gregem pascuæ meæ ! dicit Dominus. <sup>324</sup> <sup>2</sup> Ideo hæc dicit Dominus Deus Israël ad pastores qui pascunt populum meum: Vos dispersistis gregem meum, et eiecistis eos, et non visitastis eos: ecce ego visitabo super vos malitiam studiorum vestrorum, ait Dominus. <sup>3</sup> Et ego congregabo reliquias gregis mei de omnibus terris ad quas eiecero eos illuc: et convertam eos ad rura sua, et crescent et multiplicabuntur. <sup>4</sup> Et suscitabo super eos pastores, et pascent eos: non formidabunt ultra, et non pavebunt, et nullus quæretur ex numero, dicit Dominus.] <sup>5</sup> [Ecce dies veniunt, dicit Dominus, et suscitabo David germen justum: et regnabit rex, et sapiens erit, et faciet iudicium et justitiam in terra. <sup>325</sup> <sup>6</sup> In diebus illis salvabitur Juda, et Israël habitabit confidenter: et hoc est nomen quod vocabunt eum: Dominus justus noster. <sup>7</sup> Propter hoc ecce dies veniunt, dicit Dominus, et non dicent ultra: Vivit Dominus, qui eduxit filios Israël de terra Ægypti, <sup>326</sup> <sup>8</sup> sed: Vivit Dominus, qui eduxit et adduxit semen domus Israël de terra aquilonis, et de cunctis terris ad quas eieceram eos illuc, et habitabunt in terra sua.] <sup>9</sup> Ad prophetas: [Contritum est cor meum in medio mei; contremuerunt omnia ossa mea: factus sum quasi vir ebrius, et quasi homo madidus a vino, a facie Domini, et a facie verborum sanctorum ejus. <sup>327</sup> <sup>10</sup> Quia adulteris repleta est terra, quia a facie maledictionis luxit terra, arefacta sunt arva deserti: factus est cursus eorum malus, et fortitudo eorum dissimilis. <sup>328</sup> <sup>11</sup> Propheta namque et sacerdos polluti sunt, et in domo mea inveni malum eorum, ait Dominus. <sup>329</sup> <sup>12</sup> Idcirco via eorum erit quasi lubricum in tenebris: impellentur enim, et corruent in ea: afferam enim super eos mala, annum visitationis eorum, ait

<sup>323</sup> + **22.30 Scribe.** ID. Christus de hujus semine natus est, etc., usque ad imo regni simulacrum, penitus fuisse deletum. Sterilem, etc. Aquilæ prima editio, sterilem, secunda, non crescentem. Symmachus vacuum, LXX et Theodotio, abominabilem et abdicatum.

<sup>324</sup> + **23.1 Væ pastoribus,** etc. HIER. Quia omnis spes Judaici regni defecit, transit ad principes Ecclesiæ; et synagoga cum suis pastoribus derelicta atque damnata, ad apostolos sermo fit, de quibus dicitur, Super eos suscitabo pastores Ezech. 34., etc.

<sup>325</sup> + **23.5 Ecce dies veniunt, dicit,** etc. ID. Abiectis pastoribus synagogæ, Scribis, scilicet et Pharisæis, et apostolis in loco eorum substitutis, inducitur Christus pastor pastorum.

<sup>326</sup> + **23.7 Propter hoc,** etc. ID. Hoc totum caput in LXX non habetur, cujus hic sensus est: Quia non per Moysen populus Dei de Ægypto liberatur, sed per Christum de toto orbe; quod ex toto complebitur, quando ab oriente et occidente et septentrione et meridie venient et recumbent cum Abraham, Isaac et Jacob, ut postquam intraverit, plenitudo gentium, tunc omnis Israël salvus fiat Rom. 11..

<sup>327</sup> + **23.9 Quasi homo madidus a vino.** Nullius intelligentiæ, nullius sapientiæ, etc., usque ad Jeremias enim interpretatur excelsus Domini. A facie Domini, etc. ID. Considerato vultu omnipotentis Dei, id est, Patris et vultu Filii, qui est splendor gloriæ, et figura substantiæ ejus, propheta et anima et corpore perhorrescit, et se nihil esse intelligit, unde: Ut jumentum factus sum apud te.

<sup>328</sup> + **23.10 Luxit terra.** Quidquid de terra Judæa juxta litteram intelligis, ad congregationem credentium referre poteris. Propter adulteria enim, et mendacia, et perjuriam, virtutum et gratiarum sterilitas consequitur.

<sup>329</sup> + **23.11 Propheta namque,** etc. Quando in Ecclesia Dei et maxime in principibus ejus, inveniuntur mala, scimus esse completum, Propheta namque et sacerdotes polluti sunt. Afferam super eos mala. Non quod mala sint, etc., usque ad dicitur correctio et cruciatus peccantis.

Dominus. <sup>13</sup> Et in prophetis Samariæ vidi fatuitatem: prophetabant in Baal, et decipiebant populum meum Israël. <sup>14</sup> Et in prophetis Jerusalem vidi similitudinem adulterantium, et iter mendacii: et confortaverunt manus pessimorum, ut non converteretur unusquisque a malitia sua: facti sunt mihi omnes ut Sodoma, et habitatores ejus quasi Gomorrha. <sup>330</sup> <sup>15</sup> Propterea hæc dicit Dominus exercituum ad prophetas: Ecce ego cibabo eos absinthio, et potabo eos felle: a prophetis enim Jerusalem egressa est pollutio super omnem terram. <sup>331</sup> <sup>16</sup> Hæc dicit Dominus exercituum: Nolite audire verba prophetarum qui prophetant vobis, et decipiunt vos: visionem cordis sui loquuntur, non de ore Domini. <sup>17</sup> Dicunt his qui blasphemant me: Locutus est Dominus: Pax erit vobis: et omni qui ambulat in pravitate cordis sui dixerunt: Non veniet super vos malum. <sup>18</sup> Quis enim affuit in consilio Domini, et vidit, et audivit sermonem ejus? quis consideravit verbum illius, et audivit? <sup>332</sup> <sup>19</sup> Ecce turbo Dominicæ indignationis egredietur, et tempestas erumpens super caput impiorum veniet. <sup>333</sup> <sup>20</sup> Non revertetur furor Domini, usque dum faciat et usque dum compleat cogitationem cordis sui: in novissimis diebus intelligetis consilium ejus. <sup>21</sup> Non mittebam prophetas, et ipsi currebant: non loquebar ad eos, et ipsi prophetabant. <sup>22</sup> Si stetissent in consilio meo, et nota fecissent verba mea populo meo, avertissem utique eos a via sua mala, et a cogitationibus suis pessimis. <sup>23</sup> Putasne Deus e vicino ego sum, dicit Dominus, et non Deus de longe? <sup>24</sup> Si occultabitur vir in absconditis, et ego non videbo eum? dicit Dominus. Numquid non cælum et terram ego impleo? dicit Dominus. <sup>25</sup> Audivi quæ dixerunt prophetæ prophetantes in nomine meo mendacium, atque dicentes: Somniavi, somniavi. <sup>334</sup> <sup>26</sup> Usquequo istud est in corde prophetarum vaticinantium mendacium, et prophetantium seductiones cordis sui? <sup>27</sup> Qui volunt facere ut obliviscatur populus meus nominis mei, propter somnia eorum quæ narrat unusquisque ad proximum suum, sicut obliti sunt patres eorum nominis mei propter Baal? <sup>335</sup> <sup>28</sup> Propheta qui habet somnium, narret somnium: et qui habet sermonem meum, loquatur sermonem meum vere. Quid paleis ad triticum? dicit Dominus. <sup>336</sup> <sup>29</sup> Numquid non verba mea sunt quasi ignis, dicit Dominus, et quasi malleus conterens petram? <sup>337</sup> <sup>30</sup> Propterea ecce

<sup>330</sup> + **23.14 Et in prophetis.** Quomodo prophetæ Samariæ, quidquid loquuntur, prophetant in Baal; sic hæretici in Ecclesia, sive extra, ut supplantent populum Israël, qui prius cernebat Deum, loquuntur in dæmonibus.

<sup>331</sup> + **23.15 A prophetis.** ID. Utimur enim hoc testimonio, etc., usque ad conantur infamare et ubique blasphemias seminare.

<sup>332</sup> + **23.18 Quis enim?** Nolite credere falsis prophetis hæc dicentibus: unde scire possunt consilia Domini, quis vidit et annuntiavit eis?

<sup>333</sup> + **23.19 Ecce turbo.** Quasi dicat per contrarium patet prophetas nescire, quod dicunt: pro pace enim et securitate quam promittunt, venit tempestas Babylonia.

<sup>334</sup> + **23.25 Audivi quæ dixerunt.** HIER. Sunt multa genera prophetandi, etc., usque ad et corda indomabilia tyrannorum propria conscientia Domini majestatem sentirent.

<sup>335</sup> + **23.27 Somnia eorum quæ.** Sunt hodie somniatores in Ecclesia, qui errores suos Domini prophetias faciunt, crebro dicentes, somniavi: contra quos dicitur, usquequo istud, etc.

<sup>336</sup> + **23.28 Quid paleis?** Pulchre doctrina hæreticorum paleis comparatur, quæ medullam non habent, nec refecionem præbent.

<sup>337</sup> + **23.29 Nunquid non verba mea?** Quod in priori populo prophetæ mentiebantur, etc.,

ego ad prophetas, ait Dominus, qui furantur verba mea unusquisque a proximo suo.<sup>338</sup> <sup>31</sup> Ecce ego ad prophetas, ait Dominus, qui assumunt linguas suas, et aiunt: Dicit Dominus. <sup>32</sup> Ecce ego ad prophetas somniantes mendacium, ait Dominus, qui narraverunt ea, et seduxerunt populum meum in mendacio suo et in miraculis suis, cum ego non misissem eos, nec mandassem eis: qui nihil profuerunt populo huic, dicit Dominus. <sup>33</sup> Si igitur interrogaverit te populus iste, vel propheta, aut sacerdos, dicens: Quod est onus Domini? dices ad eos: Vos estis onus: projiciam quippe vos, dicit Dominus. <sup>34</sup> Et propheta, et sacerdos, et populus qui dicit: Onus Domini: visitabo super virum illum et super domum ejus. <sup>35</sup> Hæc dicetis unusquisque ad proximum, et ad fratrem suum: Quid respondit Dominus? et quid locutus est Dominus? <sup>36</sup> Et onus Domini ultra non memorabitur: quia onus erit unicuique sermo suus, et pervertistis verba Dei viventis, Domini exercituum, Dei nostri. <sup>37</sup> Hæc dices ad prophetam: Quid respondit tibi Dominus? et quid locutus est Dominus? <sup>38</sup> Si autem onus Domini dixeritis, propter hoc hæc dicit Dominus: Quia dixistis sermonem istum: Onus Domini, et misi ad vos dicens: Nolite dicere: Onus Domini: <sup>39</sup> propterea ecce ego tollam vos portans, et derelinquam vos, et civitatem quam dedi vobis et patribus vestris, a facie mea:<sup>339</sup> <sup>40</sup> et dabo vos in opprobrium sempiternum, et in ignominiam æternam, quæ numquam oblivione delebitur.]

24Ostendit mihi Dominus: et ecce duo calathi pleni ficis, positi ante templum Domini, postquam transtulit Nabuchodonosor rex Babylonis Jechoniam filium Joakim, regem Juda, et principes ejus, et fabrum, et inclusorem, de Jerusalem, et adduxit eos in Babylonem.<sup>340</sup> <sup>2</sup> Calathus unus ficus bonas habebat nimis, ut solent ficus esse primi temporis: et calathus unus ficus habebat malas nimis, quæ comedi non poterant eo quod essent malæ.<sup>341</sup> <sup>3</sup> Et dixit Dominus ad me: Quid tu vides, Jeremia? Et dixi: Ficus, ficus bonas, bonas valde: et malas, malas valde, quæ comedi non possunt eo quod sint malæ. <sup>4</sup> Et factum est verbum Domini ad me, dicens:<sup>342</sup> <sup>5</sup> [Hæc dicit Dominus Deus Israël: Sicut ficus hæ bonæ, sic cognoscam transmigrationem Juda, quam emisi de loco isto in terram Chaldæorum, in bonum. <sup>6</sup> Et ponam oculos meos super eos ad placandum, et reducam eos in

usque ad minatur ergo Dominus contra hujusmodi magistros se esse venturum. Quasi ignis. De ecclesiasticis viris scriptum est, quod malleus et securis non sunt audita in domo Domini.

<sup>338</sup> + **23.30 Qui furantur.** Semper enim mendacium imitatur veritatem, aliter enim non potest decipere.

<sup>339</sup> + **23.39 Et derelinquam.** Hoc in tempore Babylonicæ captivitatis factum esse novimus, etc., usque ad quod proprie mysterium Trinitatis significat.

<sup>340</sup> + **24.1 Ostendit.** HIER. Notandum hanc visionem factam esse tempore Sedeciæ postquam Jechonias ductus est in transmigrationem, non in captivitatem, quia ultro se tradidit. Duo calathi. Duos calathos vel cophinos malarum et bonarum ficorum, etc., usque ad ad bonas ficus et calathum optimum referantur. Positi ante templum. Non foris etc., usque ad et ficus malas malas valde.

<sup>341</sup> + **24.2 Et calathus unus,** ID. Nos simplices quærentes historias, etc., usque ad et in Babylonem ductus et ibi mortuus.

<sup>342</sup> + **24.4 Et factum est.** ID. Delirat hoc loco allegoricus interpres, etc., usque ad in terra hac et in valle lacrymarum esse morituros.

terram hanc: et ædificabo eos, et non destruam: et plantabo eos, et non evellam. <sup>343</sup> 7 Et dabo eis cor ut sciant me, quia ego sum Dominus: et erunt mihi in populum, et ego ero eis in Deum, quia revertentur ad me in toto corde suo. <sup>8</sup> Et sicut ficus pessimæ quæ comedi non possunt eo quod sint malæ, hæc dicit Dominus: Sic dabo Sedeciam regem Juda, et principes ejus, et reliquos de Jerusalem, qui remanserunt in urbe hac, et qui habitant in terra Ægypti. <sup>9</sup> Et dabo eos in vexationem, afflictionemque omnibus regnis terræ, in opprobrium, et in parabolam, et in proverbium, et in maledictionem in universis locis ad quæ ejeci eos. <sup>10</sup> Et mittam in eis gladium, et famem, et pestem, donec consumantur de terra quam dedi eis et patribus eorum.]

25 Verbum quod factum est ad Jeremiam, de omni populo Juda, in anno quarto Joakim filii Josiæ regis Juda (ipse est annus primus Nabuchodonosor regis Babylonis), <sup>344</sup> 2 quod locutus est Jeremias propheta ad omnem populum Juda, et ad universos habitatores Jerusalem, dicens: <sup>3</sup> A tertio decimo anno Josiæ filii Amon regis Juda, usque ad diem hanc, iste tertius et vigesimus annus, factum est verbum Domini ad me, et locutus sum ad vos, de nocte consurgens et loquens, et non audistis. <sup>345</sup> 4 Et misit Dominus ad vos omnes servos suos prophetas, consurgens diluculo, mittensque: et non audistis, neque inclinastis aures vestras ut audiretis, <sup>346</sup> 5 cum diceret: Revertimini unusquisque a via sua mala, et a pessimis cogitationibus vestris, et habitabitis in terra quam dedit Dominus vobis et patribus vestris, a sæculo et usque in sæculum: <sup>6</sup> et nolite ire post deos alienos, ut serviatis eis, adoretisque eos: neque me ad iracundiam provocetis in operibus manuum vestrarum, et non affligam vos. <sup>347</sup> 7 Et non audistis me, dicit Dominus, ut me ad iracundiam provocaretis in operibus manuum vestrarum, in malum vestrum. <sup>8</sup> Propterea hæc dicit Dominus exercituum: Pro eo quod non audistis verba mea, <sup>9</sup> ecce ego mittam et assumam universas cognationes aquilonis, ait Dominus, et Nabuchodonosor regem Babylonis servum meum, et adducam eos super terram istam, et super habitatores ejus, et super omnes nationes quæ in circuitu illius sunt: et interficiam eos, et ponam eos in stuporem et in sibilum, et in solitudines sempiternas. <sup>348</sup> 10 Perdamque ex eis vocem gaudii et vocem lætitiæ,

<sup>343</sup> + **24.6 Et ponam oculos meos.** In captivitate posuit oculos suos super illos, etc., usque ad magna pars reversa est in Jerusalem.

<sup>344</sup> + **25.1 Verbum.** HIER. Hæc priora sunt præterita visione, etc., usque ad quod non observat carmen lyricum. Anno quarto. Quarto anno regis Joachim, etc., usque ad Joachim autem interfectus est undecimo anno regni sui.

<sup>345</sup> + **25.3 A tertio decimo anno.** A tredecimo anno regni Josiæ, etc., usque ad nisi assidue Domini admonitione revocetur.

<sup>346</sup> + **25.4 Et misit Dominus ad vos omnes servos.** Non per unum prophetam, sed per omnes, populum suum admonuit, et quasi in vigiliis et excubiis constitutus, surrexit diluculo, ut commoneret, et non audierunt; ut quanto crebrior admonitio, tanto contemptus major. Neque inclinastis. ID. Tanta fuit duritia, etc., usque ad quæ non supplicium pro scelere irrogat.

<sup>347</sup> + **25.6 Post deos,** etc. Quasi dicat: Hæc cum superioribus monebam, ne diis alienis serviretis, nec me ad iracundiam provocaretis et nolentem ad pœnam vestram cogeretis.

<sup>348</sup> + **25.9 Et assumam,** etc., Nabuchodonosor servum meum. Non sicut prophetæ et alii



vocem sponsi et vocem sponsæ, vocem molæ et lumen lucernæ. <sup>349</sup> **11** Et erit universa terra hæc in solitudinem, et in stuporem: et servient omnes gentes istæ regi Babylonis septuaginta annis. <sup>350</sup> **12** Cumque impleti fuerint septuaginta anni, visitabo super regem Babylonis et super gentem illam, dicit Dominus, iniquitatem eorum, et super terram Chaldæorum, et ponam illam in solitudines sempiternas. <sup>351</sup> **13** Et adducam super terram illam omnia verba mea, quæ locutus sum contra eam, omne quod scriptum est in libro isto, quæcumque prophetavit Jeremias adversum omnes gentes: <sup>14</sup> quia servierunt eis, cum essent gentes multæ, et reges magni: et reddam eis secundum opera eorum, et secundum facta manuum suarum. <sup>15</sup> Quia sic dicit Dominus exercituum, Deus Israël: Sume calicem vini furoris hujus de manu mea, et propinabis de illo cunctis gentibus ad quas ego mittam te. <sup>352</sup> **16** Et bibent, et turbabuntur et insanient a facie gladii quem ego mittam inter eos. <sup>17</sup> Et accipi calicem de manu Domini, et propinavi cunctis gentibus ad quas misit me Dominus, <sup>18</sup> Jerusalem, et civitatibus Juda, et regibus ejus, et principibus ejus, ut darem eos in solitudinem, et in stuporem, et in sibilum, et in maledictionem, sicut est dies ista: <sup>353</sup> **19** Pharaoni regi Ægypti, et servis ejus, et principibus ejus, et omni populo ejus: <sup>354</sup> **20** et universis generaliter: cunctis regibus terræ Ausitidis, et cunctis regibus terræ Philisthiim, et Ascaloni, et Gazæ, et Accaron, et reliquiis Azoti: <sup>355</sup> **21** et Idumææ, et Moab, et filii Ammon: **22** et cunctis regibus Tyri, et universis regibus Sidonis, et regibus terræ insularum qui sunt trans mare: <sup>356</sup> **23** et Dedan, et Thema, et Buz, et universis qui attonsi sunt in comam: **24** et cunctis regibus Arabiæ, et cunctis regibus occidentis, qui habitant in deserto: **25** et cunctis regibus Zambri, et cunctis regibus Elam, et cunctis regibus Medorum: <sup>357</sup> **26**

sancti, qui Deo serviunt; sed quia in eversione Jerusalem Domini serviat voluntati. Et adducam eos, etc. Hæc sunt præmia contemptorum et Deum audire nolentium. Quidquid ergo mali super nos adducitur, nostra peccata merentur; et sicut gentes contra Jerusalem adductæ sunt, sic hodie contra negligentem Ecclesiam serviunt.

<sup>349</sup> + **25.10 Perdamque**, etc. Hoc in conciliabulo malignantium comprobatur, ut magistri eorum non doceant verbum Dei, sed sibilent ad instar colubri: in quibus vox gaudii et lætitiæ periit ut non audiant illud Apostoli: Gaudete in Domino semper, iterum dico, gaudete Phil. 4..

<sup>350</sup> + **25.11 Et servient**. Sicut Jerusalem, etc., usque ad prophetico sermone describit.

<sup>351</sup> + **25.12 Cum impleti**. Nota quod non solum contra Babylonem prophetat Jeremias, sed contra omnes gentes quæ in exercitu Babylonis fuerunt et contra populum Dei dimicaverunt.

<sup>352</sup> + **25.15 Sume calicem vini furoris**, etc. ID. Propinatio calicis dominici furoris indicium est, etc., usque ad calix propinatur, sed pro pœna.

<sup>353</sup> + **25.18 Jerusalem et civitatibus Juda**, etc., Quasi dicat: Putabam quod solis gentibus propinarem, et ideo huic ministerio me lætus obtuleram, sed inter cæteras gentes, imo ante cæteras, propinavi Jerusalem et civitatibus Juda, etc.

<sup>354</sup> + **25.19 Pharaoni regi Ægypti**, etc. Post Jerusalem bibit Pharaon rex Ægypti, et servi ejus, et principes, et universus populus, et qui non quidem est Ægyptius, sed in ejus regionibus commoratur.

<sup>355</sup> + **25.20 Philisthiim et Ascalonis**, etc. Generali nomine terram Palæstinorum significat, etc., usque ad Palæstinos autem a Babyloniis captos atque vastatos scribit Isaias.

<sup>356</sup> + **25.22 Tyri et universis regibus**, etc. Tyrus et Sidon sunt in littore Phœnicis, etc., usque ad lingua Hebraica magna ex parte confinis est.

<sup>357</sup> + **25.25 Regibus Elam et cunctis**, etc. Quia sequitur, Elam et reges Medorum arbitrantur Zambri esse Persidis regionem: nisi forte quia præcessit Arabia, intelligantur esse reges solitudinis. Et rex Sesach, etc. Quasi dicat: Omnes in circumitu, etc., usque ad ante Antichristum secundum

cunctis quoque regibus aquilonis, de prope et de longe, unicuique contra fratrem suum: et omnibus regnis terræ quæ super faciem ejus sunt: et rex Sesach bibit post eos. <sup>27</sup> Et dices ad eos: Hæc dicit Dominus exercituum, Deus Israël: Bibite, et inebriamini, et vomite: et cadite, neque surgatis a facie gladii quem ego mittam inter vos. <sup>28</sup> Cumque noluerint accipere calicem de manu tua ut bibant, dices ad eos: Hæc dicit Dominus exercituum: Bibentes bibetis: <sup>29</sup> quia ecce in civitate in qua invocatum est nomen meum ego incipiam affligere, et vos quasi innocentes et immunes eritis? non eritis immunes: gladium enim ego voco super omnes habitatores terræ, dicit Dominus exercituum. <sup>30</sup> Et tu prophetabis ad eos omnia verba hæc, et dices ad illos: [Dominus de excelso rugiet, et de habitaculo sancto suo dabit vocem suam: rugiens rugiet super decorem suum: celeuma quasi calcantium concinetur adversus omnes habitatores terræ. <sup>31</sup> Pervenit sonitus usque ad extrema terræ, quia iudicium Domino cum gentibus: iudicatur ipse cum omni carne. Impios tradidi gladio, dicit Dominus. <sup>358</sup> <sup>32</sup> Hæc dicit Dominus exercituum: Ecce afflictio egredietur de gente in gentem, et turbo magnus egredietur a summitatibus terræ. <sup>359</sup> <sup>33</sup> Et erunt interfecti Domini in die illa, a summo terræ usque ad summum ejus: non plangentur, et non colligentur, neque sepelientur: in sterquilinum super faciem terræ jacebunt. <sup>34</sup> Ululate, pastores, et clamate, et aspergite vos cinere, optimates gregis: quia completi sunt dies vestri ut interficiamini, et dissipationes vestræ: et cadetis quasi vasa pretiosa. <sup>360</sup> <sup>35</sup> Et peribit fuga a pastoribus, et salvatio ab optimatibus gregis. <sup>36</sup> Vox clamoris pastorum, et ululatus optimatum gregis, quia vastavit Dominus pascua eorum: <sup>37</sup> et conticuerunt arva pacis a facie iræ furoris Domini. <sup>38</sup> Dereliquit quasi leo umbraculum suum, quia facta est terra eorum in desolationem a facie iræ columbæ, et a facie iræ furoris Domini.]

26 In principio regni Joakim filii Josiæ regis Juda, factum est verbum istud a Domino, dicens: <sup>361</sup> <sup>2</sup> Hæc dicit Dominus: Sta in atrio domus Domini, et loqueris ad omnes civitates Juda, de quibus veniunt ut adorent in domo Domini universos sermones quos ego mandavi tibi ut loquaris ad eos: noli subtrahere verbum, <sup>362</sup> <sup>3</sup> si forte audiant, et convertantur unusquisque a via sua mala, et pœniteat me mali quod cogito facere eis propter malitiam

---

Danielem destruendum.

<sup>358</sup> + **25.31 Iudicium Domino.** Quia sunt gentium diversa merita, qui non credit jam iudicatus est, in eo scilicet quod non credit; sed qui non credunt diversis afficientur suppliciis.

<sup>359</sup> + **25.32 Ecce egredietur,** etc. Erubescant qui, vim Scripturæ sanctæ facientes, in bonam partem accipiunt Domini comminationes.

<sup>360</sup> + **25.34 Ululate, pastores.** HIER. Ululatus optimatum gregis, etc., usque ad conticescent bona pacis et auferentur in furore. Domini.

<sup>361</sup> + **26.1 In principio regni,** etc. ID. Hæc prophetia superiore prior est, quamvis sub eodem rege. Illa enim facta est in anno quarto, hæc in ejusdem regis principio. Non igitur in prophetia historiæ ordo texendus cum priora posterius, et posteriora prius dicantur.

<sup>362</sup> + **26.2 In atrio domus.** Ut etiam exteris civitatibus loquaris. Pulchre autem in atrio stat, et in vestibulo templi, ut qui ad orandum conveniunt sermones ejus audire cogantur.

studiorum eorum. <sup>363</sup> <sup>4</sup> Et dices ad eos: Hæc dicit Dominus: Si non audieritis me, ut ambuletis in lege mea quam dedi vobis, <sup>364</sup> <sup>5</sup> ut audiatis sermones servorum meorum prophetarum quos ego misi ad vos, de nocte consurgens, et dirigens, et non audistis: <sup>6</sup> dabo domum istam sicut Silo, et urbem hanc dabo in maledictionem cunctis gentibus terræ. <sup>365</sup> <sup>7</sup> Et audierunt sacerdotes, et prophetæ, et omnis populus, Jeremiam loquentem verba hæc in domo Domini. <sup>8</sup> Cumque complisset Jeremias, loquens omnia quæ præceperat ei Dominus ut loqueretur ad universum populum, apprehenderunt eum sacerdotes, et prophetæ, et omnis populus, dicens: Morte moriatur. <sup>9</sup> Quare prophetavit in nomine Domini, dicens: Sicut Silo erit domus hæc, et urbs ista desolabitur eo quod non sit habitator? Et congregatus est omnis populus adversus Jeremiam in domo Domini. <sup>10</sup> Et audierunt principes Juda verba hæc, et ascenderunt de domo regis in domum Domini, et sederunt in introitu portæ domus Domini novæ. <sup>366</sup> <sup>11</sup> Et locuti sunt sacerdotes et prophetæ ad principes, et ad omnem populum, dicens: Judicium mortis est viro huic, quia prophetavit adversus civitatem istam, sicut audistis auribus vestris. <sup>367</sup> <sup>12</sup> Et ait Jeremias ad omnes principes, et ad universum populum, dicens: Dominus misit me ut prophetarem ad domum istam, et ad civitatem hanc, omnia verba quæ audistis. <sup>368</sup> <sup>13</sup> Nunc ergo bonas facite vias vestras et studia vestra, et audite vocem Domini Dei vestri, et pœnitebit Dominum mali quod locutus est adversum vos. <sup>369</sup> <sup>14</sup> Ego autem ecce in manibus vestris sum: facite mihi quod bonum et rectum est in oculis vestris. <sup>15</sup> Verumtamen scitote et cognoscite quod, si occideritis me, sanguinem innocentem tradetis contra vosmetipsos, et contra civitatem istam, et habitatores ejus: in veritate enim misit me Dominus ad vos, ut loquerer in auribus vestris omnia verba hæc. <sup>16</sup> Et dixerunt principes et omnis populus ad sacerdotes et ad prophetas: Non est viro huic iudicium mortis, quia in nomine Domini Dei nostri locutus est ad nos. <sup>370</sup> <sup>17</sup> Surrexerunt ergo viri de senioribus terræ, et dixerunt ad omnem cœtum populi, loquentes: <sup>18</sup> Michæas de Morasthi fuit propheta in diebus Ezechia regis Juda, et ait ad omnem populum Juda, dicens: [Hæc dicit Dominus exercituum: Sion quasi ager arabitur, et Jerusalem in acervum lapidum erit, et mons domus in

<sup>363</sup> + **26.3 Si forte audiant,** etc. ID. Quasi dicat: Forsitan audient, etc., usque ad Forsitan verebuntur Filium meum.

<sup>364</sup> + **26.4 Si non audieritis.** In nostra positum est voluntate, etc., usque ad nec semel et a sæculo, sed semper et sollicito?

<sup>365</sup> + **26.6 Dabo domum istam sicut Silo.** Sicut exstructo templo in area, etc., usque ad factus pro nobis maledictum.

<sup>366</sup> + **26.10 Portæ domus.** Nova dicitur, quia qui in ea sedebant, et iudicio præerant, sacerdotum et pseudoprophetarum calumniæ resistebant.

<sup>367</sup> + **26.11 Et locuti sunt.** Sedentibus urbis principibus in porta templi, etc., usque ad sed futura bona cogitantes.

<sup>368</sup> + **26.12 Et ait.** Jeremias illis accusantibus et crimen, etc., usque ad: In veritate enim misit me Dominus ad vos.

<sup>369</sup> + **26.13 Nunc ergo bonas.** Quasi dicat: Si irascimini, etc., usque ad ut nihil subtrahatur de veritate.

<sup>370</sup> + **26.16 Et dixerunt.** Principes civitatis, et populus intellexerunt, etc., usque ad quas mutatione sententiæ possumus liberare.

excelsa silvarum.] <sup>19</sup> Numquid morte condemnavit eum Ezechias rex Juda, et omnis Juda? numquid non timuerunt Dominum, et deprecati sunt faciem Domini, et pœnituit Dominum mali quod locutus fuerat adversum eos? Itaque nos facimus malum grande contra animas nostras. <sup>20</sup> Fuit quoque vir prophetans in nomine Domini, Urias filius Semei de Cariathiarim, et prophetavit adversus civitatem istam, et adversus terram hanc, juxta omnia verba Jeremiæ. <sup>371</sup> <sup>21</sup> Et audivit rex Joakim, et omnes potentes et principes ejus, verba hæc, et quæsivit rex interficere eum: et audivit Urias, et timuit, fugitque, et ingressus est Ægyptum. <sup>22</sup> Et misit rex Joakim viros in Ægyptum, Elnathan filium Achobor, et viros cum eo, in Ægyptum, <sup>372</sup> <sup>23</sup> et eduxerunt Uriam de Ægypto, et adduxerunt eum ad regem Joakim, et percussit eum gladio, et projecit cadaver ejus in sepulchris vulgi ignobilis. <sup>24</sup> Igitur manus Ahicam filii Saphan fuit cum Jeremia, ut non traderetur in manus populi, et interficerent eum. <sup>373</sup>

<sup>27</sup>In principio regni Joakim filii Josiæ regis Juda, factum est verbum istud ad Jeremiam a Domino, dicens: <sup>374</sup> <sup>2</sup> Hæc dicit Dominus ad me: Fac tibi vincula et catenas, et pones eas in collo tuo, <sup>375</sup> <sup>3</sup> et mittes eas ad regem Edom, et ad regem Moab, et ad regem filiorum Ammon, et ad regem Tyri, et ad regem Sidonis, in manu nuntiorum qui venerunt Jerusalem ad Sedeciam regem Juda. <sup>4</sup> Et præcipies eis ut ad dominos suos loquantur: Hæc dicit Dominus exercituum, Deus Israël: Hæc dicetis ad dominos vestros: <sup>5</sup> Ego feci terram, et homines, et jumenta quæ sunt super faciem terræ, in fortitudine mea magna, et in brachio meo extento, et dedi eam ei qui placuit in oculis meis. <sup>376</sup> <sup>6</sup> Et nunc itaque ego dedi omnes terras istas in manu Nabuchodonosor regis Babylonis servi mei: insuper et bestias agri dedi ei, ut serviant illi: <sup>377</sup> <sup>7</sup> et servient ei omnes gentes, et filio ejus, et filio filii ejus, donec veniat tempus terræ ejus et ipsius: et servient ei gentes multæ et reges magni. <sup>378</sup> <sup>8</sup> Gens autem et regnum quod non servierit Nabuchodonosor

<sup>371</sup> + **26.20 Fuit quoque.** Quæritur cum Urias eadem, etc., usque ad Christum quoque de manibus persequentium lapsus est.

<sup>372</sup> + **26.22 Et misit rex.** Quæritur quomodo Joachim rex, etc., usque ad et hanc prophetiam factam esse cum cœpisset regnare.

<sup>373</sup> + **26.24 Igitur manus Ahicam.** Quamvis Jeremias Domini auxilio liberatus sit, in mercedem tamen deputatur illi, per quem prophetam suum liberavit.

<sup>374</sup> + **27.1 In principio regni,** etc. HIERON. Multi putant hoc sequentis esse principium; sed superiori est jungendum, ut quidquid dictum refertur vel factum, in principio regni Joachim credamus fuisse.

<sup>375</sup> + **27.2 Hæc dicit Dominus.** Præterita visio in principio regni Joachim: hæc autem sub Sedecia, qui extremo regnavit in Jerusalem, sub quo urbs capta est et eversa.

<sup>376</sup> + **27.5 Terram et homines.** Ordo contrarius, in Genesi prius fiunt animantia, homo postea; hic autem prius hominem nominat, postea quæ sunt ei subjecta. In fortitudine. Christus Dei virtus et Dei sapientia. Et dedi, etc. Significat quod humano generi omnia per gratiam sunt tributa.

<sup>377</sup> + **27.6 In manu Nabuchodonosor.** ID. Quantæ infelicitatis est Israël, cujus comparatione Nabuchodonosor servus Dei appellatur? Insuper et. Omne genus animalium; cum homine enim omnia traduntur, quæ ipsi subjiciuntur; vel feras gentes, ut illi serviant qui servire non noverant.

<sup>378</sup> + **27.7 Donec veniat,** etc. Ne putetur regnum Nabuchodonosor esse perpetuum, significat ipsum a Medis et a Persis esse capiendum.

regi Babylonis, et quicumque non curvaverit collum suum sub jugo regis Babylonis, in gladio, et in fame, et in peste visitabo super gentem illam, ait Dominus, donec consumam eos in manu ejus. <sup>9</sup> Vos ergo nolite audire prophetas vestros, et divinos, et somniatores, et augures, et maleficos, qui dicunt vobis: Non servietis regi Babylonis: <sup>10</sup> quia mendacium prophetant vobis, ut longe vos faciant de terra vestra, et ejiciant vos, et pereatis. <sup>11</sup> Porro gens quæ subjecerit cervicem suam sub jugo regis Babylonis, et servierit ei, dimittam eam in terra sua, dicit Dominus, et colet eam, et habitabit in ea. <sup>12</sup> Et ad Sedeciam regem Juda locutus sum secundum omnia verba hæc, dicens: Subjicite colla vestra sub jugo regis Babylonis, et servite ei et populo ejus, et vivetis. <sup>379</sup> <sup>13</sup> Quare moriemini, tu et populus tuus, gladio, et fame, et peste, sicut locutus est Dominus ad gentem quæ servire noluerit regi Babylonis? <sup>14</sup> Nolite audire verba prophetarum dicentium vobis: Non servietis regi Babylonis: quia mendacium ipsi loquuntur vobis: <sup>380</sup> <sup>15</sup> quia non misi eos, ait Dominus, et ipsi prophetant in nomine meo mendaciter, ut ejiciant vos, et pereatis, tam vos quam prophetæ qui vaticinantur vobis. <sup>16</sup> Et ad sacerdotes, et ad populum istum, locutus sum, dicens: Hæc dicit Dominus: Nolite audire verba prophetarum vestrorum, qui prophetant vobis, dicentes: Ecce vasa Domini revertentur de Babylone nunc cito: mendacium enim prophetant vobis. <sup>381</sup> <sup>17</sup> Nolite ergo audire eos: sed servite regi Babylonis, ut vivatis: quare datur hæc civitas in solitudinem? <sup>382</sup> <sup>18</sup> Et si prophetæ sunt, et est verbum Domini in eis, occurrant Domino exercituum, ut non veniant vasa quæ derelicta fuerant in domo Domini, et in domo regis Juda, et in Jerusalem, in Babylonem. <sup>383</sup> <sup>19</sup> Quia hæc dicit Dominus exercituum ad columnas, et ad mare, et ad bases, et ad reliqua vasorum quæ remanserunt in civitate hac, <sup>384</sup> <sup>20</sup> quæ non tulit Nabuchodonosor rex Babylonis cum transferret Jechoniam filium Joakim regem Juda de Jerusalem in Babylonem, et omnes optimates Juda et Jerusalem: <sup>21</sup> quia hæc dicit Dominus exercituum, Deus Israël, ad vasa quæ derelicta sunt in domo Domini, et in domo regis Juda et Jerusalem: <sup>22</sup> In Babylonem transferentur, et ibi erunt usque ad diem visitationis suæ, dicit Dominus, et afferri faciam ea, et restitui in loco isto.

<sup>379</sup> + **27.12 Et ad Sedeciam.** Post universas gentes, transit ad Sedeciam et eadem comminatur, neque enim Judæi privilegium merentur, qui aut similia, aut graviora, aut majora gentibus peccaverunt; et qui audire dedignantur, peste et fame consumuntur. Nolite audire. In hoc loco allegoricus interpres, etc., usque ad et sedem pristinam non recepturos.

<sup>380</sup> + **27.14 Non servietis.** Melius est sponte servire, et amicum Deum habere, et gentilem terram colere, quam necessitate captivum servire. Verba prophetæ. Notandum in Scripturis sanctis pseudopphetas vocari prophetas.

<sup>381</sup> + **27.16 Et ad sacerdotes.** Post gentes et reges, sacerdotibus loquitur, et populo, qui jam interitum prophetis annuntiaverat, dicens: Et ejiciam vos, etc. Loquitur autem eadem quæ supra.

<sup>382</sup> + **27.17 Ut vivatis.** Nota Dei clementiam, etc., usque ad In quo ostenditur posse retineri Deum precibus sanctorum.

<sup>383</sup> + **27.18 Occurrant Domino.** ID. Occurrant, et quæ prædicunt opere completa demonstrent, et tunc veritate vaticinium probabitur.

<sup>384</sup> + **27.19 Ad columnas.** ID. Enumerat vasa quæ translata fuerunt in Babylonem, capto Sedecia, civitate incensa, temploque subverso.

28 Et factum est in anno illo, in principio regni Sedeciæ regis Juda, in anno quarto, in mense quinto, dixit ad me Hananias filius Azur, propheta de Gabaon, in domo Domini, coram sacerdotibus et omni populo, dicens: <sup>385</sup> <sup>2</sup> Hæc dicit Dominus exercituum, Deus Israël: Contrivi jugum regis Babylonis. <sup>3</sup> Adhuc duo anni dierum, et ego referri faciam ad locum istum omnia vasa domus Domini, quæ tulit Nabuchodonosor rex Babylonis de loco isto, et transtulit ea in Babylonem. <sup>386</sup> <sup>4</sup> Et Jechoniam filium Joakim regem Juda, et omnem transmirationem Juda, qui ingressi sunt in Babylonem, ego convertam ad locum istum, ait Dominus: conteram enim jugum regis Babylonis. <sup>5</sup> Et dixit Jeremias propheta ad Hananiam prophetam, in oculis sacerdotum, et in oculis omnis populi qui stabat in domo Domini: <sup>6</sup> et ait Jeremias propheta: Amen ! sic faciat Dominus: suscitet Dominus verba tua quæ prophetasti, ut referantur vasa in domum Domini, et omnis transmigratio de Babylone ad locum istum. <sup>387</sup> <sup>7</sup> Verumtamen audi verbum hoc quod ego loquor in auribus tuis, et in auribus universi populi: <sup>388</sup> <sup>8</sup> prophetæ qui fuerunt ante me et ante te, ab initio, et prophetaverunt super terras multas et super regna magna de prælio, et de afflictione, et de fame: <sup>9</sup> propheta qui vaticinatus est pacem, cum venerit verbum ejus, scietur propheta quem misit Dominus in veritate. <sup>10</sup> Et tulit Hananias propheta catenam de collo Jeremiæ prophetæ, et confregit eam. <sup>389</sup> <sup>11</sup> Et ait Hananias in conspectu omnis populi, dicens: Hæc dicit Dominus: Sic confringam jugum Nabuchodonosor regis Babylonis, post duos annos dierum de collo omnium gentium. <sup>12</sup> Et abiit Jeremias propheta in viam suam. Et factum est verbum Domini ad Jeremiam, postquam confregit Hananias propheta catenam de collo Jeremiæ prophetæ, dicens: <sup>13</sup> Vade, et dices Hananiæ: Hæc dicit Dominus: Catenas ligneas contrivisti, et facies pro eis catenas ferreas. <sup>390</sup> <sup>14</sup> Quia hæc dicit Dominus exercituum, Deus Israël: Jugum ferreum posui super collum cunctorum gentium istarum, ut serviant Nabuchodonosor regi Babylonis, et servient ei: insuper et bestias terræ dedi ei. <sup>391</sup> <sup>15</sup> Et dixit Jeremias propheta ad Hananiam prophetam: Audi, Hanania: non misit te

<sup>385</sup> + **28.1 Et factum est.** HIER. Nondum Ezechiele vaticinante in Babylone ad eos qui cum Jechonia fuerant translati. In domo Domini. In qua fiducialiter loquitur, quia prospera populo pollicetur; et mendacia libenter audiuntur, præcipue quæ optata promittunt.

<sup>386</sup> + **28.3 Omnia vasa,** etc. Jeremias dixerat etiam reliqua vasa apportanda, hic affirmat asportata esse reportanda.

<sup>387</sup> + **28.6 Amen, sic,** etc. Optat fieri, quod ille mentitus, etc., usque ad sub aliorum exemplo veritatem asserit.

<sup>388</sup> + **28.7 Verumtamen.** Potuit dicere mentiris, etc., usque ad ut qui audiunt expectent exitum.

<sup>389</sup> + **28.10 Et tulit.** HIER. Consideranda Jeremiæ prudentia, etc., usque ad quorum notitia solius Dei est.

<sup>390</sup> + **28.13 Ananias.** Putative propheta dicitur. Multa enim in Scripturis sanctis dicuntur juxta opinionem illius temporis, quo gesta referuntur, non juxta veritatem rei.

<sup>391</sup> + **28.14 Et facies.** Cum abiisset Jeremias et silentio devorasset injurias, factus est sermo Domini ad eum non ut suis verbis ad Ananiam mendacio gloriantem loqueretur et diceret: Hæc dixit Dominus; quod tamen ille Ananias dixerat, sed mendacium semper veritatem imitatur. Catenas. Ostendit quod minorem pœnam retinens, etc., usque ad in brutorum animalium corpora sunt relegatæ.

Dominus, et tu confidere fecisti populum istum in mendacio. <sup>392</sup> <sup>16</sup> Idcirco hæc dicit Dominus: Ecce ego mittam te a facie terræ: hoc anno morieris: adversum enim Dominum locutus es. <sup>393</sup> <sup>17</sup> Et mortuus est Hananias propheta in anno illo, mense septimo. <sup>394</sup>

29 Et hæc sunt verba libri quem misit Jeremias propheta de Jerusalem ad reliquias seniorum transmigratorum, et ad sacerdotes, et ad prophetas, et ad omnem populum quem traduxerat Nabuchodonosor de Jerusalem in Babylonem, <sup>395</sup> <sup>2</sup> postquam egressus est Jechonias rex, et domina, et eunuchi, et principes Juda et Jerusalem, et faber et inclusor, de Jerusalem, <sup>3</sup> in manu Elasa filii Saphan, et Gamariæ filii Helciæ, quos misit Sedecias rex Juda ad Nabuchodonosor regem Babylonis in Babylonem, dicens: <sup>4</sup> Hæc dicit Dominus exercituum, Deus Israël, omni transmigratori quam transtuli de Jerusalem in Babylonem: <sup>5</sup> Ædificate domos, et habitate: et plantate hortos, et comedite fructum eorum. <sup>6</sup> Accipite uxores, et generate filios et filias: et date filiis vestris uxores, et filias vestras date viris, et pariant filios et filias: et multiplicamini ibi, et nolite esse pauci numero. <sup>396</sup> <sup>7</sup> Et quærite pacem civitatis ad quam transmigrare vos feci, et orate pro ea ad Dominum, quia in pace illius erit pax vobis. <sup>8</sup> Hæc enim dicit Dominus exercituum, Deus Israël: Non vos seducant prophetæ vestri qui sunt in medio vestrum, et divini vestri, et ne attendatis ad somnia vestra quæ vos somniatis: <sup>397</sup> <sup>9</sup> quia falso ipsi prophetant vobis in nomine meo, et non misi eos, dicit Dominus. <sup>10</sup> Quia hæc dicit Dominus: Cum cœperint impleri in Babylone septuaginta anni, visitabo vos, et suscitabo super vos verbum meum bonum, ut reducam vos ad locum istum. <sup>398</sup> <sup>11</sup> Ego enim scio cogitationes quas ego cogito super vos, ait Dominus, cogitationes pacis et non afflictionis, ut dem vobis finem et patientiam. <sup>12</sup> Et invocabitis me, et ibitis: et orabitis me, et ego exaudiam

<sup>392</sup> + **28.15 Et dixit.** ID. Notandum quod Jeremias passus injuriam, nondum facto ad se sermone Domini, silet, postea vero missus a Domino, audacter arguit, mentienti denuntians propinquam mortem.

<sup>393</sup> + **28.16 Hoc anno.** ID. Si quando morimur, de carceribus corporum liberamur, secundum illud quod male interpretantur hæretici: Educ de carcere animam meam; quomodo pro supplicio mors irrogatur?

<sup>394</sup> + **28.17 Mense septimo.** Forsitan in mense septimo, qui requiem significare solet, ideo mortuum mentiuntur, ut de malis corporis liberetur, juxta illud: Mors viro requies est; nos autem novimus corpora credentium esse templa Dei, si Spiritus sanctus habitet in illis.

<sup>395</sup> + **29.1 Et hæc.** HIER. Intendit persuadere ne acquiescant pseudopropheta, qui eis post breve tempus reditum in Jerusalem promittebant. Sed sciant se in Babylone multo tempore moraturos. Verba libri. ID. Hic libellus Jeremiæ, etc., usque ad quæ a Domino sibi imperata fuerant populo suaderet. Ad reliquias seniorum. Primo ad senes, deinde ad sacerdotes, tertio ad prophetas, quarto ad omnem populum Dei sermo dirigitur, secundum ordinem ætatis epistola prophetæ mittatur.

<sup>396</sup> + **29.6 Accipite uxores,** etc. Jeremiæ (quia prope est captivitas Jerusalem) imperatur ne accipiat uxorem, nec faciat filios. Si autem, propter angustiam temporis, habentibus usus uxorum tollitur, quanto magis non habentibus ne accipiant imperatur.

<sup>397</sup> + **29.8 Non vos seducant.** ID. Falsos prophetas, etc., usque ad qui idem erat regni Sedeciæ.

<sup>398</sup> + **29.10 Cum cœperint.** Nolite credere pseudopropheta, qui vicinum reditum pollicentur vobis: prius enim vobis explebuntur septuaginta anni quam redeatis. Septuaginta anni. Tandiu in sæculi confusione versamur, etc., usque ad et tunc est finis laboris nostri atque patientiæ.

vos. <sup>13</sup> Quæretis me, et inuenietis, cum quæsieritis me in toto corde vestro.  
<sup>14</sup> Et inueniar a vobis, ait Dominus: et reducam captiuitatem uestram, et congregabo vos de uersis gentibus et de cunctis locis ad quæ expuli vos, dicit Dominus, et reuerti uos faciam de loco ad quem transmigrare uos feci.  
<sup>399</sup> <sup>15</sup> Quia dixistis: Suscitauit nobis Dominus prophetas in Babylone: <sup>16</sup> quia hæc dicit Dominus ad regem qui sedet super solium David, et ad omnem populum habitatorem urbis huius, ad fratres uestros qui non sunt egressi uobiscum in transmigrationem: <sup>17</sup> hæc dicit Dominus exercituum: Ecce mittam in eos gladium, et famem, et pestem: et ponam eos quasi ficus malas, quæ comedi non possunt eo quod pessimæ sint: <sup>400</sup> <sup>18</sup> et persequar eos in gladio, et in fame, et in pestilentia: et dabo eos in vexationem uersis regnis terræ: in maledictionem, et in stuporem, et in sibilum, et in opprobrium cunctis gentibus ad quas ego eieci eos, <sup>19</sup> eo quod non audierint uerba mea, dicit Dominus, quæ misit ad eos per seruos meos prophetas, de nocte consurgens et mittens: et non audistis, dicit Dominus. <sup>401</sup> <sup>20</sup> Vos ergo audite uerbum Domini, omnis transmigrationis quam emisi de Ierusalem in Babylonem. <sup>21</sup> Hæc dicit Dominus exercituum, Deus Israël, ad Achab filium Coliæ, et ad Sedeciam filium Maasiæ, qui prophetant uobis in nomine meo mendaciter: Ecce ego tradam eos in manus Nabuchodonosor regis Babylonis, et percutiet eos in oculis uestris: <sup>402</sup> <sup>22</sup> et assumetur ex eis maledictio omni transmigrationi Iuda quæ est in Babylone, dicentium: Ponat te Dominus sicut Sedeciam et sicut Achab, quos frixit rex Babylonis in igne: <sup>23</sup> pro eo quod fecerint stultitiam in Israël, et mœchati sunt in uxores amicorum suorum, et locuti sunt uerbum in nomine meo mendaciter, quod non mandavi eis. Ego sum iudex et testis, dicit Dominus. <sup>24</sup> Et ad Semeiam Nehelamiten dices: <sup>403</sup> <sup>25</sup> Hæc dicit Dominus exercituum, Deus Israël: Pro eo quod misisti in nomine tuo libros ad omnem populum qui est in Ierusalem, et ad Sophoniam filium Maasiæ sacerdotem, et ad uersos sacerdotes, dicens: <sup>26</sup> Dominus dedit te sacerdotem pro Jojade sacerdote, ut sis dux in domo Domini, super omnem uirum arreptitium et prophetantem, ut mittas eum in neruum et in carcerem: <sup>27</sup> et nunc quare non increpasti Ieremiam Anathothiten, qui prophetat uobis? <sup>404</sup> <sup>28</sup> Quia super hoc misit in Babylonem ad nos, dicens: Longum est: ædificate domos, et habitate: et plantate hortos, et comedite fructus eorum. <sup>29</sup> Legit ergo Sophonias sacerdos librum istum in auribus Ieremiæ prophetæ. <sup>30</sup> Et factum est uerbum Domini ad Ieremiam, dicens: <sup>31</sup> Mitte ad omnem

<sup>399</sup> + **29.14 Et reuerti.** Ut certius sciatis quod hunc reditum tanquam propinquum sperare non debeatis, sed domos ædificare, pomeria plantare, filios generare, et tempus exspectare promissum.

<sup>400</sup> + **29.17 Quasi ficus.** Theodotio suarinas, id est, secundas, Symmachus nouissimas, quæ Hebraice suarim

<sup>401</sup> + **29.19 De nocte.** ID. Non cessavi monere, ut uos imitentur qui in transmigratione securo otio fruimini, donec compleantur promissa Dei.

<sup>402</sup> + **29.21 Ad Achab.** Aiunt Hebræi hos esse presbyteros, etc., usque ad ut acta pœnitentia post uerum sabbatum pristinum locum possiderent.

<sup>403</sup> + **29.24 Ad Semeiam.** Semeias de loco Nehelami, etc., usque ad Discretio uero spirituum spiritualis gratia est.

<sup>404</sup> + **29.27 Quare non increpasti.** ID. Mendacio præuenit ueritatem quod ipse merebatur aliis imponit, quia prudentiores sunt filii tenebrarum filiis lucis, et quod timent sibi inferunt aliis.



transmigrationem, dicens: Hæc dicit Dominus ad Semeiam Nehelamiten: Pro eo quod prophetavit vobis Semeias, et ego non misi eum, et fecit vos confidere in mendacio, <sup>405</sup> <sup>32</sup> idcirco hæc dicit Dominus: Ecce ego visitabo super Semeiam Nehelamiten, et super semen ejus: non erit ei vir sedens in medio populi hujus, et non videbit bonum quod ego faciam populo meo, ait Dominus, quia prævaricationem locutus est adversus Dominum.

30 Hoc verbum quod factum est ad Jeremiam a Domino, dicens: <sup>406</sup> <sup>2</sup> Hæc dicit Dominus Deus Israël, dicens: Scribe tibi omnia verba quæ locutus sum ad te, in libro. <sup>3</sup> Ecce enim dies veniunt, dicit Dominus, et convertam conversionem populi mei Israël et Juda, ait Dominus: et convertam eos ad terram quam dedi patribus eorum, et possidebunt eam. <sup>4</sup> Et hæc verba quæ locutus est Dominus ad Israël et ad Judam: <sup>5</sup> [Quoniam hæc dicit Dominus: Vocem terroris audivimus: formido, et non est pax. <sup>6</sup> Interrogate, et videte si generat masculus: quare ergo vidi omnis viri manum super lumbum suum, quasi parturientis, et conversæ sunt universæ facies in auruginem? <sup>7</sup> Væ ! quia magna dies illa, nec est similis ejus: tempusque tribulationis est Jacob, et ex ipso salvabitur. <sup>407</sup> <sup>8</sup> Et erit in die illa, ait Dominus exercituum: conteram jugum ejus de collo tuo, et vincula ejus dirumpam, et non dominabuntur ei amplius alieni: <sup>9</sup> sed servient Domino Deo suo, et David regi suo, quem suscitabo eis. <sup>408</sup> <sup>10</sup> Tu ergo ne timeas, serve meus Jacob, ait Dominus, neque paveas, Israël: quia ecce ego salvabo te de terra longinqua, et semen tuum de terra captivitatis eorum: et revertetur Jacob, et quiescet, et cunctis affluet bonis, et non erit quem formidet: <sup>409</sup> <sup>11</sup> quoniam tecum ego sum, ait Dominus, ut salvem te. Faciam enim consummationem in cunctis gentibus in quibus dispersi te: te autem non faciam in consummationem: sed castigabo te in iudicio, ut non videaris tibi innoxius. <sup>12</sup> Quia hæc dicit Dominus: Insanabilis fractura tua; pessima plaga tua: <sup>410</sup> <sup>13</sup> non est qui iudicet iudicium tuum ad alligandum: curationum utilitas non est tibi. <sup>14</sup> Omnes amatores tui obliti sunt tui, teque non quærent: plaga enim inimici percussi te castigatione crudeli: propter multitudinem iniquitatis tuæ dura facta sunt peccata tua. <sup>15</sup> Quid clamas super contritione tua? insanabilis est dolor tuus: propter multitudinem iniquitatis tuæ, et propter dura peccata tua, feci hæc tibi. <sup>16</sup> Propterea omnes qui comedunt te devorabuntur, et universi hostes tui in captivitatem ducentur: et qui te vastant vastabuntur, cunctosque

<sup>405</sup> + **29.31 Hæc dicit.** Semeias vere Nehelamites, etc., usque ad contra quos subditur, Ecce ego visitabo.

<sup>406</sup> + **30.1 Hoc verbum.** HIER. Jeremias reversionem promittebat, etc., usque ad Sed cum Israël et Judas in terram suam revertentur.

<sup>407</sup> + **30.7 Væ quia magna.** ID. Prius tristia nuntiantur, etc., usque ad nec manibus arma, sed lumbos quasi parturientes tenebunt.

<sup>408</sup> + **30.9 Et David.** Christo, scilicet; quomodo enim primus Adam et secundus scribuntur juxta corporis veritatem sic et David. Christus enim de David secundum carnem.

<sup>409</sup> + **30.10 Serve meus.** ID. Familiariter vocat, sicut Abraham, Isaac, Jacob vocantur servi Dei. Moyses quoque et alii prophetæ, et Paulus in principio Epistolarum hoc titulo gloriantur.

<sup>410</sup> + **30.12 Plaga.** ID. Aliter amicus, aliter percutit inimicus; aliter pater, aliter hostis: ille enim ut corrigat, iste percutit ut occidat.

prædatores tuos dabo in prædam. <sup>411</sup> <sup>17</sup> Obducam enim cicatricem tibi, et a vulneribus tuis sanabo te, dicit Dominus. Quia ejectam vocaverunt te, Sion: hæc est, quæ non habebat requirentem. <sup>18</sup> Hæc dicit Dominus: Ecce ego convertam conversionem tabernaculorum Jacob, et tectis ejus miserebor: et ædificabitur civitas in excelso suo, et templum juxta ordinem suum fundabitur: <sup>412</sup> <sup>19</sup> et egredietur de eis laus, voxque ludentium. Et multiplicabo eos, et non minuentur: et glorificabo eos, et non attenuabuntur. <sup>413</sup> <sup>20</sup> Et erunt filii ejus sicut a principio, et cœtus ejus coram me permanebit, et visitabo adversum omnes qui tribulant eum. <sup>21</sup> Et erit dux ejus ex eo, et princeps de medio ejus producet: et applicabo eum, et accedet ad me. Quis enim iste est qui applicet cor suum ut appropinquet mihi? ait Dominus: <sup>22</sup> et eritis mihi in populum, et ego ero vobis in Deum. <sup>23</sup> Ecce turbo Domini, furor egrediens, procella ruens: in capite impiorum conquiescet. <sup>24</sup> Non avertet iram indignationis Dominus, donec faciat et compleat cogitationem cordis sui: in novissimo dierum intelligetis ea.]

31 [In tempore illo, dicit Dominus, ero Deus universis cognationibus Israël, et ipsi erunt mihi in populum. <sup>414</sup> <sup>2</sup> Hæc dicit Dominus: Invenit gratiam in deserto populus qui remanserat a gladio: vadet ad requiem suam Israël. <sup>3</sup> Longe Dominus apparuit mihi. Et in caritate perpetua dilexi te: ideo attraxi te, miserans. <sup>415</sup> <sup>4</sup> Rursumque ædificabo te, et ædificaberis, virgo Israël: adhuc ornaberis tympanis tuis, et egredieris in choro ludentium. <sup>5</sup> Adhuc plantabis vineas in montibus Samariæ: plantabunt plantantes, et donec tempus veniat, non vindemiabunt. <sup>416</sup> <sup>6</sup> Quia erit dies in qua clamabunt custodes in monte Ephraim: Surgite, et ascendamus in Sion ad Dominum Deum nostrum. <sup>7</sup> Quia hæc dicit Dominus: Exsultate in lætitia, Jacob, et hinnite contra caput gentium: personate, et canite, et dicite: Salva, Domine, populum tuum, reliquias Israël. <sup>417</sup> <sup>8</sup> Ecce ego adducam eos de terra aquilonis, et congregabo eos ab extremis terræ: inter quos erunt cæcus et claudus, prægnans et pariens simul, cœtus magnus revertentium huc. <sup>418</sup> <sup>9</sup>

<sup>411</sup> + **30.16 Propterea.** ID. Sub Zorobabel hæc facta cognoscimus, etc., usque ad sed plenius atque perfectius in Christo complentur.

<sup>412</sup> + **30.18 Ecce ego convertam.** ID. Quoniam typus præcessit, etc., usque ad plenius atque perfectius in Christo et in apostolis complentur.

<sup>413</sup> + **30.19 Ludentium, et multiplicabo eos,** etc. Non secundum illud, Sedit populus manducare et bibere, et surrexerunt ludere Exod. 32.; sed sicut David ludebat ante arcam Domini I Par. 13.

<sup>414</sup> + **31.1 In tempore.** HIER. Opere completo, cognoscitur artifex; adepta sanitate, medici industria. Sic eversa Jerusalem, et abjecto priori populo, intelligitur quod repulsio Judæorum salus sit gentium.

<sup>415</sup> + **31.3 Longe Dominus apparuit.** Quia offenderat Dominum Israël, etc., usque ad non merito salvatus est.

<sup>416</sup> + **31.5 Plantabunt,** etc. ID. Qui post captivitatem Israël ab alienis possessi sunt, quibus dicitur: Plantate plantaria et vindemiate Deut. 28..

<sup>417</sup> + **31.7 Reliquias Israël.** Quæ secundum electionem salvantur.

<sup>418</sup> + **31.8 Ecce ego adducam,** etc. Per apostolos et apostolicos viros qui sunt custodes, clamantes in monte Samariæ, quibus præcipitur: Personate, canite III Reg. 18., etc. Claudus. ID. Qualibus per Eliam dicitur: Usquequo claudicatis utroque pede? Sed in Christo postea cucurrerunt;

In fletu venient, et in misericordia reducam eos: et adducam eos per torrentes aquarum in via recta, et non impingent in ea, quia factus sum Israël pater, et Ephraim primogenitus meus est. <sup>419</sup> <sup>10</sup> Audite verbum Domini, gentes, et annuntiate in insulis quæ procul sunt, et dicite: Qui dispersit Israël congregabit eum, et custodiet eum sicut pastor gregem suum. <sup>11</sup> Redemit enim Dominus Jacob, et liberavit eum de manu potentioris. <sup>420</sup> <sup>12</sup> Et venient, et laudabunt in monte Sion: et confluent ad bona Domini, super frumento, et vino, et oleo, et fœtu pecorum et armentorum: eritque anima eorum quasi hortus irriguus, et ultra non esurient. <sup>13</sup> Tunc lætabitur virgo in choro, juvenes et senes simul: et convertam luctum eorum in gaudium, et consolabor eos, et lætificabo a dolore suo. <sup>14</sup> Et inebriabo animam sacerdotum pinguedine, et populus meus bonis meis adimplebitur, ait Dominus. <sup>421</sup> <sup>15</sup> Hæc dicit Dominus: Vox in excelso audita est lamentationis: luctus, et fletus Rachel plorantis filios suos, et nolentis consolari super eis, quia non sunt. <sup>422</sup> <sup>16</sup> Hæc dicit Dominus: Quiescat vox tua a ploratu, et oculi tui a lacrimis, quia est merces operi tuo, ait Dominus, et revertentur de terra inimici: <sup>423</sup> <sup>17</sup> et est spes novissimis tuis, ait Dominus, et revertentur filii ad terminos suos. <sup>18</sup> Audiens audivi Ephraim transmigrantem: Castigasti me, et eruditus sum, quasi juvenculus indomitus: converte me, et convertar, quia tu Dominus Deus meus. <sup>424</sup> <sup>19</sup> Postquam enim convertisti me, egi pœnitentiam: et postquam ostendisti mihi, percussi femur meum. Confusus sum, et erubui, quoniam sustinui opprobrium adolescentiæ meæ. <sup>425</sup> <sup>20</sup> Si filius honorabilis mihi Ephraim, si puer delicatus ! quia ex quo locutus sum de eo, adhuc recordabor ejus. Idcirco conturbata sunt viscera mea super eum: miserans miserebor ejus, ait Dominus. <sup>426</sup> <sup>21</sup> Statue tibi speculam; pone tibi amaritudines; dirige cor

et, qui ambulabat in tenebris, vidit lucem magnam. In fletu venient et in, etc. ID. Judæi hoc putant esse completum, etc., usque ad hæc fuisse completa possunt probare.

<sup>419</sup> + **31.9 Et Ephraim.** Ephraim, qui est typus gentilis populi, etc., usque ad in Samaria primus regnum obtinuit, etc.

<sup>420</sup> + **31.11 De manu potentioris,** etc. ID. Adversariæ potestatis, quæ natura fortior: nos autem fide fortiores, si tamen liberamur ab eo qui alligat fortem, et domum ejus diripit.

<sup>421</sup> + **31.14 Animam sacerdotum.** Qui habent scientiam Dei, de quorum ore interrogant legem, qui credunt in eum qui est sacerdos in æternum. Pinguedine, et populus meus bonis meis adimplebitur, ait Dominus, etc. Unde Dominus in valle Gethsemani, id est pinguedinis, comprehensus est.

<sup>422</sup> + **31.15 Vox in.** ID. Quidam Judæorum hunc locum sic exponunt, etc., usque ad Hebræos, quod legebant Hebraice, suis sermonibus expressisse. Rachel plorans. Rachel mater Joseph, etc., usque ad flere dicitur pueros juxta se interfectos.

<sup>423</sup> + **31.16 Et revertentur.** ID. Melius hoc de parvulis intelligimus, etc., usque ad et infantes resurgent in virum perfectum.

<sup>424</sup> + **31.18 Eruditus sum.** Quasi dicat: Correctio proficit in salutem, et quæ ad præsens videtur esse tristitiæ, post reddit fructum pacis.

<sup>425</sup> + **31.19 Quoniam sustinui.** ID. Per ignorantiam ætatis dicit se peccasse, ut facilius veniam consequatur, unde: Delicta juventutis meæ et ignorantias meas ne memineris. Et in sequentibus, Deus parvulum eum vocavit et deliciis affluentem, propter divitiarum scilicet magnitudinem et terræ fertilitatem Psal. 24..

<sup>426</sup> + **31.20 Si filius honorabilis,** etc. Pœnitentiam agente Ephraim et dicente: Erudisti me, Domine, et eruditus sum, etc., respondit Dominus, et plene conversum tali sustentat oraculo, Si filius honorabilis, etc. Idcirco conturbata. Quasi dicat: Avido animo suscepit verba mea, et

tuum in viam rectam in qua ambulasti: revertere, virgo Israël, revertere ad civitates tuas istas. <sup>427</sup> <sup>22</sup> Usquequo deliciis dissolveris, filia vaga? quia creavit Dominus novum super terram: femina circumdabit virum. <sup>23</sup> Hæc dicit Dominus exercituum, Deus Israël: Adhuc dicent verbum istud in terra Juda et in urbibus ejus, cum convertero captivitatem eorum: Benedicat tibi Dominus, pulchritudo justitiæ, mons sanctus: <sup>428</sup> <sup>24</sup> et habitabunt in eo Judas et omnes civitates ejus simul, agricolæ et minantes greges. <sup>25</sup> Quia inebriavi animam lassam, et omnem animam esurientem saturavi. <sup>429</sup> <sup>26</sup> Ideo quasi de somno suscitatus sum: et vidi, et somnus meus dulcis mihi. <sup>430</sup> <sup>27</sup> Ecce dies veniunt, dicit Dominus, et seminabo domum Israël et domum Juda semine hominum et semine jumentorum. <sup>431</sup> <sup>28</sup> Et sicut vigilavi super eos ut evellerem, et demolirer, et dissiparem, et disperderem, et affligerem, sic vigilabo super eos ut ædificem et plantem, ait Dominus. <sup>29</sup> In diebus illis non dicent ultra: Patres comederunt uvam acerbam, et dentes filiorum obstupuerunt. <sup>30</sup> Sed unusquisque in iniquitate sua morietur: omnis homo qui comederit uvam acerbam, obstupescunt dentes ejus. <sup>432</sup> <sup>31</sup> Ecce dies venient, dicit Dominus, et feriam domui Israël et domui Juda foedus novum, <sup>433</sup> <sup>32</sup> non secundum pactum quod pepigi cum patribus eorum in die qua apprehendi manum eorum ut educerem eos de terra Ægypti, pactum quod irritum fecerunt: et ego dominatus sum eorum, dicit Dominus. <sup>33</sup> Sed hoc erit pactum quod feriam cum domo Israël post dies illos, dicit Dominus: dabo legem meam in visceribus eorum, et in corde eorum scribam eam, et ero eis in Deum, et ipsi erunt mihi in populum: <sup>34</sup> et non docebit ultra vir proximum suum et vir fratrem suum, dicens: Cognosce Dominum: omnes enim cognoscent me, a minimo eorum usque ad maximum, ait Dominus: quia propitiabor iniquitati eorum, et peccati eorum non memorabor amplius. <sup>434</sup>

servavit, sed tamen miserebor ejus; quia et hominum justitia Dei indiget misericordia.

<sup>427</sup> + **31.21 Statue tibi.** etc. Provocat ad satisfactionem, ut consideret in quantis deliquit, et agens pœnitentiam ad pristinam gratiam revertatur, secundum illud, Memento unde excideris, et age pœnitentiam, et prima opera fac Apoc. 2.. Dirige cor tuum. ID. Dirigit cor suum in viam rectam, etc., usque ad nec per luxus sæculi declinare consentit. Revertere, virgo, Israël, revertere ad civitates tuas istas. ID. Licet hæc quidam juxta historiam, etc., usque ad et desinat vagari per luxus sæculi.

<sup>428</sup> + **31.23 Adhuc dicent.** ID. Christianis, scilicet temporibus, quibus captivitatem populi sui Dominus convertit. Benedicat tibi. Hæc sub Zorobabel ex parte videntur, etc., usque ad juxta Judæos et nostros judaizantes carnaliter.

<sup>429</sup> + **31.25 Quia inebriavi.** Mutatio personarum, etc., usque ad respondet populus de captivitate reversus: ideo expergefactus sum, etc.

<sup>430</sup> + **31.26 Ideo quasi.** Ut imitarer dicentem, etc., usque ad et diem resurrectionis expectat.

<sup>431</sup> + **31.27 Ecce dies veniunt dicit Dominus.** Omnes hujuscemodi repromissiones, etc., usque ad sed sit Deus omnia in omnibus.

<sup>432</sup> + **31.30 Obstupescunt dentes.** ID. Dentes comedentium non possunt suavitatem sentire, etc., usque ad non austeritate ciborum, sed vitio dentium.

<sup>433</sup> + **31.31 Ecce dies.** Hoc testimonio Paulus, etc., usque ad et circumcisio et sabbatum spiritualiter compleverunt.

<sup>434</sup> + **31.34 Et non docebit.** Ut non quærant Judaicos magistros et mandata hominum, sed doceantur a Spiritu sancto, si tamen templum Dei fuerint, et spiritus Dei habitaverit in ipsis, qui spirat ubi vult, et diversas habet gratias: Notitia tamen unius Dei omnium virtutum possessio est. Omnes enim cognoscent. HIER. Quia omnes erunt etc., usque ad non in natura qua in semetipso etiam cum videretur latuit.

<sup>35</sup> Hæc dicit Dominus qui dat solem in lumine diei, ordinem lunæ et stellarum in lumine noctis: qui turbat mare, et sonant fluctus ejus: Dominus exercituum nomen illi: <sup>435</sup> <sup>36</sup> Si defecerint leges istæ coram me, dicit Dominus, tunc et semen Israël deficiet, ut non sit gens coram me cunctis diebus. <sup>436</sup> <sup>37</sup> Hæc dicit Dominus: Si mensurari potuerint cæli sursum, et investigari fundamenta terræ deorsum, et ego abjiciam universum semen Israël, propter omnia quæ fecerunt, dicit Dominus. <sup>437</sup> <sup>38</sup> Ecce dies veniunt, dicit Dominus, et ædificabitur civitas Domino, a turre Hananeel usque ad portam anguli. <sup>438</sup> <sup>39</sup> Et exhibit ultra norma mensuræ in conspectu ejus super collem Gareb, et circuibit Goatha, <sup>439</sup> <sup>40</sup> et omnem vallem cadaverum, et cineris, et universam regionem mortis usque ad torrentem Cedron, et usque ad angulum portæ equorum orientalis, Sanctum Domini: non evelletur, et non destruetur ultra in perpetuum.]

32 Verbum quod factum est ad Jeremiam a Domino, in anno decimo Sedeciae regis Juda, ipse est annus decimus octavus Nabuchodonosor. <sup>440</sup> <sup>2</sup> Tunc exercitus regis Babylonis obsidebat Jerusalem, et Jeremias propheta erat clausus in atrio carceris qui erat in domo regis Juda. <sup>441</sup> <sup>3</sup> Clauserat enim eum Sedecias rex Juda, dicens: Quare vaticinaris, dicens: Hæc dicit Dominus: Ecce ego dabo civitatem istam in manus regis Babylonis, et capiet eam: <sup>442</sup> <sup>4</sup> et Sedecias rex Juda non effugiet de manu Chaldæorum, sed tradetur in manus regis Babylonis: et loquetur os ejus cum ore illius, et oculi ejus oculos illius videbunt: <sup>5</sup> et in Babylonem ducet Sedeciam, et ibi erit donec visitem eum, ait Dominus: si autem dimicaveritis adversum Chaldæos, nihil prosperum habebitis? <sup>443</sup> <sup>6</sup> Et dixit Jeremias: Factum est verbum Domini ad me, dicens: <sup>7</sup> Ecce Hanameel filius Sellum, patruelis tuus, veniet ad te, dicens: Eme tibi agrum meum qui est in Anathoth, tibi enim competit

<sup>435</sup> + **31.35 Qui dat solem.** ID. Secundum Genesim sol in coelo positus est in lumine diei, luna et stellæ in lumine noctis. In psalmo quoque legitur: Dies diei eructat verbum, et nox nocti indicat scientiam, quia invicem sibi dies et noctes succedunt.

<sup>436</sup> + **31.36 Si defecerint,** etc. Si cæli peribunt, et sic vestimentum veterascent, quomodo semen Israël potest esse perpetuum? Cæli autem peribunt.

<sup>437</sup> + **31.37 Si mensurari.** Quasi dicat: Quomodo rerum, etc., usque ad nec aliquando cessabit.

<sup>438</sup> + **31.38 Ecce dies.** Qui mille annorum regnum, etc., usque ad, ibi autem Ananehel per men litteram.

<sup>439</sup> + **31.39 Usque ad anguli portam.** ID. Nulla enim vera justitia, etc., usque ad hæc ædificatio manebit in æternum.

<sup>440</sup> + **32.1 Verbum quod,** etc. HIER. Non solum verba, sed et opera prophetarum, sunt nobis in exempla virtutum. Poterat Jeremias nuntiare prospera et frui regis amicitia, sed maluit Deo obedire, qui potest et animam et corpus perdere in gehennam.

<sup>441</sup> + **32.2 In atrio carceris.** ID. Notanda ex parte regis clementia, qui non in carcere, sed in vestibulo prophetarum recludi jusserat, in libera scilicet custodia, ne posset effugere; quasi non omnis Jerusalem clausa munitionibus fuerit communis carcer.

<sup>442</sup> + **32.3 Clauserat enim eum.** Jam vicina captivitate, jam peste et fame consumpta civitate, et tamen perstat Sedecias in sententia. Quare vaticinaris. Gravior est terror ante increpationem verborum, quam poenarum sustinere cruciatum, et videre quem timeas.

<sup>443</sup> + **32.5 Visitem eum.** Temperavit sententiam, ut ad bonam et malam partem possit referri, visitatio enim et consolationem, et supplicium significat.

ex propinquitate ut emas. <sup>444</sup> <sup>8</sup> Et venit ad me Hanameel filius patru mei, secundum verbum Domini, ad vestibulum carceris, et ait ad me: Posside agrum meum qui est in Anathoth, in terra Benjamin, quia tibi competit hæreditas, et tu propinquus es ut possideas. Intellexi autem quod verbum Domini esset: <sup>445</sup> <sup>9</sup> et emi agrum ab Hanameel filio patru mei, qui est in Anathoth, et appendi ei argentum: septem stateres, et decem argenteos. <sup>10</sup>

Et scripsi in libro, et signavi, et adhibui testes, et appendi argentum in statera. <sup>11</sup> Et accepi librum possessionis signatum, et stipulationes, et rata, et signa forinsecus: <sup>12</sup> et dedi librum possessionis Baruch filio Neri filii Maasiæ, in oculis Hanameel patruelis mei, in oculis testium qui scripti erant in libro emptionis, et in oculis omnium Judæorum qui sedebant in atrio carceris. <sup>13</sup> Et præcepi Baruch coram eis, dicens: <sup>446</sup> <sup>14</sup> Hæc dicit Dominus exercituum, Deus Israël: Sume libros istos, librum emptionis hunc signatum, et librum hunc qui apertus est, et pone illos in vase fictili, ut permanere possint diebus multis: <sup>447</sup> <sup>15</sup> hæc enim dicit Dominus exercituum, Deus Israël: Adhuc possidebuntur domus, et agri, et vineæ in terra ista. <sup>448</sup> <sup>16</sup> Et oravi ad Dominum, postquam tradidi librum possessionis Baruch filio Neri, dicens: <sup>17</sup> [Heu ! heu ! heu ! Domine Deus, ecce tu fecisti cælum et terram in fortitudine tua magna, et in brachio tuo extento: non erit tibi difficile omne verbum: <sup>18</sup> qui facis misericordiam in millibus, et reddis iniquitatem patrum in sinum filiorum eorum post eos: fortissime, magne, et potens, Dominus exercituum nomen tibi. <sup>449</sup> <sup>19</sup> Magnus consilio, et incomprehensibilis cogitatu: cujus oculi aperti sunt super omnes vias filiorum Adam, ut reddas unicuique secundum vias suas, et secundum fructum adinventionum ejus. <sup>450</sup> <sup>20</sup> Qui posuisti signa et portenta in terra Ægypti usque ad diem hanc, et in Israël, et in hominibus, et fecisti tibi nomen sicut est dies hæc. <sup>451</sup> <sup>21</sup> Et eduxisti populum tuum Israël de terra Ægypti, in signis et in portentis, et in manu robusta et in brachio extento, et in terrore

<sup>444</sup> + **32.7 Ecce Hanameel, filius.** Helchias et Sellum, etc., usque ad voluminis hujus monstrat exordium. Eme tibi agrum. Ager iste sacerdotalis, cujus emptio atque possessio Jeremiæ defertur, est in Anathoth in terra Benjamin. Quorum primum obedientiam, secundum filium dextræ sonat; et convenienter appetit ejus emptionem, in quo obedientia et virtus Domini versabatur.

<sup>445</sup> + **32.8 In terra Benjamin.** ID. Hoc est de suburbanis, etc., usque ad Audiant qui falsa adhibitis testibus vindicare conantur.

<sup>446</sup> + **32.13 Et præcepi Baruch.** ID. Baruch, qui interpretatur benedictus, etc., usque ad hoc legere cupientibus exhibeat apertum volumen.

<sup>447</sup> + **32.14 In vase fictili,** etc. Ne foris positi paterent rapinæ, etc., usque ad commoventur tamen Dei sermone.

<sup>448</sup> + **32.15 Adhuc possidebuntur domus et agri.** Hoc est quod Jeremias supra dixit se intellexisse verbum Dei, et idcirco emisse agrum.

<sup>449</sup> + **32.18 Qui facis misericordiam.** Grandis misericordia Creatoris, etc., usque ad diu dilata pœna reddatur. Fortissime, magne, etc. ID. Hæc nomina potentiam Creatoris indicant, sed proprie nomen Dei. Pater est, unde: Pater, manifestavi nomen tuum hominibus Joan. 27..

<sup>450</sup> + **32.19 Magnus consilio,** etc. Nemo ergo secretis Dei se inferat, et de illius judicis judicare præsumat. Ut reddas unicuique. Significat quod interdum, etc., usque ad tandem Rubri maris fluctibus obrutus est.

<sup>451</sup> + **32.20 Qui posuisti signa.** De generali transit ad speciale, et quod proprie præstiterit Israël, brevi sermone percurrit. Et portenta, etc. Quibus afflicta est usque ad diem hanc, etc., usque ad Et notandum quod Israël ab omnibus separat.

magno: <sup>452</sup> <sup>22</sup> et dedisti eis terram hanc, quam jurasti patribus eorum ut dares eis, terram fluentem lacte et melle. <sup>23</sup> Et ingressi sunt, et possederunt eam, et non obedierunt voci tuæ, et in lege tua non ambulaverunt: omnia quæ mandasti eis ut facerent non fecerunt, et evenerunt eis omnia mala hæc. <sup>453</sup> <sup>24</sup> Ecce munitiones exstructæ sunt adversum civitatem ut capiatur, et urbs data est in manus Chaldæorum qui præliantur adversus eam, a facie gladii, et famis, et pestilentia: et quæcumque locutus es, acciderunt, ut tu ipse cernis. <sup>454</sup> <sup>25</sup> Et tu dicis mihi, Domine Deus: Eme agrum argento, et adhibe testes, cum urbs data sit in manus Chaldæorum? <sup>455</sup> <sup>26</sup> Et factum est verbum Domini ad Jeremiam, dicens: <sup>27</sup> [Ecce ego Dominus Deus universæ carnis: numquid mihi difficile erit omne verbum? <sup>456</sup> <sup>28</sup> Propterea hæc dicit Dominus: Ecce ego tradam civitatem istam in manus Chaldæorum, et in manus regis Babylonis, et capient eam. <sup>457</sup> <sup>29</sup> Et venient Chaldæi præliantes adversum urbem hanc, et succendent eam igni, et comburent eam, et domos in quarum domatibus sacrificabant Baal, et libabant diis alienis libamina ad irritandum me. <sup>458</sup> <sup>30</sup> Erant enim filii Israël et filii Juda jugiter facientes malum in oculis meis ab adolescentia sua: filii Israël, qui usque nunc exacerbant me in opere manuum suarum, dicit Dominus. <sup>459</sup> <sup>31</sup> Quia in furore et in indignatione mea facta est mihi civitas hæc, a die qua ædificaverunt eam usque ad diem istam qua auferetur de conspectu meo, <sup>32</sup> propter malitiam filiorum Israël et filiorum Juda, quam fecerunt ad iracundiam me provocantes, ipsi et reges eorum, principes eorum, et sacerdotes eorum, et prophetæ eorum, viri Juda et habitatores Jerusalem. <sup>33</sup> Et verterunt ad me terga, et non facies, cum docerem eos diluculo et erudirem, et nollent audire, ut acciperent disciplinam. <sup>460</sup> <sup>34</sup> Et posuerunt

<sup>452</sup> + **32.21 Et eduxisti populum tuum.** Pulchre dixit populum tuum: eo enim tempore quo eductus est, Domini imperio serviebat.

<sup>453</sup> + **32.23 Et ingressi sunt.** ID. Nihil medium inter possessionem et inobedientiam: ubertas enim securitatem, securitas negligentiam, negligentia contemptum parit. Et non obedierunt. Id est, Frustra ergo promiserunt, dicentes: Quæcumque præceperit Dominus faciemus; non enim in responsione, sed in opere præmium est.

<sup>454</sup> + **32.24 Ecce munitiones exstructæ.** Decimus annus Sedeciæ erat, et civitas obsessa, ut supra dictum est, et Jeremias in atrio carceris. Unde subditur: Ecce munitiones. Ne capiatur. Quasi dicat: Non habent quos vincant, sed quos capiant, jam fame et peste consumptos. Et quæcumque locutus es. Ex creaturis prædicat Creatorem, etc., usque ad Hæc autem universa præmittit, ut inferat quasi in reprehensionem divinæ sententiæ: Et tu dicis mihi, Domine Deus, eme agrum.

<sup>455</sup> + **32.25 Et tu dicis.** Non reprehendit, sed interrogat, etc., usque ad et agrum emat quem non possideat.

<sup>456</sup> + **32.27 Ecce ego Dominus.** Non omnium gentium vel populi Israël tantum, etc., usque ad quia alia propter se, alia in usum hominum sunt facta.

<sup>457</sup> + **32.28 Ecce ego tradam civitatem.** Quia mihi est curæ omnia regere, universa disponere, singulis reddere juxta vias suas. Civitatem istam. Primum vallata exercitu Chaldæorum, absente Nabuchodonosor, capta est; et Sedecias in Rablatha regi traditus est.

<sup>458</sup> + **32.29 Et venient Chaldæi.** Aquila melius, ingredientur: non enim absentes erant, ut venirent qui obsiderent civitatem; verbum autem Hebræum et venient, et ingredientur sonat. Et domos in quarum domatibus. Quomodo periturus scribitur mundus, juxta illud: Cælum et terra transibunt, eo quod in maligno positus sit, sic et domus ipsa, et loca, in quibus flagitia facta sunt, iræ Dei subjacebunt.

<sup>459</sup> + **32.30 Jugiter facientes malum.** Sine fine, etc., usque ad in conspectu tuo.

<sup>460</sup> + **32.33 Et verterunt ad me terga.** Unde alibi: Vertunt contra me scapulam recedentem

idola sua in domo in qua invocatum est nomen meum, ut polluerent eam. <sup>461</sup>  
<sup>35</sup> Et ædificaverunt excelsa Baal quæ sunt in valle filii Ennom, ut initiarent  
 filios suos et filias suas Moloch, quod non mandavi eis, nec ascendit in cor  
 meum ut facerent abominationem hanc: et in peccatum deducerent Judam.  
<sup>462</sup> <sup>36</sup> Et nunc propter ista, hæc dicit Dominus Deus Israël ad civitatem  
 hanc, de qua vos dicitis quod tradetur in manus regis Babylonis, in gladio, et  
 in fame, et in peste: <sup>37</sup> Ecce ego congregabo eos de universis terris ad quas  
 ejeci eos in furore meo, et in ira mea, et in indignatione grandi: et reducam  
 eos ad locum istum, et habitare eos faciam confidenter: <sup>463</sup> <sup>38</sup> et erunt mihi  
 in populum, et ego ero eis in Deum. <sup>464</sup> <sup>39</sup> Et dabo eis cor unum, et viam  
 unam, ut timeant me universis diebus, et bene sit eis, et filiis eorum post eos.  
<sup>465</sup> <sup>40</sup> Et feriam eis pactum sempiternum, et non desinam eis benefacere: et  
 timorem meum dabo in corde eorum, ut non recedant a me. <sup>466</sup> <sup>41</sup> Et  
 lætabor super eis, cum bene eis fecero: et plantabo eos in terra ista in  
 veritate, in toto corde meo et in tota anima mea. <sup>467</sup> <sup>42</sup> Quia hæc dicit  
 Dominus: Sicut adduxi super populum istum omne malum hoc grande, sic  
 adducam super eos omne bonum quod ego loquor ad eos. <sup>43</sup> Et  
 possidebuntur agri in terra ista, de qua vos dicitis quod deserta sit, eo quod  
 non remanserit homo et jumentum, et data sit in manus Chaldæorum. <sup>44</sup>  
 Agri ementur pecunia, et scribentur in libro, et imprimetur signum, et testis  
 adhibebitur, in terra Benjamin et in circuitu Jerusalem, in civitatibus Juda, et  
 in civitatibus montanis, et in civitatibus campestribus, et in civitatibus quæ  
 ad austrum sunt, quia convertam captivitatem eorum, ait Dominus.]

### 33Et factum est verbum Domini ad Jeremiam secundo, cum adhuc clausus

Zach. 7.. Qui enim precatur, inclinata cervice in terra pronus funditur; qui vero tergum vertit, gestu corporis indicat, se negligere comminantem. Cum docerem eos. Fugatis tenebris erroris et idolorum cultura, illuminare eos cupiebam, et docere quæ recta sunt.

<sup>461</sup> + **32.34 Et posuerunt idola sua,** etc. Non solum tunc Judas posuit idolum in templo Dei, sed usque hodie in Ecclesia, vel in corde credentium ponitur idolum, quando novum dogma constituitur et in abscondito adoratur.

<sup>462</sup> + **32.35 Et ædificaverunt,** etc. Proprie tribus Juda et Benjamin in phano Baalis et Moloc dæmonum simulacra venerabantur; vitulos aureos in Dan et in Bethel decem tribubus, quod tam execrabile est, ut Dominus nunquam se cogitasse testetur. In valle filii Ennon. HIER. Quæ Silœ fontibus subjacet et amœnitate sua populum ad luxuriam provocavit, quam sequitur cultus idolorum.

<sup>463</sup> + **32.37 Ecce ego congregabo.** Multi putant hoc in tempore Zorobabel, etc., usque ad et electio reliquiarum salvatur. Et reducam eos ad locum istum, et habitare. Sicut sperantibus auxilium, etc., usque ad et desperatio atque humilitas Dei mereatur auxilium.

<sup>464</sup> + **32.38 Erunt mihi in populum, et ego,** etc. Tristibus læta subjungit, et captivis reditum promittit; sed primum ostendit causam offensæ et justi furoris; et quanto major culpa, tanto in peccatores amplior clementia.

<sup>465</sup> + **32.39 Et dabo eis.** CASS. Manifeste prodit initium nobis, etc., usque ad et per hoc vel remunerationem, vel supplicia promeriri.

<sup>466</sup> + **32.40 Et timorem meum dabo in corde eorum.** ID. Sic liberum donat arbitrium, ut timor qui tribuitur ex gratia sit largitoris.

<sup>467</sup> + **32.41 In toto corde meo, et in tota anima mea.** Si verba sunt Salvatoris, etc., usque ad sicut illud: festivitates vestras odi Amos. 5., etc. Quia hæc dicit Dominus, etc. Hæc juxta litteram, etc., usque ad Sed spiritualiter in Christo et apostolis plenius completa sunt.



esset in atrio carceris, dicens: <sup>468</sup> <sup>2</sup> [Hæc dicit Dominus, qui facturus est, et formaturus illud, et paraturus: Dominus nomen ejus: <sup>3</sup> Clama ad me, et exaudiam te, et annuntiabo tibi grandia et firma quæ nescis. <sup>469</sup> <sup>4</sup> Quia hæc dicit Dominus Deus Israël ad domos urbis hujus, et ad domos regis Juda, quæ destructæ sunt, et ad munitiones, et ad gladium <sup>5</sup> venientium ut dimicent cum Chaldæis, et impleant eas cadaveribus hominum quos percussi in furore meo et in indignatione mea, abscondens faciem meam a civitate hac, propter omnem malitiam eorum: <sup>6</sup> Ecce ego obducam eis cicatricem et sanitatem, et curabo eos, et revelabo illis deprecationem pacis et veritatis. <sup>7</sup> Et convertam conversionem Juda et conversionem Jerusalem, et ædificabo eos sicut a principio. <sup>8</sup> Et emundabo illos ab omni iniquitate sua in qua peccaverunt mihi, et propitius ero cunctis iniquitatibus eorum, in quibus dereliquerunt mihi et spreverunt me. <sup>9</sup> Et erit mihi in nomen, et in gaudium, et in laudem, et in exultationem cunctis gentibus terræ, quæ audierint omnia bona quæ ego facturus sum eis: et pavebunt et turbabuntur in universis bonis, et in omni pace quam ego faciam eis. <sup>10</sup> Hæc dicit Dominus: Adhuc audietur in loco isto quem vos dicitis esse desertum, eo quod non sit homo nec jumentum in civitatibus Juda, et foris Jerusalem, quæ desolatæ sunt, absque homine, et absque habitatore, et absque pecore, <sup>470</sup> <sup>11</sup> vox gaudii et vox lætitiæ, vox sponsi et vox sponsæ, vox dicentium: Confitemini Domino exercituum, quoniam bonus Dominus, quoniam in æternum misericordia ejus: et portantium vota in domum Domini: reducam enim conversionem terræ sicut a principio, dicit Dominus. <sup>12</sup> Hæc dicit Dominus exercituum: Adhuc erit in loco isto deserto, absque homine et absque jumento, et in cunctis civitatibus ejus, habitaculum pastorum accubantium gregum. <sup>471</sup> <sup>13</sup> In civitatibus montuosis, et in civitatibus campestribus, et in civitatibus quæ ad austrum sunt, et in terra Benjamin, et in circuitu Jerusalem, et in civitatibus Juda, adhuc transibunt greges ad manum numerantis, ait Dominus.] <sup>14</sup> [Ecce dies veniunt, dicit Dominus, et suscitabo verbum bonum quod locutus sum ad domum Israël et ad domum Juda. <sup>472</sup> <sup>15</sup> In diebus illis et in tempore illo germinare faciam David germen justitiæ, et faciet iudicium et justitiam in terra: <sup>16</sup> in diebus illis salvabitur Juda, et Jerusalem habitabit confidenter: et hoc est nomen quod vocabunt eum: Dominus justus noster. <sup>17</sup> Quia hæc dicit Dominus: Non interibit de David vir qui sedeat super thronum domus

<sup>468</sup> + **33.1 Et factum est.** Prædicit quod sicut peccatoribus vindicta, etc., usque ad donec a Romanis per totum orbem dispersi sint.

<sup>469</sup> + **33.3 Clama ad me, et ego exaudiam eum.** Ostendit quod per orationes prophetarum et sanctorum, qui fuerunt in plebe, Dominus placatus sit et revelaverit eis reversionem in terram suam, quæ adhuc occulta latebat. Nunc autem dicitur: Clama ad me, et exaudiam te. Quia imminens captivitas Dominus avertere noluit, ut primum solverent pœnam peccati sui; postea vero reversionem non negavit, quam modo promittit.

<sup>470</sup> + **33.10 Adhuc audietur in loco isto,** etc. Ne desperent Judæi propter minas et captivitates futuras, restorationis bona promittit, ut locus, qui desertus fuerat propter scelera habitatorum, propter correctionem et emendationem habitetur.

<sup>471</sup> + **33.12 Accubantium gregum.** Greges Ecclesiæ, scilicet de gentibus congregatæ, etc., usque ad multi sunt qui ad fidem Christi et ovium suarum numerum pertinent.

<sup>472</sup> + **33.14 Ad domum Israël:** De quibus Isaias: erit in novissimis diebus præparatus mons domus Domini in vertice montium, etc.

Israël: <sup>473</sup> <sup>18</sup> et de sacerdotibus et de Levitis non interibit vir a facie mea, qui offerat holocausta, et incendat sacrificum, et cædat victimas omnibus diebus.] <sup>19</sup> Et factum est verbum Domini ad Jeremiam, dicens: <sup>20</sup> [Hæc dicit Dominus: Si irritum potest fieri pactum meum cum die, et pactum meum cum nocte, ut non sit dies et nox in tempore suo, <sup>21</sup> et pactum meum irritum esse poterit cum David servo meo, ut non sit ex eo filius qui regnet in throno ejus, et Levitæ et sacerdotes ministri mei. <sup>22</sup> Sicuti enumerari non possunt stellæ cæli, et metiri arena maris, sic multiplicabo semen David servi mei, et Levitas ministros meos.] <sup>23</sup> Et factum est verbum Domini ad Jeremiam, dicens: <sup>24</sup> [Numquid non vidisti quid populus hic locutus sit, dicens: Duæ cognationes quas elegerat Dominus abjectæ sunt? et populum meum despexerunt, eo quod non sit ultra gens coram eis. <sup>25</sup> Hæc dicit Dominus: Si pactum meum inter diem et noctem, et leges cælo et terræ non posui, <sup>26</sup> equidem et semen Jacob et David servi mei projiciam, ut non assumam de semine ejus principes seminis Abraham, Isaac, et Jacob: reducam enim conversionem eorum, et miserebor eis.]

#### 34 Verbum quod factum est ad Jeremiam a Domino quando

Nabuchodonosor rex Babylonis, et omnis exercitus ejus, universaque regna terræ quæ erant sub potestate manus ejus, et omnes populi, bellabant contra Jerusalem, et contra omnes urbes ejus, dicens: <sup>474</sup> <sup>2</sup> Hæc dicit Dominus Deus Israël: Vade, et loquere ad Sedeciam regem Juda, et dices ad eum: Hæc dicit Dominus: Ecce ego tradam civitatem hanc in manus regis Babylonis, et succendet eam igni: <sup>3</sup> et tu non effugies de manu ejus, sed comprehensione capieris, et in manu ejus traderis: et oculi tui oculos regis Babylonis videbunt, et os ejus cum ore tuo loquetur, et Babylonem introibis. <sup>4</sup> Attamen audi verbum Domini, Sedecia, rex Juda: Hæc dicit Dominus ad te: Non morieris in gladio, <sup>5</sup> sed in pace morieris: et secundum combustiones patrum tuorum, regum priorum qui fuerunt ante te, sic comburent te: et: Væ domine, plangent te: quia verbum ego locutus sum, dicit Dominus. <sup>6</sup> Et locutus est Jeremias propheta ad Sedeciam regem Juda universa verba hæc in Jerusalem. <sup>7</sup> Et exercitus regis Babylonis pugnabat contra Jerusalem, et contra omnes civitates Juda quæ reliquæ erant, contra Lachis et contra Azecha: hæ enim supererant de civitatibus Juda, urbes munitæ. <sup>8</sup> Verbum quod factum est ad Jeremiam a Domino, postquam percussit rex Sedecias fœdus cum omni populo in Jerusalem, prædicans <sup>9</sup> ut dimitteret unusquisque servum suum et unusquisque ancillam suam, Hebræum et Hebræam, liberos, et nequaquam dominarentur eis, id est, in Judæo et fratre suo. <sup>10</sup> Audierunt ergo omnes principes et universus populus qui inierant pactum ut dimitteret unusquisque servum suum et unusquisque ancillam suam liberos, et ultra non dominarentur eis: audierunt igitur, et dimiserunt. <sup>11</sup> Et conversi sunt deinceps: et retraxerunt servos et ancillas suas quos dimiserant liberos, et

<sup>473</sup> + **33.17 Hæc dicit Dominus.** Supra dixerat de creatione solis et lunæ et stellarum, etc., usque ad Christi regnum et sacerdotium in æternum manebit.

<sup>474</sup> + **34.1 Verbum quod factum,** etc. RAB. Licet rex nequissimus, etc., usque ad finem capitis.

subjugaverunt in famulos et famulas. <sup>12</sup> Et factum est verbum Domini ad Jeremiam a Domino, dicens: <sup>13</sup> Hæc dicit Dominus Deus Israël: Ego percussi fœdus cum patribus vestris in die qua eduxi eos de terra Ægypti, de domo servitutis, dicens: <sup>14</sup> Cum completi fuerint septem anni, dimittat unusquisque fratrem suum Hebræum, qui venditus est ei: et serviet tibi sex annis, et dimittes eum a te liberum: et non audierunt patres vestri me, nec inclinaverunt aurem suam. <sup>15</sup> Et conversi estis vos hodie, et fecistis quod rectum est in oculis meis, ut prædicaretis libertatem unusquisque ad amicum suum: et inistis pactum in conspectu meo, in domo in qua invocatum est nomen meum super eam: <sup>16</sup> et reversi estis, et commaculastis nomen meum, et reduxistis unusquisque servum suum et unusquisque ancillam suam quos dimiseratis ut essent liberi et suæ potestatis, et subjugastis eos ut sint vobis servi et ancillæ. <sup>17</sup> Propterea hæc dicit Dominus: Vos non audistis me, ut prædicaretis libertatem unusquisque fratri suo et unusquisque amico suo: ecce ego prædico vobis libertatem, ait Dominus, ad gladium, ad pestem, et ad famem, et dabo vos in commotionem cunctis regnis terræ. <sup>18</sup> Et dabo viros qui prævaricantur fœdus meum, et non observaverunt verba fœderis quibus assensi sunt in conspectu meo, vitulum quem concenterunt in duas partes, et transierunt inter divisiones ejus, <sup>19</sup> principes Juda et principes Jerusalem, eunuchi et sacerdotes, et omnis populus terræ, qui transierunt inter divisiones vituli: <sup>20</sup> et dabo eos in manus inimicorum suorum, et in manus quærentium animam eorum, et erit morticinum eorum in escam volatilibus cæli et bestiis terræ. <sup>21</sup> Et Sedeciam regem Juda, et principes ejus, dabo in manus inimicorum suorum, et in manus quærentium animas eorum, et in manus exercituum regis Babylonis, qui recesserunt a vobis. <sup>22</sup> Ecce ego præcipio, dicit Dominus, et reducam eos in civitatem hanc, et præliabuntur adversus eam, et capient eam, et incendunt igni: et civitates Juda dabo in solitudinem, eo quod non sit habitator.

35 Verbum quod factum est ad Jeremiam a Domino in diebus Joakim filii Josiæ regis Juda, dicens: <sup>475</sup> <sup>2</sup> Vade ad domum Rechabitarum, et loquere eis, et introduces eos in domum Domini, in unam exedram thesaurorum, et dabis eis bibere vinum. <sup>3</sup> Et assumpsi Jezoniam filium Jeremiæ filii Habsaniæ, et fratres ejus, et omnes filios ejus, et universam domum Rechabitarum, <sup>4</sup> et introduxi eos in domum Domini, ad gazophylacium filiorum Hanan filii Jegedeliæ hominis Dei, quod erat juxta gazophylacium principum, super thesaurum Maasiæ filii Sellum, qui erat custos vestibuli: <sup>5</sup> et posui coram filiis domus Rechabitarum scyphos plenos vino, et calices, et dixi ad eos: Bibite vinum. <sup>6</sup> Qui responderunt Non bibemus vinum, quia Jonadab filius Rechab, pater noster, præcepit nobis, dicens: Non bibetis vinum, vos et filii vestri, usque in sempiternum: <sup>7</sup> et domum non ædificabitis, et sementem non seretis, et vineas non plantabitis, nec habebitis: sed in tabernaculis habitabitis cunctis diebus vestris, ut vivatis diebus multis

<sup>475</sup> + 35.1 Verbum quod factum est. RAB. Cum propheta in proximo capite de Sedecias, etc., usque ad finem capituli.

super faciem terræ in qua vos peregrinamini. <sup>8</sup> Obedivimus ergo voci Jonadab filii Rechab, patris nostri, in omnibus quæ præcepit nobis, ita ut non biberemus vinum cunctis diebus nostris, nos, et mulieres nostræ, filii, et filiæ nostræ, <sup>9</sup> et non ædificaremus domos ad habitandum: et vineam, et agrum, et sementem non habuimus: <sup>10</sup> sed habitavimus in tabernaculis, et obedientes fuimus juxta omnia quæ præcepit nobis Jonadab pater noster. <sup>11</sup> Cum autem ascendisset Nabuchodonosor rex Babylonis ad terram nostram, diximus: Venite, et ingrediamur Jerusalem a facie exercitus Chaldæorum, et a facie exercitus Syriæ: et mansimus in Jerusalem. <sup>12</sup> Et factum est verbum Domini ad Jeremiam, dicens: <sup>13</sup> Hæc dicit Dominus exercituum, Deus Israël: Vade, et dic viris Juda et habitatoribus Jerusalem: Numquid non recipietis disciplinam, ut obediatis verbis meis? dicit Dominus. <sup>14</sup> Prævaluerunt sermones Jonadab filii Rechab quos præcepit filiis suis ut non biberent vinum, et non biberunt usque ad diem hanc, quia obedierunt præcepto patris sui: ego autem locutus sum ad vos, de mane consurgens et loquens, et non obedistis mihi. <sup>15</sup> Misique ad vos omnes servos meos prophetas, consurgens diluculo mittensque, et dicens: Convertimini unusquisque a via sua pessima, et bona facite studia vestra: et nolite sequi deos alienos, neque colatis eos, et habitabitis in terra quam dedi vobis et patribus vestris: et non inclinastis aurem vestram, neque audistis me. <sup>16</sup> Firmaverunt igitur filii Jonadab filii Rechab præceptum patris sui quod præceperat eis: populus autem iste non obedivit mihi. <sup>17</sup> Idcirco hæc dicit Dominus exercituum, Deus Israël: Ecce ego adducam super Juda et super omnes habitatores Jerusalem universam afflictionem quam locutus sum adversum illos, eo quod locutus sum ad illos, et non audierunt; vocavi illos, et non responderunt mihi. <sup>18</sup> Domui autem Rechabitarum dixit Jeremias: Hæc dicit Dominus exercituum, Deus Israël: Pro eo quod obedistis præcepto Jonadab patris vestri, et custodistis omnia mandata ejus, et fecistis universa quæ præcepit vobis, <sup>19</sup> propterea hæc dicit Dominus exercituum, Deus Israël: Non deficiet vir de stirpe Jonadab filii Rechab, stans in conspectu meo cunctis diebus.

36Et factum est in anno quarto Joakim filii Josiæ regis Juda, factum est verbum hoc ad Jeremiam a Domino, dicens: <sup>2</sup> Tolle volumen libri, et scribes in eo omnia verba quæ locutus sum tibi adversum Israël et Judam, et adversum omnes gentes, a die qua locutus sum ad te ex diebus Josiæ usque ad diem hanc: <sup>3</sup> si forte, audiente domo Juda universa mala quæ ego cogito facere eis, revertatur unusquisque a via sua pessima, et propitius ero iniquitati et peccato eorum. <sup>476</sup> <sup>4</sup> Vocavit ergo Jeremias Baruch filium Neræ: et scripsit Baruch ex ore Jeremiæ omnes sermones Domini quos locutus est ad eum, in volumine libri: <sup>477</sup> <sup>5</sup> et præcepit Jeremias Baruch, dicens: Ego clausus sum, nec valeo ingredi domum Domini. <sup>6</sup> Ingredere ergo tu, et lege

<sup>476</sup> + **36.3 Si forte audiente domo Juda,** etc. Immensa clementia, etc., usque ad ut per misericordiam Dei veniam consequantur.

<sup>477</sup> + **36.4 Vocavit ergo.** Prompta obedientia prophetæ concordat, etc., usque ad qui soluti et liberi verbum Dei proximis expendere negligunt?

de volumine in quo scripsisti ex ore meo verba Domini, audiente populo in domo Domini, in die jejunii: insuper et audiente universo Juda qui veniunt de civitatibus suis, leges eis, <sup>7</sup> si forte cadat oratio eorum in conspectu Domini, et revertatur unusquisque a via sua pessima: quoniam magnus furor et indignatio est quam locutus est Dominus adversus populum hunc. <sup>8</sup> Et fecit Baruch filius Neriae juxta omnia quae praeceperat ei Jeremias propheta, legens ex volumine sermones Domini in domo Domini. <sup>9</sup> Factum est autem in anno quinto Joakim filii Josiae regis Juda, in mense nono: praedicaverunt jejunium in conspectu Domini omni populo in Jerusalem, et universae multitudini quae confluerat de civitatibus Juda in Jerusalem. <sup>478</sup> <sup>10</sup> Legitque Baruch ex volumine sermones Jeremiae filii in domo Domini, in gazophylacio Gamariae filii Saphan scribae, in vestibulo superiori, in introitu portae novae domus Domini, audiente omni populo. <sup>11</sup> Cumque audisset Michaeas filius Gamariae filii Saphan omnes sermones Domini ex libro, <sup>12</sup> descendit in domum regis, ad gazophylacium scribae, et ecce ibi omnes principes sedebant: Elisama scriba, et Dalaias filius Semeiae, et Elnathan filius Achobor, et Gamarias filius Saphan, et Sedecias filius Hananiae, et universi principes: <sup>13</sup> et nuntiavit eis Michaeas omnia verba quae audivit, legente Baruch ex volumine in auribus populi. <sup>14</sup> Miserunt itaque omnes principes ad Baruch Judi filium Nathaniae filii Selemiae filii Chusi, dicentes: Volumen ex quo legisti, audiente populo, sume in manu tua, et veni. Tulit ergo Baruch filius Neriae volumen in manu sua, et venit ad eos: <sup>15</sup> et dixerunt ad eum: Sede, et lege haec in auribus nostris. Et legit Baruch in auribus eorum. <sup>16</sup> Igitur cum audissent omnia verba, obstuperunt unusquisque ad proximum suum, et dixerunt ad Baruch: Nuntiare debemus regi omnes sermones istos. <sup>479</sup> <sup>17</sup> Et interrogaverunt eum, dicentes: Indica nobis quomodo scripsisti omnes sermones istos ex ore ejus. <sup>18</sup> Dixit autem eis Baruch: Ex ore suo loquebatur quasi legens ad me omnes sermones istos, et ego scribebam in volumine atramento. <sup>480</sup> <sup>19</sup> Et dixerunt principes ad Baruch: Vade, et abscondere, tu et Jeremias, et nemo sciat ubi sitis. <sup>20</sup> Et ingressi sunt ad regem in atrium: porro volumen commendaverunt in gazophylacio Elisamae scribae, et nuntiaverunt, audiente rege, omnes sermones. <sup>21</sup> Misitque rex Judi ut sumeret volumen: qui tollens illud de gazophylacio Elisamae scribae, legit, audiente rege et universis principibus qui stabant circa regem. <sup>22</sup> Rex autem sedebat in domo hiemali, in mense nono, et posita erat arula coram eo plena prunis. <sup>23</sup> Cumque legisset Judi tres pagellas vel quatuor, scidit illud scalpello scribae, et projecit in ignem qui erat super arulam, donec consumeretur omne volumen igni qui erat in arula. <sup>481</sup> <sup>24</sup> Et non timuerunt, neque sciderunt vestimenta sua, rex

<sup>478</sup> + **36.9 Prædicaverunt jejunium in conspectu Domini**, etc. Ut qui per luxum peccaverunt, etc., usque ad quæ deliquerunt in maximis.

<sup>479</sup> + **36.16 Igitur cum audissent**, etc. Etiam auditoribus necessaria est, etc., usque ad verba Dei audire poterant aure corporis, sed non cordis.

<sup>480</sup> + **36.18 Ex ore suo loquebatur**, etc. Significat quod apostoli et prophetæ nullam necessitatem tractandi vel penuriam loquendi patiebantur; sed prompte et facile omnia proferebant.

<sup>481</sup> + **36.23 Et projecit in ignem**. Stupenda indurati cordis nequitia, etc., usque ad ne crederent et poeniterent.

et omnes servi ejus qui audierunt universos sermones istos. <sup>25</sup> Verumtamen Elnathan, et Dalaias, et Gamarias, contradixerunt regi, ne combureret librum: et non audivit eos. <sup>26</sup> Et præcepit rex Jeremiel filio Amelech, et Saraia filio Ezriel, et Selemia filio Abdeel, ut comprehenderent Baruch scribam, et Jeremiam prophetam: abscondit autem eos Dominus. <sup>482</sup> <sup>27</sup> Et factum est verbum Domini ad Jeremiam prophetam, postquam combusserat rex volumen et sermones quos scripserat Baruch ex ore Jeremiae, dicens: <sup>28</sup> Rursum tolle volumen aliud, et scribe in eo omnes sermones priores qui erant in primo volumine, quod combussit Joakim rex Juda. <sup>29</sup> Et ad Joakim regem Juda dices: Hæc dicit Dominus: Tu combussisti volumen illud, dicens: Quare scripsisti in eo annuntians: Festinus veniet rex Babylonis, et vastabit terram hanc, et cessare faciet ex illa hominem et jumentum? <sup>30</sup> Propterea hæc dicit Dominus contra Joakim regem Juda: Non erit ex eo qui sedeat super solium David: et cadaver ejus projicietur ad æstum per diem, et ad gelu per noctem. <sup>483</sup> <sup>31</sup> Et visitabo contra eum, et contra semen ejus, et contra servos ejus, iniquitates suas: et adducam super eos, et super habitatores Jerusalem, et super viros Juda, omne malum quod locutus sum ad eos, et non audierunt. <sup>32</sup> Jeremias autem tulit volumen aliud, et dedit illud Baruch filio Neriae scribae: qui scripsit in eo ex ore Jeremiae omnes sermones libri quem combusserat Joakim rex Juda igni: et insuper additi sunt sermones multo plures quam antea fuerant.

37Et regnavit rex Sedecias filius Josia pro Jechonia filio Joakim, quem constituit regem Nabuchodonosor rex Babylonis in terra Juda: <sup>484</sup> <sup>2</sup> et non obedivit ipse, et servi ejus, et populus terræ, verbis Domini, quæ locutus est in manu Jeremiae prophetæ. <sup>3</sup> Et misit rex Sedecias Juchal filium Selemia, et Sophoniam filium Maasia, sacerdotem, ad Jeremiam prophetam, dicens: Ora pro nobis Dominum Deum nostrum. <sup>485</sup> <sup>4</sup> Jeremias autem libere ambulabat in medio populi: non enim miserant eum in custodiam carceris. Igitur exercitus Pharaonis egressus est de Ægypto, et audientes Chaldaei qui obsidebant Jerusalem, hujuscemodi nuntium, recesserunt ab Jerusalem. <sup>486</sup> <sup>5</sup> Et factum est verbum Domini ad Jeremiam prophetam, dicens: <sup>6</sup> Hæc dicit Dominus Deus Israël: Sic dicetis regi Juda, qui misit vos ad me interrogandum: Ecce exercitus Pharaonis, qui egressus est vobis in auxilium, revertetur in terram suam in Ægyptum: <sup>7</sup> et redient Chaldaei, et bellabunt contra civitatem hanc, et capient eam, et succendent eam igni. <sup>8</sup> Hæc dicit Dominus: Nolite decipere animas vestras, dicentes: Euntes abibunt, et

<sup>482</sup> + **36.26 Abscondit autem,** etc. Contra quem frustra nititur humana præsumptio. Custodit enim Dominus omnes diligentes se, et omnes peccatores disperdet.

<sup>483</sup> + **36.30 Propterea,** etc. Digna ultio, etc., usque ad æstu solis et gelu noctis ureretur.

<sup>484</sup> + **37.1 Et regnavit rex Sedecias,** etc. Quod Sedecias post Joachim, etc., usque ad sed omnes iniqui fuerunt et idololatræ, et ideo perierunt.

<sup>485</sup> + **37.3 Ora pro.** Nequaquam pro se orare postulavit, quia divinis mandatis obtemperare noluit: Qui enim avertit aurem suam ne audiat legem, oratio ejus erit execrabilis.

<sup>486</sup> + **37.4 Igitur exercitus.** Quomodo Chaldaei solverunt, etc., usque ad Jeremias vero contraria et vera prophetavit.

recedent a nobis Chaldæi: quia non abibunt. <sup>9</sup> Sed etsi percusseritis omnem exercitum Chaldæorum qui præliantur adversum vos, et derelicti fuerint ex eis aliqui vulnerati, singuli de tentorio suo consurgent, et incendunt civitatem hanc igni. <sup>10</sup> Ergo cum recessisset exercitus Chaldæorum ab Jerusalem, propter exercitum Pharaonis, <sup>11</sup> egressus est Jeremias de Jerusalem ut iret in terram Benjamin, et divideret ibi possessionem in conspectu civium. <sup>12</sup> Cumque pervenisset ad portam Benjamin, erat ibi custos portæ per vices, nomine Jerias filius Selemiæ filii Hananiæ: et apprehendit Jeremiam prophetam, dicens: Ad Chaldæos profugis. <sup>13</sup> Et respondit Jeremias: Falsum est: non fugio ad Chaldæos. Et non audivit eum, sed comprehendit Jerias Jeremiam, et adduxit eum ad principes: <sup>14</sup> quam ob rem irati principes contra Jeremiam, cæsum eum miserunt in carcerem qui erat in domo Jonathan scribæ: ipse enim præpositus erat super carcerem. <sup>15</sup> Itaque ingressus est Jeremias in domum laci et in ergastulum: et sedit ibi Jeremias diebus multis. <sup>16</sup> Mittens autem Sedecias rex, tulit eum: et interrogavit eum in domo sua abscondite, et dixit: Putasne est sermo a Domino? Et dixit Jeremias: Est: et ait: In manus regis Babylonis traderis. <sup>17</sup> Et dixit Jeremias ad regem Sedeciam: Quid peccavi tibi, et servis tuis, et populo tuo, quia misisti me in domum carceris? <sup>18</sup> ubi sunt prophetæ vestri, qui prophetabant vobis, et dicebant: Non veniet rex Babylonis super vos, et super terram hanc? <sup>19</sup> Nunc ergo audi, obsecro, domine mi rex: valeat deprecatio mea in conspectu tuo, et ne me remittas in domum Jonathan scribæ, ne moriar ibi. <sup>20</sup> Præcepit ergo rex Sedecias ut traderetur Jeremias in vestibulo carceris, et daretur ei torta panis quotidie, excepto pulmento, donec consumerentur omnes panes de civitate: et mansit Jeremias in vestibulo carceris.

38 Audivit autem Saphatias filius Mathan, et Gedelias filius Phassur, et Juchal filius Selemiæ, et Phassur filius Melchiæ, sermones quos Jeremias loquebatur ad omnem populum, dicens: <sup>2</sup> Hæc dicit Dominus: Quicumque manserit in civitate hac, morietur gladio, et fame, et peste: qui autem profugerit ad Chaldæos, vivet, et erit anima ejus sospes et vivens. <sup>3</sup> Hæc dicit Dominus: Tradendo tradetur civitas hæc in manu exercitus regis Babylonis, et capiet eam. <sup>4</sup> Et dixerunt principes regi: Rogamus ut occidatur homo iste: de industria enim dissolvit manus virorum bellantium qui remanserunt in civitate hac, et manus universi populi, loquens ad eos juxta verba hæc: siquidem homo iste non quærit pacem populo huic, sed malum. <sup>5</sup> Et dixit rex Sedecias: Ecce ipse in manibus vestris est: nec enim fas est regem vobis quidquam negare. <sup>487</sup> <sup>6</sup> Tulerunt ergo Jeremiam, et projecerunt eum in lacum Melchiæ filii Amelech, qui erat in vestibulo carceris: et submiserunt Jeremiam funibus in lacum, in quo non erat aqua, sed lutum: descendit itaque Jeremias in cœnum. <sup>7</sup> Audivit autem Abdemelech Æthiops, vir eunuchus, qui erat in domo regis, quod misissent

<sup>487</sup> + 38.5 Et dicit rex Sedecias, etc. Pater Sedeciam sine puro affectu, etc., usque ad Postea vero flagellatum tradidit eum Judæis, ut crucifigeretur.

Jeremiam in lacum. Porro rex sedebat in porta Benjamin: <sup>488</sup> <sup>8</sup> et egressus est Abdemelech de domo regis, et locutus est ad regem, dicens: <sup>9</sup> Domine mi rex, male fecerunt viri isti omnia quaecumque perpetrarunt contra Jeremiam prophetam, mittentes eum in lacum, ut moriatur ibi fame: non sunt enim panes ultra in civitate. <sup>10</sup> Præcepit itaque rex Abdemelech Æthiopi, dicens: Tolle tecum hinc triginta viros, et leva Jeremiam prophetam de lacu, antequam moriatur. <sup>11</sup> Assumptis ergo Abdemelech secum viris, ingressus est domum regis, quæ erat sub cellario, et tulit inde veteres pannos, et antiqua quæ computruerant, et submitit ea ad Jeremiam in lacum per funiculos. <sup>12</sup> Dixitque Abdemelech Æthiops ad Jeremiam: Pone veteres pannos, et hæc scissa et putrida, sub cubito manuum tuarum, et super funes. Fecit ergo Jeremias sic, <sup>13</sup> et extraxerunt Jeremiam funibus, et eduxerunt eum de lacu: mansit autem Jeremias in vestibulo carceris. <sup>14</sup> Et misit rex Sedecias, et tulit ad se Jeremiam prophetam ad ostium tertium quod erat in domo Domini: et dixit rex ad Jeremiam: Interrogo ego te sermonem, ne abscondas a me aliquid. <sup>15</sup> Dixit autem Jeremias ad Sedeciam: Si annuntiavero tibi, numquid non interficies me? et si consilium dederò tibi, non me audies. <sup>16</sup> Juravit ergo rex Sedecias Jeremiæ clam, dicens: Vivit Dominus, qui fecit nobis animam hanc, si occidero te, et si tradidero te in manus virorum istorum qui quærunt animam tuam. <sup>17</sup> Et dixit Jeremias ad Sedeciam: Hæc dicit Dominus exercituum, Deus Israël: Si profectus exieris ad principes regis Babylonis, vivet anima tua, et civitas hæc non succendetur igni: et salvus eris tu, et domus tua. <sup>489</sup> <sup>18</sup> Si autem non exieris ad principes regis Babylonis, tradetur civitas hæc in manus Chaldæorum, et succendent eam igni: et tu non effugies de manu eorum. <sup>19</sup> Et dixit rex Sedecias ad Jeremiam: Sollicitus sum propter Judæos qui transfugerunt ad Chaldæos, ne forte tradar in manus eorum, et illudant mihi. <sup>20</sup> Respondit autem Jeremias: Non te tradent. Audi, quæso, vocem Domini, quam ego loquor ad te, et bene tibi erit, et vivet anima tua. <sup>21</sup> Quod si nolueris egredi, iste est sermo quem ostendit mihi Dominus: <sup>22</sup> ecce omnes mulieres quæ remanserunt in domo regis Juda educentur ad principes regis Babylonis, et ipsæ dicent: Seduxerunt te, et prævaluerunt adversum te, viri pacifici tui: demerserunt in cœno et in lubrico pedes tuos, et recesserunt a te. <sup>490</sup> <sup>23</sup> Et omnes uxores tuæ et filii tui educentur ad Chaldæos: et non effugies manus eorum, sed in manu regis Babylonis capieris, et civitatem hanc comburet igni. <sup>24</sup> Dixit ergo Sedecias ad Jeremiam: Nullus sciat verba hæc, et non morieris. <sup>25</sup> Si autem audierint principes quia locutus sum tecum, et venerint ad te, et dixerint tibi: Indica nobis quid locutus sis cum rege: ne celes nos, et non te interficiemus: et quid locutus est tecum rex: <sup>26</sup> dices ad eos: Prostravi ego preces meas coram

<sup>488</sup> + **38.7 Audivit autem Abdemelech.** Sicut illi principes, qui prophetam miserunt, etc., usque ad quanto nos districtius reos tenemus.

<sup>489</sup> + **38.17 Si profectus exieris,** etc. Propheta, prævidens civitatem esse tradendam in manus Chaldæorum, consilium dedit regi ut se traderet in manus regis Babylonis, ut sic furibundum ejus animum mitigaret, et leviolem sententiam susciperet; sed mens indurata corrigi non poterat.

<sup>490</sup> + **38.22 Ecce.** Significat quod fluxa cogitatio, etc., usque ad et animam igne comburet inextinguibili.



rege, ne me reduci juberet in domum Jonathan, et ibi morerer. <sup>27</sup> Venerunt ergo omnes principes ad Jeremiam, et interrogaverunt eum, et locutus est eis juxta omnia verba quæ præceperat ei rex: et cessaverunt ab eo: nihil enim fuerat auditum. <sup>28</sup> Mansit vero Jeremias in vestibulo carceris usque ad diem quo capta est Jerusalem: et factum est ut caperetur Jerusalem.

39 Anno nono Sedeciae regis Juda, mense decimo, venit Nabuchodonosor rex Babylonis, et omnis exercitus ejus, ad Jerusalem, et obsidebant eam. <sup>2</sup> Undecimo autem anno Sedeciae, mense quarto, quinta mensis, aperta est civitas: <sup>3</sup> et ingressi sunt omnes principes regis Babylonis, et sederunt in porta media: Neregel, Sereser, Semegarnabu, Sarsachim, Rabsares, Neregel, Sereser, Rebmag, et omnes reliqui principes regis Babylonis. <sup>4</sup> Cumque vidisset eos Sedecias rex Juda, et omnes viri bellatores, fugerunt: et egressi sunt nocte de civitate per viam horti regis, et per portam quæ erat inter duos muros, et egressi sunt ad viam deserti. <sup>5</sup> Persecutus est autem eos exercitus Chaldæorum, et comprehenderunt Sedeciam in campo solitudinis Jerichontinæ, et captum adduxerunt ad Nabuchodonosor regem Babylonis, in Reblatha, quæ est in terra Emath: et locutus est ad eum judicia. <sup>6</sup> Et occidit rex Babylonis filios Sedeciae in Reblatha, in oculis ejus: et omnes nobiles Juda occidit rex Babylonis. <sup>7</sup> Oculos quoque Sedeciae eruit, et vinxit eum compedibus ut duceretur in Babylonem. <sup>8</sup> Domum quoque regis et domum vulgi succenderunt Chaldæi igni, et murum Jerusalem subverterunt. <sup>9</sup> Et reliquias populi qui remanserant in civitate, et perfugas qui transfugerant ad eum, et superfluos vulgi qui remanserant, transtulit Nabuzardan, magister militum, in Babylonem. <sup>10</sup> Et de plebe pauperum, qui nihil penitus habebant, dimisit Nabuzardan magister militum in terra Juda, et dedit eis vineas et cisternas in die illa. <sup>11</sup> Præceperat autem Nabuchodonosor rex Babylonis de Jeremia Nabuzardan magistro militum, dicens: <sup>12</sup> Tolle illum, et pone super eum oculos tuos, nihilque ei mali facias: sed ut voluerit, sic facias ei. <sup>13</sup> Misit ergo Nabuzardan princeps militiae, et Nabusezban, et Rabsares, et Neregel, et Sereser, et Rebmag, et omnes optimates regis Babylonis, <sup>14</sup> miserunt, et tulerunt Jeremiam de vestibulo carceris, et tradiderunt eum Godoliae filio Ahicam filii Saphan, ut intraret in domum, et habitaret in populo. <sup>15</sup> Ad Jeremiam autem factus fuerat sermo Domini, cum clausus esset in vestibulo carceris, dicens: <sup>16</sup> Vade, et dic Abdemelech Æthiopi, dicens: Hæc dicit Dominus exercituum, Deus Israël: Ecce ego inducam sermones meos super civitatem hanc in malum, et non in bonum, et erunt in conspectu tuo in die illa. <sup>17</sup> Et liberabo te in die illa, ait Dominus, et non traderis in manus virorum quos tu formidas: <sup>491</sup> <sup>18</sup> sed eruens liberabo te, et gladio non cades, sed erit tibi anima tua in salutem, quia in me habuisti fiduciam, ait Dominus.

<sup>491</sup> + 39.17 Et liberabo te. Qui sperant in Domino non confundentur Sap. 19.. Confundentur omnes iniqua agentes Psal. 24.. Ecce principes qui animam Jeremiae quærebant, captivantur. Eunuchus qui eum liberaverat perfecta potitus est libertate. Sic quoque liberatis sanctis prædicatoribus, persecutores æterna ultione punientur.

40 Sermo qui factus est ad Jeremiam a Domino, postquam dimissus est a Nabuzardan magistro militiæ de Rama, quando tulit eum vinctum catenis in medio omnium qui migrabant de Jerusalem et Juda, et ducebantur in Babylonem. <sup>492</sup> <sup>2</sup> Tollens ergo princeps militiæ Jeremiam, dixit ad eum: Dominus Deus tuus locutus est malum hoc super locum istum: <sup>493</sup> <sup>3</sup> et adduxit, et fecit Dominus sicut locutus est, quia peccastis Domino, et non audistis vocem ejus: et factus est vobis sermo hic. <sup>494</sup> <sup>4</sup> Nunc ergo ecce solvi te hodie de catenis quæ sunt in manibus tuis: si placet tibi ut venias mecum in Babylonem, veni, et ponam oculos meos super te: si autem displicet tibi venire mecum in Babylonem, reside: ecce omnis terra in conspectu tuo est: quod elegeris, et quo placuerit tibi ut vadas, illuc perge: <sup>5</sup> et mecum noli venire, sed habita apud Godoliam filium Ahicam filii Saphan, quem præposuit rex Babylonis civitatibus Juda: habita ergo cum eo in medio populi: vel quocumque placuerit tibi ut vadas, vade. Dedit quoque ei magister militiæ cibaria et munuscula, et dimisit eum. <sup>6</sup> Venit autem Jeremias ad Godoliam filium Ahicam in Masphath, et habitavit cum eo in medio populi qui relictus fuerat in terra. <sup>7</sup> Cumque audissent omnes principes exercitus, qui dispersi fuerant per regiones, ipsi et socii eorum, quod præfecisset rex Babylonis Godoliam filium Ahicam terræ, et quod commendasset ei viros, et mulieres, et parvulos, et de pauperibus terræ, qui non fuerant translati in Babylonem, <sup>8</sup> venerunt ad Godoliam in Masphath, et Ismahel filius Nathaniæ, et Johanan et Jonathan filii Caree, et Sareas filius Thanehumeth, et filii Ophi, qui erant de Netophathi, et Jezonias filius Maachathi, ipsi et viri eorum. <sup>9</sup> Et juravit eis Godolias filius Ahicam filii Saphan, et comitibus eorum, dicens: Nolite timere servire Chaldæis: habitate in terra, et servite regi Babylonis, et bene erit vobis. <sup>10</sup> Ecce ego habito in Masphath, ut respondeam præcepto Chaldæorum qui mittuntur ad nos: vos autem colligite vindemiam, et messem, et oleum, et condite in vasis vestris, et manete in urbibus vestris quas tenetis. <sup>11</sup> Sed et omnes Judæi qui erant in Moab, et in filiis Ammon, et in Idumæa, et in universis regionibus, audito quod dedisset rex Babylonis reliquias in Judæa, et quod præposuisset super eos Godoliam filium Ahicam filii Saphan, <sup>12</sup> reversi sunt, inquam, omnes Judæi de universis locis ad quæ profugerant, et venerunt in terram Juda ad Godoliam in Masphath, et collegerunt vinum et messem multam nimis. <sup>13</sup> Johanan autem filius Caree, et omnes principes exercitus qui dispersi fuerant in regionibus, venerunt ad Godoliam in Masphath, <sup>14</sup> et dixerunt ei: Scito quod Baalis, rex filiorum Ammon, misit Ismahel filium Nathaniæ percutere animam tuam. Et non credidit eis Godolias filius Ahicam. <sup>15</sup> Johanan autem filius Caree dixit ad Godoliam seorsum in Masphath, loquens: Ibo, et

<sup>492</sup> + **40.1 Sermo qui factus est,** etc. Quæritur quomodo hic sermo Domini, etc., usque ad juxta sermonem Domini liberatus est.

<sup>493</sup> + **40.2 Tollens ergo.** Descripta vastatione urbis, et interitu, et captivitate populi, et perfidia regis, sequitur quid de Jeremia factum sit, et de reliquiis populi, quas propheta monuit ex verbo Domini sedere in terra sua, et servire regi Babylonis, ipsi vero maluerunt ire in Ægyptum, ubi eos postea Nabuchodonosor trucidavit, et ipsam Ægyptum vastavit.

<sup>494</sup> + **40.3 Et factus est vobis.** Ex hoc etiam loco manifestum est Deum, etc., usque ad Dei vero sententiam justam prædicabant.

percutiam Ismahel filium Nathaniae, nullo sciente, ne interficiat animam tuam, et dissipentur omnes Judaei qui congregati sunt ad te, et peribunt reliquiae Juda. <sup>16</sup> Et ait Godolias filius Ahicam ad Johanan filium Caree: Noli facere verbum hoc: falsum enim tu loqueris de Ismahel.

41 Et factum est in mense septimo, venit Ismahel filius Nathaniae filii Elisama, de semine regali, et optimates regis, et decem viri cum eo, ad Godoliam filium Ahicam, in Masphath, et comederunt ibi panes simul in Masphath. <sup>2</sup> Surrexit autem Ismahel filius Nathaniae, et decem viri qui cum eo erant, et percusserunt Godoliam filium Ahicam filii Saphan gladio, et interfecerunt eum quem praefecerat rex Babylonis terrae. <sup>3</sup> Omnes quoque Judaeos qui erant cum Godolia in Masphath, et Chaldaeos qui reperti sunt ibi, et viros bellatores, percussit Ismahel. <sup>4</sup> Secundo autem die postquam occiderat Godoliam, nullo adhuc sciente, <sup>5</sup> venerunt viri de Sichem, et de Silo, et de Samaria, octoginta viri, rasi barba, et scissis vestibus, et squalentes: et munera et thus habebant in manu, ut offerrent in domo Domini. <sup>6</sup> Egressus ergo Ismahel filius Nathaniae in occursum eorum de Masphath, incedens et plorans ibat: cum autem occurrisset eis, dixit ad eos: Venite ad Godoliam filium Ahicam. <sup>7</sup> Qui cum venissent ad medium civitatis, interfecit eos Ismahel filius Nathaniae circa medium lacu, ipse et viri qui erant cum eo. <sup>8</sup> Decem autem viri reperti sunt inter eos, qui dixerunt ad Ismahel: Noli occidere nos, quia habemus thesauros in agro, frumenti, et hordei, et olei, et mellis: et cessavit, et non interfecit eos cum fratribus suis. <sup>495</sup> <sup>9</sup> Lacus autem in quem projecerat Ismahel omnia cadavera virorum quos percussit propter Godoliam, ipse est quem fecit rex Asa propter Baasa regem Israel: ipsum replevit Ismahel filius Nathaniae occisis. <sup>10</sup> Et captivas duxit Ismahel omnes reliquias populi qui erant in Masphath, filias regis, et universum populum qui remanserat in Masphath, quos commendaverat Nabuzardan princeps militiae, Godoliam filio Ahicam: et cepit eos Ismahel filius Nathaniae, et abiit ut transiret ad filios Ammon. <sup>11</sup> Audivit autem Johanan filius Caree, et omnes principes bellatorum qui erant cum eo, omne malum quod fecerat Ismahel filius Nathaniae, <sup>12</sup> et assumptis universis viris, profecti sunt ut bellarent adversum Ismahel filium Nathaniae: et invenerunt eum ad aquas multas quae sunt in Gabaon. <sup>13</sup> Cumque vidisset omnis populus qui erat cum Ismahel Johanan filium Caree, et universos principes bellatorum qui erant cum eo, laetati sunt: <sup>14</sup> et reversus est omnis populus quem ceperat Ismahel, in Masphath, reversusque abiit ad Johanan filium Caree. <sup>15</sup> Ismahel autem filius Nathaniae fugit cum octo viris a facie Johanan, et abiit ad filios Ammon. <sup>16</sup> Tulit ergo Johanan filius Caree, et omnes principes bellatorum qui erant cum eo, universas reliquias vulgi quas reduserat ab Ismahel filio Nathaniae de Masphath, postquam percussit Godoliam filium Ahicam: fortes viros ad praelium, et mulieres, et pueros, et eunuchos, quos reduserat de

<sup>495</sup> + 41.8 Decem viri reperti sunt inter eos, etc., habemus thesaurum. Thesaurus enim in agro, etc., usque ad Per calcaneum enim, qui finis est corporis, terminus significatur actionis.

Gabaon. <sup>496</sup> <sup>17</sup> Et abierunt, et sederunt peregrinantes in Chamaam, quæ est juxta Bethlehem, ut pergerent, et introirent Ægyptum, <sup>18</sup> a facie Chaldæorum: timebant enim eos, quia percusserat Ismahel filius Nathaniæ Godoliam filium Ahicam, quem præposuerat rex Babylonis in terra Juda.

42Et accesserunt omnes principes bellatorum, et Johanan filius Caree, et Jezonias filius Osaïæ, et reliquum vulgus, a parvo usque ad magnum, <sup>2</sup> dixeruntque ad Jeremiam prophetam: Cadat oratio nostra in conspectu tuo, et ora pro nobis ad Dominum Deum tuum, pro universis reliquiis istis, quia derelicti sumus pauci de pluribus, sicut oculi tui nos intuentur: <sup>3</sup> et annuntiet nobis Dominus Deus tuus viam per quam pergamus, et verbum quod faciamus. <sup>4</sup> Dixit autem ad eos Jeremias propheta: Audivi. Ecce ego oro ad Dominum Deum vestrum secundum verba vestra: omne verbum quodcumque responderit mihi indicabo vobis, nec celabo vos quidquam. <sup>5</sup> Et illi dixerunt ad Jeremiam: Sit Dominus inter nos testis veritatis et fidei, si non juxta omne verbum in quo miserit te Dominus Deus tuus ad nos, sic faciemus: <sup>6</sup> sive bonum est, sive malum, voci Domini Dei nostri, ad quem mittimus te, obediemus, ut bene sit nobis cum audierimus vocem Domini Dei nostri. <sup>7</sup> Cum autem completi essent decem dies, factum est verbum Domini ad Jeremiam, <sup>8</sup> vocavitque Johanan filium Caree, et omnes principes bellatorum qui erant cum eo, et universum populum, a minimo usque ad magnum. <sup>9</sup> Et dixit ad eos: Hæc dicit Dominus Deus Israël, ad quem misistis me ut prosternerem preces vestras in conspectu ejus: <sup>10</sup> Si quiescentes manseritis in terra hac, ædificabo vos, et non destruam: plantabo, et non evellam: jam enim placatus sum super malo quod feci vobis. <sup>11</sup> Nolite timere a facie regis Babylonis, quem vos pavidi formidatis: nolite metuere eum, dicit Dominus, quia vobiscum sum ego ut salvos vos faciam, et eruam de manu ejus: <sup>12</sup> et dabo vobis misericordias, et miserebor vestri, et habitare vos faciam in terra vestra. <sup>13</sup> Si autem dixeritis vos: Non habitabimus in terra ista, nec audiemus vocem Domini Dei nostri, <sup>14</sup> dicentes: Nequaquam, sed ad terram Ægypti pergemus, ubi non videbimus bellum, et clangorem tubæ non audiemus, et famem non sustinebimus, et ibi habitabimus: <sup>15</sup> propter hoc nunc audite verbum Domini, reliquiæ Juda: Hæc dicit Dominus exercituum, Deus Israël: Si posueritis faciem vestram ut ingrediamini Ægyptum, et intraveritis ut ibi habitetis, <sup>16</sup> gladius quem vos formidatis ibi comprehendet vos in terra Ægypti: et fames, pro qua estis solliciti, adhærebit vobis in Ægypto, et ibi moriemini. <sup>17</sup> Omnesque viri qui posuerunt faciem suam ut ingrediantur Ægyptum, ut habitent ibi, morientur gladio, et fame, et peste: nullus de eis remanebit, nec effugiet a facie mali quod ego afferam super eos. <sup>18</sup> Quia hæc dicit Dominus exercituum, Deus Israël: Sicut conflatus est furor meus et indignatio mea super habitatores Jerusalem, sic

<sup>496</sup> + 41.16 Tulit ergo Johanan filius Careæ et omnes principes bellatorum qui erant cum eo, etc. Hanc fugam reliquiarum et transitum contra verbum Domini in Ægyptum quem Jeremias longa narratione hic retexit, longe ante Isaias prædixit, centum scilicet quinquaginta annis, qui fuerunt inter Isaiam et Jeremiam, dicens: Væ filii desertores, dicit Dominus, ut faceritis consilium, et non ex me Isai. 30., etc.

conflabitur indignatio mea super vos cum ingressi fueritis Ægyptum: et eritis in jusjurandum, et in stuporem, et in maledictum, et in opprobrium, et nequaquam ultra videbitis locum istum. <sup>19</sup> Verbum Domini super vos, reliquiæ Juda: Nolite intrare Ægyptum: scientes scietis, quia obtestatus sum vos hodie, <sup>20</sup> quia decepistis animas vestras. Vos enim misistis me ad Dominum Deum nostrum, dicentes: Ora pro nobis ad Dominum Deum nostrum, et juxta omnia quæcumque dixerit tibi Dominus Deus noster, sic annuntia nobis, et faciemus. <sup>21</sup> Et annuntiavi vobis hodie, et non audistis vocem Domini Dei vestri super universis pro quibus misit me ad vos. <sup>22</sup> Nunc ergo scientes scietis quia gladio, et fame, et peste moriemini in loco ad quem voluistis intrare ut habitaretis ibi.

43 Factum est autem, cum complexset Jeremias loquens ad populum universos sermones Domini Dei eorum, pro quibus miserat eum Dominus Deus eorum ad illos, omnia verba hæc, <sup>2</sup> dixit Azarias filius Osaïæ, et Johanan filius Caree, et omnes viri superbi, dicentes ad Jeremiam: Mendacium tu loqueris: non misit te Dominus Deus noster, dicens: Ne ingrediamini Ægyptum ut habitetis illuc. <sup>3</sup> Sed Baruch filius Nerïæ incitat te adversum nos, ut tradat nos in manus Chaldæorum, ut interficiat nos, et traduci faciat in Babylonem. <sup>4</sup> Et non audivit Johanan filius Caree, et omnes principes bellatorum, et universus populus, vocem Domini, ut manerent in terra Juda. <sup>5</sup> Sed tollens Johanan filius Caree, et universi principes bellatorum, universos reliquiarum Juda, qui reversi fuerant de cunctis gentibus ad quas fuerant ante dispersi, ut habitarent in terra Juda, <sup>6</sup> viros, et mulieres, et parvulos, et filias regis, et omnem animam quam reliquerat Nabuzardan princeps militiæ cum Godolia filio Ahicam filii Saphan, et Jeremiam prophetam, et Baruch filium Nerïæ: <sup>7</sup> et ingressi sunt terram Ægypti, quia non obedierunt voci Domini, et venerunt usque ad Taphnis. <sup>8</sup> Et factus est sermo Domini ad Jeremiam in Taphnis, dicens: <sup>9</sup> Sume lapides grandes in manu tua, et abscondes eos in crypta quæ est sub muro latericio in porta domus Pharaonis in Taphnis, cernentibus viris Judæis: <sup>10</sup> et dices ad eos: Hæc dicit Dominus exercituum, Deus Israël: Ecce ego mittam et assumam Nabuchodonosor regem Babylonis, servum meum: et ponam thronum ejus super lapides istos quos abscondi, et statuet solium suum super eos: <sup>11</sup> veniensque percutiet terram Ægypti, quos in mortem, in mortem, et quos in captivitatem, in captivitatem, et quos in gladium, in gladium: <sup>12</sup> et succendet ignem in delubris deorum Ægypti, et comburet ea, et captivos ducet illos, et amicietur terra Ægypti sicut amicitur pastor pallio suo, et egredietur inde in pace: <sup>13</sup> et conteret statuas domus solis quæ sunt in terra Ægypti, et delubra deorum Ægypti comburet igni.

44 Verbum quod factum est per Jeremiam ad omnes Judæos qui habitabant in terra Ægypti, habitantes in Magdalo, et in Taphnis, et in Memphis, et in terra Phatures, dicens: <sup>2</sup> Hæc dicit Dominus exercituum, Deus Israël: Vos vidistis omne malum istud quod adduxi super Jerusalem, et super omnes urbes Juda: et ecce desertæ sunt hodie, et non est in eis habitator, <sup>3</sup> propter

malitiam quam fecerunt ut me ad iracundiam provocarent, et irent ut sacrificarent, et colerent deos alienos quos nesciebant, et illi, et vos, et patres vestri. <sup>4</sup> Et misi ad vos omnes servos meos prophetas, de nocte consurgens, mittensque et dicens: Nolite facere verbum abominationis hujusmodi, quam odivi. <sup>5</sup> Et non audierunt, nec inclinaverunt aurem suam, ut converterentur a malis suis, et non sacrificarent diis alienis. <sup>6</sup> Et conflata est indignatio mea et furor meus, et succensa est in civitatibus Juda, et in plateis Jerusalem: et versæ sunt in solitudinem et vastitatem secundum diem hanc. <sup>7</sup> Et nunc hæc dicit Dominus exercituum, Deus Israël: Quare vos facitis malum grande hoc contra animas vestras, ut intreat ex vobis vir et mulier, parvulus et lactens, de medio Judæ, nec relinquatur vobis quidquam residuum: <sup>8</sup> provocantes me in operibus manuum vestrarum, sacrificando diis alienis in terra Ægypti, in quam ingressi estis ut habitetis ibi: et dispereatis, et sitis in maledictionem et in opprobrium cunctis gentibus terræ? <sup>9</sup> Numquid obliti estis mala patrum vestrorum, et mala regum Juda, et mala uxorum ejus, et mala vestra, et mala uxorum vestrarum, quæ fecerunt in terra Juda, et in regionibus Jerusalem? <sup>10</sup> Non sunt mundati usque ad diem hanc: et non timuerunt, et non ambulaverunt in lege Domini, et in præceptis meis quæ dedi coram vobis et coram patribus vestris. <sup>11</sup> Ideo hæc dicit Dominus exercituum, Deus Israël: Ecce ego ponam faciem meam in vobis in malum: et disperdam omnem Judam. <sup>12</sup> Et assumam reliquias Judæ, qui posuerunt facies suas ut ingrederentur terram Ægypti, et habitarent ibi, et consumerentur omnes in terra Ægypti: cadent in gladio, et in fame, et consumerentur a minimo usque ad maximum: in gladio et in fame morientur, et erunt in jusjurandum, et in miraculum, et in maledictionem, et in opprobrium. <sup>13</sup> Et visitabo super habitatores terræ Ægypti sicut visitavi super Jerusalem, in gladio, et fame, et peste: <sup>14</sup> et non erit qui effugiat, et sit residuus de reliquiis Judæorum qui vadunt ut peregrinentur in terra Ægypti, et revertantur in terram Juda, ad quam ipsi elevant animas suas ut revertantur, et habitent ibi: non revertentur, nisi qui fugerint. <sup>15</sup> Responderunt autem Jeremiæ omnes viri scientes quod sacrificarent uxores eorum diis alienis, et universæ mulieres quarum stabat multitudo grandis, et omnis populus habitantium in terra Ægypti in Phatures, dicentes: <sup>497</sup> <sup>16</sup> Sermonem quem locutus es ad nos in nomine Domini, non audiemus ex te: <sup>17</sup> sed facientes faciemus omne verbum quod egredietur de ore nostro, ut sacrificemus reginæ cæli, et libemus ei libamina, sicut fecimus nos et patres nostri, reges nostri et principes nostri, in urbibus Juda, et in plateis Jerusalem: et saturati sumus panibus, et bene nobis erat, malumque non vidimus. <sup>18</sup> Ex eo autem tempore quo cessavimus sacrificare reginæ cæli, et libare ei libamina, indigemus omnibus, et gladio et fame consumpti sumus. <sup>19</sup> Quod si nos sacrificamus reginæ cæli, et libamus ei libamina, numquid sine viris nostris fecimus ei placentas ad colendum eam,

<sup>497</sup> + **44.15 Responderunt autem Jeremiæ**, etc. Stulta responsio. Confitentur eum loqui in nomine Domini, et non acquiescunt, sed sequuntur pravitatis suæ consilium. Mystice. Omnes hæretici in Ægypto hujus mundi. Id est, in tenebris erroris constituti, sacrificia non Deo vero, sed dæmonibus offerunt, cum figmenta et prava dogmata ad decipiendos homines et fidem subvertendam scribunt. Ideo venient super eos mala, et erunt in desolationem et in stuporem.

et libandum ei libamina? <sup>20</sup> Et dixit Jeremias ad omnem populum, adversum viros, et adversum mulieres, et adversum universam plebem, qui responderant ei verbum, dicens: <sup>21</sup> Numquid non sacrificium quod sacrificastis in civitatibus Juda, et in plateis Jerusalem, vos et patres vestri, reges vestri, et principes vestri, et populus terræ, horum recordatus est Dominus, et ascendit super cor ejus? <sup>22</sup> Et non poterat Dominus ultra portare propter malitiam studiorum vestrorum, et propter abominationes quas fecistis: et facta est terra vestra in desolationem, et in stuporem, et in maledictum, eo quod non sit habitator, sicut est dies hæc. <sup>23</sup> Propterea quod sacrificaveritis idolis, et peccaveritis Domino, et non audieritis vocem Domini, et in lege, et in præceptis, et in testimoniis ejus non ambulaveritis, idcirco evenerunt vobis mala hæc, sicut est dies hæc. <sup>24</sup> Dixit autem Jeremias ad omnem populum, et ad universas mulieres: Audite verbum Domini, omnis Juda qui estis in terra Ægypti. <sup>25</sup> Hæc inquit Dominus exercituum, Deus Israël, dicens: Vos et uxores vestræ locuti estis ore vestro, et manibus vestris implestis, dicentes: Faciamus vota nostra quæ vovimus, ut sacrificemus reginæ cæli, et libemus ei libamina. Implestis vota vestra, et opere perpetrastis ea. <sup>26</sup> Ideo audite verbum Domini, omnis Juda qui habitatis in terra Ægypti: Ecce ego juravi in nomine meo magno, ait Dominus, quia nequaquam ultra vocabitur nomen meum ex ore omnis viri Judæi, dicentis: Vivit Dominus Deus, in omni terra Ægypti. <sup>498</sup> <sup>27</sup> Ecce ego vigilabo super eos in malum, et non in bonum: et consumentur omnes viri Juda qui sunt in terra Ægypti gladio et fame, donec penitus consumantur. <sup>28</sup> Et qui fugerint gladium, revertentur de terra Ægypti in terram Juda viri pauci: et scient omnes reliquiæ Juda, ingredientium terram Ægypti ut habitent ibi, cujus sermo compleatur, meus an illorum. <sup>29</sup> Et hoc vobis signum, ait Dominus, quod visitem ego super vos in loco isto, ut sciatis quia vere complebuntur sermones mei contra vos in malum: <sup>30</sup> hæc dicit Dominus: Ecce ego tradam Pharaonem Ephree regem Ægypti in manu inimicorum ejus, et in manu quærentium animam illius, sicut tradidi Sedeciam regem Juda in manu Nabuchodonosor regis Babylonis inimici sui, et quærentis animam ejus.

45Verbum quod locutus est Jeremias propheta ad Baruch filium Neriæ, cum scripsisset verba hæc in libro ex ore Jeremiæ, anno quarto Joakim filii Josiæ regis Juda, dicens: <sup>499</sup> <sup>2</sup> Hæc dicit Dominus Deus Israël ad te, Baruch:

<sup>498</sup> + **44.26 Vivit Dominus**, etc. Contradicit propheta ex sermone Domini ne nomen ejus vocetur ore Judæorum in terra Ægypti, quoniam qui contra Dei præceptum illuc pertransierant, protectionem Domini ibidem habere non debebant. Mystice autem non vocatur nomen Domini ore hæreticorum in terra Ægypti: quia nec sermo eorum nec oratio, dum in errore sunt, accepta est Deo. Non enim est pulchra laus in ore peccatoris Eccl. 15. Qui ergo in errore perseveraverint, peribunt gladio districti judicii. Qui autem, relicto errore, de Ægypto in terram Juda redierint penitentes: et deinceps catholicam fidem tenentes salvabuntur.

<sup>499</sup> + **45.1 Verbum quod locutus est Jeremias**, etc. Rudis adhuc in tolerantia passionum quas experturus erat Baruch, expavit captivitatis calamitatem quæ tempore Joachim filii Josiæ regis Juda imminabat, unde conqueritur dolorem additum dolori suo, cui responsum est a Domino quia superflue quærat sibi pacem, cum totus populus laboret sub fasce tribulationum. Significat autem eos qui in pressura tribulationum vel persecutionum, quibus in præsentī Ecclesia gravatur,

<sup>3</sup> Dixisti: Væ misero mihi ! quoniam addidit Dominus dolorem dolori meo: laboravi in gemitu meo, et requiem non inveni. <sup>4</sup> Hæc dicit Dominus: Sic dices ad eum: Ecce quos ædificavi, ego destruo, et quos plantavi, ego evello, et universam terram hanc: <sup>5</sup> et tu quæris tibi grandia? noli quærere, quia ecce ego adducam malum super omnem carnem, ait Dominus, et dabo tibi animam tuam in salutem in omnibus locis ad quæcumque perrexeris.

<sup>46</sup> Quod factum est verbum Domini ad Jeremiam prophetam contra gentes.  
<sup>500</sup> <sup>2</sup> Ad Ægyptum, adversum exercitum Pharaonis Nechao regis Ægypti, qui erat juxta fluvium Euphraten in Charcamis, quem percussit Nabuchodonosor rex Babylonis, in quarto anno Joakim filii Josiæ regis Juda.  
<sup>3</sup> [Præparate scutum et clypeum, et procedite ad bellum. <sup>4</sup> Jungite equos, et ascendite, equites: state in galeis, polite lanceas, induite vos loriceis. <sup>5</sup> Quid igitur? vidi ipsos pavidos, et terga vertentes, fortes eorum cæsos: fugerunt conciti, nec respexerunt: terror undique, ait Dominus. <sup>6</sup> Non fugiat velox, nec salvari se putet fortis: ad aquilonem juxta flumen Euphraten victi sunt, et ruerunt. <sup>7</sup> Quis est iste, qui quasi flumen ascendit, et veluti fluviorum intumescunt gurgites ejus? <sup>8</sup> Ægyptus fluminis instar ascendit, et velut flumina movebuntur fluctus ejus, et dicet: Ascendens operiam terram: perdam civitatem, et habitatores ejus. <sup>9</sup> Ascendite equos, et exultate in curribus, et procedant fortes, Æthiopia et Libyes tenentes scutum, et Lydii arripientes et jacentes sagittas. <sup>501</sup> <sup>10</sup> Dies autem ille Domini Dei exercituum dies ultionis, ut sumat vindictam de inimicis suis: devorabit gladius, et saturabitur, et inebriabitur sanguine eorum: victima enim Domini Dei exercituum in terra aquilonis juxta flumen Euphraten. <sup>11</sup> Ascende in Galaad, et tolle resinam, virgo filia Ægypti: frustra multiplicas medicamina: sanitas non erit tibi. <sup>502</sup> <sup>12</sup> Audierunt gentes ignominiam tuam, et ululatus tuus replevit terram: quia fortis impegit in fortem, et ambo pariter conciderunt.] <sup>503</sup> <sup>13</sup> Verbum quod locutus est Dominus ad Jeremiam prophetam, super eo quod venturus esset Nabuchodonosor rex Babylonis, et percussurus terram Ægypti: <sup>14</sup> [Annuntiate Ægypto, et auditum facite in Magdalo, et resonet in Memphis, et in Taphnis: dicite: Sta, et præpara te, quia

pusillanimitate titubant, quærentes consolationem, quæ in futuro promittitur. Unde: Vos autem contristabimini, sed tristitia vestra vertetur in gaudium Joan. 16..

<sup>500</sup> + **46.1 Quod factum est verbum,** etc. RAB. Hactenus propheta mistim de Juda et Israhel, de Chaldæis et Ægyptiis pro convenientia narrationis egit, etc., usque ad anno Joachim filii Josiæ quando Pharaon Nechao rex Ægypti in Charchamis cum Nabuchodonosor pugnavit, et superatus est.

<sup>501</sup> + **46.9 Ascendite equos.** ID. Hæretici et schismatici ex diversis provinciis orti, frustra disponunt contra civitatem Dei bella, etc., usque ad cum traduntur in manus ejus qui solium suum posuit ad Aquilonem, ut mittat eos in stagnum ignis et sulphuris.

<sup>502</sup> + **46.11 Ascende in Galaad.** HIER. Mons est ad quem septima die venit Jacob, de Charram fugiens: est autem ad tergum Phoenicis et Arabiæ collibus Libani copulatus, extenditurque per desertum usque ad trans Jordanem ubi habitavit Seon rex Amorrhæorum. Cecidit autem in sortem filiorum Ruben et Gad, et dimidiæ tribus Manasse. Tolle resinam. RAB. Græci, vocant; enim dicitur de eo quod manat, etc., usque ad quia non accipient ab eis sanitatem, sed confusionem.

<sup>503</sup> + **46.12 Audierunt gentes.** ID. Quia frustrato solatio idolorum, etc., usque ad non victoriam veritatis accipiunt, sed errore captivi pariter in foveam perditionis cadunt.



devorabit gladius ea quæ per circuitum tuum sunt. <sup>504</sup> <sup>15</sup> Quare computruit fortis tuus? non stetit, quoniam Dominus subvertit eum. <sup>16</sup> Multiplicavit ruentes, ceciditque vir ad proximum suum, et dicent: Surge, et revertamur ad populum nostrum, et ad terram nativitatis nostræ, a facie gladii columbæ. <sup>17</sup> Vocate nomen Pharaonis regis Ægypti: tumultum adduxit tempus. <sup>18</sup> Vivo ego, inquit Rex (Dominus exercituum nomen ejus), quoniam sicut Thabor in montibus, et sicut Carmelus in mari, veniet. <sup>505</sup> <sup>19</sup> Vasa transmigracionis fac tibi, habitatrix filia Ægypti: quia Memphis in solitudinem erit, et deseretur, et inhabitabilis erit. <sup>20</sup> Vitula elegans atque formosa Ægyptus, stimulator ab aquilone veniet ei. <sup>506</sup> <sup>21</sup> Mercenarii quoque ejus, qui versabantur in medio ejus quasi vituli saginati, versi sunt, et fugerunt simul, nec stare potuerunt: quia dies interfectionis eorum venit super eos, tempus visitationis eorum. <sup>507</sup> <sup>22</sup> Vox ejus quasi æris sonabit: quoniam cum exercitu properabunt, et cum securibus venient ei quasi cædentes ligna. <sup>23</sup> Succiderunt saltum ejus, ait Dominus, qui supputari non potest: multiplicati sunt super locustas, et non est eis numerus. <sup>24</sup> Confusa est filia Ægypti, et tradita in manu populi aquilonis. <sup>25</sup> Dixit Dominus exercituum, Deus Israël: Ecce ego visitabo super tumultum Alexandriæ, et super Pharaonem, et super Ægyptum, et super deos ejus, et super reges ejus, et super Pharaonem, et super eos qui confidunt in eo: <sup>26</sup> et dabo eos in manu quærentium animam eorum, et in manu Nabuchodonosor regis Babylonis, et in manu servorum ejus: et post hæc habitabitur sicut diebus pristinis, ait Dominus. <sup>508</sup> <sup>27</sup> Et tu ne timeas, serve meus Jacob, et ne paveas, Israël: quia ecce ego salvum te faciam de longinquo, et semen tuum de terra captivitatis tuæ: et revertetur Jacob, et requiescet, et prosperabitur, et non erit qui exterreat eum. <sup>509</sup> <sup>28</sup> Et tu noli timere, serve meus Jacob, ait Dominus, quia tecum ego sum: quia ego consumam cunctas gentes ad quas ejeci te, te vero non consumam: sed castigabo te in iudicio, nec quasi innocenti parcam tibi.]

<sup>504</sup> + **46.14 Annuntiate Ægypto.** Quasi dicat: Vos qui audistis vaticinium meum, nuntiate Pharaoni quia prope est tempus et tumultus belli.

<sup>505</sup> + **46.18 Quoniam sicut Thabor.** Hoc est ex comparatione locorum frugiferorum, quasi in mari submersorum, grandem Ægyptiorum potestis intelligere ruinam. HIER. Thabor terminus est Zabulon, mons in medio Galilææ campo, mira rotunditate sublimis: distans a Diocæsaræa decem millibus contra orientalem plagam. Qui confinium quoque inter tribus Issachar et Nephtholim fuit Carmelus, ubi Nabal Carmelus fuit et nunc villa est Carmela nomine, decimo lapide oppidi Chebron, vergens ad orientalem plagam ubi Romanorum præsidium est. RAB. Mystice autem, quia Thabor, etc., usque ad in hujus sæculi mare demersi, et in damnatione perpetua.

<sup>506</sup> + **46.20 Vitula.** Quia Ægyptia plebs in deliciis nutrita, indomita, lasciva, jugum disciplinæ recusavit.

<sup>507</sup> + **46.21 Mercenarii.** RAB. Principes Ægyptiorum non pastores, sed mercenarios vocat, etc., usque ad Mercenarius autem, et qui non est pastor, cum videt lupum venientem, dimittit oves, et fugit Joan. 10..

<sup>508</sup> + **46.26 Et post hæc,** etc. ID. Licet videatur intimare regnum Ægyptiorum non irreparabiliter a Nabuchodonosor esse destructum, etc., usque ad: Percutiet Dominus Ægyptum plaga et sanabit eam Isa. 19., etc.

<sup>509</sup> + **46.27 Et tu noli timere,** etc. Hæc promissio non bene convenit Judæis: qui toto orbe dispersi, etc., usque ad: Quia ex parte cæcitas contigit in Israël, et cum plenitudo gentium subintraverit, tunc omnis Israël salvus fiet Rom. 11..

47 Quod factum est verbum Domini ad Jeremiam prophetam contra Palæstinos, antequam percuteret Pharaon Gazam. <sup>510</sup> <sup>2</sup> [Hæc dicit Dominus: Ecce aquæ ascendunt ab aquilone, et erunt quasi torrens inundans, et operient terram et plenitudinem ejus, urbem et habitatores ejus. Clamabunt homines, et ululabunt omnes habitatores terræ, <sup>3</sup> a strepitu pompæ armorum, et bellatorum ejus, a commotione quadrigarum ejus, et multitudine rotarum illius. Non respexerunt patres filios manibus dissolutis, <sup>4</sup> pro adventu diei in quo vastabuntur omnes Philistiim, et dissipabitur Tyrus et Sidon cum omnibus reliquiis auxiliis suis: depopulatus est enim Dominus Palæstinos, reliquias insulæ Cappadociæ. <sup>511</sup> <sup>5</sup> Venit calvitium super Gazam; conticuit Ascalon, et reliquiæ vallis earum: usquequo concideris? <sup>512</sup> <sup>6</sup> O mucro Domini, usquequo non quiesces? ingredi in vaginam tuam, refrigerare, et sile. <sup>7</sup> Quomodo quiescet, cum Dominus præceperit ei adversus Ascalonem, et adversus maritimas ejus regiones, ibique condixerit illi?] <sup>513</sup>

48 Ad Moab. [Hæc dicit Dominus exercituum, Deus Israël: Væ super Nabo, quoniam vastata est, et confusa! capta est Cariathaim, confusa est fortis, et tremuit. <sup>514</sup> <sup>2</sup> Non est ultra exsultatio in Moab contra Hesebon: cogitaverunt malum: Venite, et disperdamus eam de gente. Ergo silens conticesces, sequeturque te gladius. <sup>3</sup> Vox clamoris de Oronaim, vastitas et contritio magna. <sup>4</sup> Contrita est Moab: annuntiate clamorem parvulis ejus. <sup>5</sup> Per ascensum enim Luith plorans ascendet in fletu, quoniam in descensu Oronaim hostes ululatum contritionis audierunt. <sup>6</sup> Fugite, salvate animas vestras, et eritis quasi myricæ in deserto: <sup>515</sup> <sup>7</sup> pro eo enim quod habuisti fiduciam in munitionibus tuis et in thesauris tuis, tu quoque capieris: et ibit Chamos in transmigrationem, sacerdotes ejus et principes ejus simul. <sup>8</sup> Et

<sup>510</sup> + **47.1 Quod factum est verbum**, etc. Jeremias sicut Isaias et Ezechiel vicinis nationibus plagas venturas prædicit, quia populum Dei infestabant, et in illius adversitate gaudebant. Palæstinis ergo, sicut ante Ægyptiis, prænuntiat captivitatem venturam.

<sup>511</sup> + **47.4 Et dissipabitur**. Ostendit Tyrum et Sidonem ad Palæstinos attinere, licet Tyrus in sortem Nephthaim ceciderit, et Sidon terminus Chananæorum in sortem Aser: sed non eam possedit, quia hostes expellere non valuit. Reliquias insulæ Cappadociæ. In qua habitabant Cappadocei pristinis cultoribus interfectis. Hæc est terminus Chananæorum juxta Ægyptum, ceciditque in sortem Judæ: sed eam non obtinuit, quia Enachim, id est, gigantes allophylorum fortissime restiterunt: et est usque hodie insignis civitas Palæstinæ, quamvis de ea prophetatum sit Gaza futura est in tumulum sempiternum: sed ubi prius fuit vix ulla remanent vestigia, in alio enim loco ædificata est.

<sup>512</sup> + **47.5 Venit**, etc. RAB. Hæreticis et schismaticis et omnibus Ecclesiæ hostibus plagam venturam significat, etc., usque ad Per libidinem enim carnalium mentes exurit: sed novissimo præcipitabitur.

<sup>513</sup> + **47.7 Quomodo quiescet**, etc. Quasi dicat: Non potest gladius quiescere, nisi Domino jubente cujus vindictam exercet, vel: Quasi ex persona afflictorum ad gladium Domini locutus erat, sed hic respondet in persona sua.

<sup>514</sup> + **48.1 Ad Moab hæc dicit Dominus**, etc. RAB. Sicut est circumcisio carnalis et spiritualis: sic Moab carnalis et spiritualis. Moab interpretatur, etc., usque ad Est autem Moab provincia Arabum, Nabo civitas nobilis, in qua erat Chamos idolum, quod et Beelphegor.

<sup>515</sup> + **48.6 Salvate animas vestras**. Qui volunt salvare animam suam fugiant versuram doctrinam philosophorum et hæreticorum, ubi certus est interitus: et per humilitatem confessionis agant pœnitentiam erroris in deserto districtæ abstinentiæ maneatque in simplicitate et veritate catholiciæ doctrinæ.

veniet prædo ad omnem urbem, et urbs nulla salvabitur: et peribunt valles, et dissipabuntur campestria, quoniam dixit Dominus: <sup>9</sup> Date florem Moab, quia florens egredietur: et civitates ejus desertæ erunt, et inhabitabiles. <sup>516</sup> <sup>10</sup>

Maledictus qui facit opus Domini fraudulenter, et maledictus qui prohibet gladium suum a sanguine. <sup>517</sup> <sup>11</sup> Fertilis fuit Moab ab adolescentia sua, et requievit in fœcibus suis: nec transfusus est de vase in vas, et in transmigrationem non abiit: idcirco permansit gustus ejus in eo, et odor ejus non est immutatus. <sup>518</sup> <sup>12</sup> Propterea ecce dies veniunt, dicit Dominus, et mittam ei ordinatores et stratores laguncularum: et sternent eum, et vasa ejus exhaurient, et lagunculas eorum collident. <sup>519</sup> <sup>13</sup> Et confundetur Moab a Chamos sicut confusa est domus Israël a Bethel, in qua habebat fiduciam. <sup>14</sup>

Quomodo dicitis: Fortes sumus, et viri robusti ad præliandum? <sup>15</sup> Vastata est Moab, et civitates illius succiderunt, et electi juvenes ejus descenderunt in occisionem, ait Rex: Dominus exercituum nomen ejus. <sup>16</sup> Prope est interitus

Moab ut veniat, et malum ejus velociter accurret nimis. <sup>17</sup> Consolamini eum, omnes qui estis in circuitu ejus: et universi qui scitis nomen ejus, dicite: Quomodo confracta est virga fortis, baculus gloriosus? <sup>520</sup> <sup>18</sup> Descende de gloria, et sede in siti, habitatio filiæ Dibon, quoniam vastator Moab ascendit ad te: dissipavit munitiones tuas. <sup>19</sup> In via sta, et prospice, habitatio Aroër: interroga fugientem, et ei qui evasit dic: Quid accidit? <sup>20</sup> Confusus est Moab, quoniam victus est. Ululate, et clamate: annuntiate in Arnon, quoniam vastata est Moab, <sup>21</sup> et judicium venit ad terram campestram, super Helon, et super Jasa, et super Mephaath, <sup>22</sup> et super Dibon, et super Nabo, et super domum Deblathaim, <sup>23</sup> et super Cariathaim, et super Bethgamul, et super

<sup>516</sup> + **48.9 Date florem**, etc. Qui inventionem humana et in sæculari scientia florere videbatur, in desertum et in solitudinem redigetur. Quia vero displicet Deo omnis hypocrisis, ut sequens sententia ostendit:

<sup>517</sup> + **48.10 Maledictus qui facit**, etc. Necessè est enim ut non solum intueamur quod agimus, sed etiam qua discretione agimus. Maledictus. RAB. Desidia per torporem nascitur, fraus per privatam dilectionem, etc., usque ad sæpe desidia interveniente deficiunt, et frigescente amore tabefiunt. Et maledictus. Potest hæc maledictio omnibus convenire qui fluxum sæculi sequuntur, et corpora sua castigare et servituti subjicere negligunt, secundum illud: Qui autem sunt Christi carnem suam crucifixerunt Galat. 5., etc. Quia sine sanguinis effusione non fit remissio peccatorum. Caro enim et sanguis regnum Dei non possidebunt II Cor. 15.. Maledictus ergo qui prohibet gladium, id est, verbum Dei a sanguine: quo scilicet animatur materia peccatorum; fundendum est quidquid in membris nostris carnale et terrenum inolevit et reseccandum gladium verbi Dei. GREG. Gladium a sanguine prohibere, est prædicationis verbum a carnalis vitæ interfectione retinere, de quo dicitur: Gladius meus devorabit carnes Isa. 1.. Hinc Paulus ait, Contestor hodie quia mundus sum a sanguine omnium. Non enim subterfugi, quominus annuntiarem omne consilium Dei vobis Act. 10..

<sup>518</sup> + **48.11 Fertilis**. Ostenditur Moab ex abundantia in odium et elationem venisse, et populum Dei afflictum despexisse, quia nihil afflictionis vel captivitatis patiebatur.

<sup>519</sup> + **48.12 Mittam ei**, etc. RAB. Quicumque in humana philosophia confidunt despicientes Ecclesiæ fidem et doctrinam simplicem, etc., usque ad tunc ibunt cum diabolo et angelis ejus in ignem æternum. Justi autem in vitam æternam.

<sup>520</sup> + **48.17 Consolamini**. Ironice vel ad pœnitentiam provocat, ut per satisfactionem congruam evadant miseriam. Mystice. Sapientes hujus mundi et hæretici, quos Moab significat, si stultitiam non correxerint ad fidem catholicam conversi, veniet illis ruina et vastatio omnibus urbibus eorum, id est, diversis sectis. Quæ enim longe vel prope a veritate distant, lucente Evangelio subvertentur.

Bethmaon, <sup>24</sup> et super Carioth, et super Bosra, et super omnes civitates terræ Moab, quæ longe et quæ prope sunt. <sup>25</sup> Abscissum est cornu Moab, et brachium ejus contritum est, ait Dominus. <sup>521</sup> <sup>26</sup> Inebriate eum, quoniam contra Dominum erectus est: et allidet manum Moab in vomitu suo, et erit in derisum etiam ipse. <sup>27</sup> Fuit enim in derisum tibi Israël: quasi inter fures reperisses eum: propter verba ergo tua quæ adversum illum locutus es, captivus duceris. <sup>28</sup> Relinquire civitates, et habitate in petra, habitatores Moab: et estote quasi columba nidificans in summo ore foraminis. <sup>29</sup> Audivimus superbiam Moab: superbus est valde: sublimitatem ejus, et arrogantiam, et superbiam, et altitudinem cordis ejus. <sup>522</sup> <sup>30</sup> Ego scio, ait Dominus, jactantiam ejus, et quod non sit juxta eam virtus ejus, nec juxta quod poterat conata sit facere. <sup>31</sup> Ideo super Moab ejulabo, et ad Moab universam clamabo, ad viros muri fictilis lamentantes: <sup>523</sup> <sup>32</sup> de planctu Jazer plorabo tibi, vinea Sabama. Propagines tuæ transierunt mare; usque ad mare Jazer pervenerunt: super messem tuam et vindemiam tuam prædo irruit. <sup>524</sup> <sup>33</sup> Ablata est lætitia et exsultatio de Carmelo et de terra Moab, et vinum de torcularibus sustuli: nequaquam calcator uvæ solitum celeuma cantabit. <sup>34</sup> De clamore Hesebon usque Eleale et Jasa, dederunt vocem suam; a Segor usque ad Oronaim, vitula conternante: aquæ quoque Nemrim pessimæ erunt. <sup>525</sup> <sup>35</sup> Et auferam de Moab, ait Dominus, offerentem in excelsis, et sacrificantem diis ejus. <sup>526</sup> <sup>36</sup> Propterea cor meum ad Moab quasi tibiæ resonabit, et cor meum ad viros muri fictilis dabit sonitum tiliarum: quia plus fecit quam potuit, idcirco perierunt. <sup>37</sup> Omne enim caput calvitium, et omnis barba rasa erit: in cunctis manibus colligatio, et super omne dorsum cilicium: <sup>527</sup> <sup>38</sup> super omnia tecta Moab, et in plateis

<sup>521</sup> + **48.25 Abscissum.** HIER. Sicut contra Babylonem et Philistiim vaticinatus est, etc., usque ad quidquid ad terrenam scientiam pertinet et putatur robustum, subvertitur, ut nihil probetur quod fortissimum putabatur.

<sup>522</sup> + **48.29 Audivimus.** Quia in priori commate errantes ad pœnitentiam provocabat, et ad Christum converti monebat; ut in ejus fide perpetuo manerent; nunc incorrigibiles plurimos et obstinatos agnoscens, ex persona eorum, qui de Moab salvati sunt, et experimento suo ejus superbiam didicerunt, ait: Audivimus superbiam Moab, etc. Et Moab superbiam arguit, quia plus effertur quam possit, vel poscat ejus fortitudo.

<sup>523</sup> + **48.31 Ideo super Moab ejulabo.** Potentiam pristinae felicitatis et plagam repentinae subversionis ostendit. Moab universam clamabo. Quæ interpretatur fortitudo eorum, et significat fortissima hæreticorum dogmata dialectice constructa, in quibus videbatur esse fortitudo erroris.

<sup>524</sup> + **48.32 Plorabo tibi, vinea Sabama.** Tempestatem hujus sæculi. Videtur enim significare aliquos de Moab ad Dominum converti velle. Sabama enim conversio aliqua interpretatur. Vineam Sabama, etc. Attollens altitudinem, quia superbia turrim ad cœlum conatur erigere.

<sup>525</sup> + **48.34 A Segor usque ad Oronaim.** Segor urbs quæ Mortuo mari imminet, ubi terminus Moabitarum. Indicat ergo, quia usque ad extremos fines provinciae ululatus personabit. De quo Isaias: Vectes ejus usque Segor vitulam consternantem Isa. 15., id est, perfectæ ætatis. Sicut enim in hominibus tricesimus annus, ita in pecudibus et jumentis annus tertius robustissimus est. Aquæ quoque Nemrim. Isaias: Aquæ enim Nemrim desertæ erunt Isa. 15., etc. Et quæ hic minus dicuntur, in Isaiâ plene exponuntur. Est enim Nimrim oppidum super mare Mortuum.

<sup>526</sup> + **48.35 Et auferam de Moab.** Intereunte secta humanæ sapientiae, cessavit pompa et clamor verborum, ut philosophi nec hæretici de Ecclesia egressi aliquid inveniant in doctrina sua quod humanæ vitæ utile sit.

<sup>527</sup> + **48.37 Omne enim caput calvitium.** RAB. Apud antiquos barbæ capitisque rasura luctus indicium fuit, etc., usque ad hinc Isaias: In cunctis capitibus ejus calvitium, omnis barba radetur

ejus, omnis plactus: quoniam contrivi Moab sicut vas inutile, ait Dominus.  
<sup>528</sup> <sup>39</sup> Quomodo victa est, et ululaverunt? quomodo dejecit cervicem Moab,  
 et confusus est? eritque Moab in derisum, et in exemplum omnibus in  
 circuitu suo. <sup>40</sup> Hæc dicit Dominus: Ecce quasi aquila volabit, et extendet  
 alas suas ad Moab. <sup>41</sup> Capta est Carioth, et munitiones comprehensæ sunt:  
 et erit cor fortium Moab in die illa sicut cor mulieris parturientis, <sup>529</sup> <sup>42</sup> et  
 cessabit Moab esse populus, quoniam contra Dominum gloriatus est. <sup>43</sup>  
 Pavor, et fovea, et laqueus super te, o habitator Moab, dicit Dominus. <sup>44</sup> Qui  
 fugerit a facie pavoris cadet in foveam, et qui conscenderit de fovea capietur  
 laqueo: adducam enim super Moab annum visitationis eorum, ait Dominus.  
<sup>45</sup> In umbra Hesebon steterunt de laqueo fugientes, quia ignis egressus est de  
 Hesebon, et flamma de medio Seon: et devorabit partem Moab, et verticem  
 filiorum tumultus. <sup>530</sup> <sup>46</sup> Væ tibi, Moab: periisti, popule Chamos, quia  
 comprehensi sunt filii tui et filiæ tuæ in captivitatem. <sup>531</sup> <sup>47</sup> Et convertam  
 captivitatem Moab in novissimis diebus, ait Dominus.] Hucusque judicia  
 Moab. <sup>532</sup>

49Ad filios Ammon. [Hæc dicit Dominus: Numquid non filii sunt Israël, aut  
 hæres non est ei? cur igitur hæreditate possedit Melchom Gad, et populus  
 ejus in urbibus ejus habitavit? <sup>533</sup> <sup>2</sup> Ideo ecce dies veniunt, dicit Dominus,  
 et auditum faciam super Rabbath filiorum Ammon fremitum prælii, et erit in  
 tumultum dissipata, filiæque ejus igni succendentur, et possidebit Israël  
 possessores suos, ait Dominus. <sup>534</sup> <sup>3</sup> Ulula, Hesebon, quoniam vastata est  
 Hai; clamate, filiæ Rabbath: accingite vos ciliciis, plangite et circuite per  
 sepes, quoniam Melchom in transmigrationem ducetur, sacerdotes ejus et  
 principes ejus simul. <sup>4</sup> Quid gloriaris in vallibus? defluxit vallis tua, filia  
 delicata, quæ confidebas in thesauris tuis, et dicebas: Quis veniet ad me? <sup>5</sup>  
 Ecce ego inducam super te terrorem, ait Dominus Deus exercituum, ab  
 omnibus qui sunt in circuitu tuo: et dispergemini singuli a conspectu vestro,  
 nec erit qui congreget fugientes. <sup>6</sup> Et post hæc reverti faciam captivos  
 filiorum Ammon, ait Dominus.] <sup>535</sup> <sup>7</sup> Ad Idumæam. [Hæc dicit Dominus

Isa. 15..

<sup>528</sup> + **48.38 Quoniam contrivi Moab.** Omnis doctrina philosophorum et hæreticorum, quia  
 fragilis est et inutilis, a veritate conteritur et dissipatur.

<sup>529</sup> + **48.41 Et erit cor fortium Moab.** Bene cor Moab cordi mulieris parturientis comparat;  
 quia de magna luxuria ad magnam pervenitur tristitiam.

<sup>530</sup> + **48.45 In umbra Hesebon steterunt.** Quia in ejus munitione sperabat sibi solatium, sed  
 frustra: quia ignis vindictæ verticem tumultus filiorum Moab justo iudice retribuente oppressit.

<sup>531</sup> + **48.46 Væ tibi, Moab.** Quia nec munitio urbium, nec virtus idolorum valuit te defendere:  
 sic erit perpetuum væ his qui confidunt in sapientia humana, et serviunt erroribus diversis.

<sup>532</sup> + **48.47 Et convertam captivitatem Moab.** Videtur tempus gratiæ significare, in quo  
 quicumque invocaverit nomen Domini, salvus erit Joel. 2..

<sup>533</sup> + **49.1 Ad filios.** Post Moab ad filios Ammon verba vertuntur, et increpantur, quod  
 ausi sunt terram Israël invadere, unde et eis ultio digna prænuntiatur, et Israël possessores suos  
 prædicatur possessurus.

<sup>534</sup> + **49.2 Filiæ Rabbath.** Metropolis Moabitarum, quæ nunc Ariopolis dicitur, composito  
 nomine ex Hebræo et Græco, quod, id est, Martis civitas vocetur.

<sup>535</sup> + **49.6 Et post hæc.** Quia post conversionem hæreticorum ad fidem rectam, captivitas pec-

exercituum: Numquid non ultra est sapientia in Theman? periit consilium a filiis; inutilis facta est sapientia eorum. <sup>536</sup> <sup>8</sup> Fugite, et terga vertite; descendite in voraginem, habitatores Dedan: quoniam perditionem Esau adduxi super eum, tempus visitationis ejus. <sup>9</sup> Si vindemiatore venissent super te, non reliquissent racemum: si fures in nocte rapuissent quod sufficeret sibi. <sup>537</sup> <sup>10</sup> Ego vero discooperui Esau: revelavi abscondita ejus, et celari non poterit: vastatum est semen ejus, et fratres ejus, et vicini ejus, et non erit. <sup>11</sup> Relinque pupillos tuos: ego faciam eos vivere: et viduæ tuæ in me sperabunt. <sup>12</sup> Quia hæc dicit Dominus: Ecce quibus non erat iudicium ut biberent calicem, bibentes bibent: et tu, quasi innocens relinqueris? non eris innocens, sed bibens bibes. <sup>13</sup> Quia per memetipsum iuravi, dicit Dominus, quod in solitudinem, et in opprobrium, et in desertum, et in maledictionem erit Bosra, et omnes civitates ejus erunt in solitudines sempiternas. <sup>14</sup> Auditum audivi a Domino, et legatus ad gentes missus est: Congregamini, et venite contra eam, et consurgamus in prælium. <sup>538</sup> <sup>15</sup> Ecce enim parvulum dedi te in gentibus, contemptibilem inter homines. <sup>539</sup> <sup>16</sup> Arrogantia tua decepit te, et superbia cordis tui, qui habitas in cavernis petræ, et apprehendere niteris altitudinem collis: cum exaltaveris quasi aquila nidum tuum, inde detraham te, dicit Dominus. <sup>540</sup> <sup>17</sup> Et erit Idumæa deserta: omnis qui transibit per eam stupebit, et sibilabit super omnes plagas ejus. <sup>18</sup> Sicut subversa est Sodoma et Gomorrha, et vicinæ ejus, ait Dominus: non habitabit ibi vir, et non incolet eam filius hominis. <sup>19</sup> Ecce quasi leo ascendet de superbia Jordanis ad pulchritudinem robustam, quia subito currere faciam eum ad illam. Et quis erit electus, quem præponam ei? quis enim similis mei? et quis sustinebit me? et quis est iste pastor, qui resistat vultui meo? <sup>541</sup> <sup>20</sup> Propterea audite consilium Domini quod iniit de Edom,

cati dissolvetur, recipientur in communionem Ecclesiæ, unde exierant. Et captivos. Possumus per filios Ammon, qui de Loth in spelunca, et in ebrietate, et incestu generati sunt hæreticos accipere, secundum illud, Ex nobis exierunt, sed ex nobis non erant Joan. 2..

<sup>536</sup> + **49.7 Ad Idumæam.** RAB. Tropologice Idumæa terrena et carnea delectatio, quæ consurgit adversus spiritum, ut non faciamus ea quæ sunt spiritus, et animam, etc., usque ad Cum enim spiritui caro subjecta fuerit, Idumæa transibit in Judæam, et caro serviet rationi.

<sup>537</sup> + **49.9 Si fures.** Hæretici qui furantur sufficientiam sibi, et quotidie aliquos de Ecclesia rapiunt, ingredientes vineam Domini, quam de Ægypto transtulit, cupiunt universa populari, ut vix racemum in ea relinquant. Sed Dominus e contra omnia secreta eorum, et patriarcharum Esau (qui primas scilicet hæreses invenerunt) viros ecclesiasticos et doctores profert in medium. Et prima illius victoria est patefacere quæ tegebantur. HIER. Contra Judæos factus est sermo, qui Christianis invident, etc., usque ad ut mortificantes membra nostra (fornicationem, scilicet immunditiam, et hujusmodi) æternam in Christo victoriam consequamur.

<sup>538</sup> + **49.14 Audivi.** Hæc sententia in Abdia pene eisdem verbis continetur, et multa hujus capituli.

<sup>539</sup> + **49.15 Ecce enim.** RAB. Quasi dicat: O Edom, qui minor es inter omnes in circuitu nationes, etc., usque ad inde te detraherem, et ad terram reducerem cæterarum gentium. Parvulum dedi te in gentibus. O hæretice, licet magnus tibi videaris, et contemnas parvitatem Ecclesiæ, parvus tamen es et contemptibilis.

<sup>540</sup> + **49.16 Cum exaltaveris,** etc. RAB. Quia hæretici altitudinem et similitudinem aquilarum pollicentur sibi, quæ ad cadaver Dominicum congregantur, etc., usque ad Quod autem contra hæreticos et carnem dictum est, contra Judæos quoque intelligi potest.

<sup>541</sup> + **49.19 Ecce quasi leo.** ID. Sicut Dominus castigavit superbiam Judæorum, quos per Jordanem, etc., usque ad sed leo sævissimus in tartarum eos perpetuo cruciandos detrudet.

et cogitationes ejus quas cogitavit de habitatoribus Theman: si non dejecerint eos parvuli gregis, nisi dissipaverint cum eis habitaculum eorum. <sup>21</sup> A voce ruinae eorum commota est terra; clamor in mari Rubro auditus est vocis ejus. <sup>542</sup> <sup>22</sup> Ecce quasi aquila ascendet, et avolabit, et expandet alas suas super Bosran: et erit cor fortium Idumææ in die illa quasi cor mulieris parturientis.] <sup>23</sup> Ad Damascum. [Confusa est Emath et Arphad, quia auditum pessimum audierunt: turbati sunt in mari; præ sollicitudine quiescere non potuit. <sup>543</sup> <sup>24</sup> Dissoluta est Damascus, versa est in fugam: tremor apprehendit eam, angustia et dolores tenuerunt eam quasi parturientem. <sup>544</sup> <sup>25</sup> Quomodo dereliquerunt civitatem laudabilem, urbem lætitiæ? <sup>26</sup> Ideo cadent juvenes ejus in plateis ejus, et omnes viri prælii conticescent in die illa, ait Dominus exercituum. <sup>27</sup> Et succendam ignem in muro Damasci, et devorabit mœnia Benadad.] <sup>28</sup> Ad Cedar, et ad regna Asor, quæ percussit Nabuchodonosor rex Babylonis. [Hæc dicit Dominus: Surgite, et ascendite ad Cedar, et vastate filios orientis. <sup>545</sup> <sup>29</sup> Tabernacula eorum, et greges eorum capient: pelles eorum, et omnia vasa eorum, et camelos eorum tollent sibi, et vocabunt super eos formidinem in circuitu. <sup>546</sup> <sup>30</sup> Fugite, abite vehementer, in voraginibus sedete, qui habitatis Asor, ait Dominus: iniit enim contra vos Nabuchodonosor rex Babylonis consilium, et cogitavit adversum vos cogitationes. <sup>31</sup> Consurgite, et ascendite ad gentem quietam, et habitantem confidenter, ait Dominus: non ostia, nec vectes eis: soli habitant. <sup>32</sup> Et erunt cameli eorum in direptionem, et multitudo jumentorum in prædam: et dispergam eos in omnem ventum, qui sunt attonsi in comam, et ex omni confinio eorum adducam interitum super eos, ait Dominus. <sup>33</sup> Et erit Asor in habitaculum draconum, deserta usque in æternum: non manebit ibi vir, nec incolet eam filius hominis.] <sup>34</sup> Quod facum est verbum Domini ad Jeremiam prophetam adversus Ælam, in principio regni Sedeciæ regis Juda, dicens: <sup>35</sup> [Hæc dicit Dominus exercituum: Ecce ego confringam arcum Ælam, et summam fortitudinem eorum: <sup>547</sup> <sup>36</sup> et inducam super Ælam quatuor

<sup>542</sup> + **49.21 A voce ruinae,** etc. Veniente vastatore, strepitus ruinae eorum longe lateque resonabit, terrorem incutiens vicinis provinciis.

<sup>543</sup> + **49.23 Confusa est.** RAB. Post Philisthæos, Moabitas, Ammonitas quoque et Idumæos, ad Damascum, id est, Arabiam, etc., usque ad cum enim captus est populus Judæorum, Damascus, cui imperabat Aretha, similiter capta est.

<sup>544</sup> + **49.24 Dissoluta.** Damascus interpretatur poculum sanguinis, aut sanguinem bibens, aut sanguis cilicii; quæ omnia ethnicis conveniunt, etc., usque ad Quomodo enim acervus lapidum de dispersis lapidibus cumulatur: sic de omnibus nationibus acervus credentium congregatur in ruina Judæorum cadentium dum gentes surgunt.

<sup>545</sup> + **49.28 Ad Cedar.** Hi Agareni sunt, sed usurpato nomine Saraceni vocantur, et habitant per solitudinem totam, de quibus poeta dicit: Lateque vagantes Agi. RAB. Mystice. Cedar, quod interpretatur tenebræ, et Asor, etc., usque ad qui se simulant filios Orientis, cum sint tenebrarum filii.

<sup>546</sup> + **49.29 Tabernacula.** Hæc omnia Saracenorum proprie gentem significant, qui in tentoriis manent, et ubi nox coegerit sedes habent, et armenta multa, et pecora, camelorumque greges; sed non habent ostia, nec vectes, non enim versantur in urbibus, sed in solitudine. Hi omnes a Babyloniis sunt deleti.

<sup>547</sup> + **49.35 Ecce ego confringam,** etc. RAB. Elam regio Persidis, unde Elamitæ. Prædicat enim propheta, etc., usque ad Elamitæ quoque despicientes vel tentantes interpretantur, et significant persecutores Ecclesiæ.

ventos a quatuor plagis cæli, et ventilabo eos in omnes ventos istos, et non erit gens ad quam non perveniant profugi Ælam. <sup>37</sup> Et pavere faciam Ælam coram inimicis suis, et in conspectu quærentium animam eorum: et adducam super eos malum, iram furoris mei, dicit Dominus, et mittam post eos gladium donec consumam eos. <sup>38</sup> Et ponam solium meum in Ælam, et perdam inde reges et principes, ait Dominus. <sup>39</sup> In novissimis autem diebus reverti faciam captivos Ælam, dicit Dominus.]

50 Verbum quod locutus est Dominus de Babylone et de terra Chaldæorum, in manu Jeremiæ prophetæ. <sup>548</sup> <sup>2</sup> [Annuntiate in gentibus, et auditum facite: levate signum, prædicate, et nolite celare: dicite: Capta est Babylon, confusus est Bel, victus est Merodach, confusa sunt sculptilia ejus, superata sunt idola eorum. <sup>549</sup> <sup>3</sup> Quoniam ascendit contra eam gens ab aquilone, quæ ponet terram ejus in solitudinem, et non erit qui habitet in ea ab homine usque ad pecus: et moti sunt, et abierunt. <sup>4</sup> In diebus illis, et in tempore illo, ait Dominus, venient filii Israël ipsi et filii Juda simul: ambulantes et flentes properabunt, et Dominum Deum suum quærent: <sup>550</sup> <sup>5</sup> in Sion interrogabunt viam, huc facies eorum: venient, et apponentur ad Dominum fœdere sempiterno, quod nulla oblivione delebitur. <sup>6</sup> Grex perditus factus est populus meus: pastores eorum seduxerunt eos, feceruntque vagari in montibus: de monte in collem transierunt; obliti sunt cubilis sui. <sup>551</sup> <sup>7</sup> Omnes qui invenerunt comederunt eos, et hostes eorum dixerunt: Non peccavimus: pro eo quod peccaverunt Domino decori justitiæ, et exspectationi patrum eorum Domino. <sup>8</sup> Recedite de medio Babylonis, et de terra Chaldæorum egredimini, et estote quasi hædi ante gregem. <sup>552</sup> <sup>9</sup> Quoniam ecce ego suscito, et adducam in Babylonem congregationem gentium magnarum de terra aquilonis, et præparabuntur adversus eam, et inde capietur: sagitta ejus quasi viri fortis interfectoris: non revertetur vacua. <sup>10</sup> Et erit Chaldæa in prædam: omnes vastantes eam replebuntur, ait Dominus. <sup>11</sup> Quoniam exsultatis, et magna loquimini, diripientes hæreditatem meam: quoniam effusi estis sicut vituli super herbam, et

<sup>548</sup> + **50.1 Verbum.** Expleto vaticinio contra Ægyptum, Palæstinos, Moab, filios Ammon, Damascus quoque et Cedar, contra Babylonem et Chaldæos sermo dirigitur; ut quos ante latenter arguit, nunc palam scelera eorum manifestando, vastationem et desolationem subsequi aperte pronuntiet, Isaias quoque et Ezechiel similia contra Babylonios et Chaldæos prophetaverunt.

<sup>549</sup> + **50.2 Confusa sunt.** Similia dicit Isaias: Ecce ego suscitabo super eos Medos, qui argentum non quærant, neque aurum velint Isa. 13..

<sup>550</sup> + **50.4 Venient filii Israël.** RAB. Hæc promissio reversionem populi Dei de captivitate significat, etc., usque ad ut jungantur illi fœdere sempiterno.

<sup>551</sup> + **50.6 Grex perditus.** Hac sententia notantur reges Israëlitarum, qui errare fecerunt populum et declinare ad idololatriam: quorum fuit primus Jeroboam filius Nabath, qui fecit adorari vitulos aureos: deinde cæteri prævaricatores legis.

<sup>552</sup> + **50.8 Recedite,** etc. Secundum historiam monet Israëlitas, qui captivandi erant in Babylonem, ut non stabilem possessionem arbitrentur se ibi habituros, sed spem revertendi habent, et cum captivitas laxaretur, fugerent inde: quia venturum erat ut a Medis et Persis vastaretur. ORIG. Quomodo corpus nostrum in aliquo terræ loco consistit, sic anima, secundum statum suum in aliquo terræ loco nuncupative est. Corpus nostrum, etc., usque ad sic in Ægypto, alius est in Taphnis, alius est in Memphis, alius in Sienni, alius in Bubastis habitat.



mugistis sicut tauri: <sup>12</sup> confusa est mater vestra nimis, et adæquata pulveri, quæ genuit vos: ecce novissima erit in gentibus, deserta, invia, et arens. <sup>553</sup>  
<sup>13</sup> Ab ira Domini non habitabitur, sed redigetur tota in solitudinem: omnis qui transibit per Babylonem stupebit, et sibilabit super universis plagis ejus.  
<sup>14</sup> Præparamini contra Babylonem per circuitum, omnes qui tenditis arcum: debellate eam, non parcatis jaculis, quia Domino peccavit. <sup>15</sup> Clamate adversus eam, ubique dedit manum: ceciderunt fundamenta ejus, destructi sunt muri ejus, quoniam ultio Domini est: ultionem accipite de ea: sicut fecit, facite ei. <sup>554</sup> <sup>16</sup> Disperditate satorum de Babylone, et tenentem falcem in tempore messis: a facie gladii columbæ unusquisque ad populum suum convertetur, et singuli ad terram suam fugient. <sup>555</sup> <sup>17</sup> Grex dispersus Israël: leones ejecerunt eum. Primus comedit eum rex Assur: iste novissimus exossavit eum Nabuchodonosor rex Babylonis. <sup>556</sup> <sup>18</sup> Propterea hæc dicit Dominus exercituum, Deus Israël: Ecce ego visitabo regem Babylonis et terram ejus, sicut visitavi regem Assur: <sup>557</sup> <sup>19</sup> et reducam Israël ad habitaculum suum: et pascetur Carmelum et Basan, et in monte Ephraim et Galaad saturabitur anima ejus. <sup>20</sup> In diebus illis, et in tempore illo, ait Dominus, quæretur iniquitas Israël, et non erit, et peccatum Juda, et non inveniatur: quoniam propitius ero eis quos reliquero. <sup>21</sup> Super terram dominantium ascende, et super habitatores ejus visita: dissipa, et interfice quæ post eos sunt, ait Dominus, et fac juxta omnia quæ præcepi tibi. <sup>558</sup> <sup>22</sup> Vox belli in terra, et contritio magna. <sup>23</sup> Quomodo confractus est et contritus malleus universæ terræ? quomodo versa est in desertum Babylon in gentibus? <sup>559</sup> <sup>24</sup> Illaqueavi te, et capta es, Babylon, et nesciebas: inventa es et apprehensa, quoniam Dominum provocasti. <sup>25</sup> Aperuit Dominus thesaurum suum, et protulit vasa iræ suæ, quoniam opus est Domino Deo exercituum, in terra Chaldæorum. <sup>560</sup> <sup>26</sup> Venite ad eam ab extremis finibus; aperite ut

<sup>553</sup> + **50.12 Confusa est mater vestra nimis**, etc. Isaias dicit similia, Et erit Babylon illa gloriosa, in regnis incluta, in superbia Chaldæorum, subvertetur sicut Dominus subvertit Sodomam et Gomorrhæam Isa. 13. Ecce novissima erit, etc. In fine mundi, vel in morte cujusque, omnis gloria et superbia Chaldæorum, et confusio mundi recedet a nobis, et ita omnia subvertentur, sicut subvertit Deus Sodomam et Gomorrhæam, nec ultra voluptatis vel mundi futurus est status.

<sup>554</sup> + **50.15 Sicut fecit, facite ei**. Id est, sicut illa per Nabuchodonosor gentes circumquaque vastavit, ita ei retributionem reddite.

<sup>555</sup> + **50.16 A facie gladii columbæ**. Columba stulta dicitur, quia nutrit pullos alienos; ita Nabuchodonosor alios opprimendo et fovendo. Etiam Nabuchodonosor columbam vocat, non pro simplicitate, sed pro stultitia superbiæ.

<sup>556</sup> + **50.17 Leones ejecerunt**, etc. Teglatphalasar qui partem magnam Judæorum in Assyrios transtulit, et Sennacherib qui decem tribus in montes Medorum traduxit, hi leones appellantur.

<sup>557</sup> + **50.18 Ecce ego visitabo**. RAB. Visitat Dominus regem Babylonis, id est, confusionis, sicut visitavit regem Assur, qui interpretatur, etc, usque ad sed novus populus in nova civitate in perpetuum exsultabit.

<sup>558</sup> + **50.21 Super terram dominantium**. Prædicatoribus Christi præcipitur, ut regnum diaboli studeant evertere: et opera ejus maligna et consilia pessima, ut interficiant omnes peccatores terræ, et disperdant de civitate Domini omnes operantes iniquitatem.

<sup>559</sup> + **50.23 Quomodo confractus**, etc. ORIG. Malleus universæ terræ diabolus est. Sed est qui non curat de malleo universæ terræ, vir scilicet, stans super muros Adamantinos, etc., usque ad legem Dei non subjicitur, neque enim potest, et inventa est Babylon, et comprehensa: quia Domino restitit.

<sup>560</sup> + **50.25 Aperuit Dominus thesaurum**, etc. ID. Alia editio: Aperite apothecas ejus, etc., ut

exeant qui conculcent eam: tollite de via lapides, et redigite in acervos: et interficite eam, nec sit quidquam reliquum. <sup>27</sup> Dissipate universos fortes ejus: descendant in occisionem: vae eis, quia venit dies eorum, tempus visitationis eorum ! <sup>28</sup> Vox fugientium, et eorum qui evaserunt de terra Babylonis, ut annuntient in Sion ultionem Domini Dei nostri, ultionem templi ejus. <sup>561</sup> <sup>29</sup> Annuntiate in Babylonem plurimis, omnibus qui tendunt arcum: consistite adversus eam per gyrum, et nullus evadat: reddite ei secundum opus suum: juxta omnia quae fecit, facite illi, quia contra Dominum erecta est, adversum Sanctum Israël. <sup>30</sup> Idcirco cadent juvenes ejus in plateis ejus, et omnes viri bellatores ejus conticescent in die illa, ait Dominus. <sup>31</sup> Ecce ego ad te, superbe ! dicit Dominus Deus exercituum: quia venit dies tuus, tempus visitationis tuae. <sup>562</sup> <sup>32</sup> Et cadet superbus, et corruet, et non erit qui suscitet eum: et succendam ignem in urbibus ejus, et devorabit omnia in circuitu ejus. <sup>33</sup> Hæc dicit Dominus exercituum: Calumniam sustinent filii Israël, et filii Juda simul: omnes qui ceperunt eos, tenent: nolunt dimittere eos. <sup>34</sup> Redemptor eorum fortis, Dominus exercituum nomen ejus: iudicio defendet causam eorum, ut exterreat terram, et commoveat habitatores Babylonis. <sup>35</sup> Gladius ad Chaldæos, ait Dominus, et ad habitatores Babylonis, et ad principes, et ad sapientes ejus. <sup>36</sup> Gladius ad divinos ejus, qui stulti erunt: gladius ad fortes illius, qui timebunt. <sup>37</sup> Gladius ad equos ejus, et ad currus ejus, et ad omne vulgus quod est in medio ejus: et erunt quasi mulieres: gladius ad thesauros ejus, qui diripientur. <sup>563</sup> <sup>38</sup> Siccitas super aquas ejus erit, et arescent, quia terra sculptilium est, et in portentis gloriantur. <sup>39</sup> Propterea habitabunt dracones cum faunis ficariis, et habitabunt in ea struthiones: et non inhabitabitur ultra usque in sempiternum, nec exstruetur usque ad generationem et generationem. <sup>40</sup> Sicut subvertit Dominus Sodomam et Gomorrhham, et vicinas ejus, ait Dominus, non habitabit ibi vir, et non incolet eam filius hominis. <sup>41</sup> Ecce populus venit ab aquilone, et gens magna, et reges multi consurgent a finibus terræ. <sup>42</sup> Arcum et scutum apprehendent: crudeles sunt, et immisericordes: vox eorum quasi mare sonabit, et super equos ascendent, sicut vir paratus ad prælium contra te, filia Babylon. <sup>43</sup> Auidit rex Babylonis famam eorum, et dissolutæ sunt manus ejus: angustia apprehendit eum, dolor quasi parturientem. <sup>44</sup> Ecce quasi leo ascendet, de superbia Jordanis ad pulchritudinem robustam, quia subito currere faciam eum ad illam. Et quis erit electus, quem præponam ei? quis

ait Apostolus Rom. 6.: Pertulit in multa patientia vasa iræ præparata in perditionem super vasa misericordiæ, etc. Alii ergo vasa misericordiæ, alii vasa iræ, etc., usque ad qui asserit sidera non esse causas eorum quæ fiunt super terram, præcipue eorum quæ Christianis accidunt: præceptum Domini exsequitur.

<sup>561</sup> + **50.28 Vox fugientium.** ORIG. Utinam hæc esset nostra vox, o catechumeni, fugientium de Babylone, et fugientium, etc., usque ad interfice omnes peccatores terræ, qui in te sunt, et omnes Babylonios, ut possis mundatus in Jerusalem transgredi civitatem Dei.

<sup>562</sup> + **50.31 Ecce ego ad te.** RAB. Mystice prænuntiat Antichristo, qui extolletur super omne id quod dicitur Deus, etc., usque ad quia non timuerunt calumniam et captivitatem populo Dei inferre.

<sup>563</sup> + **50.37 Et erunt quasi mulieres.** ID. Imbelles quasi mulieres, per Medos et Persas destruxit eos, etc., usque ad quia synagoga eorum terra sculptilium est, et in portentis, id est falsis figmentis gloriantur.

est enim similis mei? et quis sustinebit me? et quis est iste pastor, qui resistat vultui meo? <sup>564</sup> <sup>45</sup> Propterea audite consilium Domini quod mente concepit adversum Babylonem, et cogitationes ejus quas cogitavit super terram Chaldæorum: nisi detraxerint eos parvuli gregum, nisi dissipatum fuerit cum ipsis habitaculum eorum. <sup>46</sup> A voce captivitatis Babylonis commota est terra, et clamor inter gentes auditus est.]

51 [Hæc dicit Dominus: Ecce ego suscitabo super Babylonem et super habitatores ejus, qui cor suum levaverunt contra me, quasi ventum pestilentem: <sup>2</sup> et mittam in Babylonem ventilatores, et ventilabunt eam et demolientur terram ejus, quoniam venerunt super eam undique in die afflictionis ejus. <sup>3</sup> Non tendat qui tendit arcum suum, et non ascendat loricator: nolite parcere juvenibus ejus; interficite omnem militiam ejus. <sup>4</sup> Et cadent interfecti in terra Chaldæorum, et vulnerati in regionibus ejus. <sup>5</sup> Quoniam non fuit viduatus Israël et Juda a Deo suo, Domino exercituum, terra autem eorum repleta est delicto a Sancto Israël. <sup>565</sup> <sup>6</sup> Fugite de medio Babylonis, et salvet unusquisque animam suam: nolite tacere super iniquitatem ejus, quoniam tempus ultionis est a Domino: vicissitudinem ipse retribuet ei. <sup>566</sup> <sup>7</sup> Calix aureus Babylon in manu Domini, inebrians omnem terram: de vino ejus biberunt gentes, et ideo commotæ sunt. <sup>567</sup> <sup>8</sup> Subito cecidit Babylon, et contrita est. Ululate super eam: tollite resinam ad dolorem ejus, si forte sanetur. <sup>568</sup> <sup>9</sup> Curavimus Babylonem, et non est sanata: derelinquamus eam, et eamus unusquisque in terram suam: quoniam pervenit

<sup>564</sup> + **50.44 Ecce quasi leo.** ID. Videtur significare quod Nabuchodonosor, postquam regnum Judæorum, etc., usque ad et ut demonstret non Cyri potentia, sed Domini judicio factum esse, subditur: Quis enim similis mei?

<sup>565</sup> + **51.5 Quoniam non fuit,** etc. Quia Dominus misit eos in vindictam populi sui, quem non corripiendo castigavit, sed sæviendo contrivit: unde, Væ Assur, virga furoris mei Isa. 10..

<sup>566</sup> + **51.6 Fugite de medio,** etc. Post plagas Babylonis, ad Judæos historice, ad fideles mystice exhortationem convertit, ut fugiant de medio Babylonis, id est mundanæ confusionis. ORIG. Non gradatim scilicet, non pedetentim, sed velociter exite, quicumque confusam habetis animam, etc., usque ad Similiter, quando sunt minora peccata, ministris utitur Deus: quando vero graviora, tunc ad retributionem ipse festinat.

<sup>567</sup> + **51.7 Calix aureus,** etc. Non est semper calix aureus Babylonis vel in manu Domini; cum enim ad vindictam venerit et in manu Domini posita fuerit, efficietur terra quæ facta est in Job. Nec jugiter in manu Domini continetur; sed tunc tantum cum restituet ei Dominus quod meretur. ORIG. Calix aureus. Nabuchodonosor volens decipere homines per calicem Babylonis, non miscuit in vase fictili, etc., usque ad sæpe vidi aureum calicem in pulchro sermonis ornatu, et dogmatum venena considerans, deprehendi calicem Babylonis. Inebrians, etc. ID. Vide omnes homines ebrios; inebriamur ira et tristitia: inebriamur, etc., usque ad ab eo omnes inebriamur quandiu terra sumus. De vino. ID. Sicut in his, qui vinum corporale bibunt supra mensuram, videmus ebrii corporis motum, etc., usque ad biberunt gentes, ideo commotæ sunt.

<sup>568</sup> + **51.8 Subito cecidit.** Significat consummationem mundi subito futuram, quæ non per partes sed repente fiet, sicut Jericho corruens cito vel subito periit. Si autem veneris ad adventum Christi, et videris magnum ejus opus, quomodo subvertit omnia dogmata gentium, ut credentes de erroris jugo eximeret, videbis quia in passione ejus Babylon subito corruit et contrita est; videat quisque Babylonem in pectore suo corruisse. In cujus enim corde non cecidit, Christus ei nondum advenit: Babylon ruit, ædificatur Jerusalem civitas sancta Dei. Ululate. HIER. Quia nulla anima apud Deum insanabilis, consilium dat eis qui possunt, etc., usque ad sed quia noluit curari, satisfaciunt boni medici et dicunt:

usque ad cælos iudicium ejus, et elevatum est usque ad nubes. <sup>569</sup> <sup>10</sup>  
 Protulit Dominus justitias nostras: venite, et narremus in Sion opus Domini  
 Dei nostri. <sup>11</sup> Acuite sagittas, implete pharetras: suscitavit Dominus spiritum  
 regum Medorum: et contra Babylonem mens ejus est ut perdat eam, quoniam  
 ultio Domini est, ultio templi sui. <sup>12</sup> Super muros Babylonis levate signum,  
 augete custodiam, levate custodes, præparate insidias: quia cogitavit  
 Dominus, et fecit quæcumque locutus est contra habitatores Babylonis. <sup>13</sup>  
 Quæ habitas super aquas multas, locuples in thesauris: venit finis tuus,  
 pedalis præcisionis tuæ. <sup>14</sup> Juravit Dominus exercituum per animam suam:  
 Quoniam replebo te hominibus quasi brucho, et super te celeuma cantabitur.  
<sup>15</sup> Qui fecit terram in fortitudine sua, præparavit orbem in sapientia sua, et  
 prudentia sua extendit cælos. <sup>16</sup> Dante eo vocem, multiplicantur aquæ in  
 cælo: qui levat nubes ab extremo terræ, fulgura in pluviam fecit, et produxit  
 ventum de thesauris suis. <sup>570</sup> <sup>17</sup> Stultus factus est omnis homo a scientia;  
 confusus est omnis conflator in sculptili: quia mendax est conflatio eorum,  
 nec est spiritus in eis. <sup>571</sup> <sup>18</sup> Vana sunt opera, et risu digna: in tempore  
 visitationis suæ peribunt. <sup>19</sup> Non sicut hæc, pars Jacob, quia qui fecit omnia  
 ipse est: et Israël sceptrum hæreditatis ejus: Dominus exercituum nomen ejus.  
<sup>20</sup> Collidis tu mihi vasa belli: et ego collidam in te gentes, et disperdam in te  
 regna: <sup>21</sup> et collidam in te equum et equitem ejus: et collidam in te currum  
 et ascensorem ejus: <sup>22</sup> et collidam in te virum et mulierem: et collidam in te  
 senem et puerum: et collidam in te juvenem et virginem: <sup>23</sup> et collidam in te  
 pastorem et gregem ejus: et collidam in te agricolam et jugales ejus: et  
 collidam in te duces et magistratus: <sup>24</sup> et reddam Babyloni, et cunctis  
 habitatoribus Chaldææ, omne malum suum quod fecerunt in Sion, in oculis  
 vestris, ait Dominus. <sup>25</sup> Ecce ego ad te, mons pestifer, ait Dominus, qui  
 corrumpis universam terram: et extendam manum meam super te, et evolvam  
 te de petris, et dabo te in montem combustionis: <sup>572</sup> <sup>26</sup> et non tollent de te  
 lapidem in angulum, et lapidem in fundamenta: sed perditus in æternum eris,  
 ait Dominus. <sup>27</sup> Levate signum in terra, clangite buccina in gentibus,

<sup>569</sup> + **51.9 Curavimus.** ORIG. Vide ne quando angelis præcipiat Deus languenti animæ tuæ medicamina conficere, etc., usque ad profert Deus iudicium suum ad humiliandum quod exaltatum est.

<sup>570</sup> + **51.16 Qui levat nubes,** id est prædicatores et prophetas, qui nos a calore futuri iudicii defendunt imbre eloquii sui, cum futura depromunt. Fulgura. Prædicatores prophetarum fulgura sunt, cum inimicos percutiunt: pluviam, cum devotos a peccatis abluunt, et imbrem salutis infundunt: unde spirituales germinent fructus, et in maturam messem coalescant. Et producit ventos de thesauris. Venti sunt apostoli, quorum prædicatio percurrit mundum tanquam ventus celerrimus: de quibus alibi dicitur: Sagittas suas ardentibus effecit Psal. 7.. Ipsi enim ventis pennæ propter discursus celeritatem tribuuntur; unde: Volavit super pennas ventorum Ibid. 11..

<sup>571</sup> + **51.17 Stultus factus est.** Bene post subversionem Babylonis reprehendit fabricatores idolorum, quia per stultitiam humanæ mentis facta sunt opera vana et risu digna: quia nec spiritus in eis, nec vox, nec ulla efficacia: unde nec se, nec cultores suos in die visitationis liberare possunt. Confusus est. RAB. Demonstrata subversione Babylonis, redit propheta ad auctorem tanti iudicii: quia non est potestas nisi a Deo, qui dominatur in regno hominum, et cui voluerit dabit illud.

<sup>572</sup> + **51.25 Ecce ego,** etc. Mons pestifer, Nabuchodonosor, et regnum Chaldæorum; vel diabolus, qui alibi mons caliginosus, propter tenebras erroris, dicitur. Et dabo te. Ad hunc montem pertinent Judæi, hæretici, blasphemi, et omnes impii, qui perdurant in malitia, nec convertuntur ut fiant lapides vivi in ædificio Dei.

sanctificate super eam gentes, annuntiate contra illam regibus Ararat, Menni, et Ascenez: numerate contra eam Taphsar, adducite equum quasi bruchum aculeatum. <sup>28</sup> Sanctificate contra eam gentes, reges Mediæ, duces ejus, et universos magistratus ejus, cunctamque terram potestatis ejus. <sup>29</sup> Et commovebitur terra et conturbabitur, quia evigilabit contra Babylonem cogitatio Domini, ut ponat terram Babylonis desertam et inhabitabilem. <sup>30</sup> Cessaverunt fortes Babylonis a prælio; habitaverunt in præsidiis: devoratum est robur eorum, et facti sunt quasi mulieres: incensa sunt tabernacula ejus, contriti sunt vectes ejus. <sup>573</sup> <sup>31</sup> Currens obviam currenti veniet, et nuntius obvius nuntianti, ut annuntiet regi Babylonis quia capta est civitas ejus a summo usque ad summum. <sup>32</sup> Et vada præoccupata sunt, et paludes incensæ sunt igni, et viri bellatores conturbati sunt. <sup>33</sup> Quia hæc dicit Dominus exercituum, Deus Israël: Filia Babylonis quasi area, tempus trituræ ejus: adhuc modicum, et veniet tempus messionis ejus. <sup>574</sup> <sup>34</sup> Comedit me, devoravit me Nabuchodonosor rex Babylonis: reddidit me quasi vas inane, absorbit me quasi draco, replevit ventrem suum teneritudine mea, et ejecit me. <sup>35</sup> Iniquitas adversum me et caro mea super Babylonem, dicit habitatio Sion: et sanguis meus super habitatores Chaldææ, dicit Jerusalem. <sup>36</sup> Propterea hæc dicit Dominus: Ecce ego judicabo causam tuam, et ulciscar ultionem tuam: et desertum faciam mare ejus, et siccabo venam ejus. <sup>37</sup> Et erit Babylon in tumulos, habitatio draconum, stupor et sibilus, eo quod non sit habitator. <sup>38</sup> Simul ut leones rugient; excutient comas veluti catuli leonum. <sup>39</sup> In calore eorum ponam potus eorum, et inebriabo eos ut sopiantur, et dormiant somnum sempiternum, et non consurgant, dicit Dominus. <sup>40</sup> Deducam eos quasi agnos ad victimam, et quasi arietes cum hædis. <sup>41</sup> Quomodo capta est Sesach, et comprehensa est inclyta universæ terræ! quomodo facta est in stuporem Babylon inter gentes! <sup>575</sup> <sup>42</sup> Ascendit super Babylonem mare: multitudine fluctuum ejus aperta est. <sup>43</sup> Factæ sunt civitates ejus in stuporem, terra inhabitabilis et deserta, terra in qua nullus habitet, nec transeat per eam filius hominis. <sup>44</sup> Et visitabo super Bel in Babylone, et ejiciam quod absorberat de ore ejus: et non confluent ad eum ultra gentes, siquidem et murus Babylonis corruet. <sup>45</sup> Egredimini de medio ejus, populus meus, ut salvet unusquisque animam suam ab ira furoris Domini, <sup>576</sup> <sup>46</sup> et ne forte mollescat cor vestrum, et timeatis auditum qui audietur in terra: et veniet in anno auditio, et post hunc annum auditio, et

<sup>573</sup> + **51.30 Cessaverunt,** etc. Veniente Cyro et Dario cessavit robur Babylonis et principum ejus.

<sup>574</sup> + **51.33 Filia Babylonis,** etc. Fuit plebs Babylonis, quando per potentiam regni et divitiarum abundantiam triturbabat et conterebat gentes: sed tempus messionis ejus venit cum cogitur recipere quod gessit, de qua ex persona Judaicæ plebis consequenter dicitur: Comedit me et devoravit me Nabuchodonosor, rex Babylonis. Et desertum faciam mare, etc. RAB. Mystice mare hujus sæculi significat turbulentiam, quod Dominus desertum ponit. Faciet enim cessare luxum ejus, et dissipabuntur iniqui, qui confusioni errorum vitiorumque deserviebant.

<sup>575</sup> + **51.41 Quomodo capta est Sesach.** RAB. Sesach, byssus sacci, vel manus sacci interpretatur: sicut Babylon confusio, etc., usque ad ut egrediantur de societate eorum, ne cum illis pereant.

<sup>576</sup> + **51.45 Egredimini de medio ejus.** ID. Qui vult animam suam salvam facere, etc., usque ad sed in meditatione legis ejus et exercitio virtutum strenui.

iniquitas in terra, et dominator super dominatorem. <sup>47</sup> Propterea ecce dies veniunt, et visitabo super sculptilia Babylonis, et omnis terra ejus confundetur, et universi interfecti ejus cadent in medio ejus. <sup>48</sup> Et laudabunt super Babylonem cæli et terra, et omnia quæ in eis sunt: quia ab aquilone venient ei prædones, ait Dominus. <sup>49</sup> Et quomodo fecit Babylon, ut caderent occisi in Israël, sic de Babylone cadent occisi in universa terra. <sup>50</sup> Qui fugistis gladium, venite, nolite stare: recordamini procul Domini, et Jerusalem ascendat super cor vestrum. <sup>51</sup> Confusi sumus, quoniam audivimus opprobrium: operuit ignominia facies nostras, quia venerunt alieni super sanctificationem domus Domini. <sup>52</sup> Propterea ecce dies veniunt, ait Dominus, et visitabo super sculptilia ejus, et in omni terra ejus mugiet vulneratus. <sup>577</sup> <sup>53</sup> Si ascenderit Babylon in cælum, et firmaverit in excelso robor suum, a me venient vastatores ejus, ait Dominus. <sup>54</sup> Vox clamoris de Babylone, et contritio magna de terra Chaldæorum: <sup>55</sup> quoniam vastavit Dominus Babylonem, et perdidit ex ea vocem magnam: et sonabunt fluctus eorum quasi aquæ multæ; dedit sonitum vox eorum: <sup>56</sup> quia venit super eam, id est super Babylonem, prædo, et apprehensi sunt fortes ejus, et emarcuit arcus eorum, quia fortis ultor Dominus reddens retribuet. <sup>57</sup> Et inebriabo principes ejus, et sapientes ejus, et duces ejus, et magistratus ejus, et fortes ejus: et dormient somnum sempiternum, et non expergiscentur, ait Rex (Dominus exercituum nomen ejus). <sup>58</sup> Hæc dicit Dominus exercituum: Murus Babylonis ille latissimus suffossione suffodietur, et portæ ejus excelsæ igni comburentur, et labores populorum ad nihilum, et gentium in ignem erunt, et disperibunt.] <sup>59</sup> Verbum quod præcepit Jeremias propheta Saraïæ filio Nerïæ filii Maasiæ, cum pergeret cum Sedecia rege in Babylonem, in anno quarto regni ejus: Saraias autem erat princeps prophetiæ. <sup>60</sup> Et scripsit Jeremias omne malum quod venturum erat super Babylonem, in libro uno: omnia verba hæc quæ scripta sunt contra Babylonem. <sup>61</sup> Et dixit Jeremias ad Saraïam: Cum veneris in Babylonem, et videris, et legeris omnia verba hæc, <sup>62</sup> dices: Domine, tu locutus es contra locum istum, ut disperderes eum, ne sit qui in eo habitet, ab homine usque ad pecus, et ut sit perpetua solitudo. <sup>63</sup> Cumque compleveris legere librum istum, ligabis ad eum lapidem, et projicies illum in medium Euphraten, <sup>64</sup> et dices: Sic submergetur Babylon, et non consurget a facie afflictionis quam ego adduco super eam, et dissolvetur. Hucusque verba Jeremiæ. <sup>578</sup>

52Filius viginti et unius anni erat Sedecias cum regnare cœpisset, et undecim annis regnavit in Jerusalem. Et nomen matris ejus Amital filia

<sup>577</sup> + **51.52 Propterea**, etc. ID. Enumerat plagas Babylonis superventuras et optimatibus ejus, ducibus et magistratibus, et omni populo, etc., usque ad Exite de illa, populus meus, ne participes sitis delictorum ejus, et de plagis ejus non accipiatis Apoc. 18., etc.

<sup>578</sup> + **51.64 Sic submergetur Babylon**. Nam secundum historiam Babylon in Euphraten mersa est, quamvis in solitudinem redacta. Sed spiritualis Babylonis æternum interitum prædicat, quæ in profundum inferni cum principe diabolo demergetur. Unde Joannes: Sustulit unus angelus fortis lapidem quasi molarem magnum, et misit in mare, dicens: Hoc impetu mittetur Babylon Apoc. 18..

Jeremiæ de Lobna. <sup>579</sup> **2** Et fecit malum in oculis Domini, juxta omnia quæ fecerat Joakim, <sup>3</sup> quoniam furor Domini erat in Jerusalem et in Juda, usquequo projiceret eos a facie sua: et recessit Sedecias a rege Babylonis. <sup>4</sup> Factum est autem in anno nono regni ejus, in mense decimo, decima mensis, venit Nabuchodonosor rex Babylonis, ipse et omnis exercitus ejus, adversus Jerusalem: et obsederunt eam, et ædificaverunt contra eam munitiones in circuitu. <sup>580</sup> **5** Et fuit civitas obsessa usque ad undecimum annum regis Sedeciæ. <sup>6</sup> Mense autem quarto, nona mensis, obtinuit fames civitatem, et non erant alimenta populo terræ. <sup>7</sup> Et dirupta est civitas, et omnes viri bellatores ejus fugerunt, exieruntque de civitate nocte, per viam portæ quæ est inter duos muros, et ducit ad hortum regis, Chaldæis obsidentibus urbem in gyro, et abierunt per viam quæ ducit in eremum. <sup>581</sup> **8** Persecutus est autem Chadæorum exercitus regem, et apprehenderunt Sedeciam in deserto quod est juxta Jericho: et omnis comitatus ejus diffugit ab eo. <sup>582</sup> **9** Cumque comprehendissent regem, adduxerunt eum ad regem Babylonis in Reblatha, quæ est in terra Emath, et locutus est ad eum judicia. <sup>10</sup> Et jugulavit rex Babylonis filios Sedeciæ in oculis ejus, sed et omnes principes Juda occidit in Reblatha. <sup>11</sup> Et oculos Sedeciæ eruit, et vinxit eum compedibus, et adduxit eum rex Babylonis in Babylonem, et posuit eum in domo carceris usque ad diem mortis ejus. <sup>583</sup> **12** In mense autem quinto, decima mensis, ipse est annus nonusdecimus Nabuchodonosor regis Babylonis, venit Nabuzardan princeps militiæ, qui stabat coram rege Babylonis, in Jerusalem, <sup>584</sup> **13** et incendit domum Domini, et domum regis, et omnes domos Jerusalem: et omnem domum magnam igni combussit: <sup>14</sup> et totum murum Jerusalem per circuitum destruxit cunctus exercitus Chaldæorum qui erat cum magistro militiæ. <sup>15</sup> De pauperibus autem populi, et de reliquo vulgo quod remanserat in civitate, et de perfugis qui

<sup>579</sup> + **52.1 Filius viginti.** Historia quæ captum refert Sedeciam, et Jerusalem a Chaldæis vastatam, in libro Regum plene tota continetur.

<sup>580</sup> + **52.4 Factum est autem.** Novenarius minor denario imperfectionem legis significat, etc., usque ad tenebris peccatorum vallati fugiunt, et videntes lupum venientem oves dimittunt.

<sup>581</sup> + **52.7 Per viam portæ.** Latenter arguit inertiam doctorum, qui inter muros duorum Testamentorum constituti, non bellum gerere, sed effugere quærunt, et deliciis magis affluere (quas hortus signat) quam scuto fidei hostibus resistere.

<sup>582</sup> + **52.8 Persecutus est,** etc. RAB. In libro Regum ita legitur: Fugit Sedecias per viam, etc. Malignis spiritibus populum circumdantibus, rector non fugit, etc., usque ad Apprehensum ergo regem duxerunt ad regem Babylonis in Reblatha, etc.

<sup>583</sup> + **52.11 Et adduxit eum rex,** etc. Quia anima in confusione peccatorum vineta compedibus vitiorum, per malignos spiritus ducitur in domum carceris usque ad diem mortis, et in angustia mentis includitur, ut mortis sententiam expectet.

<sup>584</sup> + **52.12 In mense autem quinto,** etc. Congruit ordo temporis cum ratione vindictæ: Mense quinto vastatur civitas, quæ Pentateuchum despexit, decima die mensis, quia decalogo legis contraria fecit, blandiens sibi de securitate pro sanctorum locorum habitatione; unde supra: Nolite confidere, etc. GREG. Dum Scriptura Sedeciæ captivitatem narrat, ordinem captivitatis internæ denuntiat, etc., usque ad Quandoque enim et lumen totius rationis clauditur, quia pravo usu et iniquitatis suæ multitudine gravatur. Venit Nabuzardan, etc. RAB. Justo judicio Dei venit Nabuzardan, princeps exercitus regis Babylonis, super Jerusalem, et succendit, etc., usque ad omnem domum comburit igni, id est, cujusque conscientiam flamma illiciti amoris. De pauperibus, etc. ID. Eos, qui utiles verbo et exemplo esse poterant, etc., usque ad sed spinæ et tribuli vitiorum.

transfugerant ad regem Babylonis, et ceteros de multitudine transtulit Nabuzardan princeps militiae. <sup>16</sup> De pauperibus vero terrae reliquit Nabuzardan princeps militiae vinitores et agricolas. <sup>17</sup> Columnas quoque aereas quae erant in domo Domini, et bases, et mare aeneum quod erat in domo Domini, confregerunt Chaldæi, et tulerunt omne aes eorum in Babylonem, <sup>18</sup> et lebetes, et creagras, et psalteria, et phialas, et mortariola, et omnia vasa aerea quae in ministerio fuerant, tulerunt: <sup>19</sup> et hydrias, et thymiamateria, et urceos, et pelves, et candelabra, et mortaria, et cyathos, quotquot aurea, aurea, et quotquot argentea, argentea, tulit magister militiae: <sup>20</sup> et columnas duas, et mare unum, et vitulos duodecim aereos qui erant sub basibus quas fecerat rex Salomon in domo Domini. Non erat pondus aëris omnium horum vasorum. <sup>585</sup> <sup>21</sup> De columnis autem decem et octo cubiti altitudinis erant in columna una, et funiculus duodecim cubitorum circuibat eam: porro grossitudo ejus quatuor digitorum, et intrinsecus cava erat. <sup>586</sup> <sup>22</sup> Et capitella super utramque aërea: altitudo capitelli unius quinque cubitorum, et retiacula et malogranata super coronam in circuitu, omnia aërea: similiter columnæ secundæ, et malogranata. <sup>23</sup> Et fuerunt malogranata nonaginta sex dependentia: et omnia malogranata centum, retiaculis circumdabantur. <sup>24</sup> Et tulit magister militiae Saraïam sacerdotem primum, et Sophoniam sacerdotem secundum, et tres custodes vestibuli: <sup>587</sup> <sup>25</sup> et de civitate tulit eunuchum unum, qui erat præpositus super viros bellatores: et septem viros de his qui videbant faciem regis, qui inventi sunt in civitate: et scribam principem militum, qui probabat tyrones: et sexaginta viros de populo terræ, qui inventi sunt in medio civitatis. <sup>588</sup> <sup>26</sup> Tulit autem eos Nabuzardan magister militiae, et duxit eos ad regem Babylonis in Reblatha: <sup>589</sup> <sup>27</sup> et percussit eos rex Babylonis, et interfecit eos in Reblatha in terra Emath: et translatus est Juda de terra sua. <sup>590</sup> <sup>28</sup> Iste est populus quem transtulit Nabuchodonosor: in anno septimo, Judæos tria millia et viginti tres: <sup>591</sup> <sup>29</sup>

<sup>585</sup> + **52.20 Columnas quoque,** etc. Per diversa vasa, diversa officia in Ecclesia significantur, quæ maligni spiritus de servitio Dei auferunt, et in usum suum convertunt.

<sup>586</sup> + **52.21 De columnis,** etc. RAB. Quod facturam columnarum describit cum capitellis, et retiaculis atque malis granatis, ostendit, etc., usque ad legat opus nostrum super librum Regum, ubi quid de his sancti Patres senserint, explanatum est.

<sup>587</sup> + **52.24 Et tulit magister,** etc. Etiam fortes in Ecclesia diabolus decipit et captivat; unde: *Esca ejus electæ Habac. 1.,* etc.

<sup>588</sup> + **52.25 De civitate tulit,** etc. Continentes, scilicet, oleum gratiæ et misericordiæ (sicut fatuæ virgines) in pectore suo non habentes, qui frustra super viros bellatores constituuntur, cum arrogantiam vitare non præmeditantur.

<sup>589</sup> + **52.26 Septem viros,** etc. Septiformi Spiritu, scilicet, sanctificatos. Sed quia gratiam perdiderunt, septem spiritibus nequioribus traditi, non regis cœlestis mandata intuantur, sed regis inferni voluntati obsequuntur. Et scribam, etc. Quem liber Regum Sophar, qui interpretatur dissipans vel dividens, et significat eos qui rudes in Ecclesia, quos ad militiam Christi nutrire debuerant, pravis exemplis dissipant, et a cœtu fidelium per errorem sequestrant. Et sexaginta viros, etc. Stultos, scilicet, cooperatores, qui merito vulgi nomine appellantur, qui utilitatem divini consilii discernere et implere neglexerunt.

<sup>590</sup> + **52.27 Et percussit eos rex Babylonis,** etc. Hoc ambit rex Babylonis, ut quos ab Ecclesia evellit, perducat ad interfectionem perpetuæ mortis.

<sup>591</sup> + **52.28 Iste est populus,** etc. RAB. Tertio vastavit Nabuchodonosor Judæam. Primo, cum Joachim, etc., usque ad et retrudit in carcerem inferni, ubi gemunt in perpetuum damnati.



